

歷代史料筆記叢刊

清代史料筆記

樞垣記略



中華書局



清代史料筆記

池北偶談

蕉軒隨錄 續錄

柳弧

蕉廊脞錄

鏡湖自撰年譜

在園雜志

古夫于亭雜錄

漏網喁魚集 海角續編

養吉齋叢錄

分甘餘話

水窗春嘯

閱世編

廣東新語

世載堂雜憶

郎潛紀聞初筆、二筆、三筆

長楚齋隨筆、續筆、三筆、四筆、五筆

郎潛紀聞四筆

海國四說

鄉言解頤 吳下諺聯

不下帶編 巾箱說

巢林筆談

清秘述聞三種

庸閒齋筆記

嘯亭雜錄

異辭錄

樞垣記略

夷氛聞記

歸田瑣記

舊典備徵 安樂康平室隨筆

冷廬雜識

廣陽雜記

浪跡叢談 續談 三談

聽雨叢談

柳南隨筆 續筆

陶廬雜錄

道咸宦海見聞錄

北游錄

履園叢話

永憲錄

簷曝雜記 竹葉亭雜記

揚州畫舫錄

榆巢雜識

清代史料筆記



樞垣記略

〔清〕梁章鉅 朱智撰

中華書局

圖書在版編目(CIP)數據

樞垣記略/(清)梁章鉅,(清)朱智撰;何英芳點校. -
北京:中華書局,1984.10(2008.7重印)
(清代史料筆記叢刊)
ISBN 978-7-101-01743-4

I. 樞… II. ①梁…②朱…③何… III. ①筆記-中國-清代-選集②中國-古代史-史料-清代 IV.
K249.066

中國版本圖書館 CIP 數據核字(2008)第 083996 號

清代史料筆記叢刊

樞垣記略

[清]梁章鉅 朱智撰
何英芳 點校

*

中華書局出版發行

(北京市豐臺區太平橋西里 38 號 100073)

<http://www.zhbc.com.cn>

E-mail:zhbc@zhbc.com.cn

北京瑞古冠中印刷廠印刷

*

850×1168 毫米 1/32·11¼印張·2 插頁·226 千字

1984 年 10 月第 1 版 2008 年 7 月北京第 3 次印刷

印數:16001-19000 冊 定價:26.00 元

ISBN 978-7-101-01743-4

說明

樞垣記略二十八卷，清 梁章鉅編撰，朱智續撰。梁章鉅（一七七五—一八四九），字閔中，又字茵林，號茵鄰，晚號退庵，福建 長樂人。嘉慶 壬戌（一八〇二）進士。歷任軍機處 章京、員外郎、知府、按察使、布政使、巡撫並兼署總督。道光 壬寅（一八四二）因病罷官，閑居家鄉。朱智，字茗笙，浙江 錢塘人。咸豐元年（一八五一）舉人。歷任工部 主事、軍機處 章京、通政使 司副使、大理寺 卿、太僕寺 卿等。光緒五年（一八七九）任兵部 右侍郎，七年（一八八一）病免回錢塘。十六年（一八九〇）因在家鄉辦賑出力，受到嘉獎。

此書主要是有關清代軍機處的記述。軍機處設于雍正年間，光緒朝大清會典辦理軍機處記載其職掌；軍機大臣書諭旨，綜軍國之要以贊上治機務。常日直禁庭以待召見。『清史稿 軍機大臣年表稱：『軍機處名不師古，而絲綸出納，職居密勿。』軍國大計，罔不總攬。自雍、乾後百八十年，威命所寄，不於內閣而於軍機處，蓋隱然執政之府矣。』所以歷來許多人都將軍機處比作宋代的樞密院或漢代的尚書省。這部書名曰樞垣記略就是這原因。但這樣一個重要機構，有關它的緣起源流、規章制度等，清朝官修書中的記載却極少。光緒朝大清會典辦理軍機處

只談其職掌，（乾隆朝大清會典無軍機處一門），清朝通典、清朝續文獻通考雖有軍機處一門，記述又頗爲簡略，大清會典事例、清朝文獻通考、清朝通志則無軍機處一門。樞垣記略一書匯載了有關軍機處的史料，正可補此不足。

梁章鉅於嘉慶二十三年（一八一八）至道光二年（一八二二）曾任軍機處章京，見到了不少有關軍機處的檔案材料，「繙閱舊檔，輒思輯爲一書」，五年以來，手不停披，在方略館宿直時常徹夜爲之，或屢代人夜直爲之，所以樞垣記略中有關軍機處的記載，主要來源於梁章鉅在軍機處任職期間所見到的檔案材料，如訓諭、除授、恩敘類等。這些檔案材料，集中反映了軍機處的性質，前後變化，人員升遷調補，以及獎勵懲罰等制度。這些材料不少不見於清代官書，因而有一定的文獻價值。書中材料第二部分來源，是作者選取的許多詩、文。詩、文作者均在軍機處任過職，如王昶、趙翼等人。這些詩文反映了他們在軍機處供事狀況，大至國家朝政大典，小至他們日常生活。書中材料第三部分是梁章鉅在軍機處政務之暇，勾稽載籍，咨訪故老，證以方略館檔案編纂的題名三卷，及根據自己所見所聞，記錄而成的規制二卷。這是現在保存下來的唯一一份比較完整的資料。材料第四部分來源，是收集了一些史料筆記、叢書、地方志反映軍機處職員生平事跡的有關資料。總之，樞垣記略一書所收取的資料是比較全面的。

梁章鉅在資料的編排上也是下過一番功夫的。所有資料分爲七類，每類按年月日的順序

排列，查閱十分方便。書中許多條目後面均加有按語，與正文相輔相成。

樞垣記略一書有兩種版本，一種是梁章鉅編撰的十六卷本：訓諭一卷、除授二卷、恩敘三卷、規制二卷、題名三卷、詩文三卷、雜記二卷，取材下限以道光二年爲斷。另一種是光緒元年朱智續撰的二十八卷本：訓諭一卷、除授四卷、恩敘七卷、規制二卷、題名五卷、詩文七卷、雜記二卷，取材上接道光二年，下限以光緒元年十二月爲斷。朱智二十八卷本，規制與雜記二類則未做任何補充。其體例雖依梁章鉅本，但也有小的改動。如題名，朱智本增有親王奉旨在軍機大臣上行走一條。而梁章鉅編纂題名時認爲：「親王本非大臣可比，題名中未敢列入。」只是在按語中加以說明。朱智是奉恭親王奕訢之命續編此書的，所以詩文一門選恭親王的詩文過多，其實不少詩文是與軍機處無關的。

這次整理，用的是朱智續撰的二十八卷本。梁本原有朱士彥序一篇，朱本刪去，今據梁本補入。點校中可能有許多錯誤，希請讀者指正。

點校者

我朝以武功定天下，開國之初，經特簡王大臣參贊密勿，羣策羣力，勳業爛然，久已載在史策。雍正年間，始設軍機處，宣綸緯，司出納，而典章益臻明備焉。閩梁芷林中丞充章京時，撰樞垣記略一書，爲門七，爲卷十有六，分類排纂，具有條理，蓋仿宋麟臺故事、元祕書監志等書之例。惟其書成於道光壬午，迄今已五十餘年。制度相沿，因時損益，三朝除擢，既不乏人，恩遇之隆，尤多異數，非及時補纂，何以徵文考獻，垂示來茲。予仰蒙宣宗成皇帝恩勤教誨，講讀三天，於國家掌故，幸得稍窺涯涘。文宗朝，命直樞廷，穆宗嗣統，荷兩宮皇太后、皇上鴻恩，侍直如故。十餘年來，從公昕夕，暇輒披覽載籍，凡朝廷行政用人諸大典，益得資所考鏡。爰屬章京朱智等，詳稽檔冊，依原書體例，重加修輯。其訓諭、除授、恩敘、規制、題名、詩文六門，今增十二卷，合原書共爲二十八卷。謹敘其事於簡端。時光緒二年歲次乙亥十二月穀旦和碩恭親王撰并書。

原序

自雍正庚戌設立軍機處，迨茲九十餘年，綱舉目張，人才輩出，而載稽故實尚缺成書。章鉅於嘉慶戊寅選充章京，倬直餘閒，繙閱舊檔，輒思輯爲一書。隨筆甄綜，日有所積，至道光壬午春季奉命守郡，匆匆出直，此後遂無由再綴一詞。因思五年以來，手不停披，在方略館宿直時常徹夜爲之，或屢代人夜直爲之。以用力之勤，竊喜稍存梗概，因於簿書之隙，重加勘彙，閱月而成編，爲門七，爲卷十有六。卷首恭錄訓諭，次列除授，又次紀恩敘，又次詳規制，又次攷題名，而以詩文及雜記附末。適補章鉅缺人直者爲李侍讀彥章，因以稿本寄之，拾遺正誤。又經年而稿還，時章鉅已爲淮海監司，遂付梓人。書中良限仍以壬午春季爲斷，俟好事者續增焉。軍機處爲我朝政府，攷官制者謂即唐、宋之樞密，因題爲樞垣記略云。道光癸未秋仲，梁章鉅識於清江浦之以政學齋。

序

自雍正年間仿唐、宋樞密院之規設立辦理軍機處，職掌之要，冠於朝端。領之者皆親臣重臣，世稱之爲樞長；而其曹亦極才望之選，非其人不足以當之。嘉慶年間，余同年友梁茵林以儀部郎考選第一，從事其間，有「殿中無雙」之目。余嘗笑語茵林曰：「近人有贈秦小峴侍郎文，以謂『其人而自軍機來者，其衣冠言貌一望可識』。此固有所指而言之，然今之能雪斯言者，亦鮮矣。以君之器識，固萬不出此，然但以旅進旅退，畢乃事乎？今各部院寺監皆有專書以垂於後，軍機之設已百十年，未聞有能纂成一帙者，不可謂非缺典也。君能無意於是乎？」茵林爲余言：「嘗讀四庫全書提要，謂欽定歷代職官表中『其兼官無正員而所掌綦重，如軍機處之類，別有專表，以崇職守』云云，今武英殿所刊布此書，編繙之，則實無專表，不知何故。惟新修大清會典中有軍機一門，但詳規制，而於緣起源流亦未之及，故成書綦難。」余曰：「惟其如是，此纂輯之所以愈不可緩也。」無何而茵林換外職，出樞直，蹤跡濶疎者數年。今秋茵林奉旨起家北行，舟過寶應，則出示所纂樞垣記略十六卷，粲然成編，並索余一言。余窮日夜讀之，既擴我見聞，且喜茵林之敏於撰述，而復義例詳明，摭拾周備，闕前修所未開之境，成內直所必需之書，釐然爲掌

故所存，隱然爲法戒所繫。乃知蒞林之爲此書，是真能以人重官，而迥異於以官重人者也。聞蒞林此編最難著手者，爲滿漢大臣題名一卷、滿章京題名一卷、漢章京題名一卷，皆前無所承而創爲之。蓋勾稽載籍，諮訪故老，而證以方略館冊檔，孳孳矻矻，多得之夜直官燭之餘，可謂勤且篤矣。近吳伯新太常所刊軍機題名錄即用蒞林之稿本，第不知何以但錄章京而遺樞長。又蒞林之書以道光二年春出直而止，近聞有續輯二年夏以後題名之舉，惜此外各門尚未聞有議續編者，殆將俟蒞林重入春明爲之料理乎？余固拭目俟之矣。遂書以爲之序云。

道光十五年八月年愚弟朱士彥撰

目錄

卷之一	訓諭	一
卷之二	除授一 軍機大臣	一六
卷之三	除授二 軍機大臣	二六
卷之四	除授三 軍機章京	三五
卷之五	除授四 軍機章京	四四
卷之六	恩敍一	五二
卷之七	恩敍二	六〇
卷之八	恩敍三	七二
卷之九	恩敍四	八三
卷之十	恩敍五	九四
卷之十一	恩敍六	一〇六
卷之十二	恩敍七	一一七
卷之十三	規制一	一二九

卷之十四	規制二	一四三
卷之十五	題名一 親王奉旨 在軍機大臣上行走 滿洲軍機大臣 漢軍機大臣	一五七
卷之十六	題名二 滿洲軍機章京	一六六
卷之十七	題名三 滿洲軍機章京	一八七
卷之十八	題名四 漢軍機章京	一九六
卷之十九	題名五 漢軍機章京	二二〇
卷之二十	詩文一	二三五
卷之二十一	詩文二	二五四
卷之二十二	詩文三	二六九
卷之二十三	詩文四	二八〇
卷之二十四	詩文五	二八六
卷之二十五	詩文六	二九六
卷之二十六	詩文七	三〇七
卷之二十七	雜記一	三二五
卷之二十八	雜記二	三三七

樞垣記略卷之一

訓諭

乾隆十一年四月十二日諭：軍機處係機要重地，凡事俱應慎密，不容宣洩。今乃有在京、直隸、江南、浙江等處提塘，串通軍機處寫字之人，將不發抄之事件抄寄該省督撫者。朕看此情節，在提塘等微末之人，不過以此博督撫之歡心；在督撫亦樂其不時私遞，得聞京師信息。此皆淺陋之見，且非始於今日。朕已將督撫等從寬免其查究，但那蘇圖、尹繼善、陳大受、魏定國、常安等，俱爲封疆大臣，似此行私報密等事，甚不光明。若有見聞，即當據實查辦，何得身蹈其事，不能自檢，尚得謂之正己率屬乎？著密行傳諭申飭之。

十二年二月初六日諭：軍機處係機密之地，所交密議章奏，本無宣洩。其應交該部密議者，嗣後俱交軍機處存記檔案，交發部議。其奏事處所奉密議事件，著亦交軍機處記檔轉發。

五月二十二日諭：朕令軍機大臣等寄信傳諭之旨，有因地方應辦事務，經朕指示及傳諭詢問者，亦有令該督撫等商酌辦理者，既未明發諭旨，理宜慎密。嗣後諸臣回奏摺內，如不交部議者，仍聽其引入原旨；若係應交部議之案，概不必將寄信之處敘入，另行具摺聲明，至具題本

章，尤爲不可。俟伊等奏摺之便，傳諭知之。

十三年十一月 日諭：經略大學士起身以後，軍機處所辦事件，多不能愜意。即如今日議覆山東請運奉天米石一摺，阿蘭泰近日曾以「該處收成止有七分，未便大弛海禁，致妨本地民食」具奏，而軍機大臣竟無一人記憶者，經朕指示，始查檢入議。其餘脫漏之處，一一須朕訓諭，雖經改正，而朕心則已過勞，較之經略大學士在京時，諸事周詳妥協，不致煩費朕心者，實已大相徑庭矣。此等處訥親向日尚能辦理得宜。由是觀之，向日朕加恩任用，自不爲過。惟因貽誤軍國重務，大負朕恩，不得不重治其罪，亦出之大公至正。但從前當大學士鄂爾泰在之時，朕培養陶成一訥親，訥親在之時，朕培養陶成一經略大學士傅恆。皆幾經教導，幾經歷練，而後及此，人材難得，固非一朝一夕所能造就。今經略大學士前往軍營，朕實向大學士一人是問，並未豫留此心於大臣中培養陶成，以爲接辦之人。是以辦理諸務，數日之間，已不能不時繫朕念。軍旅固關緊要，第金川不過一隅，視機務孰爲重大？且朕躬豈宜過勞？經略大學士到彼，蕩平勒烏圍、刮耳崖，即應遵照前旨，飛報大捷。其莎羅奔、狼卡擒獲獻俘固善，縱或免脫潛逃，祇須留兵搜捕，一切應辦事宜，或交傅爾丹，或交岳鍾琪，若策楞到彼，或交策楞、班第等。經略大學士酌量分布妥協，於奏捷後四五日內，即當馳赴闕廷，贊襄左右，不必待奏到奉有諭旨，方行旋師矣。此旨必應遵。

十四年十一月十三日諭：朕許大學士張廷玉原官致仕，且允配享太廟之請。乃張廷玉具摺謝恩，詞稱泥首闕廷，並不親至，第令伊子張若澄代奏，因命軍機大臣傳寫諭旨，令其明白回奏。而今日黎明，張廷玉即來內廷，此必軍機處泄漏消息之故。不然，今日既可來，何以昨日不來？此不待問而可知者矣。昨朕命寫諭旨時，大學士傅恆及汪由敦二人承旨，而汪由敦免冠叩首，奏稱「張廷玉蒙聖恩曲加體恤，終始矜全，若明發諭旨，則張廷玉罪將無可道」。此已見師生捨身相爲之私情。及觀今日張廷玉之早來，則其情顯然。軍機重地，顧師生而不顧公義，身爲大臣，豈應出此？

十五年五月十四日諭：向來軍機處交出公文，簽發馬上飛遞者，定限日行三百里，遇有最緊要事件，始以日行六百里字樣加簽。公文緩急既有不同，則遞送遲延，處分亦當分別差等。乃吏部議處此等案件，不按三百里、六百里之分，但查核時刻逾違，俱照扣關公文例議以降一級調用，比例殊未允協，現干例議積案甚多。著量加區別，除沉匿軍情機密事件仍照驛站舊例議處外，其軍機交出尋常緊要事件限日行六百里者，儘有逾限，准照扣關例議處；若係軍機處常行事件限馬上飛遞日行三百里者，逾限之處，照公文遲延例，著爲令。再軍機處發遞公文，原係酌量事件以定期期，嗣後非遇緊急最要事件，亦不得以日行六百里簽發。

二十三年十二月 日諭：袁日修與鹽商牛兆泰係屬姻親，寄書可也。而使鹽道之婿持書寄

鹽商，雖無囑託之言，明有囑託之意。軍機行走之人，尤當以慎密防閑爲要，此何爲者耶？裘曰修不必在軍機處行走。

二十六年三月初七日旨：吏部議睦朝棟照溺職例革職一本，所以留中不發者，朕意以爲若總裁大員中查無應行迴避之人，則該御史所奏，不過博一時虛譽，其罪尚屬可原。今據知貢舉熊學鵬查奏，應行迴避士子有總裁劉統勳之胞弟、胞姪二人，于敏中之堂姪一人。劉統勳等既係軍機大臣，而睦朝棟現係軍機處行走之員，此次劉統勳、于敏中二人不令隨駕，外間已揣其預典試事，而軍機處之人固不待言矣。況朕向劉統勳等曾面論及之，睦朝棟豈有不知之理？則其所奏，顯屬迎合上官，此風斷不可長。前明師生堂屬黨援門戶之弊，往往假公濟私，害及朝政，最爲言路惡習。我皇考十三年以來，大加整頓，風紀肅清。朕臨御二十有六年，於臺垣章疏，苟有一二可採者，未嘗不見之施行，若其意有所屬，瞻顧徇私者，亦斷難逃洞鑒。睦朝棟何人，而敢以此等伎倆巧爲嘗試乎？此在諸科道尚屬不可，況該御史之在軍機行走者乎？今歲恩科會試，已屬格外曠典，臣子得與文衡，已可云寵榮逾分，而更欲爲宗戚侍中，是於不知足之中又加甚焉。號稱讀書者宜如是乎？於政體、官方、士習，均有關係，睦朝棟革職不足蔽其辜，著鞏交刑部治罪。

二十八年九月初十日諭：御史戈濤奏稱「所奏事件，未經領到原摺，而刑部業已紛傳，必係

刑部司員之在軍機者，預爲透漏」一摺，當交軍機大臣查奏。今據軍機大臣查明「戈濤條陳」一摺，俱係發交刑部辦理事件，即於本日傳鈔，隨本報發回。硃批原摺向應存貯軍機處，年底彙繳，例不給還」等語。此事原屬照例辦理，尚無透漏之處，戈濤以未接到硃批原摺，故爲此奏。但軍機司員，向於本部堂官及相好戚友中預通消息，亦不能保其必無，從前即曾有因此獲罪者。該司員等益當痛加儆戒，不得因此次查無情弊，遂罔知顧忌。設將來果有徇私洩漏等事，一經查出，必嚴加懲治，決不稍爲寬貸也。

三十年閏二月二十六日諭：向來軍機大臣寄信諭旨，該督等覆奏時，止稱接准廷寄，並不書寫承旨銜名，於體制殊未允協。嗣後各省督撫等，接准軍機大臣遵旨寄信傳諭有應具摺覆奏者，俱著將寄信內所開承旨人名一一開寫，不得但稱廷寄及軍機處字樣。可於奏事之便，傳諭各督撫，一體通傳應行奏事之各該衙門遵照。

三十一年四月十一日諭：前據常鈞條奏，外省奏摺交兵部鈐用印信，以昭慎重，經部議覆准行。但印信存貯部署，往返鈐用，日費馬力，殊屬煩瑣。且交發奏摺，即係原齎差弁祇領，向來亦未聞有滋弊之事。嗣後該部預將印花存貯軍機處備用，所有臨時鈐印之處，不必行。

四十一年九月十八日諭：戶部堂官在內廷行走者多，該部事務殷繁，不可無人坐辦。袁守侗雖在軍機處行走，著每日到署專辦戶部事務，遇朕至圓明園之日，不必隨往。其豐昇額、福康

安、梁國治、和珅並著每日輪流一人到署辦事。

四十九年 月 日諭：各省督撫年終彙奏事件，向由軍機處將有無遲延遺漏查明具奏，原以專責成而重考覈。但該督撫等奏報發抄後，各部院不過照常彙題，存案備查，而軍機處名爲彙總，實不過循例奏明，仍屬具文，於覈實辦公之道，均屬未協。即如各省拏獲命盜各案已未結數目，及盜竊案已未緝獲，記功記過各款，該督撫等均於年終彙奏一次。此等案件，如果事隔數十年，實在無從督緝，竟應查明酌與開除，以清塵案，其餘未結未獲各款，自應分別定以處分，庶承緝之員，自顧考成，俱知上緊辦理，依限完結，而督撫等亦不能以一奏了事。嗣後各督撫年終彙奏各項，均著各部院衙門詳悉查覈，彙送軍機處覆加考覈，於三月間彙齊辦理具奏。如各該部有疏忽遺漏，軍機處又不能詳加覈正，經朕看出，惟軍機大臣是問。

五十六年十月二十四日諭：國初以來，設立議政王大臣，彼時因有議政處，是以特派王大臣承充辦理。自雍正年間設立軍機處之後，皆係軍機大臣每日召對，承旨遵辦。而滿洲大學士、尚書向例俱兼虛銜，並無應辦之事，殊屬有名無實。朕向來辦事祇崇實政，所有議政空銜，著不必兼充，嗣後該部亦毋庸奏請。

五十九年二月二十六日諭：昨據福康安等查審「吉林辦理參務，虧缺庫項，勒派民戶」一案，分別定擬具奏。福康安與恆秀誼屬姑表弟兄，有心徇庇，從寬定擬，希圖含混了事。經朕看出，詳

細指斥，即令軍機大臣繕寫飭諭，而軍機大臣亦復意存瞻顧，遷延觀望，並未即日擬旨進呈。現距歸政之期尚有二年，朕一日臨御，即一日倍加兢業，豈容大臣顧預從事？阿桂、和珅、王杰、福長安、董誥俱著交部議處。

嘉慶四年正月初八日諭：各部院衙門文武大臣，各直省督撫藩臬，凡有奏事之責者，及軍營帶兵大臣等嗣後陳奏事件，俱應直達朕前，不許另有副封關會軍機處，各部院文武大臣，亦不得將所奏之事，預先告知軍機大臣。即如各部院衙門奏章呈遞後，朕可即行召見，面爲商酌，各交該衙門辦理，不關軍機大臣指示也，何得豫行宣露，致啓通同扶飾之弊？即將此通諭知之。

十九日諭：從前和珅意圖專擅，用印文傳知各省抄送摺稿，因此帶有投遞軍機處另封事件，業經降旨飭禁，並隨摺批諭。今和珅業經伏法，所有隨帶文書，當永遠停止。儻經此番飭禁之後，尚有仍蹈前轍者，必當重治其罪，決不姑貸。

七年二月二十四日諭：御史王寧焯奏「請重軍機大臣責成，以肅諭旨」一摺，自雍正年間初設軍機處，於大學士，各部院尚書，侍郎中遴派數人在內行走，本爲籌辦軍務。而各直省寄信事件，以及在京各衙門遇有應降諭旨，勢不能紛紛令羣工承繕，是以俱由軍機處擬寫交發，令事有統彙，以昭畫一。是軍機大臣承旨書諭，並非將臣工翊贊之職，盡責之此數人也。內外滿、漢大

臣，俱經朕特加擢用，誰不宜盡心匡弼？必責之軍機大臣，則其權過重，若承奉諭旨之事，軍機大臣得以力阻不行，則外人又將以攬權指摘矣。況我朝列聖相承，乾綱獨攬，皇考高宗純皇帝臨御六十年，於一切綸音宣布，無非斷自宸衷，從不令臣下阻撓國是。即朕親政以來，辦理庶務，悉遵皇考遺訓，雖虛懷延納，博采羣言，而至用人行政，令出惟行，大權從無旁落。朕初閱該御史所奏，以爲必有指陳時務臚舉切要者，及詳閱摺內，乃專指上年停止前往盛京一節。謁陵展敬，爲登極後應行大典，朕彼時明降諭旨，於六年秋孟啟行，事關體制，豈臣下所可阻止？嗣因御史沈琨、張鵬展等以軍務未竣，懇請展期，交王大臣等會同妥議，以爲應如所請，是以降旨暫行停止。即上年春間，曾有旨巡幸木蘭，後因夏間雨水過多，亦停止秋獮。此皆朕臨期酌度，豈軍機大臣能於春間即逆料夏雨情形，預爲阻止耶？至該御史稱「鑾輅所經，地方官早爲備辦，永平一帶糜費已多，不能開銷」等語。謁陵諭旨，係五年十一月初二日頒發，至六年正月二十日降旨停止，爲時無幾，且距七月啟鑾之期又遠，地方官有何預辦不能開銷之處乎？至該御史所奏「前諭已發，復行改擬，不敬於先，遂致不信於後」等語。試思前史所稱爲詔令不信者，如恩旨已降，或應行蠲貸而實未均霑，或業已豁除而仍行科斂，我國家曾有此等事乎？至於明發諭旨，有經朕再四思維尚有未盡周妥之處，或臣工陳奏未便因而復行停止者，此正欲事臻盡善，故不厭反覆精詳。若必迴護前旨，固執己見，勢將文過飾非，蹈言莫予違之習，豈古帝王從善如

轉圜之道乎？又所稱「軍機大臣昧於大體，不當僅於語句筆畫小誤，始行自請議處」，所論亦屬非是。謄寫諭旨雖係章京之責，但軍機大臣於進呈事件，理當致謹校核，既有錯誤，自應請議，況朕亦時加寬免，何嘗僅於細務加之責備耶？王寧焯所奏謬妄，原摺著擲還。

六月二十四日諭：內閣本絲綸重地，大學士均應常川到閣，閱看本章。其中有在軍機處行走者，每年春夏在圓明園之日居多，散直後，勢難再令赴閣視事。至在城之日，偶值樞務稍簡，朕仍令其赴衙門辦事，即應閣、部兼到。若不在內廷行走之大學士，則票擬綸音，是其專責，豈可稍涉閒曠？是以保寧到京後，雖兼領侍衛內大臣，朕不令其在園居住，以便赴閣辦公，無曠職守。嗣後在軍機處行走之大學士，值朕進城諭令到衙門辦事時，著先赴內閣，再赴所管之部院衙門。其不在內廷行走之大學士，俱著常川到閣閱本，以重綸扉而符體制。

九年七月十八日諭：吳熊光自簡用湖廣總督以來，朕即聞其接待屬員過於嚴峻，批稟事件，往往措詞過當。因其在軍機章京年久，擬寫諭旨，於訓飭之語習以爲常，率意書寫。文稟批答，自有一定體制，即使屬員偶有過失，亦應明白開導，何至動遭呵斥，竟與擬寫諭旨相似。亦非體制。若云該督曾在軍機行走，則軍機章京中如勒保、方維甸等，亦俱行走有年，簡放外任，並未聞伊等于屬員批稟有似吳熊光措詞過當之處。嗣後該督務須平心辦事，不可似前躁妄，用副委任。

又諭：昨日召見尚書德瑛，詢以留京王大臣遇有陳奏事件何人繕辦，據稱俱傾在京軍機章京辦理，殊屬非是。從前軍機大臣中有派令留京者，是以該章京隨同辦事。近年來留京王大臣並無軍機，然俱有該管衙門，其屬員中豈無能辦章奏之人，何必交軍機章京代為辦理，將應辦公事轉似煩情耶？且與留京王大臣浹洽日久，恐不免有探聽漏洩情事，朕在藩邸時，即確有聞見。嗣後留京王大臣著於宗人府及所管之部，各派明白妥幹司員二三人承辦諸務，以符體制。

十年五月十九日諭：御史何元煊奏「請酌改軍機處名目」一摺，據稱「軍機處承辦一切事務，與兵部之專司戎政者不同，現在軍務久經告歲，似應更改名目，以紀偃武之隆」等語。軍機處名目，自雍正年間創設以來，沿用已久，一切承旨書諭及辦理各件，皆關係機要，此與前代所稱平章軍國重事相仿，並非專指運籌決勝而言。目今三省邪匪久已肅清，大功告歲，薄海內外，共慶昇平，又何必改易「軍機」二字，始為偃武，即如兵部專司戎政，自周官分職以來，相沿至今。兵可百年不用，不可一日不備。現在內外旗營，均有定制，新疆西北兩路，皆號軍營，若如該御史所請，勢必諱兵不言，豈國家承平日久，并古大司馬之職亦可不設乎？何元煊率請改易舊章，而不顧其言之紕繆，所奏斷不可行。原摺著擲還。

六月二十九日諭：昨日英和於已刻忽呈遞奏片密封，朕親手拆看，據稱「本日劉權之、戴衢亨均奉派進城驗看月官，懇請晚膳後與慶桂、董誥一同召見，有面奏事件」等語。旋經召令伊三

人進見，據英和奏稱「劉權之平日聲名本屬平常。此次因軍機處行走章京內，有中書、筆帖式等官，屆應行保奏之期，先經慶桂等會商，將內閣典籍齊嘉紹、中書蔡炯、刑部筆帖式武爾通阿三員奏陞主事。劉權之以內閣中書袁煦亦應列入，並稱袁煦係伊房師紀昀之婿，紀昀在日曾經託過。經慶桂等阻止，劉權之遂不肯列銜具奏」等語。軍機章京等趨直當差，屆應行保奏之時，軍機大臣等自當查照成案，核明章京等行走年月，及平日當差之勤慎與否，和衷商推，秉公保奏。今劉權之以中書袁煦爲伊師紀昀之婿，聲言欲一併列入，實屬瞻徇，本不成話。昨詢之慶桂、董誥，均稱劉權之實有此語，今日面詢劉權之，亦據自認屬實，是明係瞻徇私情，罔顧公議矣，其錯謬固不待言。彼時英和既以劉權之之言爲非，即應向慶桂、董誥、戴衢亨三人會同商議據實參奏，如慶桂等或有瞻顧劉權之之處，即當一併參劾。乃乘劉權之、戴衢亨進城之際，輒行奏請見面，雖稱請與慶桂、董誥一同召見，其實慶桂、董誥二人並未知有此密奏，則與獨請自對何異？伊面奏云：「此事現已停止，懇求不必詢問劉權之，尋事退出軍機。」此言實屬狂妄膽大。從前和珅雖惡阿桂，尚不敢公然出此言，今英和後生新進，學習辦事之人，竟敢出此悖理之言，若不及早懲治，恐將來又出大案矣。此事著派保寧、朱珪、祿康、恭阿拉、明亮、鄒炳泰、英善、王懿修會同查辦，將劉權之嚴加議處，英和議處，並將此次軍機處現擬保奏齊嘉紹等，是否與例案相符，一併查明具奏。劉權之著先革去太子少保，英和亦著革去太子少保，拔去花翎，退出南書房，伊

二人俱不必在軍機處行走，聽候議處。中書袁煦亦著退出軍機處。

十一年 月 日諭：軍機處司員，自雍正年間定制以來，均係以本衙門額缺承辦軍機處事務，其陞遷保舉，悉由本衙門堂官註考，相沿已久。若以計典獨歸之軍機處，更定官制，事多格礙。惟軍機司員內，其辦事勤慎又能兼部務者，自當列之上考，其祇在軍機處行走而於部務未能諳習者，本衙門堂官不得意存遷就，濫行保薦。軍機大臣尤不得授意各部院堂官扶同薦舉，以昭公慎。

十四年十二月初六日諭：戶部議奏摺內將軍機處擡寫，殊屬不合。軍機處體制與部院衙門無異，向來奏摺內從無擡寫之例，此時軍機大臣奉公守法，和衷辦事，何用汝輩諂諛尊奉。鄂雲布何不曉事若此，著飭行。

十八年七月初十日諭：御史傅棠奏「考試軍機章京，請欽派大臣在舉場公所，將試卷彌封，以昭慎重」一摺。軍機章京入直樞廷，先取人品端莊，參以文理清順，字畫工楷，方為無媿厥職。若如該御史所奏，糊名考試，則但能觀其文字，其人之才品，何由識別？惟在軍機大臣秉公甄別，期於得人，自足以昭慎重。如充補後，該章京有舞弊營私劣跡，軍機大臣均難辭考選不慎之咎。至於各衙門保送人數，亦應定以限制，員缺至多者不得過八員，如逾額，即著軍機大臣參奏。此次內閣保至三十二員，未免太濫，著駁回，令該衙門大加刪減，不得過七八員。出具切實

考語，另行保送，由軍機處考試揀選，帶領引見。嗣後軍機章京如有因濫保獲咎者，其本衙門原保之堂官亦著一併議處。

二十四年十月初四日諭：昨據吳璥等奏，將馬營壩漫工勘定壩基及引沁入黃分繪二圖呈覽，當即發下，本日向軍機處查取，交那彥寶閱看。據軍機大臣覆奏，係章京程同文攜回寓所，當降旨令程同文革職。旋據自行查明，程同文並未攜去，係值宿章京何增元、強逢泰因聞程同文有欲繪南北岸河圖之言，誤行回稟。原圖奏到時，戴均元曾囑章京張允垂令將大壩口門及引河頭等處丈尺照錄一紙，以備查考。張允垂誤行會意，輒攜回寓所，照樣摹繪，此事與程同文無涉。著即將張允垂革職，以示懲儆。嗣後滿、漢章京辦理公事，總當在官言官，毋得攜回私寓，致干嚴懲。戴均元雖曾告知章京照錄口門丈尺，並未令其將圖攜回，著改爲交部議處。托津、盧蔭溥、文孚失於查察，著改爲交部察議。值宿章京何增元等，未經詳查，率以程同文攜回寓所之言回堂復奏，亦有不合。何增元、強逢泰俱著交部察議。

咸豐二年三月十六日諭：昨因賽尚阿出差，特旨將內閣侍讀穆蔭開缺，以五品京堂候補。在軍機大臣上學習行走。穆蔭係軍機章京，行走多年，尚稱熟習，故令隨同學習，藉資造就。茲據給事中蘇廷魁奏稱「超擢太驟，易啓倖進之門」，已不成話，併稱：「侯賽尚阿回京後，仍令該員回

章京當差。」黜陟自下，巧爲嘗試，尤屬亂道。該給事中入甚端方，此奏似不出其手，但所言尚無大謬，姑置不問。夫軍機大臣本爲要任，滿、漢兼用，斷不應稍有區別，朕用人行政，一秉大公，從無分於滿、漢。穆蔭人亦中材，朕本欲添派滿洲軍機大臣，惟內斷於心，親加選擇，黜陟大柄，朕自持之，非諸臣所可輕議也。用是明白宣示，使知朕意。

十一年十月十五日諭：御史徐啓文奏「樞機重地，責無旁貸，請責成議政王、軍機大臣實力匡勸，毋避小嫌。中外臣工均應拾遺補闕，隨時陳奏」等語。朕奉母后皇太后、聖母皇太后懿旨，載垣等干預政柄，皆由匡贊諸臣遇事唯諾，實階之厲。恭親王以朕叔膺議政王重任，桂良等亦皆以先朝舊臣，簡授要職，自無不力矯唯阿之習。惟以責任過重，如該御史所奏，恐以敬畏太甚，或近趨承，不爲無見。值此四方多難，惟賴親貴重臣弼予郅治。該王大臣等仰蒙兩宮皇太后特旨簡任，務各協力同心，勉圖康濟，毋避任事之小嫌，共矢公忠之大節。至中外臣工於時事闕失，均宜直言無隱，即議政王、軍機大臣等贊理庶務，如未能盡協機宜，亦准其據實指陳，毋稍瞻顧，以期力挽頹風，共臻上理。

同治元年二月二十三日諭：御史佛爾國春奏「軍機章京與外官交結，私通信息，請嚴定罪名，以除積習」一摺。軍機處地屬樞機，理宜慎密。該章京等每日繕寫諭旨，登記檔冊等件，均

關緊要，宜如何小心謹祕，以重職守。查乾隆年間，因御史戈濤奏軍機司員有豫爲透漏情事，查明後恭奉諭旨，嚴加訓誡。嗣有軍機章京徐步雲於查辦揚州提引一事，豫先通信，復奉旨「徐步雲與盧見曾認爲師生，此等緊要事件，敢於私通信息，致盧見曾豫行寄頓，甚屬可惡。著發往伊犁效力贖罪」等因。聖訓昭垂，允宜法守。第恐日久玩生，該章京等仍蹈陋習，多與外官交結，遇事先期通信，俾得早爲彌縫，甚至賄賂交通，毫無忌憚，實堪痛恨。上年冬間即經議政王、軍機大臣申明堂諭，以爲儆戒，現當整飭官方之際，樞密重地，尤宜嚴肅。用是特行申諭，嗣後該章京等務各廉隅自飭，勤慎趨公，毋得復蹈從前積弊。儻有不知自愛，於逐日辦理各事件有與外人交通透漏情事，一經發覺，或被人參奏得實，必從重懲辦。近侍官員，漏泄機密等事，專條具在，例意綦嚴，該御史所請再行嚴定罪名之處，應毋庸議。仍著議政王、軍機大臣隨時嚴密稽查，以挽頽風而除積習，務俾各該章京等懷然於寬典之不可倖邀也。

樞垣記略卷之二

除授一 軍機大臣

雍正十年二月 日，命大學士鄂爾泰、張廷玉辦理軍機事務。

十一年 月 日，命鑾儀使訥親在軍機處行走。

又命理藩院侍郎班第在軍機處行走。

十三年十月十六日旨：徐本著在軍機處行走。

謹按：徐本時爲刑部尚書、協辦大學士。

乾隆二年十一月二十八日諭：昨莊親王等奏辭總理事務，情詞懇切，朕勉從所請。但目前西北兩路軍務尚未全竣，且朕日理萬幾，亦間有特旨交出之事，仍須就近承辦。皇考當日原派有辦理軍機大臣，今仍著大學士鄂爾泰、張廷玉，公訥親，尚書海望，侍郎納延泰、班第辦理。

六年正月十九日旨：班第著仍在軍機處行走。

謹按：班第於乾隆三年以理藩院侍郎出爲湖廣總督，於五年丁母憂回京。

十年六月初九日旨：戶部侍郎傅恆著在軍機處行走。

十月二十日旨：刑部尚書汪由敦著在軍機處行走。

十一月十八日旨：高斌、蔣溥俱著在軍機處行走。海望精力亦不如前，且所辦事務繁多，不必兼軍機處。

又命參贊大臣馬蘭泰來京，在辦理軍機處行走。

十三年四月 日旨：戶部事務繁多，尚書蔣溥著專辦部務，不必兼軍機處行走。

九月二十八日旨：舒赫德著暫在軍機處行走。

謹按：舒赫德時爲戶部侍郎，鑲紅旗漢軍都統，是年冬即出參贊四川軍務。

三十日旨：大學士來保著在軍機處行走。

十月 日，命吏部尚書協辦大學士陳大受在軍機處行走。

十一月十九日旨：協辦大學士尚書尹繼善著在軍機處行走。

十五年正月十八日旨：工部侍郎劉綸著在軍機處行走。

四月初八日旨：刑部侍郎兆惠著在軍機處行走。

十一月十七日旨：侍郎兆惠現有出差辦理事件，舒赫德著仍在軍機處行走。

十七年九月二十四日旨：都統銜班第仍著在軍機處行走。

十一月初七日旨：刑部尚書劉統勳著在軍機處行走。

十九年五月 日旨：雅爾哈善著仍署戶部侍郎，在軍機處行走。

二十一年四月十七日旨：大學士傅恆派往軍營，軍機大臣較少，著尚書阿里袞暫在軍機處行走。

謹按：阿里袞於二十年五月授戶部尚書，踰年五月以領隊大臣出赴西路軍營。

二十六日旨：侍郎雅爾哈善、劉綸俱著回部辦事，不必兼軍機處行走。侍郎裘曰修著在軍機處行走。

八月初七日旨：工部侍郎夢麟著在軍機處學習行走。

二十三年正月二十五日旨：吏部侍郎三泰、戶部侍郎劉綸俱著在軍機處行走。

十二月 日旨：裘曰修不必在軍機處行走。

二十五年二月二十七日旨：富德著在軍機處行走。

謹按：富德時由金川軍營凱旋，旋補理藩院尚書。

八月二十八日旨：戶部侍郎于敏中著在軍機處行走。

二十八年正月十四日旨：阿桂著在軍機處行走。

三十三年二月 日，命兵部尚書福隆安在軍機處行走。

三十五年閏五月初九日諭：現在軍機處行走之滿洲大臣人少，因思溫福前在軍機章京上行，走有年，尚爲熟練曉事，著傳諭溫福奉到諭旨，即馳驛速行來京。

謹按：溫福時爲福建巡撫。

十五日旨：溫福著來京補授吏部侍郎，在軍機處行走。

謹按：溫福是年即授理藩院尚書署工部尚書，踰年以副將軍統兵勦金川。

八月十三日旨：署兵部尚書豐盛額著在軍機處學習行走。

三十六年四月初五日旨：戶部侍郎桂林著在軍機處學習行走。

九月十三日，命侍郎慶桂在軍機處行走。

謹按：慶桂時爲理藩院侍郎。

三十七年五月 日，命侍郎福康安在軍機處學習行走。

三十八年四月二十三日旨：署禮部侍郎索琳著在軍機處學習行走。

謹按：是月二十二日，先經奉旨，索琳著銷去副都統銜，加恩授爲內閣學士，革職留任，八年無過，准其開復。所有禮部侍郎員缺，仍著索琳暫行署理。續經本處片奏，查索琳奉旨令其在軍機處行走，向來內閣學士俱係在司員上行走。索琳現奉旨仍署禮部侍郎，是以臣等於諭旨內止寫署禮部侍郎，合併聲明。

九月二十日旨：刑部侍郎袁守侗著在軍機大臣上學習行走。

十一月十七日旨：梁國治著來京在軍機處行走。

十八日諭：梁國治昨已有旨令其來京在軍機處行走，其員缺已令巴延三調補，仍署理山西巡撫，並將敦福調補湖南布政使，就近護理撫篆矣。軍機漢大臣現在祇有于敏中一人，而應辦之事甚多。著傳諭梁國治於奉到此旨後，速即起程，馳驛來京，務於歲內趕到。將此由五百里傳諭知之。

三十九年七月二十四日旨：左都御史阿思哈著在軍機處行走。

四十年三月 日，命戶部侍郎和珅在軍機大臣上行走。

四十一年四月初十日旨：協辦大學士尚書公阿桂著仍在軍機處行走。

謹按：是年金川全境蕩平，阿桂奏凱回京，封頭等誠謀英勇公，授吏部尚書協辦大學士。

四十四年十二月初四日旨：戶部侍郎董誥著在軍機處行走。

四十五年正月二十七日旨：福長安著在軍機處學習行走。

謹按：福長安時爲總管內務府大臣，逾月授戶部侍郎。

四十八年五月十九日旨：署工部尚書福康安著在軍機處行走。

四十九年五月初三日旨：工部尚書慶桂著在軍機處行走。

謹按：慶桂時由福州將軍內擢工部尚書。

五十一年十二月十三日旨：尚書王杰著在軍機處行走。

五十四年六月十六日旨：兵部尚書孫士毅著在軍機處行走。

謹按：孫士毅時由兩廣總督撤任來京，旋授兵部尚書。是年冬復出爲四川總督。

五十八年四月 日，命侍郎松筠在軍機處行走。

謹按：松筠時爲戶部侍郎。

六十年九月十四日旨：台布著在軍機處學習行走。

謹按：台布時爲內閣學士，即於是年擢工部侍郎。

嘉慶元年十月初七日諭：董誥在軍機處行走有年，著加恩補授大學士。王杰因患腿疾久未入直，現在軍機處漢大臣祇有董誥一人，著左都御史沈初在軍機處學習行走。

二年閏六月二十四日諭：大學士王杰因腿疾不能入直，著不必在軍機處行走，即回京供職。漢軍機大臣祇有沈初一人，外廷漢大臣內年老者多，即有尚能辦事之人，於機務究未諳悉。吳熊光、戴衢亨在軍機章京上行走有年，自爲熟習。念其職分較小，著加恩各賞三品卿銜，照松

筠、台布之例，隨同軍機大臣學習行走。兵部右侍郎傅森亦著一體學習行走，庶可漸資造就。

三年二月二十一日旨：內閣學士那彥成係翰林出身，人尚明白，且係原任大學士阿桂之孫，著在軍機處學習行走。傅森著仍回戶部辦事。

四年正月初八日旨：成親王永理、原任大學士署刑部尚書董誥、兵部尚書慶桂俱著在軍機處行走。戶部侍郎那彥成、戴衢亨仍留軍機處行走。沈初年老，不必在軍機處行走。

十月二十二日諭：本朝自設立軍機處以來，向無諸王在軍機處行走者。正月初間，因軍機處事務較繁，是以暫令成親王永理人直辦事，但究與國家定制未符。成親王永理著不必在軍機處行走。現在軍機大臣人少，傅森著仍在軍機處行走。

謹按：傅森時爲兵部尚書。

六年二月二十七日旨：刑部尚書成德著在軍機處學習行走。

七年六月十五日旨：軍機大臣現在人少，吏部尚書劉權之、刑部尚書德瑛俱著在軍機處學習行走。

九年六月十一日諭：軍機處承旨書諭，問於大學士及尚書、侍郎等官慎選行走，誠以絲綸出納，必有總匯之區，不能分隸各部，亦斷無更番輪值之理。但六曹事務殷繁，軍機大臣中偶值此一部無人，適有垂詢交辦等事，該大臣非其專管，未能熟悉，必俟該部值日召對，轉覺遲緩。自

應職備六官，方足以資經理，而在內行走之各衙門司員，亦得本堂官核其勤惰。軍機大臣德瑛，自行走以來，人甚慎密，清文最爲通曉，辦事亦極認真，本日已降旨調補吏部尚書。該部職掌銓衡，事務繁重，軍機大臣慶桂係兼管吏部，較之德瑛，倍覺老練。若仍留德瑛在軍機處行走，部中即少一專辦之人，而軍機處轉多一吏部堂官。德瑛著不必在軍機處行走，即赴本衙門辦事。現在軍機大臣，戶、禮二部無人，禮部尚書那彥成著仍在軍機處行走，戶部侍郎英和年力富強，人有出息，著在軍機處學習行走。

十年六月二十九日旨：劉權之、英和俱不必在軍機處行走。

閏六月初一日旨：托津著調補吏部左侍郎，並著在軍機處學習行走。

十三年閏五月初一日旨：英和著暫在軍機大臣上學習行走，俟戴衢亨、托津到京後，仍回南書房行走。

十六年四月初二日諭：方維甸自回籍以後，承歡侍奉伊母，自己日就康健。現在大學士戴衢亨因在臺懷偶患時證，不意爲醫藥所誤，遽於昨日溘逝，朕心悼惜。此時軍機漢大臣人少，樞務至重，朕於中外諸大臣遍加遴選，惟方維甸性情公直，在軍機章京上年久，熟諳事務，人地相宜。今特簡爲軍機大臣，將來補放尚書，用資倚畀。

二十六日諭：前因軍機大臣乏人，朕念方維甸熟習機務，是以降旨召伊來京。茲據奏伊母

近日精神恍惚，難以力疾遠行，情詞懇切，朕聞之甚爲憐憫。現在天氣漸熱，方維甸母子不能暫離，若令其母長途跋涉，朕心殊爲不忍。方維甸著不必來京。

七月初二日旨：盧蔭溥著以光祿寺少卿加四品銜在軍機大臣上學習行走。

十七年九月二十五日旨：松筠前於戶部侍郎任內蒙皇考高宗純皇帝簡任，在軍機大臣上行走，旋駐劄西藏多年。嘉慶四年後經朕授爲伊犁將軍，復歷任陝甘、兩江、兩廣總督。居官清正，心地忠誠，內擢吏部尚書、協辦大學士。松筠著仍在軍機大臣上行走。

又旨：大學士慶桂前蒙皇考高宗純皇帝簡用，在軍機大臣上行走。朕親政以來，復令入直內廷，十有餘年，夙夜在公，奉職勤慎。今年近八旬，步履遲鈍，每日趨直樞廷，朝入暮歸，高年精力殊非所宜。慶桂著不必在軍機大臣上行走，輪班赴內閣閱本。

十八年十月二十一日旨：托津現在出差，勒保患病亦尚未全愈，軍機處滿洲大臣乏人，桂芳著暫在軍機大臣上學習行走，承寫清字諭旨。俟勒保病痊，托津差竣，伊二人內有一人入直，桂芳即無庸在軍機處行走。

二十一年十月二十四日旨：協辦大學士禮部尚書章煦著在軍機大臣上行走。

二十三年二月初四日旨：協辦大學士尚書戴均元、尚書和寧著在軍機大臣上學習行走。

二十四年正月二十四日旨：兵部尚書和寧年近八旬，耳雖重聽，而精神素健，辦事亦有識

見。著調補刑部尚書，即令常川到署，專心任事，無庸在軍機大臣上行走。文孚著在軍機大臣上學習行走。

二十五年九月初七日旨：大學士曹振鏞，尚書英和、黃鉞均著在軍機大臣上行走。

道光元年十月初十日旨：松筠著在軍機大臣上行走。

謹按：松筠時爲左都御史。

樞垣記略卷之三

除授二 軍機大臣

道光三年正月二十五日旨：長齡著在軍機大臣上行走。

謹按：長齡於二年六月由陝甘總督授大學士，奉命回京。踰年冬復出爲雲貴總督。

四年十一月二十六日旨：玉麟著在軍機大臣上行走。

謹按：玉麟時爲兵部尚書，九年夏出爲伊犁將軍。

五年五月十一日諭：戶部尚書黃鉞年逾七旬，夙夜趨直，未免勞動。著無庸在軍機處行走，俾得專心辦理部務。王鼎著在軍機大臣上行走。

謹按：王鼎時以一品銜署戶部左侍郎。

十一月十七日旨：蔣攸銛著在軍機大臣上行走。

謹按：蔣攸銛時以大學士任直隸總督，是年十月奉命來京，七年夏復出爲兩江總督。

七年五月十二日旨：穆彰阿著在軍機大臣上學習行走。

謹按：穆彰阿時爲工部尚書。

十四年正月二十一日旨：大學士潘世恩著在軍機大臣上行走。

十五年七月十七日諭：大學士文孚在軍機大臣上行走有年，謹慎小心，前歲因年近七旬，奏請解職，朕察其精神尚健，未經允准。昨日召見時，面稱近年兩耳重聽，間復健忘，據實陳懇，情詞剴切，朕不忍再違所請。文孚著以大學士管理吏部事務，無庸在軍機大臣上行走，以節勞動而示體恤。

又旨：刑部侍郎趙盛奎、工部侍郎賽尚阿俱著在軍機大臣上學習行走。

謹按：賽尚阿於咸豐元年春以大學士授欽差大臣，出赴湖南剿匪。

十七年六月十六日旨：都察院左都御史奎照、戶部侍郎文慶俱著在軍機大臣上學習行走。

十八年正月初一日旨：左都御史奎照、戶部侍郎文慶著即在軍機大臣上行走。

十九年正月二十五日諭：奎照自擢任軍機大臣以來，朕看氣體不充。軍機大臣事務甚繁，奎照不甚相宜，著回本衙門辦事，毋庸在軍機大臣上行走。

十二月二十一日旨：隆文著在軍機大臣上行走。

謹按：隆文時爲刑部尚書。

二十年三月初六日旨：大理寺少卿何汝霖著在軍機大臣上學習行走。

二十一年九月初八日旨：戶部尚書祁寯藻著在軍機大臣上行走。

二十七年五月初九日旨：文慶、陳孚恩俱著在軍機大臣上行走。

謹按：陳孚恩時署兵部左侍郎。

二十八年二月初九日旨：文慶著補授總管內務府大臣，並帶印鑰，毋庸在軍機大臣上行走。

二十九年九月十四日旨：季芝昌著在軍機大臣上行走。

謹按：季芝昌時署吏部右侍郎，咸豐元年夏以左都御史出爲閩浙總督。

二十四日旨：何汝霖著以一品銜署理禮部左侍郎吳鍾駿出差之缺，仍在軍機大臣上行走。

十月二十日諭：本日據大學士潘世恩瀝情奏請開缺，朕思軍機大臣夙夜在公，勤勞較甚，實非高年所宜。潘世恩年逾八旬，公勤素著，若仍令其入直，不足以示體恤。著俟來歲春融赴閣辦事，毋庸開缺，以示朕逾格篤眷耆臣至意。

咸豐元年三月初九日旨：穆蔭著以五品京堂候補在軍機大臣上學習行走。

四月初三日旨：戶部左侍郎舒興阿著在軍機大臣上行走。

謹按：舒興阿於是年冬出爲陝甘總督。

五月二十六日旨：工部右侍郎彭蘊章著在軍機大臣上行走。

二年三月十七日諭：本日禮部尚書何汝霖銷假，面陳腿疾尚未全愈，懇請開缺。朕察其精

神未遽衰頹，惟起跪稍形竭蹶，因思軍機大臣事務較繁，若仍命入直，轉非所以示體恤。何汝霖著加恩毋庸在軍機大臣上行走，仍在禮部衙門辦事，不必開缺，以示朕篤眷著臣至意。

五月十三日旨：吏部左侍郎邵燦、戶部右侍郎麟魁俱著在軍機大臣上行走。

謹按：邵燦於三年冬出爲漕運總督。

三年十月初七日旨：恭親王奕訢著在軍機大臣上行走。

又旨：瑞麟、穆蔭均著在軍機大臣上行走。

謹按：瑞麟時爲戶部右侍郎。

又旨：麟魁著補授總管內務府大臣，毋庸在軍機處行走。

十二月二十六日旨：工部左侍郎杜翰著在軍機大臣上行走。

五年七月二十一日旨：文慶著在軍機大臣上行走。

謹按：文慶時爲戶部尚書，旋協辦大學士，是年冬補大學士。

六年十一月十八日旨：戶部尚書柏蔭著在軍機大臣上行走。

八年五月二十四日旨：吏部左侍郎匡源、內閣學士署刑部左侍郎文祥均著在軍機大臣上學

習行走。

九年十月初五日旨：匡源、文祥均著在軍機大臣上行走。

初七日旨：杜翰著署吏部右侍郎，仍在軍機大臣上行走。

十年六月初十日諭：大學士彭蘊章精力漸不如前，著毋庸在軍機大臣上行走，以示體恤。

十月二十八日旨：焦祐瀛著補授太常寺少卿，在軍機大臣上學習行走。

十一年十月初一日旨：恭親王奕訢著授爲議政王，在軍機處行走。

又旨：戶部左侍郎文祥著仍在軍機大臣上行走。

又旨：大學士桂良、戶部尚書沈兆霖、戶部右侍郎寶鋆均著在軍機大臣上行走。鴻臚寺少

卿曹毓瑛著在軍機大臣上學習行走。

謹按：沈兆霖於是月奉命赴陝西查辦事件，踰年署陝甘總督。

同治元年閏八月十三日旨：都察院左都御史李棠階著在軍機大臣上行走。

十四日諭：李棠階奏「瀝陳下悃，懇請收回成命」一摺，都察院左都御史李棠階，經特簡在軍機大臣上行走。當此時事多艱，李棠階受特達之知不次超擢，自應竭盡悃忱，以資倚畀，其毋庸固辭。

十月初十日旨：曹毓瑛著在軍機大臣上行走。

四年四月十四日旨：恭親王著仍在軍機大臣上行走。

十一月十一日旨：李鴻藻著在軍機大臣上學習行走，仍兼弘德殿行走。

十二日諭：內閣學士李鴻藻，昨經降旨，著在軍機大臣上學習行走，仍兼弘德殿行走。茲據李鴻藻奏稱「軍機處爲政令所出，方今時勢關係甚重，恐難勝任，請收回成命，俾得專心在弘德殿行走」等語，覽奏具見悃忱。現值軍事未戡，庶政殷繁，是以特簡李鴻藻進參樞務。李鴻藻惟當勉圖報稱，以副委任，毋許固辭。

五年三月二十九日旨：李鴻藻著在軍機大臣上行走。

又旨：都察院左副都御史胡家玉著在軍機大臣上學習行走。

七月初九日慈安皇太后、慈禧皇太后懿旨：戶部右侍郎李鴻藻之母姚氏，秉性淑慎，教子成名，今以疾終，深可軫惻。朝廷優禮大臣，推恩賢母，著賜祭一壇，賞銀二千兩經理喪事，由廣儲司給發，以示眷懷。李鴻藻事母至孝，哀痛必切，朝廷以孝治天下，原應聽其照例終制，以遂孝思。第該侍郎膺文宗顯皇帝特簡，授皇帝讀，盡心啓沃，迄今六年，夙夜罔懈。皇帝春秋鼎盛，緝熙典學，功修正篤，李鴻藻諄諄納誨，皇帝樂從，誠不可或離左右，且軍務未平，兼資翊贊。溯查雍正、乾隆年間，大臣如孫嘉淦、朱軾、嵇曾筠、蔣炳、于敏中等，皆奉特旨，在任守制，或開缺辦事入直內廷，近今如曾國藩、胡林翼、閻敬銘，亦皆奪情起用。李鴻藻著開戶部右侍郎缺，守孝百日後，即赴弘德殿授讀，仍在軍機處行走，凡遇朝會，不必與列。此係遵照列朝成憲，權宜辦

理，日前召見醇郡王、倭仁、徐桐、翁同龢，再三垂詢，均已深喻此意。朝廷不得已之苦衷，中外臣工應能共諒。李鴻藻當思輔導皇帝，弼成聖德，移孝作忠，莫大於是。其勉抑私情，以副先皇帝簡任之恩，朝廷倚畀之重，勿以守禮固辭。

十六日慈安皇太后、慈禧皇太后懿旨：前因戶部右侍郎李鴻藻之母病終，推恩賜祭賞銀，以示榮寵。並令李鴻藻於守孝百日後，仍赴弘德殿授讀，在軍機處行走，原係酌遵成憲，從權辦理。茲據吏部奏稱，轉據李鴻藻呈稱，該侍郎母氏「苦節多年，拊育教誨之恩，纖毫未報，一旦慘遭大故，偷生視息，負疚已深。樞要之地，綱紀攸關，輔導聖學，尤宜志行完粹之人。若自蹈愆尤，則進講獻納之際，何以置辭？懇請終制」各等語，情詞懇切，具見惻忱。惟念李鴻藻膺文宗顯皇帝特簡，授皇帝讀，於今六年。當此緝熙典學，正就將日進之時，該侍郎盡心輔導，弼成聖德，則所以慰天下臣民之望者，莫大於是。前因軍務未平，各督撫等奪情起用者，指不勝屈，況機務殷繁，尤資贊畫，前降諭旨甚明。李鴻藻惟當恪遵前旨，仍於百日守孝後，照常趨直，用副先皇帝簡擢之恩。第思該侍郎哀痛未忘，不得不稍示區別，前有旨令遇朝會不必與列，尚不足以示體恤。李鴻藻著遵照雍正年間世宗憲皇帝諭旨，二十七月內不穿朝服，不與朝會筵宴，遇有祭祀典禮咸集之處，均毋庸與列。該侍郎當深感朝廷曲體之情，勉抑哀思，移孝作忠，毋得再行陳請。

二十二日慈安皇太后、慈禧皇太后懿旨：昨據大學士倭仁等奏「懇恩准予大臣終制，以維禮教」，本日復據吏部奏「李鴻藻瀝陳下忱，懇請仍准終制，據呈代陳」各一摺。前因皇帝典學，功修正篤，李鴻藻不可或離左右，曾經召見醇郡王、倭仁、徐桐、翁同龢，詢問再三。彼時醇郡王即請降旨慰留，倭仁等亦無異議。次日復令軍機大臣與倭仁等商議，亦以聖學爲重，不持異同。茲覽倭仁等摺內所稱「李鴻藻事親盡禮，現在奉旨奪情，欲固辭則迹近辜恩，欲抑情則內多負疚，請仍准其終制」等語。倭仁等既以奪情爲非禮，何妨於前次召見時，據實陳奏，乃爾時並無異議，迨兩次降旨慰留後，始有此奏，殊不可解。本日復召見倭仁、徐桐、翁同龢，面加詢問，據稱「聖學關係甚重，臣等亦願李鴻藻照常入直。惟親見該侍郎哀痛迫切，勢處萬難，是以代爲陳請，並無他意。聖功緊要，請仍令李鴻藻遵奉前旨」等語。是倭仁等亦知此次奪情之舉，係屬不得已從權辦理，想中外大小臣工亦必能共諒此意。李鴻藻當思聖學日新，四方多故，盡忠即所以盡孝。前降諭旨，業已詳盡，其恪遵前旨，毋得拘泥常情，再行籲懇。

十月初二日慈安皇太后、慈禧皇太后懿旨：前因侍郎李鴻藻丁憂，後兩次懇請終制，當經降旨慰留，並准其二十七箇月內不穿朝服，不與朝會筵宴，以示體恤。嗣復派恭親王等赴該侍郎寓次傳旨，令於百日後照常入直，毋得再行固辭。旋據李鴻藻奏稱「百日將滿，愁急萬分，心疾恐致增劇，請曲予矜全」等語。情詞懇切，深用惻然。昨據御史張觀鈞奏稱「賢臣不宜久離，請

旨敦促」，並歷陳該侍郎宜出任事各條，頗爲詳盡。李鴻藻受恩至重，與國家有休戚相關之誼，當此聖學日新，軍務方亟，該侍郎豈能怏然於懷？著即於百日後，仍遵前旨，照常入直弘德殿、軍機處，以副委任。俟將來扶柩回籍時，仍當寬予假期，俾得從容料理，則忠孝兩全，可無遺憾。該侍郎務當仰體朝廷曲成之意，毋得再行籲請。

十六日慈安皇太后、慈禧皇太后懿旨：本日據李鴻藻奏「現居百日已滿，自揣病軀實難入直，懇恩矜全」一摺。侍郎李鴻藻自丁母憂，屢經降旨慰留，令其照常入直弘德殿、軍機處，以副委任。茲復據奏稱「數月以來，哀迫憂煎，精神恍惚，時發心跳氣壅之證，非安心調養，恐成怔忡，藥餌難以奏效」等語。覽其所奏，祇以病軀難以入直，尚非拘執終制陳說，李鴻藻著加恩賞假調理。方今皇帝春秋正富，典學方殷，軍務未竣，四方多事，該侍郎受國厚恩，具有天良，自當於病痊時，照常入直，竭力圖報，諒不始終固執也。

又旨：都察院左都御史汪元方著在軍機大臣上行走。

六年十月十五日旨：署禮部右侍郎沈桂芬著在軍機大臣上學習行走。

七年三月二十三日旨：沈桂芬著在軍機大臣上行走。

十月十五日旨：李鴻藻著在弘德殿、軍機大臣上行走，並署理禮部左侍郎。

樞垣記略卷之四

除授三

軍機章京

雍正十一年五月初三日旨：編修張若靄，庶吉士鄂容安、鄂倫著在辦理軍機處行走。

乾隆九年二月二十九日日本處奏：軍機處檔案，關係緊要，且有查例議覆等事，俱須諳練之員指授料理。原任江南廬鳳道畢誼，前於給事中任內在總理事務處行走二年。該員爲人謹飭，文理簡明，後因外轉廬鳳道失察家人犯贓，部議降四級調用，現在候補通判。可否仰懇聖恩，賞以主事銜食俸，令在軍機處行走，專辦檔案，俾臣等得收臂指之益。謹奏。奉旨：依議。

十四年三月十二日諭：據大學士公傅恆奏稱「胡寶瑤辦事甚屬諳練，順天府尹衙門事務尚簡，請仍留軍機處辦事」等語。胡寶瑤著仍兼軍機處行走。

又諭：胡寶瑤現在軍機處行走，順天府尹事務難以兼理，著兵部侍郎蔣炳兼管。

二十三年三月二十五日諭：蔣炳著寬宥來京，在軍機司員上效力行走，遇有員外郎缺出補用。

謹按：蔣炳於河南巡撫任內緣事遣戍釋回。

二十八年四月十六日本處奏：軍機處行走戶部郎中馮光熊，於本年正月內丁憂，現在已滿百日。該員在軍機處行走數年，辦事尚屬留心，今守制閒居。臣等公同商酌，與其另選新人，不如仍留熟手。可否令該員在軍機處及本部額外郎中上行走，俟服闋時，照例再行補缺。至該員係例應丁憂人員，今在額外行走，除公費飯銀照例給與外，毋庸支給半俸。謹奏。奉旨：知道了。

五月十九日本處奏：順天府丞申甫陞授光祿寺卿，查光祿寺衙門事務稍簡，據申甫感激天恩情願仍在軍機處行走。臣等看得申甫辦事日久，尚爲熟練，謹請旨准其仍在軍機處行走。奉旨：知道了。

二十九年五月十三日旨：博崑仍著在軍機處行走。

十二月初二日本處奏：原任吏部文選司郎中章寶傳，前因議奏方略館謄錄補缺一案，部議降二級調任，現候補正六品主事。查該員在軍機處行走十餘年，尚爲熟諳，現在年力方壯，正可及時驅策。懇將章寶傳以候補主事仍在軍機處行走，以觀後效。謹奏。奉旨：知道了。

三十三年 月 日旨：程燾以京堂用，仍在軍機處司員上行走。

謹按：程燾時以江西布政使奉旨來京。

三十四年六月十九日旨：原任廣西按察使袁守侗著留京以三品京堂用，仍在軍機處司員上

行走。

八月初二日旨：程燾著補授太僕寺少卿，仍在軍機處司員上行走。

三十五年三月初四日本處奏：查汪承需原在軍機司員上行走，後因欽派坐糧廳前往通州辦事。今差竣籤掣知府，呈請親改補近地，尚未得缺。今據該員呈稱，未得缺之前，情願仍在軍機處行走。該員係已離軍機處候補知府之員，可否准其仍前行走，理合請旨。奉旨：准其行走。

謹按：汪承需已籤陞邵武府知府，由軍機大臣轉奏，奉旨加恩以戶部郎中用。

五月初六日本處奏：查從前胡寶琮、傅顯陞授副都御史後，仍在軍機處司員上行走。今劉秉恬陞授副都御史，應仍令其在軍機司員上行走，理合奏明。奉旨：著仍在軍機處行走。

三十六年三月初二日旨：索琳著署理內閣學士，在軍機章京上行走。

十七日旨：博清額著降補內閣學士，在軍機司員上行走。

謹按：博清額係由刑部侍郎降補。

四月初九日旨：福德著留京，仍以內閣學士在軍機司員上行走。

謹按：福德係由盛京侍郎降補。

三十七年八月二十九日旨：汪承需從寬免罪，給還郎中，革職留任，仍在軍機章京上行走。

三十八年閏三月初三日旨：候補員外郎馮應榴著以工部用，仍在軍機司員上行走。

九月十一日諭：永保已加恩准襲伊父溫福輕車都尉世職，其本任內閣侍讀不必開缺，仍著在軍機司員上行走。

十月 日旨：博清額辦事不及阿桂，其攻勦亦不及海蘭察，不必在軍營領隊。即著回京，仍在軍機章京上行走。

三十九年五月初八日諭：阿思哈著在軍機章京上行走。

謹按：阿思哈由雲貴總督出戍伊犁，是年回京，奉旨復充章京。踰月授總憲，復在大臣上行走。

七月二十四日旨：劉秉燾著降補主事，逐出軍機處。

同日旨：王慶長著革去中書，逐出軍機處。

四十年二月十六日旨：惠齡著加恩以主事用，仍在軍機章京上行走。

二十日諭：郎中孫士毅著留京，以四五品京堂用，遇缺即補，仍在軍機處司員上行走。

四十一年五月初五日諭：鴻臚寺卿王昶仍在軍機司員上行走。

二十六日諭：福德著授爲額外內閣學士，仍在軍機司員上行走。

四十五年四月十三日諭：孫永清已授爲都察院副都御史，仍著兼軍機章京上行走。

七月 日旨：馮應榴補授通政司參議，仍兼軍機處、吏部行走。

四十六年十月二十四日旨：翰林院修撰戴衢亨著在軍機章京上行走。

四十九年五月初八日諭：恒寧著來京，以吏部郎中用，仍在軍機章京上行走。

五十四年十月十五日本處奏：前在軍機處行走中書籤陞廣東廣州府同知沈琨，未經領憑赴任，旋即丁憂回籍。今服闋來京，因不諳外任，情願註銷同知，仍候補中書。查該員前在軍機處行走六年，尚爲勤慎，今情願註銷同知仍補中書，係屬以大改小。可否准將該員接算前俸，仍以中書補用，伏候欽定。謹奏。奉旨：知道了。

嘉慶四年二月十一日旨：長齡、鄂靈、多容安、德克津布、明舒、德克精阿、齊嘉紹、姚文田、傅淦、趙佩湘、胡枚、吳光悅、顏允璨、蔡炯、茅豫，俱著充補軍機章京，富綿、伊興阿、瑞麟、伊誠、額、金齊香阿、吉祥、武爾通阿、錫齡、興科、昌宜泰、覺羅景祿、任烜、何元煊、糜奇瑜、熊方受、盧蔭溥、張志緒、黃躍之、汪玉林、楊懋恬，俱著記名，俟有缺出挨次補用。

謹按：此次汪玉林一名未經行走。

五年二月二十四日旨：何金、姚祖同、盛惇大、葉繼雯、袁煦、貴徵、萬雲、吳應咸、龔麗正、蔣繼輝、康紹鏞、汪彥博、張之屏，俱著記名以軍機章京補用，遇有缺出挨次充補。

謹按：是年正月三十日本處奏：上年正月退出軍機之內閣中書何金、姚祖同，經臣等奏請，俟下次保送軍機章京，將該二員一併帶領引見。奉旨：原在軍機處行走之內閣中書何金、姚祖同，俟下次保送軍機章京時，帶領引見。又按：此次貴徵、蔣繼輝二名俱未經行走。七月二十六日諭：裘行簡已補授太僕寺少卿，著仍在軍機章京上行走。

六年十一月二十一日旨：明安泰、祥臨、穆馨阿、聯奎、保英、吉朗阿、重倫、花連布、榮昌、德廢、瑞麟、伊博格圖，俱著記名。

謹按：此次保英、榮昌、德廢、瑞麟四名俱未經行走。

七年正月二十七日諭：郎中錢楷向在軍機處行走，今學政任滿回京，仍著在軍機章京上行走。

九年四月十六日諭：本日御門，已將玉凝補授大理寺少卿，職分較大，無庸在軍機章京上行走。

十年十月二十九日旨：董槐、梁承福、王厚慶、王鳳翰、李芳梅、戴聰、余需元、陳鍾麟、牛坤、程同文、聶鏡敏、趙盛奎、楊振麟、朱淥、秦繩曾、陸藻、吳書城、張光勳、張允垂、吳頤，俱著記名以軍機章京用，俟有缺出挨次充補。

謹按：此次李芳梅、戴聰、牛坤、朱淥、張光勳五名俱未經行走。

十二年七月十一日旨：禮部主事覺羅克星額、內閣中書松長、兵部筆帖式珠滿、內閣中書誠端、戶部筆帖式覺羅成貴、內閣學習中書玉彰、內閣學習中書續齡、禮部筆帖式蘇誠額，俱著記名以軍機章京挨次補用。

謹按：此次松長、續齡、蘇誠額三名未經行走。

十四年四月二十日旨：札清阿、企善、昌熾、誠安、成麟、那丹珠、祥惠、札勒杭阿、容海、敏慧，著記名以軍機章京用。

謹按：此次祥惠、敏慧二名俱未經行走。

十六年正月二十五日奏：查原在軍機章京上行走之宗人府主事葉繼雯，前充會典館總纂兼提調事，現在起服到京。該員學問素優，當差勤慎，實爲向來得力之員。現在趕辦會典，並畫一諸務，亟須熟手。臣等公同商酌，擬先令在館幫辦總纂兼提調事務，仍令在軍機處額外行走。惟向例部員到京，均須由本衙門奏留方能題缺，宗人府主事從無奏留之例。該員既無原衙門可歸，而宗人府主事一缺非京察調部不能出缺。上屆京察時，適該員丁憂回籍，未預保題，今需次無期。可否仰懇聖恩，將該員掣歸臣等所管缺分較多之戶、刑二部，作爲額外主事，遇有缺出，奏請補用。則該員有衙門可歸，補缺不至無期，當差辦書自必倍加奮勉，臣等亦得收指臂之益。謹奏。奉旨：依議。

十七年四月二十一日旨：岳齡安、廷勳、安誠、桂明、瑞慶、桂芬、阿成、福兆、達興、布延柏勒格、福昇阿、呢克通阿，俱著記名以軍機章京用。

謹按：此次呢克通阿一名未經行走。

十八年七月十五日旨：韓文顯、孫蘭枝、徐鏞、吳孝銘、蘇兆登、何增元、聞人熙、趙光祿、沈學廉、李昌平、程番采、徐受荃、路德、吳榮光，俱著記名以軍機章京補用，俟有缺出挨次充補。

謹按：本處奏，中書韓文顯、孫蘭枝二員上屆保送軍機引見，未經記名，十七年十二月內因覆校實錄詳慎出力，經大學士慶桂等保奏，請列於考取新班各員之前，一體帶領引見。理合附奏。

二十一年九月二十八日旨：梁章鉅、錢廷熊、陳彬、許乃普、李彥章、喬用遷、鄒錫淳、余文銓、胡方朔、王啓文、陳孝寬、蔣泰階，俱著記名以軍機章京補用。

謹按：此次鄒錫淳一名未經行走。

十月 日命強逢泰在軍機章京上行走。

二十三年六月初五日奉旨：阿達順、車旺多爾濟、烏爾恭額、德舒、福寧阿、蘇勒芳阿、伊寧阿、三龍泰、鄂順安、福克薩音、博勒格，俱著記名以軍機章京用。

二十五年二月十二日奏：查軍機章京理藩院員外郎昌熾，昨蒙簡放西寧道，出有章京一缺，

一時接辦之員，實乏熟手。查有原任湖北荆宜施道丁憂回旗現在理藩院員外郎上行走之多容安，前充軍機章京，繕寫清字諭旨，頗爲熟悉，人亦謹慎。合無仰懇聖恩，仍令多容安充補軍機章京，俾資熟手。謹奏。奉旨：知道了。

道光元年八月二十五日旨：馬光瀾、俞誦芬、傅繩勛、蔡勳、周濤、趙榮、汪元爵、徐璣、朱遠吉、張祥河、龍汝言、徐思荃、葉敏昌，俱著記名以軍機章京補用。

樞垣記略卷之五

除授四 軍機章京

道光三年十一月初八日旨：平慶、文明、岳齡、英桂、玉琨、那遜阿古拉、松林、札克丹、奎英，俱著記名以軍機章京用。

謹按：此次札克丹、奎英二名俱未經行走。

同日旨：軍機章京刑部候補主事三龍泰、內閣中書德舒、理藩院筆帖式福兆，俱著回原衙門行走。

五年四月十六日旨：達興阿、英麟、春和、文俊、哈哈布、惠麟、文丕、熙成、蘇英阿、桂德、璽麟，俱著記名以軍機章京用。

謹按：此次哈哈布、蘇英阿、璽麟三名俱未經行走。

九月二十六日旨：方銘彝、鄭喬林、許球、何汝霖、王藻、李涵、湯鵬、江紹愷、董基誠、劉遵和、鄭瑞麒，俱著記名以軍機章京補用。

謹按：此次李涵、董基誠、劉遵和三名俱未經行走。

六年三月二十二日本處奏：軍機章京吏部郎中趙盛奎，前於道光二年正月，因郎中俸滿，截取保送繁缺知府，奉旨記名。又戶部郎中趙光祿，前於道光二年京察一等，奉旨記名以道府用。均經臣等奏明，暫留軍機章京上行走，奉旨允准在案。嗣該二員先後丁憂回籍，趙盛奎於上年正月服闋赴部，趙光祿於本年正月服闋赴部，俱奏准仍在軍機章京上行走。查該二員於本月二十日、二十一日先後補授郎中實缺，現在軍機處接手辦事有人，所有該二員記名外用之處，相應奏明，交吏部照例辦理。並遇有外任缺出，由臣等開列名單進呈，恭候簡用。謹奏。奉旨：依議。

八年三月十六日旨：阿齡阿、蘇齡阿、音德賀、法豐阿、英幹、玉春、文斌、德雲、慶安，俱著記名以軍機章京用。

謹按：此次蘇齡阿、法豐阿二名俱未經行走。

九年八月初一日諭：趙盛奎現已簡放光祿寺卿，著暫留軍機章京上行走，俟纂輯平定回疆方略書成，再回本衙門辦事。

十一年三月十八日旨：瑞春、麟翔、崇綸、福連、愛升圖、崇光，俱著記名以軍機章京用。

五月二十四日旨：萬貢珍、王佐業、程庭桂、彭蘊章、陳孚恩、劉最昌、朱應元、王寅、江鴻升、馬麗文、王積順，俱著記名以軍機章京補用。

十二年五月初一日旨：清泰、豫慶、恩符、松海、雲錦、烏爾通阿、誠廉，俱著記名以軍機章京用。

謹按：此次松海、烏爾通阿二名俱未經行走。

十三年六月二十日旨：文裕、崇綸、海慶、齡椿、崇祥、崇泰、聯第，俱著記名以軍機章京用。

謹按：此次崇綸、聯第二名俱未經行走。

十四年五月初四日旨：林揚祖、胡增瑞、陳本欽、吳清皋、何桂馨、胡長庚、潘鐸、吳光業、方大淳、沈第、王桂、顏以燠、汪本銓，俱著記名以軍機章京補用。

謹按：此次胡長庚、方大淳、沈第三名俱未經行走。

十五年十一月二十七日旨：春長、麟書、穆蔭、紹德、四慶、濟安、蘇勒芳阿、福善，俱著記名以軍機章京用。

十九年五月初四日旨：喬晉芳、宗稷辰、聶溥、梁瀚、程恭壽、莊心省、王允灌、朱憲曾、黃宗漢、孔慶鋤、王本梧、朱麗宣、袁甲三、吳士楨，俱著記名以軍機章京補用。

謹按：此次王允灌、黃宗漢二名俱未經行走。

十一月二十一日旨：豐盛額、清盛、托克托布、富和、多隆武、海慶、賽音博勒格圖、西朗阿、誌亨，俱著記名以軍機章京用。

謹按：此次富和、多隆武、海慶、誌亨四名俱未經行走。

二十二年三月十二日諭：陳孚恩現已簡放通政使司副使，著暫留軍機章京上行走，俟軍務告竣後，再回本衙門辦事。

四月十六日諭：陳孚恩著仍暫留軍機章京上行走。

二十三年五月初八日旨：鍾啓峒、吳福年、林映棠、王發桂、貢璜、邵懿辰、蔣錫綬、劉子城、文嶽英、吳嘉淦、曹毓琰、汪槩、段晴川、畢至、張之萬、王家瓊、胡嘉楷、陳鴻翊、丁守存，俱著記名以軍機章京補用。

謹按：此次貢璜、張之萬、王家瓊三名俱未經行走。

二十四年二月初五日旨：德椿、英秀、瑞亨、衡光、賽沙布、嵩壽、桂昌、瑞琇、文彬、寶福，俱著記名以軍機章京用。

謹按：此次瑞琇未經行走。

二十九年閏四月二十九日旨：文吉、達春布、慶安、色普哲訥、文琇、常陞、長年、慶霖、春煦，俱著記名以軍機章京用。

五月十九日旨：胡家玉、焦祐瀛、陳敬簡、惲世臨、錢寶青、吳台朗、李瑞章、蔣超伯、凌玉垣、錢以同、李汝楫、徐棻，俱著記名以軍機章京補用。

三十年十一月初十日諭：所有各衙門前經記名尚未傳補之滿、漢軍機章京，著帶領引見。

十一月十四日本處奏：前經記名尚未傳補之滿、漢軍機章京，現經各衙門將各該員開具出身履歷，由臣等按照名次前後開列清單，並繕寫綠頭牌，於本日帶領引見，伏候欽定。再查記名之工部筆帖式色普哲訥，現有慕陵住班差使，刑部候補主事李汝楫，現在告假出京，均不克引見。應俟各該員差竣及假滿回京時，補行帶領。合併陳明。謹奏。奉旨：長年、慶霖、春煦、焦祐瀛、陳敬簡、錢寶青、吳台朗、蔣超伯、錢以同，仍著記名以軍機章京補用，文琇、常陞、王式言、惲世臨、李瑞章、徐棻，俱著毋庸記名。

謹按：此次春煦、陳敬簡二名俱未經行走。又按：凌玉垣未經覆帶引見。

十二月初十日旨：此次補行引見之工部筆帖式色普哲訥，仍著記名以軍機章京補用。

謹按：色普哲訥未經行走。

咸豐元年五月二十八日旨：此次補行引見之刑部候補主事李汝楫，仍著記名以軍機章京補用。

十月初八日旨：林壽圖、程祖誥、吳兆麟、賀壽慈、李鴻藻、鄧廷枏、張金鑒、李德莪、康錫齡，俱著記名以軍機章京補用。

謹按：此次李鴻藻未經行走。

二年七月二十二日旨：蘇布、玉衡、文衡、英祥、鍾秀、祥保、崇縉、松齡、英華、塔克什布，俱著記名以軍機章京用。

三年四月十九日旨：段承實、梁經先、郭祥瑞、裴季芳、白恩佑、章倬標、曾協均、王錫振、鄭錫灑、洗斌、夏獻雲、謝謙亨、湯椿、朱夢元、張樾，俱著記名以軍機章京補用。

謹按：此次湯椿、張樾二名俱未經行走。

九月二十四日諭：梁瀚著補授宗人府府丞，暫留軍機章京上行走。

四年二月初九日諭：宗人府府丞梁瀚奏「祖母年老患病，懇請賞假開缺，回籍省視」一摺。梁瀚著加恩毋庸開缺，賞假三箇月，回籍省視。

七月十三日旨：興昌、裕彰、增壽、額勒和布、庭殷、瑞廉、慶多、常陞、松昌，俱著記名以軍機章京用。

謹按：此次額勒和布、庭殷、常陞、松昌四名俱未經行走。

五年三月十四日諭：錢寶青現已補授大理寺少卿，著仍在軍機章京上行走。

六年十二月十六日諭：錢寶青現已補授宗人府府丞，著仍在軍機章京上行走。

八年二月二十三日旨：英敏、慶裕、奎炘、孚謙、桂芬、崐玉、額圖璉、英貴、文海、奎麟、訥仁、續昌、額哲克，均著記名以軍機章京用。

謹按：此次英敏、孚謙、桂芬、奎麟、訥仁五名俱未經行走。

四月二十八日旨：方鼎銳、朱學勤、朱智、張德容、靳邦慶、李鶴齡、許庚身、蔣繼洙、蔡兆槐、杜來錫、張丙炎、王恩炳、錢應溥，俱著記名以軍機章京補用。

謹按：此次李鶴齡、張丙炎二名俱未經行走。

十年十月二十三日旨：范運鵬、龔聘英、沈淮、江人鏡、李廷簫、周瑞清、何燦之、龔嘉雋、區公輔、陳元楷、王汝訥、馮柏年，均著記名以軍機章京用。

十一年二月二十四日本處奏：查軍機章京戶部員外郎吳兆麟，係記名倉差，將次傳補委用。該章京在方略館校對檔案摺片，又應行赴熱河接班，可否將該章京暫停倉差傳補委用之處，伏候訓示。謹奏。奉旨：依議。

同治元年七月十六日旨：吳國杰、徐用儀、史崧秀、邵文煦、徐景軾、方熊祥、葉衍蘭、蕭庭滋、金日修、梁思問、溫忠善、黃雲鵠、胡延夔、何銘壽、陸爽棠、張善倬，俱著記名以軍機章京補用。

謹按：此次溫忠善、黃雲鵠、何銘壽三名俱未經行走。

閏八月初二日旨：裕長、容斌、本貴、三德、法克精阿、春山、文訓、尚德、玉春、志文、長祿、興陞，均著記名以軍機章京用。

謹按：此次法克精阿、文訓、長祿、興陞四名俱未經行走。

二年二月二十二日諭：王拯現已補授大理寺少卿，著仍在軍機章京上行走。

三年三月十一日諭：王拯現已補授通政使司通政使，著仍在軍機章京上行走。

十七日諭：胡家玉現已補授通政使司副使，著仍在軍機章京上行走。

四年四月初一日諭：大理寺卿胡家玉差竣回京，著仍在軍機章京上行走。

五年四月二十二日諭：鄭錫瀛現已補授大理寺少卿，著仍在軍機章京上行走。

七年四月二十六日旨：豐紳泰、增林、桂斌、文綬、文齡、額勒精額、如松、文英、榮陞、曾鈺、穆特亨額、德克吉訥、那丹珠、鈺坤、承恩、鄂昌、瑩岫、玉恆、佛爾恭額、豐伸泰、富華，均著記名以軍機章京用。

十月二十四日旨：李耀奎、李方豫、沈成烈、李士彬、丁鶴年、沈源深、魏邦翰、陳毓秀、馮光勛、李固恆、李芳柳、余聯沅、蕭韶、方恭銘、莊予楨、黃兆禔、祝維城、曾長治、柳長庚、孫紀雲，俱著記名以軍機章京補用。

九年二月十五日諭：朱學勤現已補授宗人府府丞，著仍在軍機章京上行走。

五月十八日諭：朱智現已補授通政使司副使，著仍在軍機章京上行走。

樞垣記略卷之六

恩敍一

乾隆二年十二月二十九日，莊親王允祿等奏：臣等因總理事務，荷蒙天恩，交部議敍。查總理事務差委辦事之侍郎納延泰、班第，學士素柱，並辦事官員等，多係從前在辦理軍機處行走之員，復在總理處效力行走，俱各小心謹慎，黽勉辦公，並無過失，應請一併交部議敍。謹將各員行走年分繕寫清單，伏候欽定。奉旨：著交部一併議敍。

內閣侍讀學士覺羅雅爾哈善，行走七年。監察御史舒赫德，行走八年。郎中兆惠，行走七年。郎中阿思哈，行走七年。主事明善，行走七年。主事積蘭泰，行走七年。主事傅亮，行走六年。中書蘇崇阿，行走三年。效力中書靈保，行走一年。筆帖式達素，行走五年。筆帖式碩善，行走一年。以上滿官十一員。太常寺少卿提督四譯館蔣炳，行走七年。內閣侍讀柴潮生，行走六年。起居注主事馬燦，行走二年。中書何璘，行走三年。中書潘中立，行走二年。中書涂逢震，行走一年。中書孫紹基，行走一年。以上漢官七員。

十三年十二月初十日日本處奏：奉旨，軍機處行走官員，頗爲黽勉，令臣等酌量擬賞荷包，其

出差在外者一體賞給，即令臣舒赫德帶往。欽此。臣等謹將各該員分別等次，酌量擬賞，開單進呈御覽。

順天府府丞胡寶琮、吏部郎中德舒，以上二員現隨經略大學士出差，擬各賞大荷包一對，小荷包六箇。內閣侍讀三寶、現隨舒赫德出差。理藩院員外郎富德，現隨汪札爾出差。以上二員擬各賞大荷包一對，小荷包五箇。兵部主事常亮，內閣中書傅顯、沈作朋、程燾，以上四員現隨經略大學士出差，但官職較胡寶琮等稍卑，擬各賞大荷包一對，小荷包四箇。戶科給事中馬燦、內閣侍讀鄂寶、兵部主事安福、戶部司庫圖桑阿，以上一等四員，擬各賞大荷包一對，小荷包四箇。內閣侍讀袁芳松，主事畢誼，內閣中書靈毓、胡廷樞、楊承會、睦朝棟、毛永燮，以上二等七員，擬各賞大荷包一對，小荷包二箇。內閣侍讀富察善，吏部主事雅河圖，工部主事九格，內閣中書官登、巴延三、景宣、陳朝礎、莊培因、曹錫寶，兵部筆帖式薩璧，以上三等十員，擬各賞大荷包一對。

十五日旨：經略大學士途次籌辦各事，懋著勤勞。其隨行辦事之順天府府丞胡寶琮、吏部郎中德舒，俱能勉効效力，著交部一併議敘。

十四年二月十六日諭：辦理金川軍務以來，軍機處行走官員，甚爲勉効供職，著分別等次，交部議敘。其隨經略大學士忠勇公傅恆辦事未經議敘之沈作朋、常亮、富顯、程燾，並隨尚書舒赫德之三寶，一併交部議敘。

順天府府丞馬燦，兵部員外郎安福，內閣侍讀鄂寶，戶部銀庫圖桑阿，內閣中書靈毓、楊承曾、睦朝棟、毛永燮，以上一等。內閣侍讀富察善、袁芳松，工部主事九格，主事畢誼，內閣中書官登、景宣、胡廷樞、巴延三、莊培因、曹錫寶，兵部筆帖式薩璧，以上二等。

三月初八日旨：十二日筵宴，隨班之軍機處官員，及在京辦理軍機處行走官員，俱著入宴。七月二十一日諭：尚書汪由敦在內廷軍機處行走，屢次扈蹕，尚能勤慎黽勉，所有從前革職各案，著加恩開復。

十七年十二月初七日日本處奏：看得軍機處行走中書程燾，前隨臣傅恆往金川，又隨臣舒赫德赴滇、黔閱視營伍，該員辦事勤敏，頗能黽勉出力。中書孔繼汾行走勤慎，材堪造就。懇將程燾賞給臣來保等兵部，孔繼汾賞給臣傅恆等戶部，令其在額外主事上學習行走，遇有缺出，酌量題補。奉旨：知道了。

二十六日本處奏：看得現在軍機處行走內閣侍讀靈毓、輔德，辦事勤慎，人俱明白，於繁劇之區，必能勝任。懇將二員暫令食侍讀俸，在臣戶部學習行走，遇有郎中、員外郎缺出，酌量題補。奉旨：知道了。

二十三年十月二十二日本處奏：看得軍機處行走之宗人府主事章寶傳，辦事妥慎，中書馮光熊、顧雲、王日杏，行走勤慎。該員行走各已五六年，隨圍出差，俱極黽勉。懇將章寶傳、顧雲

賞給吏部，馮光熊、王日杏賞給戶部。其主事章寶傳令在額外員外郎上行走，中書馮光熊等令在額外主事上行走，遇有缺出，酌量請旨補授。奉旨：依議。

二十四年十月二十四日諭：軍營在事諸臣，昨已加恩優敘。至同朕辦理軍務者，惟大學士公傅恆與朕一心，日夜不懈。前因伊犁平定，賜加雙公，曾涕泣固辭。今伊子福靈安尚非披堅執銳之歲，而即能奮勇行陣，屢著勤勞，實愜朕望。著賞給福靈安一等侍衛，以著酬庸之典。大學士來保，年近八十，行走不懈，及諸軍機大臣官員，日夜隨侍，候報鈔錄，一切均著勤勞。大學士傅恆、來保及軍機大臣並軍機處行走官員，著交部一併議敘。

二十七年十二月初六日本處奏：看得現在軍機處之中書薩靈阿、陸燿、劉秉恬、張霽、王昶，綴匹庫大使塞爾布，各已行走四五年不等，俱屬勤慎黽勉，尚堪造就。可否懇將薩靈阿等六員賞給臣等吏、兵二部各一員，戶、刑二部各二員，令其在額外主事上行走，兼辦部務，遇有缺出，奏請補授。奉旨：依議。

三十五年三月初六日本處奏：查軍機處行走之內閣侍讀孫士毅、戶部額外主事惠齡，前經臣傅恆帶往軍營，辦事甚屬出力。孫士毅現在俸深，即應陞郎中，懇恩准在戶部郎中上行走，遇有缺出，即行補用。惠齡係應補蒙古主事之員，但戶部蒙古主事止有一缺，補用甚難。該員先後在部行走已閱十年，尚未得缺，現在出有蒙古員外郎一缺，可否即將惠齡陞補。謹奏。奉旨：

孫士毅著在戶部郎中上行走，遇缺即補。惠齡著補授戶部蒙古員外郎。

十二日，秦堡莊途次軍機大臣面奉諭旨：軍機處行走章京准其帶用大紅帽罩。

三十七年十二月二十六日諭：批本奏事軍機處章京及凡內廷行走之員，一體穿用貂褂。

三十八年五月初一日旨：四庫全書處總纂官軍機處郎中陸錫熊，著照懋勤殿翰林節賞、年賞之例，賞給一分。

六月 日諭：博清額以派往審事之人，即同富勒渾帶兵馳守蒙古橋，旋往美諾，與海蘭察督兵聲援。連日海蘭察奏到諸摺俱有條理，必係博清額爲軍機章京，辦事年久，熟習機宜，故能周到若此。著賞戴孔雀翎。

謹按：博清額時赴四川軍營鞫案，旋授領隊大臣。

七月初一日諭：御史金雲槐因巡漕事竣，前來熱河復命。見其人尚明白，曾在軍機處行走，御史無需辦之事，著馳驛前往四川交與富勒渾、文綬酌量以道府用，令其辦理軍需事務。

三十九年五月初二日本處奏：查軍機處行走之候補員外郎馮應榴，因前在四川學政任內，率據州詳咨請開復革生一案，部議降調，捐復原官。上年三月奉旨著仍在軍機司員上行走，以工部員外郎補用。該員明白勤慎，迄今尚未補缺。茲出有吏部員外郎尹壯圖陞任一缺，仰懇聖恩，即以馮應榴調補，令在考功司辦理綜核功過事務。再查有候補員外郎蘇楞泰，前在伊犁先

後十有餘年，辦理同知事務，實心奮勉。前因同知年滿引見，以六部員外郎用，經臣等令其在軍機司員上行走。並懇恩將蘇楞泰賞給刑部，在員外郎上學習行走，遇有缺出，即行題補。奉旨：知道了。

十月十五日本處奏：軍機處行走之中書史夢琦，經臣等奏請陞用兵部額外主事。所遺中書員缺，查有候補中書汪日章行走勤慎，現在尚未得缺，可否即將該員補授之處，出自天恩。奉旨：知道了。

十二月二十七日日本處奏：銀庫員外郎保成將屆年滿，查有軍機處行走吏部文選司郎中永保，人去得，辦事勤慎，實係司員中得力之人。合無仰懇天恩，准其接管銀庫員外郎，於公務實為有益。奉旨：知道了。

四十年五月十八日本處奏：內閣現在共出三缺。查有候補中書龔提身，在軍機處行走三年，奮勉勤慎，尚未得缺。可否於此三缺內賞補一缺，以示鼓勵。謹奏。奉旨：著帶領引見。

四十一年 月 日諭：阿桂等奏，官兵已將金川全境掃平，深為欣慰。大學士于敏中自辦理軍務以來，承旨書諭，夙夜殫心，且能鉅細無遺，較衆尤為勞動。著賞給一等輕車都尉，以示格外恩眷。

五月初五日諭：吏部郎中王昶，在軍營出力年久，頗著勤勞。著加恩陞授鴻臚寺卿，並賞戴

花翎，仍在軍機處司員上行走。

六月初十日日本處奏：查乾隆三十九年九月臣舒赫德赴山東勦捕賊匪，有軍機處行走之中書沈啟震，因丁憂回籍，舟滯德州，情願隨臣效力。臣因是時隨帶司員無多，公事繁冗，不敷辦理，沈啟震向在軍機處行走，素爲熟諳，因留其同至臨清，幫辦一切，頗爲出力。當經將隨帶緣由具奏，奉硃批「俟其服滿時提奏」。今該員服闋來京候補，謹遵旨提奏。奉旨：應陞處陞用。

十月二十六日本處奏：軍機處中書沈啟震，應於本月籤陞河南南陽府同知，據該員稟稱「情願在京供職」等語。該員辦事勤慎，行走有年，甚爲出力。查同知與主事同係中書應陞之缺，臣舒赫德現管刑部，可否將該員以刑部主事用，遇缺即補之處，出自天恩。奉旨：知道了。

二十八日本處奏：中書沈啟震所遺員缺，查有候補中書吳熊光行走勤慎，可否即將該員補授，出自天恩。謹奏。奉旨：知道了。

四十二年六月初三日日本處奏：查從前軍機處行走之中書等官，曾於乾隆十七年、二十三年、二十七年節次奏請陞用主事，以示鼓勵在案，迄今已閱十餘載。臣等看得現在行走之中書伊江阿、劉謹之、陸瑗，筆帖式齊克慎，各已行走五六年，俱屬勤慎奮勉。可否照前三次之例，將伊江阿等賞給臣等所管各部，令其先在額外主事上行走，遇有缺出，奏請補授。至所遺漢中書缺，現有候補中書程維岳、馮培二員俱在軍機處行走三年，亦屬勤慎，可否即將該員等頂補中書實缺

之處，出自天恩。奉旨：知道了。

四十三年三月二十日本處奏：軍機處行走中書施光輅，選得江西袁州府同知。所遺中書員缺，查有候補中書杜兆基在軍機處行走已及四年，辦事勤慎，可否即將該員補授之處，出自天恩。奉旨：知道了。

五月二十日本處奏：現在出有中書四缺。查候補中書關槐在軍機處行走，勤慎奮勉，可否於此四缺內賞補一缺，以示鼓勵之處，出自天恩。奉旨：知道了。

四十四年十月二十四日本處奏：軍機處行走內閣侍讀孫永清，論俸推陞，應於本月籤掣刑部陝西司郎中缺。查該員行走已及十年，屢次出差及派審案件，均屬明敏諳練，爲軍機得力之員。今推陞刑部郎中，該衙門案件繁多，不能專辦本處事務。請將該員以郎中陞銜，暫留內閣侍讀之任，俾得專心仍辦軍機處之事。臣等多一熟練之員，於公務亦有裨益。奉旨：知道了。

樞垣記略卷之七

恩敘二

乾隆四十五年二月十五日本處奏：內閣中書汪日章，在軍機處行走五年，頗爲勤慎，現在派出隨營辦事，亦能奮勉。懇將該員賞給臣福隆安所管之兵部，在額外主事上行走，俟有缺出，奏請補用。奉旨：知道了。

二十四日本處奏：軍機處滿洲學習中書德倫，行走勤慎，諸事奮勉，凡遇頒發班禪額爾德尼敕書等件，俱係該員繕寫，實爲得力。懇恩遇有中書缺出，不論旗分，即令該員實授。奉旨：知道了。

四月初八日旨 候補戶部郎中汪承需，現在軍機處行走。著加恩令其先行食俸，遇有戶部郎中缺出，即行補授。

五月十四日旨 侍郎董誥、福長安俱在軍機處行走，著加恩於紫禁城內騎馬。

十一月二十日本處奏：軍機處行走之宗人府主事李燾，京察一等，例應籤掣調補六部主事。該員行走勤慎，可否將該員賞給臣等戶部，在額外主事上行走，俟有缺出，奏請補用。奉旨：知

道了。

四十六年五月初七日本處奏：現在出有中書方維甸等五缺。查候補中書章煦、毛上良在軍機處行走，尚屬勤慎。可否於此五缺內賞補二缺，以示鼓勵之處，出自天恩。奉旨：知道了。

七月初九日本處奏：現在出有中書二缺。查有候補中書張敦培在軍機處行走，頗屬勤慎。可否於此二缺內賞補一缺，以示鼓勵之處，出自天恩。奉旨：知道了。

十二月初二日本處奏：查軍機處行走出力人員，遇有陞遷等事，向經臣等奏懇賞給陞銜，仍留本處辦事在案。茲有內閣中書裘行簡，俸滿引見，記名同知。該員在軍機處行走五年，辦理一切承發事件，頗爲勤奮，以之陞補外任，殊覺可惜。可否仰懇賞給陞銜，仍留中書之任，俟有應陞相當缺出，或由內閣照例陞用，或臣等酌量題補，再行請旨。謹奏。奉旨：知道了。

四十七年三月二十三日日本處奏：查現在軍機處之中書德倫、杜兆基、毛上良，筆帖式托錦，各已行走有年，俱屬勤慎奮勉，於各部事務尚能諳悉。可否仰懇賞給臣等所管各部，令其在額外主事上行走，遇有題選缺出，奏請補授，出自天恩。至所遺漢中書員缺，現有候補中書毛鳳儀、秦瀛，行走亦屬勤慎，可否即將該員等頂補實缺之處，謹奏。奉旨：知道了。

七月初九日本處奏：陞銜留任中書裘行簡陞補侍讀，所遺中書一缺。查有候補中書沈琨在軍機處行走有年，人亦勤慎細心，可否即以該員補授之處，出自天恩。奉旨：知道了。

四十九年 月 日諭：此次勦辦回匪，三月以來，朕披覽奏章，指示機宜，和坤首承諭旨，繕寫寄發，鉅細無遺，一體宣勞。和坤本身現襲輕車都尉，再著給與輕車都尉世職，歸併前職，照例議襲。其餘在事慶成之軍機大臣梁國治、董誥、福長安，並軍機章京之勤勞出力者，著一併交部議敘，所有此次賞給各世職著世襲罔替。

八月初八日本處奏：現在軍機處之中書趙秉淵、王學海，候補筆帖式福成額，俱勤慎奮勉，人亦明白。可否懇將趙秉淵、王學海二員賞給臣等所管各部，先令其在額外主事上行走，遇有題選缺出，奏請補授。福成額遇有理藩院筆帖式缺出，即行補授之處，出自天恩。奉旨：依議。

五十二年十一月十七日諭：給事中劉謹之在軍機章京上行走二十餘年，奉職勤慎，茲患病身故，伊妻湯氏因夫亡殉節，殊屬可憫。劉謹之著加恩賞鴻臚寺卿銜，並賞銀一百兩治理喪事，湯氏著該部照例旌表，以示軫恤。

五十三年 月 日諭：逆首林爽、文經、福康安等設法生擒，辦理周妥，實屬可嘉。大學士和珅始終承旨書諭，於一切清、漢事件，鉅細無遺，懋著勤勞，自應特加優賞。和珅本係一等男爵，著照從前大學士張廷玉之例，晉封爲三等伯。大學士阿桂、王杰，尚書福長安、董誥，夙興夜寐，一體宣勞，俱著交部議敘。

二月十二日本處奏：軍機處司員修撰戴衢亨，前在山西學政任內，失察武生戕斃人命一案，

部議降調，奉旨改爲革職留任。該員在軍機處行走有年，素爲勤慎，此次勦捕臺灣逆匪，一切查檢檔案，交發文報事件，俱爲奮勉出力，並無貽誤。可否請將該員革職留任之案，准其開復，以示鼓勵。如蒙俞允，現在軍功告竣，即毋庸給予議敘。謹奏。奉旨：知道了。

十九日本處奏：軍機處行走中書張姚成，現經陞補侍讀，所遺中書員缺，查有候補中書程振甲行走勤慎，可否即將該員補授之處，出自天恩。奉旨：知道了。

四月十七日本處奏：軍機處行走中書柴模出一缺。查有候補中書張師誠，行走勤慎，可否即將該員補授之處，出自天恩。奉旨：知道了。

五十四年十月二十九日旨：理藩院蒙古郎中向無調補銀庫郎中之例。軍機章京台布行走有年，辦事甚爲出力，著加恩調補戶部銀庫郎中。

十一月初六日本處奏：現在軍機處之中書張師誠，行走有年，甚屬勤慎奮勉，人亦明白。現在軍機處並無吏部司員，懇將該員賞給吏部，在額外主事上行走，遇有題選缺出，奏請補授。所遺中書員缺，軍機處現有呈請情愿註銷同知候補沈琨，人亦勤慎，可否即以該員補授，伏候訓示。奉旨：知道了。

五十五年十月二十一日日本處奏：中書沈琨、程振甲，行走有年，俱屬勤慎奮勉。懇將二員賞給臣等所管各部，在額外主事上行走，遇有題選缺出，奏請補授。所遺中書之缺，查有軍機處候

補中書金應琦，人亦勤慎，可否扣留一缺，將該員補授之處，出自天恩。奉旨：知道了。

嘉慶三年 月 日諭：勒保奏，掃蕩安樂坪賊巢，膚公克奏。軍機大臣大學士伯和坤襄贊機宜，承旨書諭，一手經理，夙夜宣勞，著加恩晉封公爵。福長安日直樞禁，勞績倍著，自辦理軍務以來，一體始終其事，著加恩賞給侯爵。王杰、董誥、沈初、戴衢亨、那彥成均著交部從優議敘。

四年三月初三日旨：向來軍機大臣多有賞給紫禁城騎馬者。那彥成、戴衢亨現在軍機處行走，不必論其年歲，著加恩在紫禁城騎馬。

五年正月三十日本處奏：軍機章京章煦，現屆俸滿截取知府，給事中汪日章於五月內，亦屆俸滿截取。該二員在軍機處行走二十餘年，於一切事務尚爲熟習，懇恩內用，仍留軍機處辦事等因。奉旨：給事中汪日章、御史章煦著仍留軍機處，加恩以四五品京堂陞用，遇缺提奏。

七月十三日諭：朕承天考默佑，各路軍營連獲勝仗。今又於河南葉縣擒獲邪教首逆多年漏網之劉之協，所糾合之逆黨，一日一夜全行勦捕淨盡，實屬事機順利，年內庶可完功。而大學士慶桂等日侍籌幾，盡心運畫，錫爵酬庸之典，應俟全行底定再沛恩綸。軍機大臣四人，每人先加軍功一級，紀錄三次。軍機章京等，著軍機大臣選擇數名，交部議敘。傅森著賞戴花翎，用示殊恩，不許固讓。

十四日本處奏：昨奉恩旨，令臣等將軍機章京選擇數名，交部議敘。臣等謹擇其尤爲奮勉者十員，開單敬呈御覽，恭候命下，即交部議敘。奉旨：知道了。

銀庫員外郎玉凝、刑部員外郎景敏、戶部員外郎瑞麟、內閣中書多容安，以上滿章京四員。通政司參議汪日章、山西道御史章煦、兵部郎中茅豫、內閣中書何金、吳光悅、傅淦，以上漢章京六員。

六年 月 日諭：額勒登保奏，將賊匪掃蕩無遺。軍機大臣慶桂、董誥、戴衢亨承旨書諭，尚能周到勤勉，著加恩交部從優議敘。

九月二十六日旨：軍機大臣奏「太僕寺少卿章煦已陞任大理寺少卿，照例不應兼辦章京」等語。但念該員在軍機處行走有年，於勦辦教匪一切事宜，本係熟手。此時大功指日告竣，若令其即離樞直，轉不能仰邀恩敘。著加恩暫在軍機章京上行走，俟大功告竣，再回本衙門供職。

十月十一日諭：內閣中書姚祖同著加恩以各部主事用，遇缺即補，仍在軍機章京上行走。

十一月二十四日旨：慶桂、董誥、戴衢亨俱著軍功加三級，成德著軍功加一級，紀錄三次。至章煦祇係軍機章京，雖繕辦一切尚能明晰，但與慶桂等一體優敘，同加軍功三級，未免無所區別。章煦著改爲軍功加二級，餘依議。

七年 月 日諭：德楞泰節次殲擒首逆，疊次加恩，此次又復將元兇極惡之樊人傑及首逆

曾芝秀等奮勇逼勦，投河淹斃，德楞泰著加恩晉封三等侯。軍機大臣慶桂、董誥、戴衢亨承旨書諭，甚屬周到勤勉，著加恩從優議敘。軍機章京承辦軍務最久，亦著交部議敘。

四月初五日本處奏：查向來軍機處行走之候補內閣中書，有辦事勤慎未經得缺者，節經奏請補授實缺在案。今內閣中書姚祖同補授兵部主事，其所遺中書一缺，查有候補中書袁煦在軍機處行走，尚屬勤慎，即以該員補授之處，出自天恩。謹奏。奉旨：依議。

六月初十日諭：軍機處出力滿、漢章京，著慶桂等擇其尤爲勤奮者奏明，交部議敘。

十二日覆奏：臣等查滿、漢章京玉凝、文孚、富綿、興科、錢楷、黃躍之、盧蔭溥等，辦事較爲奮勉，應請旨將該員等交部議敘。其刑部主事汪彥博、工部主事楊懋恬、吏部候補主事萬雲在軍機處行走，均屬勤勉，應請量加鼓勵。將汪彥博、楊懋恬遇有應陞本部題選缺出，即行陞用，萬雲一員遇有本部主事缺出，先行實授，俱毋庸另給議敘。謹奏。

又片奏：再臣等查從前軍機處行走滿、漢章京內有辦事奮勉者，每隔三五年均經保奏一次，分別陞用，以示鼓勵。乾隆四十七年、四十九年、五十四年疊經保題各在案，自五十五年以後至今未經保奏。茲臣等看得內閣中書松寧，吏部筆帖式德克津布，刑部筆帖式吉祥，以主事用之俸滿內閣中書趙佩湘、胡枚，內閣中書曹惠華、吳光悅等，行走有年，俱屬勤慎奮勉，亦能留心部務。可否仰懇天恩，俯准將該員等賞給臣等所管吏、戶、刑三部，及理藩院衙門，先令其在額外

主事上行走，遇有題選缺出，即行奏補。如蒙俞允，除吏部筆帖式德克津布、刑部筆帖式吉祥仍在本部行走外，所有松寧等五員，臣等公同令其籤分行走。再松寧一員，現在丁憂，俟服闋後再行遇缺請補，謹奏。奉旨：向來軍機處行走滿、漢章京內，有辦事奮勉者，每隔三五年經軍機大臣保奏一次，加恩分別陞用，自乾隆五十五年以後，久未辦及。且數年來，辦理軍務該章京等繕寫諭旨、抄錄檔案，甚爲出力。現在軍營連次擒渠奏捷，大功指日告成，據軍機大臣將出力章京遵旨查明保奏。所有辦事奮勉之章京玉凝、文孚、富綿、興科、錢楷、黃躍之、盧蔭溥著交部議敘。刑部主事汪彥博、工部主事楊懋恬遇有本部應陞題選缺出，著即行陞用。吏部候補主事萬雲著遇缺即補。內閣中書松寧、趙佩湘、胡枚、曹惠華、吳光悅著以主事陞用，先令在吏部、戶部、刑部、理藩院各衙門籤分行走，遇有題選缺出，即行奏補。吏部筆帖式德克津布、刑部筆帖式吉祥著各以本部主事陞用，遇有題選缺出，即行奏補，該部知道。

十二月十六日諭：本日據額勒登保、德楞泰、勒保、惠齡、吳熊光等聯銜遞到六百里加緊奏報，川、陝、楚勦捕逆匪大功戡定。此事係勦捕內地亂民，雖非勦平外域拓土開疆可比，然辦理已及七載，領兵大臣及各督撫並在廷王大臣等均能各殫心力，用戴鉅功，允宜普沛恩綸，酬庸懋賞。成親王於四年在軍機處行走，幾及一載，贊襄機務，一切勦捕機宜，深資譬畫，今大功告竣，自應嘉獎公勤。王已列親藩，著施恩加賞一員勒，令其子綿懃受封。至軍機處行走之大學士慶

桂、董誥，尚書戴衢亨，均經皇考簡任多年，克盡忠悃，知無不言，言無不盡，自用兵以來，承旨書諭，勤慎小心。朕敬推皇考之恩，慶桂、董誥著賞給騎都尉世職，戴衢亨著加太子少保銜，仍賞給雲騎尉世職。尚書劉權之、德瑛雖在軍機處行走未久，其素日陳奏亦時有所見，均著加恩交部議敘。大理寺少卿章煦在軍機章京上行走年久，辦理軍務，始終其事，著加恩交部從優議敘。

十七日諭：昨據額勒登保等馳遞三省大功告成喜報，軍機處章京除大理寺少卿章煦一員業經加恩優敘外，其列入一等滿章京郎中德綸，員外郎玉寧、文孚；漢章京郎中錢楷，內閣侍讀何金，主事吳光悅、趙佩湘、盧蔭溥、姚祖同均著交部從優議敘。列入二等滿章京員外郎瑞麟，主事德克津布、吉祥、興科、昌宜泰、松寧、祥臨，內閣中書多容安、福綿、伊星阿、明安泰，筆帖式武爾通阿、德寧額，漢章京員外郎任烜、張志緒、汪彥博，主事萬雲、糜奇瑜、胡枚、黃躍之、曹惠華、楊懋恬，內閣中書袁煦均著交部議敘。

八年 月 日諭：本日由六百里遞到額勒登保、德楞泰、勒保會奏官兵勦捕餘匪全竣，三省地方肅清，喜摺覽奏，實深欣慰。軍機大臣等承旨書諭，獲與觀成，大學士慶桂宣力有年，且在軍機處行走，班次居首，著加恩賞戴雙眼花翎。大學士董誥之子董淇本由廕生任戶部員外郎，著加恩以六部郎中用。尚書劉權之、德瑛在軍機處行走已越一年，劉權之著加恩交部議敘；德瑛昨因會同禮部具摺，字句疎忽，部議時已經加恩留任，此次毋庸交部議敘。尚書戴衢亨之子

年尚幼稚，伊姪候選縣丞戴嘉穀，著加恩賞加知縣陞銜，仍令在實錄館效力行走。軍機章京等，著軍機大臣查開出力之員，據實保奏，候朕加恩。

三月二十九日諭：昨吏部將俸滿截取知府之刑部郎中錢楷帶領引見，已降旨記名以繁缺知府用。本日詢之軍機大臣，據稱「該員在軍機章京上行走年久，諸事熟悉，若照例外用，轉少一得力熟手」等語。錢楷著加恩賞給陞銜，仍留郎中本任，在軍機章京上行走。

十年閏六月初二日諭：此次軍機處擬辦保奏章京等一事，內閣典籍齊嘉紹、中書蔡炯、袁煦先後挑入軍機章京上行走，日期則袁煦尚屬較少。惟袁煦係於挑入後奏補實缺，業經邀恩，與齊嘉紹、蔡炯循例補缺者不同，自不應一併列入。所有擬定保奏章京各員除袁煦業已退出外，其餘亦且無庸保奏。

十一年正月二十一日日本處奏：竊查軍機處行走滿、漢章京內中書、筆帖式等官，向來每閱三四年由臣等選擇當差勤奮者，分別保題，懇恩陞用在案。上年夏間，因距前次保題已逾三年，臣等曾公同商酌擬請將內閣典籍齊嘉紹、中書蔡炯、刑部筆帖式武爾通阿三員循例保題，未經具奏，仰蒙訓示，飭令暫緩辦理。查齊嘉紹等三員均係嘉慶四年挑補軍機章京，行走有年，均屬勤慎，自去夏以來，臣等隨時留心察看，亦各奮勉如常。可否准將齊嘉紹、蔡炯、武爾通阿三員以六部主事陞補之處，出自聖主洪恩。如蒙俞允，應請循照舊案，將該三員由臣等分掣所管吏、

戶、刑三部，先令在額外主事上行走，俟有各本衙門題選缺出，即行奏補。則該員感被恩施，自當益加奮勉。謹奏。奉旨：齊嘉紹、蔡炯、武爾通阿，均著以主事陞用，先令分掣吏、戶、刑三部行走，遇有各本衙門題選缺出，即行奏補。

十一年五月二十二日諭：刑部郎中錢楷、員外郎文孚，均在軍機處行走多年，辦事勤勉，俱著加恩以四五品京堂用，遇有缺出，交吏部夾單請旨。

十二年 月 日諭：此項京察引見三品以下京堂各官，太常寺少卿錢楷、內閣侍讀學士文孚在軍機處行走有年，供職勤慎，著加恩交部議敘。

十四年三月初一日日本處奏：軍機章京上行走各員，自嘉慶十一年正月保奏之後，已逾三年。臣等留心察看現在行走各員內，勤慎出力者居多，但一時礙難遽予陞擢，惟其中有尚未得缺者數員，應行量爲調劑。臣等詳查舊案，公同商酌，除內閣滿洲中書重倫，應俟將來不論旗分出缺時，准其奏補實缺，中書梁承福，亦俟將來有缺之時奏補，又理藩院候補主事德寧額、工部候補主事張之屏二員，均應請遇有該衙門滿、漢、蒙古題選主事缺出，先予補用外，惟查有禮部候補主事伊星阿、工部候補主事童槐二員，或本衙門原祇一缺，且出缺尚早，需次無期，此次即准其在本衙門儘先補用，仍屬淹滯。合無仰懇聖恩，將該二員改掣臣等所管缺分較多之戶、刑二部，伊星阿遇有滿洲、蒙古缺出，先予補用，童槐遇有題選缺出，先予補用。如蒙俞允，臣等公同籤掣

移咨吏部，查照辦理。再查有兵部候補主事康紹鏞，嘉慶四年分部學習，按照本衙門資格，久已頂補。而該員在軍機處行走五年，實屬奮勉，茲屆保奏之期，若不量加鼓勵，未免向隅。惟此時亦未敢遽請陞擢，相應請旨，交本衙門存記，俟補缺後，遇有本衙門應陞之缺，先行擬補。又理藩院主事多容安，前由實錄館議敘，本係應陞員外郎之員，但吏部議敘分缺間補。該員資深出力，可否准其在先陞用之處，出自天恩。謹奏。奉旨：軍機滿、漢章京未經得缺各員內，內閣滿洲中書重倫俟將來不論旗分缺出，准其補授實缺。漢中書梁承福俟將來有缺時，准其奏補。理藩院候補主事德寧額、工部候補主事張之屏，遇有該衙門滿、漢、蒙古題選缺出，先行補用。其禮部候補主事伊星阿、工部候補主事童槐著於缺分較多之戶、刑等部籤掣行走，伊星阿遇有滿洲、蒙古缺出，先行補用，童槐遇有題選缺出，先行補用。至兵部候補主事康紹鏞，原係本衙門頂補之員，著交兵部存記，俟補缺後，遇有應陞缺出，先行保奏。其本係應陞員外郎之理藩院主事多容安一員，遇有本衙門缺出，准其先行陞用。

七月十七日本處奏：軍機章京候補中書王鳳翰行走尚屬勤勉，又本年中式後，奉旨遇缺即補。現有中書缺出，請將王鳳翰補授。謹奏。奉旨：知道了。

二十六日旨：兵部郎中姚祖同在軍機處行走有年，尚爲熟諳。前已截取知府，現距選期不遠，著交部暫行扣選。

樞垣記略卷之八

恩敘二

嘉慶十五年二月十七日諭：此次京察屆期，光祿寺漢少卿盧蔭溥在軍機章京上行走，繕寫諭旨，尚屬妥協，節經派往外省查辦案件，均無貽悞。盧蔭溥著加恩交部議敘。伊現在出差，回京後，吏部不必補行帶領引見。

六月十九日本處奏：原任顏料庫司庫軍機章京穆馨阿，因上年王書常冒領廣儲司銀兩，案初發覺，臣等會同刑部研審，即派穆馨阿隨同問供。其冒領三庫銀兩物料一事，係穆馨阿訊出端倪，告知臣等，始行徹底根究，水落石出。彼時因穆馨阿職係司庫，又係伊任內之事，例應迴避，是以撤回，後經被議革職。今據呈稱年力強壯，不甘閒居等因，前來相應據情代奏。可否賞給差使之處，出自天恩，謹奏。奉旨：穆馨阿著加恩賞給三庫庫使。

二十九日諭：軍機大臣承旨書諭，自勦辦洋匪以來，頗屬勤慎。現在巨盜殄除，洋面肅清，亦宜加之恩獎。慶桂、董誥、戴衢亨、托津，所有降革罰俸處分，著加恩擇其較重者，各予開復一次，仍各賞給軍功加一級。其軍機章京等，並著軍機大臣分別等次奏明，交部議敘。

七月初四日覆奏：臣等公同酌擬，將平素差使較爲奮勉者列爲一等，其餘行走勤慎者均列爲二等，謹開具名單請旨。謹奏。

擬列一等章京三員：盧蔭溥、姚祖同、何金。擬列二等章京十四員：戶部郎中糜奇瑜，禮部郎中熊方受、龔麗正，刑部郎中齊嘉紹、余需元，宗人府主事王厚慶，戶部主事胡枚、童槐，兵部主事康紹鏞，工部主事張之屏，禮部候補主事聶鏡敏，兵部候補主事程同文，內閣中書梁承福、王鳳翰。

是日奉旨：軍機章京盧蔭溥、姚祖同、何金，均著施恩加二級，糜奇瑜、熊方受、龔麗正、齊嘉紹、余需元、王厚慶、胡枚、童槐、康紹鏞、張之屏、聶鏡敏、程同文、梁承福、王鳳翰，均著施恩加一級。

十月初九日本處奏：滿洲章京戶部主事伊星阿，在軍機處行走十有餘年，熟諳清文，差使勤慎。該員係蒙古旗分人員，應陞之蒙古員外郎缺分較少，向來各部蒙古司官內有出色人員借陞滿洲缺，俟蒙古缺出仍行補還成案。臣戶部現出有廣東司滿洲員外郎一缺，係屬題缺。但伊星阿係本部主事，合無仰懇天恩，將伊星阿陞補廣東司滿洲員外郎，俟本部蒙古員外郎缺出，仍照例補還，恭候欽定。奉旨：曹振鏞等奏「戶部蒙古主事伊星阿，陞補滿洲員外郎，與例未符，請交吏部核議」一摺。伊星阿陞補滿缺之處，原屬與例不符，若交吏部核議，必行議駁。但該員在軍

機處行走有年，辦事出力，緣蒙古缺分本少，陞遷無路。是以前經軍機大臣慶桂等保奏，並聲明各衙門蒙古司員均有借補滿缺之案。所有現在戶部廣東司題缺滿洲員外郎，著施恩准以伊星阿借補，仍著該部帶領引見。

十月二十一日日本處奏：竊查勦平三省邪匪方略一部，臣等自嘉慶七年奏奉諭旨，敬謹纂輯，現在全書四百卷告成。除奉表恭進外，伏思邪匪不靖始於嘉慶元年正月，迨七年大局戡定，又經八年九年兩次奏報，然後肅清，其一切善後事宜，直至十年五六月間方竣，是書包括十年。其間軍營奏報，隔數日一至，或一日數至。簡牘繁多，刪節所存，今尚不可紀數。我皇上宵衣旰食，指示機宜，明燭於數千里之外，而裁決於不移晷之間。前後詔旨凡數千道，無一日不勤籌筆，無一日不關睿謨。蓋上以續高宗純皇帝未竟之志，莫我大清萬年丕丕基，俾天下臣民同享太平者，胥於是乎！在臣等敬謹纂輯，不敢率忽，數年陸續進呈，仰蒙幾餘觀覽，隨時指示更正，幸免舛訛，茲獲告成。查從前乾隆年間，兩金川方略告成，係照準噶爾方略告成之例，蒙恩將在館人員給予優敘在案。惟是前兩部方略皆祇百數十卷，此次方略多至倍餘，所有在館人員，實皆奮勉出力，可否量加從優，示之鼓勵。如蒙俞允，除臣等不敢仰邀議敘，又章煦、錢楷於正編告成時業經仰邀恩敘外，其現在總纂及提調、收掌、纂修、校對、譯漢官、膳錄、供事人等，臣等謹擇其始終承辦並格外出力者數員，另繕清單，恭呈御覽。其餘人員，臣等核其在館年月及平日

差使，分別等第，造冊咨部。其膳錄、供事應如何過班銓選，及照國史館膳錄、供事給予分發之處，均註明冊內，統歸吏部核辦。仍照例酌留熟手，趕辦畫一，另繕副本請交武英殿開雕，刻期妥辦。其從前開館時奏請添派之纂修、膳錄各員，屆時分別酌撤。謹奏。

總纂兵部郎中姚祖同，該員先充纂修提調，又接辦總纂。數年前後，纂書二百餘卷，始終其事。前因軍機處行走勤慎，是以俸滿截取，及兩次京察一等記名時，俱經臣等具奏在案。查郎中應陞之缺，如內閣侍讀學士、鴻臚寺少卿，即係四五品京堂，至此外各京堂不皆開列。從前章煦、錢楷均係奉特旨，遇有四五品京堂缺出提奏，臣等未敢奏請，理合聲明，請旨。幫辦總纂內閣侍讀何金，該員充當提調纂修，近來復幫辦總纂，始終其事。該員在軍機處行走多年，實爲奮勉，兩次京察一等記名，經臣具奏在案。向來內閣侍讀與各部員外郎較俸，不過二三年即選郎中，近來班次擁擠，該員俸已八年，現在甫將選補。查從前文孚係由員外郎蒙恩以四五品京堂提奏，臣等未敢躐等奏請，可否俟其選補郎中後，量加升擢之處，理合聲明。譯漢官兼纂修理藩院司務克精額，該員在館三十餘年，從前金川方略告成，即曾得過議敘，現在當差奮勉。查該員係記名撫民通判，名次略後，可否請旨先行選用。

是日奉旨：慶柱等奏「纂輯勦平三省邪匪方略四百卷告成，奉表恭進」一摺。勦捕邪匪一事，始於嘉慶元年，迨七年大局戡定之後，搜捕零匪，經理善後，至十年始克辦竣。朕纘承先緒，

籌筆孜孜，宵旰敬誠，克臻完善。一切機宜，運畫允宜，垂示一編。慶桂等奉命纂辦，數年來，率同在館人員，陸續繕輯呈進，朕隨時披覽，親加裁定。前後卷帙繁多，尚爲詳悉賅備，所有大小出力各員，自當普加優獎。慶桂等摺內雖自稱不敢仰邀議敘，仍應特沛恩施。慶桂任內並無應行開復處分，著加恩賞給加一級，紀錄二次。董誥任內有未經究出劉貴兒等夥竊謀命一案，降一級留任處分。著加恩開復，仍賞給加一級。戴衢亨任內有失察書吏冒領三庫銀物一案，降一級留任處分。著加恩開復，仍賞給加一級。托津任內有失察書吏冒領三庫銀物及未能究出劉貴兒等夥竊謀命，降一級留任二案處分，均著加恩開復。總纂兵部郎中姚祖同、幫辦總纂內閣侍讀何金，在軍機章京上行走，均已年，小心奮勉，茲承辦方略，尚屬詳慎。姚祖同著加恩以四五品京堂陞用，交軍機處存記，遇有缺出，於本內夾單提奏。何金著加恩俟補授郎中後，以四五品京堂陞用，交軍機處存記，遇有缺出，於本內夾單提奏。伊二人均仍著交部議敘。譯漢官克精額在館年久，該員係記名撫民通判，著加恩先予選用，其餘在館各員，均著加恩賞給優敘。其摺內所請將臚錄、供事過班銓選，及給予分發送部核辦之處，均著照所請行。

十六年 月 日諭：此次呈進詩冊，籍隸山西現在隨圍之軍機章京康紹鏞、張之屏、王鳳翰，著加恩各賞給五絲緞二件。

十七年四月初十日日本處奏：查軍機處行走滿、漢章京各員，自嘉慶十四年三月保奏之後，

已逾三年。臣等留心察看，擇其行走勤慎者數員，公同酌擬。查兵部候補主事珠滿，係應得蒙古主事之缺，惟該部僅止一缺，需次無期。請酌調臣慶桂所管缺分較多之理藩院行走，遇有題選缺出，即行坐補。刑部筆帖式誠安、理藩院筆帖式昌熾，均請以本衙門主事陞用，遇有滿洲、蒙古題選缺出，即行坐補，昌熾俟服闋後再行實授。內閣滿洲學習中書企善，請俟出有中書實缺，不論旗分，准其奏補。又宗人府主事王厚慶，該員例與各部主事一體推陞員外郎，請即以應陞之員外郎陞用，並循照舊案，將該員掣分臣等所管戶、刑二部行走，遇有題選缺出奏補。又吏部候補主事趙盛奎、刑部候補主事秦繩曾，均請列於該部應補各項人員之前，遇有題選缺出，即行奏補。謹奏。奉旨：依議。

十八年十二月十三日旨：軍機章京著軍機大臣查明尤爲出力者，保舉數員交部從優議敘，其餘各員並著交部議敘。

十七日本處奏：臣等公同查得軍機處行走滿、漢章京鴻臚寺少卿康紹鏞、兵部郎中程同文、內閣侍讀重倫、禮部主事王鳳翰、起居注主事吳書城、吏部候補主事趙盛奎、戶部候補主事張允垂、工部庫使穆馨阿八員尤爲勤奮出力，謹據實保奏。請將康紹鏞、程同文、重倫、王鳳翰、吳書城、穆馨阿六員從優議敘。趙盛奎一員前經臣等于循例甄別案內保奏，儘先補用。該員因吏部另案降調，今已捐復，可否仍照臣等原奏給還，儘先補用，免其試俸。又張允垂一員，尚未得缺，

並請遇有本部缺出，儘先補用。此二員無庸另給議敘，其餘滿、漢各員，均遵旨交部議敘。謹奏。奉旨：依議。

又旨：盧蔭溥、桂芳俱著在紫禁城內騎馬。

十九年二月三十日諭：自上年九月內，逆匪林清勾結豫東教匪聚衆謀逆，勦辦甫竣。其時南山匪徒，因陝省兵將征調遠出，乘虛劫掠，復派凱撤官兵分路勦除，現已一律肅清，軍務全行報歲。軍機大臣贊勸樞務，夙夜勤勞，宜沛恩施，以昭優獎。董誥之子候補員外郎董淳，著加恩以郎中用。托津之子乾清門二等侍衛恆齡，著賞給頭等侍衛，仍在乾清門行走。盧蔭溥之子監生盧本，著賞給舉人，准其一體會試。桂芳之子監生炳奎，著賞給七品小京官。所有軍機章京，著軍機大臣擇其尤爲出力者，保奏數員，再予甄敘。

閏二月初七日覆奏：臣等查得內閣侍讀學士姚祖同、刑部郎中王厚慶、刑部主事秦繩曾、理藩院候補主事昌熾、起居注主事吳書城、工部庫使穆馨阿，均尤爲出力，相應據實保奏。姚祖同、王厚慶、秦繩曾、昌熾四員請旨交部議敘。其吳書城、穆馨阿二員兼自上年承審逆案，數月以來，奮勉不懈。吳書城係起居注主事，可否准其掣調臣等所管戶、刑二部行走，遇有題選缺出補用。穆馨阿從前本係內閣中書，因調管顏料庫司庫失察書吏冒領庫物革職，係本案由該員自行審出，奏蒙賞給庫使，仍在軍機處行走。可否將該員開復內閣中書，遇缺即補，出自天恩。謹

奏。奉旨：依議。

二十年四月二十二日本處奏：軍機處行走滿、漢章京各員，自嘉慶十七年四月初十日保奏之後，已逾三年。臣等留心察看，於各章京內擇其行走勤奮者數員，公同酌擬。查滿章京內候補中書穆馨阿，係由實缺中書緣事革職賞給庫使，上年二月經臣等以該員審辦逆案出力，奏請開復中書，奉旨允准在案。但該員應按本旗本堂缺出頂補，尚需時日，請將該員不論旗分，滿、漢本堂中書缺出，即行補用，將來遇本旗本堂缺出，再行照例調還。刑部筆帖式桂凝，請以本衙門主事陞用，遇有題選主事缺出，即行奏補。又查漢章京內工部候補主事徐鏞、吳孝銘二員，均請列於該部應補人員之前，遇有題選主事缺出，即行奏補。刑部額外主事楊振麟，係由小京官六年俸滿經該部照例奏准作爲額外主事。該員在額外行走已逾兩年，應請俟照例扣足三年，期滿後，遇有本衙門題選主事缺出，儘先補用。謹奏。奉旨：依議。

二十一年正月初八日旨：軍機章京兵部郎中程同文，著吏部暫停銓選。

七月十九日旨：托津、盧蔭溥，著賞穿綠牙縫靴。嗣後軍機大臣俱准穿綠牙縫靴，著軍機處存記。

二十三年六月十二日本處奏：軍機處滿、漢章京，自嘉慶二十年四月保奏之後，已逾三年。臣等留心察看，擇其行走勤奮者，公同酌擬。查滿章京內閣中書穆馨阿，係應陞內閣侍讀之員，

請以內閣侍讀升用，遇缺即行奏補。兵部筆帖式那丹珠、工部筆帖式瑞慶，係應陞主事之員，請各以本部主事升用，遇有題選缺出，即行奏補。工部候補筆帖式桂芬，係蒙古人員，本衙門蒙古額缺較少，請調理藩院筆帖式，遇有滿、蒙缺出，即行奏補。又查禮部候補主事程喬采、兵部候補主事徐受荃，均請列於該部候補人員之前，遇有題選缺出，即行奏補。主事何增元，係由主事緣事降調，捐復原官仍在原衙門候補，請以本部主事無論咨留缺出，先行奏補，免其試俸。謹奏。奉旨：依議。

九月初三日諭：朕此次恭謁祖陵，大禮慶成。軍機大臣隨扈以來，承旨書諭，悉臻妥協，著加恩各加二級。如舊有降留處分在降三級以下者，准以所加之級抵降二級。

二十四年正月初一日諭：朕本年六旬萬壽，業經頒發恩詔，普惠臣民。比年歲稔時和，河流順軌，中外同慶又安，左右近臣允宜再加恩澤。托津襄贊樞廷多年，辦事老成，承旨書諭，綜理部旗事務，從無貽誤，即偶有小愆，亦係尋常事件，著加恩賞戴雙眼花翎，並賞用紫韁。戴均元任內舊有處分四案不予寬免外，其餘革職留任一案、降級留任一案、罰俸十二案，俱著加恩開復。盧蔭溥任內舊有處分一案不予寬免外，其餘降級留任三案，俱著加恩開復。和寧任內舊有處分五案不予寬免外，其餘革職留任二案、降級留任三案、罰俸二十一案，俱著加恩開復。用示朕履端行慶、優獎勤勞至意。

二十四日諭：大學士托津在軍機處夙夜宣勤；協辦大學士吏部尚書戴均元辦事妥協，人亦敢言，戶部尚書盧蔭溥承旨書諭，夙夜慎勤，俱著加恩，交部議敘。

二月二十日諭：各衙門緊要之地，因辦公起見，原准其將熟練人員暫行奏留。但此事務須核實，期於公事有裨，仍應酌予限制。雖不必定以年月，俟接辦有人時，該堂官仍隨時查明，將該員歸入原班陞轉，不致人才久滯，轉遏其登進之階。軍機章京程同文，前經軍機大臣奏留，暫停銓選。其京察記名道府及截取記名知府兩單內，均著停其開列，仍察看隨時具奏。

道光元年六月十五日日本處奏：軍機處行走滿、漢、章京，自嘉慶二十三年六月保奏之後，已逾三年。臣等留心察看，擇其行走勤慎者數員，公同酌擬。查內閣帖寫中書布延栢勒格，前經中式繙譯進士，以主事即用。該員係蒙古人員，應選蒙古主事之缺，銓補需時。應請酌調缺分較多之理藩院行走，遇有題選缺出，即行坐補。戶部候補主事阿達順，亦係應補蒙古主事之員，該部僅止一缺，需次較難。應請遇有本部滿洲、蒙古題選缺出，即行坐補。理藩院筆帖式桂芬，應請以本衙門主事陞用，遇有滿洲、蒙古題選缺出，即行坐補。又宗人府主事李昌平、禮部主事梁章鉅，均係應陞員外郎之員，均請作為候補員外郎。李昌平循照舊案掣分臣等所管戶、刑二部行走，遇有題選缺出，即行奏補；梁章鉅遇有禮部題選缺出，即行奏補。刑部額外主事錢廷熊，係

由小京官六年俸滿經該部奏准作爲額外主事，該員在額外行走，尚未報滿。應請俟照例扣足三年，期滿後，遇有本衙門題選缺出，先儘補用。謹奏。奉旨：依議。

十月初七日諭：程同文著以四五品京堂候補，仍在軍機章京上行走。

二年正月二十五日諭：大學士曹振鏞、戶部尚書黃鉞，辦理部務本屬妥協，又自簡任軍機大臣以來，敬共所事，實力助勤。禮部尚書文孚在軍機處行走有年，小心勤慎，克盡厥職。吏部尚書盧蔭溥在軍機處行走多年，恪恭匪懈，前因管理吏部、順天府需人，特旨調用，亦能盡心。俱著加恩交部議敘。

樞垣記略卷之九

恩敘四

道光二年二月十六日本處奏：此次辦理漢字檔冊，派出軍機章京吏部員外郎陳彬、內閣中書喬用遷總司校對，頗爲詳慎，應請量予鼓勵。懇恩准令陳彬銷去試俸，喬用遷遇有題選缺出，即行奏補。謹奏。奉旨：陳彬著准銷試俸，喬用遷著遇有該衙門題選缺出，即行奏補。

六月初一日旨：圓明園娘娘廟住房一所，著賞給松筠居住。

三年九月初四日旨：成郡王載銳恭繳熱河下處一所，著賞給軍機大臣作爲公所。

十二月十七日本處奏：臣等於本年七月間恭進遼、金二史正本，並將趕辦元史緣由奏明在案。今據該館提調等稟稱，元史業經繕校完竣，恭繕正本進呈，計二百十卷，裝成二十套，其中地名、人名、官名，悉遵欽定元史語解，悉心校對，俟發下時，臣等即督同該館提調等詳校副本，交武英殿刊刻。臣等恭讀欽定遼史語解、金史語解、元史語解，間有前後兩歧，小註不全，及重複等處，督率提調、纂修等官，敬謹恭繕一分，裝成八套進呈，俟發下時，一併恭送武英殿修飾完善。將來即冠於三史之首，頒列學宮，傳之久遠。臣等不敢仰邀議敘，其校書各員，均屬詳慎，戶部

候補主事俞誦芬尤爲出力，應請遇有該部題選主事缺出，即行充補。所有總校、分校、謄錄、譯漢各員及供事等，臣等核其在館功課分別等第造冊，咨送吏部照例優敘。謹奏。奉旨：依議。

四年四月十六日本處奏：軍機處行走滿、漢章京，自道光元年六月保奏之後，已逾三年。臣等留心察看，擇其行走勤慎者數員，公同酌擬。內閣帖寫中書福英阿，應請遇有滿、漢本堂中書缺出，不計旗分，即行坐補。戶部主事阿達順、烏爾恭額，均請作爲候補員外郎。阿達順係蒙古人員，戶部蒙古員外郎僅止一缺，需次無期。應請遇有本部滿洲、蒙古員外郎題選缺出，即行坐補。烏爾恭額應請遇有本部員外郎缺出，不論題選，即行坐補。刑部員外郎何增元，應請遇有本衙門郎中缺出，毋論咨留，即行升補，仍不積咨留之缺。刑部候補主事馬光瀾，應請遇有主事缺出，毋論咨留，即行奏補。刑部額外主事蔡勳，係由小京官六年俸滿作爲額外主事，該員在額外行走尚未報滿，應請俟照例扣足三年，期滿後，遇有本衙門主事缺出，毋論咨留，即行奏補。謹奏。奉旨：依議。

五年正月二十三日諭：大學士曹振鏞、吏部尚書文孚、戶部尚書黃鉞，管理部務均臻妥善，而承書諭旨，獻替勳勤，尤爲出力；協辦大學士戶部尚書英和和管理部旗諸務，俱能盡職。俱著交部議敘。

六年七月十九日諭：吏部郎中截取知府趙盛奎，著以四品京堂用，停其銓選。

七年三月十四日本處奏：此次辦理漢字檔冊，派出軍機章京內閣候補中書朱達吉、兵部候補主事周濤總司校對，頗爲詳慎，應請量予鼓勵。懇恩准令朱達吉遇有該衙門題選缺出，即行奏補，免其試俸；周濤遇有該部題選缺出，儘先補用。謹奏。奉旨：朱達吉著遇有該衙門題選缺出，即行奏補，免其試俸；周濤著遇有該部題選缺出，儘先補用。

七月十七日本處奏：軍機處行走滿、漢章京，自道光四年七月保奏之後，已逾三年。臣等留心察看，擇其行走勤慎者數員，公同酌擬。內閣中書岳齡係蒙古人員，升途較難。應請作爲候補主事，酌調缺分較多之理藩院行走，遇有滿洲、蒙古題選主事缺出，即行坐補。戶部候補主事文明，請遇有本部題選主事缺出，即行坐補。理藩院筆帖式賽尚阿，請作爲候補主事，遇有本衙門滿洲、蒙古題選主事缺出，即行坐補。內閣中書張祥河、龍汝言，請以六部主事升用，由臣等分掣所管吏、戶、兵、工四部行走，遇有各本衙門題選主事缺出，即行坐補。戶部主事俞誦芬，請作爲候補員外郎，遇有題選缺出，即行奏補。謹奏。奉旨：依議。

八年正月二十五日諭：自道光六年喀什噶爾用兵以來，軍機大臣曹振鏞等佐朕運籌軍務，夙夜勤勞，承書諭旨，鉅細無遺。去歲因四城雖復，首逆未獲，曾經稍示恩榮，朕意未愜。茲元兇生獲，紅旗報捷，軍機大臣等尤當再沛恩施，用昭獎勵。大學士曹振鏞，著晉加太傅銜，賞用紫韁；吏部尚書文孚，著晉加太子太傅銜，賞用紫韁；戶部尚書王鼎，著賞戴花翎；兵部尚書玉

麟，著晉加太子太保銜；工部尚書穆彰阿，著晉加太子少保銜，即在軍機大臣上行走；仍俱著照軍功，交部議敘。其滿、漢軍機章京等，著軍機大臣編列一二三等，候旨施恩。

二十七日諭：昨降旨令軍機大臣將滿、漢軍機章京等編列等次候旨施恩，茲據分別開單具奏。其擬列一等六員內，除趙盛奎已有花翎外，四品銜光祿寺少卿吳孝銘、戶部郎中阿達順，俱著加恩賞戴花翎；候補四品京堂趙盛奎、刑部郎中何增元、吏部員外郎平慶、理藩院主事賽尚阿，俱著加恩交部照軍功例從優議敘。其擬列二等之滿洲章京戶部郎中成貴、內閣侍讀福英阿、戶部候補主事文明、理藩院主事岳齡、內閣中書英桂、刑部筆帖式玉崑、理藩院筆帖式松林、兵部員外郎達興阿、戶部主事春和、內閣候補中書文俊、工部候補主事惠麟、兵部候補主事文丕；漢章京刑部員外郎孫蘭枝、刑部郎中錢廷熊、刑部員外郎馬光瀾、戶部員外郎俞誦芬、工部員外郎傅繩勳、內閣中書朱遠吉、戶部主事張祥河、兵部候補主事龍汝言、兵部主事周濤、內閣中書汪元爵、刑部候補主事徐思荃，俱著加恩交部照軍功例議敘。其行走資淺擬列三等之滿洲章京理藩院候補筆帖式熙成、工部筆帖式桂德；漢章京內閣候補中書方銘彝、工部候補主事鄭喬林、吏部候補主事許球，俱著加恩各賞大緞一疋，由廣儲司給發。

九年九月二十六日諭：朕恭謁祖陵，大禮慶成，軍機大臣俱著加恩賞加二級。如舊有降級留任處分在降三級以下者，准以所加之級抵降二級。

十月二十五日諭：大學士曹振鏞年逾七旬，著於該管衙門應行帶領引見之日，俱免其帶領，以示體恤耆臣至意。

十年七月初九日本處奏：竊查平定回疆勦擒逆裔方略一書，臣等自道光八年二月奉旨詳加纂輯，共成全書八十卷。除奉表恭進外，伏思逆裔不靖，於嘉慶二十五年八月在卡外窺伺，道光六年六月竟敢勾結回衆入卡滋擾，竊據四城，雖大兵進剿，未逾月而迅即克復。比及逆酋授首，經理善後，又越年餘始行蕙事。此數年中，軍報絡繹，簡牘繁多，刪節所存，尚復裒然成帙。我皇上宵旰籌筆，指授機宜，前後詔旨凡數百道，悉皆仰勞聖慮，裁決精詳。臣等奉命纂輯，不敢率忽，數月以來，陸續恭繕進呈，荷蒙幾餘披覽，隨時指示更正。茲已全書告成，裝潢正本，陳設本各一分呈覽，仍祈發下正本一分，交方略館敬謹存儲。此次在館人員編纂詳校，實皆奮勉出力，除臣等不敢仰邀議敘，總纂兼提調官光祿寺卿趙盛奎，現係京堂，亦不敢仰邀議敘外，其始終尤爲出力之理藩院筆帖式松林等，仰懇天恩，分別從優獎勵。其餘總纂、提調、收掌、纂修、協修、校對、譯漢等官及膳錄、供事人等，臣等覈其在館年分功課及平日差使，分別等第，造冊咨部。其膳錄、供事應如何過班銓選，均查照成案，於冊內註明，統歸吏部覈辦。謹奏。

是日諭：曹振鏞等奏「纂辦平定回疆勦擒逆裔方略告成，奉表恭進」一摺。前此回疆軍興，自逆裔滋事，以及元兇授首，經理善後一切機宜，運畫允宜，垂示一編。曹振鏞等奉命纂輯，率

同在館人員，陸續繕呈，朕隨時披覽，尚爲詳悉賅備。現已全書告成，請將在館人員分別甄敘。除曹振鏞等自稱不敢仰邀議敘外，總纂兼提調官光祿寺卿趙盛奎，雖據曹振鏞等奏稱，伊現係京堂，不敢仰邀議敘，惟該員總司編輯，亦有微勞，仍著加恩交部議敘。理藩院筆帖式松林，內閣貼寫中書文俊，刑部主事蔡勳，刑部候補主事徐思荃，吏部候補主事許球，工部候補主事何汝霖，戶部主事張祥河，內閣中書朱達吉、汪元爵，此次在館或總司校讐，或分司編纂，尤爲奮勉出力，應各加以獎勵。松林著作爲候補主事，遇有理藩院滿洲、蒙古題選主事缺出，不論咨留，即行奏補。文俊著遇有滿、漢本堂中書缺出，不計旗分，即行坐補。蔡勳、張祥河俱著作爲候補員外郎，遇有各該部題選咨留缺出，即行奏補。徐思荃、許球、何汝霖俱著作遇有各該部題選咨留主事缺出，即行奏補。朱達吉、汪元爵准銷去試俸，俱著以主事升用，分掣戶、刑兩部行走，遇有各該部題選咨留主事缺出，即行奏補。其餘在館各員及膳錄、供事等，著加恩賞給優敘。

八月十六日本處奏：軍機處行走滿、漢章京，自道光七年七月保奏之後，已逾三年。臣等留心察看，擇其行走勤慎者數員，公同酌擬。應請將理藩院員外郎賽尚阿，遇有該衙門滿洲、蒙古題選咨留郎中缺出，即行升補。內閣中書英桂，請以侍讀升用，遇有缺出，即行奏補。工部候補主事惠麟，係蒙古人員，該部額缺較少，需次無期。請調理藩院行走，遇有該衙門滿洲、蒙古題選咨留缺出，即行奏補。理藩院貼寫筆帖式熙成，請遇有該衙門滿洲、蒙古筆帖式缺出，不計旗

分，即行奏補。內閣中書方銘彝，請銷去試俸，以主事升用，由臣等分掣缺較多之戶、刑兩部行走，遇有該部題選咨留主事缺出，即行奏補。工部候補主事鄭喬林、禮部候補主事王藻，遇有各該部題選咨留主事缺出，即行奏補。謹奏。奉旨：依議。

十一年正月二十二日諭：大學士曹振鏞、吏部尚書文孚、戶部尚書王鼎、工部尚書穆彰阿，久任軍機大臣，贊襄勤慎，承旨詳明，俱著加恩，交部議敘。

五月初四日諭：曹振鏞長子戶部郎中曹恩汗，原得一品廕生，著加恩給予曹振鏞次子曹恩澐承廕，以示體恤。

十二年正月初九日本處奏：平定回疆勦擒逆裔方略一書於道光十年七月間成書八十卷，交武英殿刊刻，仍由方略館校勘，聲明如果詳慎無訛，臣等查照成案，再行奏請鼓勵在案。現據武英殿知照，將校勘全書刷印進呈，所有總司校勘之中書現任起居注主事顧英等，自道光八年到館以來，悉心校讐，尚屬始終奮勉。茲屆全書完竣，臣等查照例案，酌請甄敘。應請將內閣中書現任起居注主事顧英，以六部主事調補，聽候吏部籤掣部分，遇缺即補。候補中書吳葆晉、彭蘊章、徐培、梁逢辰，應請各按吏部原掣名次，遇有選缺中書缺出，俟正班到班時，先用此項議敘一人，次用正班一人。再總校候補中書顏以煥一員，前次總校副本完竣，即經揚威將軍大學士公長齡帶往喀什噶爾辦理善後事宜。上年長齡保奏出力，已奉旨儘先補用，此次應請交部照例議

叙。謹奏。奉旨：依議。

二月二十一日日本處奏：此次辦理漢字檔冊，派出軍機章京工部候補員外郎徐璣、禮部候補主事湯鵬總司校對，頗爲詳慎，應請量予鼓勵。懇恩准令徐璣遇有本部題選員外郎缺出，儘先補用，並免試俸。湯鵬遇有本部主事缺出，無論題選咨留，儘先補用。謹奏。奉旨：徐璣著遇有本部題選員外郎缺出，儘先補用，並免其試俸。湯鵬著遇有本部主事缺出，無論題選咨留，儘先補用。

九月初九日本處奏：軍機處行走滿漢章京，自道光十年八月保奏之後，已逾三年。臣等留心察看，擇其行走勤慎者數員，公同酌擬。內閣中書文俊，請作爲候補侍讀，該員現在丁憂，俟服闋後遇有侍讀缺出，即行奏補。內閣學習中書音德賀，請遇有滿漢本堂實缺中書缺出，不計旗分，即行奏補。工部筆帖式桂德，請作爲候補主事，遇有該衙門題選咨留主事缺出，即行奏補。理藩院候補主事熙成，請遇有該衙門滿洲、蒙古題選咨留主事缺出，即行奏補，補缺後並免試俸。戶部主事萬貢珍，請作爲候補員外郎，遇有戶部題選咨留員外郎缺出，即行奏補。禮部候補主事湯鵬，上年經方略館議敘，儘先補用。惟禮部缺少，該員候補二年，尚未得缺。請循照舊案，掣分臣等所管缺分較多之戶、刑二部，遇有該部題選咨留主事缺出，即行奏補。兵部候補郎中王廣業，請遇有本部題選咨留郎中缺出，即行奏補，並免試俸。刑部候補主事程庭桂，請遇

有本部咨留主事缺出，即行奏補。謹奏。奉旨：依議。

十四年正月初一日諭：大學士曹振鏞由乾隆年間供職詞垣，嘉慶年間洊擢至大學士，朕御極之初，簡授軍機大臣，承旨詳明，倍加勤慎，歷事三朝，爲朕股肱心膂之臣。念其夙夜趨公，宣勤佐治，允宜特沛殊恩，以節勞動。曹振鏞著加恩在紫禁城內乘坐車轎，用示朕優禮耆臣至意。二十二日諭：大學士曹振鏞久任軍機，克勤克敬，年登八秩，精力如常；協辦大學士文孚，戶部尚書穆彰阿、王鼎，承旨精詳，劬勩是賴。俱著加恩，交部議敘。

十月十三日諭：大學士曹振鏞由乾隆年間供職詞垣，嘉慶年間洊擢至大學士，朕親政之初，簡授軍機大臣，久贊綸扉，倍加勤慎。現在年登八秩，精神強固，朕心實深嘉悅，允宜特沛殊恩，以昭懋眷。伊孫曹紹櫛著加恩賞給舉人，准其一體會試，用示朕篤祐耆臣有加無已之至意。

十二月十九日日本處奏：此次承辦清檔，臣等派軍機章京內閣中書英幹、理藩院筆帖式瑞春校對，頗爲詳慎，應請量予鼓勵。英幹請遇有滿、漢本堂實缺中書缺出，不計旗分，即行奏補。惟該員現在丁憂，應俟服闋後遇缺即補。瑞春前因實錄全書告成，經部議補缺，後作爲額外主事。該員補缺無期，請遇有該衙門滿洲、蒙古筆帖式缺出，不計旗分，即行奏補，並免額外主事試俸。謹奏。奉旨：依議。

十六年正月十七日諭：軍機章京工部郎中何汝霖，著加恩遇有郎中應升之京堂缺出，吏部

一體開列請旨，其郎中任內京察一等著即註銷。

謹按：十五年九月二十二日本處奏：軍機章京工部郎中何汝霖，前經俸滿截取繁缺知府，現復記名御史。該員在軍機處行走多年，於一切事務尚爲熟悉，懇請內用，仍留軍機處辦事，以資熟手。奉旨：依議。

九月十一日本處奏：軍機處行走滿、漢章京，自道光十三年九月保奏之後，已逾三年。臣等留心察看，擇其行走勤慎者數員，公同酌擬。內閣中書音德賀，請作爲候補侍讀，遇有侍讀缺出，即行奏補。戶部筆帖式福連，請作爲候補主事，該員現未滿服，俟服闋後遇有本部題選咨留主事缺出，即行奏補。理藩院主事熙成，請作爲候補員外郎，遇有理藩院滿洲、蒙古題選咨留員外郎缺出，即行奏補。理藩院學習筆帖式瑞春，請遇有該衙門滿洲、蒙古筆帖式缺出，不計旗分，即行奏補。刑部主事方銘彝，請作爲候補員外郎，遇有本部題選咨留員外郎缺出，即行奏補。吏部候補主事陳孚恩，請遇有本部題選咨留主事缺出，即行奏補。刑部候補主事江紹愷，請遇有本部題選咨留主事缺出，即行奏補。工部額外主事彭蘊章在額外行走，尚未報滿，應請俟照例扣足三年，期滿後，遇有本部題選咨留主事缺出，即行奏補。謹奏。奉旨：依議。

十七年正月初一日諭：大學士潘世恩，著賞加太子太保銜。

二十二日諭：大學士潘世恩、穆彰阿，協辦大學士王鼎、克勤克敬，不愧贊襄，俱著加恩，交部

議敘。

二月二十一日日本處奏：此次辦理漢字檔冊，派出軍機章京工部候補主事朱應元、兵部候補主事劉最昌總司校對，頗爲詳慎，應請量予鼓勵。朱應元、劉最昌懇恩准令遇有本部主事缺出，無論題選咨留，儘先補用。謹奏。奉旨：朱應元、劉最昌均著遇有本部主事缺出，無論題選咨留，儘先補用。

十一月初九日諭：都察院左都御史奎照，著加恩在紫禁城內騎馬。

十八年八月二十三日諭：大學士穆彰阿，在內廷宣力有年，現丁母憂，著加恩賞給廣儲司銀五百兩經理喪事。

十二月十八日本處奏：此次辦理清字檔案，臣等派軍機章京戶部筆帖式恩符、理藩院筆帖式齡椿總司校對，頗爲詳慎，應請量予鼓勵。懇恩准令恩符、齡椿均作爲候補主事，遇有該衙門滿洲、蒙古題選主事缺出，即行奏補。謹奏。奉旨：恩符、齡椿均著作爲候補主事，遇有該衙門滿洲、蒙古題選主事缺出，即行奏補。

二十一日諭：大學士潘世恩，在內廷宣力有年，端方勤慎，遇事細心，現屆七旬，精神強固。著加恩賞戴花翎，以示優眷。

樞垣記略卷之十

恩敘五

道光十九年九月十九日本處奏：軍機處行走滿、漢章京，自道光十六年九月保奏之後，已逾三年。臣等留心察看，擇其行走勤慎者數員，公同酌擬。刑部筆帖式崇祥，請作爲候補主事，遇有本部題選咨留主事缺出，即行奏補。理藩院筆帖式崇泰，請作爲候補主事，俟服闋後，遇有該衙門滿洲、蒙古題選咨留主事缺出，即行奏補。內閣學習中書春長、穆蔭，均請遇有滿、漢本堂實缺中書缺出，不計旗分，即行奏補。刑部主事程庭桂，請作爲候補員外郎，遇有本部題選咨留員外郎缺出，即行奏補。內閣中書王積順，請銷去試俸，以主事升用，由臣等分掣缺分較多之戶、刑兩部行走，遇有該部題選咨留主事缺出，即行奏補。刑部候補主事林揚祖、工部候補主事陳本欽，均請遇有本部題選咨留主事缺出，即行奏補。謹奏。奉旨：依議。

二十年正月初一日諭：大學士王鼎，著賞加太子太保銜。

二十六日諭：大學士穆彰阿、潘世恩、王鼎，矢慎矢公，贊襄攸賴，俱著加恩，交部議敘。

三月初七日諭：何汝霖著賞加三品頂戴。

五月十三日諭：軍機章京陳孚恩，著加恩以四五品京堂候補，遇缺提奏。該員本任吏部郎中，著即開缺。

謹按：十九年六月初七日日本處奏，軍機章京吏部員外郎陳孚恩蒙恩記名御史。該員在軍機處行走多年，辦理一切事務尚爲熟悉，懇請仍留軍機處行走，以資熟手。如蒙俞允，應即將御史注銷。奉旨：依議。

二十二年二月十三日本處奏：此次辦理漢字檔冊，派出軍機章京工部候補主事江鴻升、刑部候補主事喬晉芳總司校對，頗爲詳慎，應請量予鼓勵。江鴻升、喬晉芳懇恩准令遇有本部主事缺出，無論題選咨留，儘先補用。謹奏。奉旨：江鴻升、喬晉芳均著遇有本部主事缺出，無論題選咨留，儘先補用。

十月初一日日本處奏：軍機處行走滿、漢章京，自道光十九年九月保奏之後，已逾三年。臣等留心察看，擇其行走勤慎者數員，公同酌擬。理藩院主事瑞春，請作爲候補員外郎，遇有理藩院滿洲、蒙古題選咨留員外郎缺出，即行奏補。戶部筆帖式濟安，請作爲候補主事，遇有該部題選咨留主事缺出，即行奏補。理藩院筆帖式蘇勒芳阿，請作爲候補主事，遇有該衙門滿洲、蒙古題選咨留主事缺出，即行奏補。戶部筆帖式紹德，請遇有該部筆帖式缺出，無論咨留，並不計班次，即行奏補。宗人府主事何桂馨，請作爲候補員外郎，由臣等分掣缺分較多之戶、刑兩部行

走，遇有該部題選咨留員外郎缺出，即行奏補。禮部員外郎汪本銓，請作爲候補郎中，遇有本部題選咨留郎中缺出，即行奏補。刑部候補主事吳光業、程恭壽，均請遇有本部題選咨留主事缺出，即行奏補。謹奏。奉旨：依議。

二十三年正月二十二日諭：大學士穆彰阿、潘世恩，戶部尚書祁寯藻，工部尚書賽尚阿，戶部侍郎何汝霖，夙夜在公，勤勞備至，朕難以言喻，俱著交部議敘。

二月十五日諭：大學士潘世恩，年逾七旬，嗣後朕御門辦事，著加恩免其入班。其該管衙門應行帶領引見之日，亦著免其帶領，以示體恤者，臣至意。

十八日本處奏：此次辦理清字檔案，臣等派軍機章京內閣中書豐盛額、貼寫中書福善總司校對，頗爲詳慎，應請量予鼓勵。懇恩准令豐盛額作爲候補侍讀，遇有蒙古侍讀缺出，即行奏補。福善遇有滿、漢本堂實缺中書缺出，不計旗分，即行奏補。謹奏。奉旨：豐盛額著作爲候補侍讀，遇有蒙古侍讀缺出，即行奏補。福善著作遇有滿、漢本堂實缺中書缺出，不計旗分，即行奏補。

八月二十六日諭：大學士潘世恩，年逾七旬，襄贊綸扉，精神強固，十年以來，夙夜趨公，宣勤佐治，朕心嘉悅之至，允宜特沛殊恩，以節勞勩。著加恩在紫禁城內乘轎，用示朕優禮者，臣至意。

二十五年六月二十四日諭：軍機章京汪本銓，著加恩以四五品京堂候補，遇缺提奏。該員本任禮部郎中，著即開缺。

謹按：二十二年五月初十日日本處奏，軍機章京禮部員外郎汪本銓，蒙恩記名御史。該員辦事精細，於一切公務，頗能留心。擬請遇有御史缺出，將該員暫緩帶領引見，俾臣等得收指臂之效。如蒙俞允，當即知照吏部，欽遵辦理。奉旨：依議。

十月初五日日本處奏：軍機處行走滿、漢章京，自道光二十二年保奏之後，已逾三年。臣等留心察看，擇其行走勤慎者數員，公同酌擬。理藩院主事崇泰，請作爲候補員外郎，遇有理藩院滿洲、蒙古題選咨留員外郎缺出，即行奏補。內閣中書穆蔭，請作爲候補侍讀，遇有侍讀缺出，即行奏補。戶部筆帖式紹德，請作爲候補主事，遇有本部題選咨留主事缺出，即行奏補。內閣中書福善，請作爲候補侍讀，俟該員服闋後，遇有侍讀缺出，即行奏補。刑部員外郎喬晉芳，請作爲候補郎中，遇有本部題選咨留郎中缺出，即行奏補。起居注主事宗稷辰，請作爲候補員外郎，由臣等分掣缺分較多之戶、刑兩部行走，遇有該部題選咨留員外郎缺出，即行奏補。兵部候補主事梁瀚，請俟補缺後，遇有本部題選員外郎缺出，即行升補。禮部主事聶澐，請作爲候補員外郎，遇有本部題選咨留員外郎缺出，即行奏補。謹奏。奉旨：依議。

二十六年正月二十三日諭：大學士穆彰阿、潘世恩，戶部尚書賽尚阿、祁寯藻，兵部尚書何

汝霖，精勤襄贊，一德一心，均著加恩，交部議敘。

二十七年正月初五日諭：兵部尚書何汝霖之母丁氏，年屆九旬，五世同堂，親見七代，承恩祿養，洵爲盛世嘉祥。覽奏之餘，朕心實深欣悅，加恩特賜伊母御書扁額一面，「福」、「壽」字各一方，如意一柄，大卷江綢四疋，大卷八，絲緞四疋，以示恩渥。其例應賞賚之處，仍著原籍該督撫循例具題。

二月初九日本處奏：此次辦理漢字檔冊，派出軍機章京禮部主事王發桂、吏部額外主事劉子城總司校對，頗爲詳慎，應請量予鼓勵。懇恩准令王發桂遇有本部主事缺出，無論題選咨留，儘先補用。劉子城俟額外行走期滿後，遇有本部主事缺出，無論題選咨留，儘先補用。謹奏。

奉旨：王發桂著遇有本部主事缺出，無論題選咨留，儘先補用。劉子城著俟額外行走期滿後，遇有本部主事缺出，無論題選咨留，儘先補用。

二十八年正月初二日諭：大學士潘世恩，著加恩晉加太傅銜，並賞用紫韉。

三月初二日本處奏：此次辦理清字檔案，臣等派軍機章京內閣中書清盛、兵部筆帖式海慶總司校對，頗爲詳慎，應請量予鼓勵。懇恩准令清盛作爲候補侍讀，遇有侍讀缺出，即行奏補。海慶作爲候補主事，遇有本部主事缺出，無論題選咨留，即行奏補。謹奏。奉旨：清盛著作爲候補侍讀，遇有侍讀缺出，即行奏補。海慶著作爲候補主事，遇有本部主事缺出，無論題選咨留，

即行奏補。

十月初六日本處奏：軍機處行走滿、漢章京，自道光二十五年保奏之後，已逾三年。臣等留心察看，擇其行走勤慎者數員，共同酌擬。理藩院筆帖式賽音博勒格圖，請作爲候補主事，遇有理藩院滿洲、蒙古題選咨留主事缺出，即行奏補。內閣候補中書德椿，請俟補缺後，遇有侍讀缺出，即行奏補。內閣學習中書英秀，請遇有滿、漢本堂實缺中書缺出，不計旗分，即行奏補。理藩院題署主事賽沙布，請作爲候補主事，遇有理藩院滿洲、蒙古題選咨留主事缺出，即行奏補。禮部員外郎袁甲三，請作爲候補郎中，遇有本部題選咨留郎中缺出，即行奏補。起居注主事邵懿辰，請作爲候補員外郎，由臣等公掣缺分較多之戶、刑兩部行走，遇有該部題選咨留員外郎缺出，即行奏補。戶部候補主事文嶽英，請遇有本部主事缺出，無論題選咨留，即行奏補。宗人府主事吳嘉淦，係應升員外郎之員，請作爲候補員外郎，由臣等公掣缺分較多之戶、刑兩部行走，遇有該部題選咨留員外郎缺出，即行奏補。謹奏。奉旨：依議。

十二月二十日諭：大學士潘世恩由乾隆年間供職詞垣，嘉慶年間洵擢尚書，經朕簡任大學士、軍機大臣，充上書房總師傅，襄贊綸扉，宣勤日懋。現在年登八秩，精神強固，朕心嘉悅實深，允宜特沛恩施，以昭優眷。伊孫潘祖蔭著加恩賞給舉人，准其一體會試，用示朕篤祐耆臣有加無已之至意。

二十九年正月二十二日諭：大學士穆彰阿、潘世恩，戶部尚書賽尚阿、祁寯藻，刑部侍郎陳孚恩，贊襄庶政，矢慎矢勤。而潘世恩年逾八旬，精神強固，尤屬罕遇，朕甚嘉焉。均著加恩，交部議敘。

咸豐元年三月十二日諭：候補五品京堂穆蔭，未補缺以前，加恩賞給五品俸，其本任內閣侍讀，著即開缺。

十三日旨：賞欽差大臣賽尚阿大卷江綢袍褂料二套、大卷緞袍褂料一套、馬褂料一件，戶部主事軍機章京丁守存銀三十兩。

十月十二日本處奏：軍機處行走滿漢章京，自道光二十八年保奏之後，已逾三年。臣等留心察看，擇其資格較深、辦事勤奮者數員，公同酌擬。戶部筆帖式瑞亨，請作爲候補主事，遇有本部題選咨留主事缺出，即行奏補。禮部筆帖式衡光，係蒙古人員，應升蒙古主事之缺。該部額缺較少，查照舊案，請調理藩院行走，作爲候補主事，遇有該衙門滿洲、蒙古題選咨留主事缺出，即行奏補。內閣學習中書高壽，請遇有滿漢本堂實缺中書缺出，不計旗分，即行奏補。吏部主事桂昌，請作爲候補員外郎，遇有本部題選咨留員外郎缺出，即行奏補。吏部員外郎林映棠，請作爲候補郎中，遇有本部題選咨留郎中缺出，即行奏補。兵部候補主事曹毓瑛、工部候補主事

汪榮，兵部候補主事段晴川，均請遇有本部主事缺出，無論題選咨留，即行奏補。謹奏。奉旨：依議。

十二月初十日日本處奏：臣等面奉諭旨，以臣何汝霖年逾七旬，嗣後每日進內，令奏事處太監扶掖。臣等謹查致仕大學士潘世恩於道光年間面奉恩旨：每日召見出入，著太監扶掖。當即傳知該太監，未經恭繕諭旨。今臣何汝霖承寵命，已屬格外天恩，若明降諭旨，臣何汝霖益切不安。可否照潘世恩之例，即日傳知奏事處太監，毋庸繕寫諭旨，伏祈皇上恩鑒。謹奏。奉旨：著傳知奏事太監，毋庸寫旨。

二年正月初一日諭：工部右侍郎彭蘊章，著加恩在紫禁城內騎馬。

二十三日諭：大學士賽尚阿、祁寯藻，禮部尚書何汝霖，在軍機處行走有年，實力劬勤，殫心竭慮，自軍興以來，夙夜在公，勤勞倍著。賽尚阿總統軍務，調度有方，工部侍郎彭蘊章自參樞務以來，克盡厥職，均著加恩，交部議敘。

二月初三日日本處奏：此次辦理漢字檔冊，派出章京胡嘉楷、胡家玉總司校對，頗為詳慎，應請量予鼓勵。懇恩准令工部候補主事現在丁憂胡嘉楷俟服闋後，遇有工部主事缺出，無論題選咨留，儘先補用。刑部候補主事胡家玉，遇有刑部主事缺出，無論題選咨留，儘先補用。謹奏。奉旨：胡嘉楷著俟服闋後，遇有本部主事缺出，無論題選咨留，儘先補用。胡家玉著遇有本部主

事缺出，無論題選咨留，儘先補用。

十月十五日諭：工部尚書麟魁，著加恩在紫禁城內騎馬。

十二月二十日諭：吏部左侍郎邵燦，著加恩在紫禁城內騎馬。

三年三月初八日本處奏：此次辦理清字檔案，臣等派軍機章京兵部主事海慶、內閣候補中書文吉總司校對，頗爲詳慎，應請量予鼓勵。懇恩准令海慶作爲候補員外郎，遇有本部員外郎缺出，無論題選咨留，即行奏補。文吉遇有滿、漢本堂實缺中書缺出，不計旗分，即行奏補。謹奏。奉旨：海慶著作爲候補員外郎，遇有本部員外郎缺出，無論題選咨留，即行奏補。文吉著遇有滿、漢本堂實缺中書缺出，不計旗分，即行奏補。

八月初四日諭：逆賊渡河北擾，攻圍懷慶，大肆披猖。經朕特命大學士直隸總督訥爾經額爲欽差大臣，尚書恩華、將軍托明阿、內閣學士勝保幫辦軍務，督率各路精兵會合進剿，逆匪四路狂奔，我兵焚燒賊巢，懷慶城圍立解。軍機大臣祁寯藻、麟魁、邵燦、彭蘊章、穆蔭夙夜在公，贊襄樞務，允宜先沛恩施，均著賞軍功加一級。

初六日諭：自軍興以來，事務紛繁，軍機滿、漢章京等，當差尚屬勤奮，漢章京承書諭旨，冊檔較多，自應量予恩施，以示獎勵。滿洲章京內閣貼寫中書德椿、兵部員外郎海慶，均著賞軍功加一級。內閣候補中書玉衡、理藩院筆帖式文衡，均著賞給軍功紀錄二次。戶部主事瑞亨，理

藩院主事衡光，吏部員外郎桂昌，內閣中書長年英祥，理藩院筆帖式祥保，內閣中書英秀，理藩院主事賽音博勒格圖，內閣中書高壽，內閣即補中書文吉，戶部筆帖式達春布，理藩院筆帖式慶霖，內閣中書蘇布、鍾秀，均著賞給軍功紀錄一次。漢章京內閣侍讀學士梁瀚、禮部郎中王發桂，均著賞軍功加一級。刑部郎中程恭壽，著賞戴花翎，並賞軍功加一級。工部候補主事林壽圖、戶部候補主事郭祥瑞，均著賞給軍功紀錄三次。工部員外郎汪榘、吏部主事陳鴻翊、起居注主事焦祐瀛、刑部候補主事李汝楫、刑部主事程祖誥、刑部候補主事蔣錫綬、戶部員外郎錢寶青、禮部主事吳台朗，均著賞給軍功紀錄二次。吏部主事賀壽慈，工部候補主事李德莪、梁經先、白恩佑，內閣中書吳兆麟，工部主事鄧廷枏，內閣中書段承實，均著賞給軍功紀錄一次。

十月二十二日諭：戶部右侍郎瑞麟、禮部左侍郎穆蔭，均著加恩，在紫禁城內騎馬。

四年二月初四日諭：戶部郎中軍機章京錢寶青，著加恩，以五品京堂候補，仍暫留郎中本任，其記名御史，即著該部註銷。

九月十一日本處奏：此次辦理漢字檔冊，派出軍機章京工部候補主事林壽圖、戶部候補主事郭祥瑞總司校對，頗爲詳慎，應請量予鼓勵。懇恩准令林壽圖、郭祥瑞均遇有本部主事缺出，無論題選咨留，儘先補用。謹奏。奉旨：林壽圖、郭祥瑞均著遇有本部主事缺出，無論題選咨留，儘先補用。

十月十二日本處奏：軍機處行走滿、漢章京，自咸豐元年保奏之後，已屆三年。臣等留心察看，擇其資格較深、辦事勤奮者數員，公同酌議。內閣中書德椿，係遇有侍讀缺出即行奏補之員，請賞給五品頂戴，作爲候補侍讀，遇有缺出，即行奏補。內閣中書英秀，係應升侍讀人員，請作爲候補侍讀。該員現未服滿，遇有侍讀缺出，即行升署，俟服闋後再行實授。內閣中書嵩壽，請以主事升用，由臣等公掣缺分較多之戶、刑兩部行走，遇有該部題選咨留主事缺出，即行奏補。內閣學習中書玉衡，請遇有滿、漢本堂實缺中書缺出，不計旗分，即行奏補。刑部候補主事蔣錫綬，請遇有本部主事缺出，無論題選咨留，即行奏補。起居注主事焦祐瀛，係應升員外郎之員，請作爲候補員外郎，由臣等公掣缺分較多之戶、刑兩部行走，遇有該部題選咨留員外郎缺出，即行奏補。刑部員外郎李汝楫，係應升郎中之員，請作爲候補郎中，遇有本部題選咨留郎中缺出，即行奏補。內閣中書吳兆麟，請以主事升用，由臣等公掣缺分較多之戶、刑兩部行走，遇有該部題選咨留主事缺出，即行奏補。謹奏。

是日奉諭：所有軍機處行走之內閣中書，即補侍讀德椿，著先行賞給五品頂戴。內閣中書英秀，著作爲候補侍讀，遇有缺出，即行升署，俟服闋後再請實授。內閣中書嵩壽，著以主事掣分戶、刑兩部行走，遇有該部主事缺出，無論題選咨留，即行奏補。內閣學習中書玉衡，著遇有滿、漢本堂實缺中書缺出，不計旗分，即行奏補。刑部候補主事蔣錫綬，著遇有該部主事缺出，無論

題選咨留，即行奏補。起居注主事焦祐瀛，著以員外郎掣分戶、刑兩部行走，遇有該部員外郎缺出，無論題選咨留，即行奏補。刑部員外郎李汝楫，著遇有該部郎中缺出，無論題選咨留，即行奏補。內閣中書吳兆麟，著以主事掣分戶、刑兩部行走，遇有該部主事缺出，無論題選咨留，即行奏補。

二十日諭：工部左侍郎杜翰，著加恩在紫禁城內騎馬。

樞垣記略卷之十一

恩敘六

咸豐五年正月二十四日諭：工部尚書彭蘊章、吏部右侍郎穆蔭、工部左侍郎杜翰，夙夜在公，辛勤倍著，均著交部議敘。

四月十八日諭：現在馮官屯逆匪全股蕩平，北路一律肅清，軍機大臣贊襄軍務，夙夜勤勞，允宜分別加恩，以昭優眷。恭親王奕訢著交宗人府從優議敘；尚書彭蘊章，侍郎穆蔭、杜翰均著交部從優議敘；侍郎瑞麟著交部議敘。致仕大學士祁寯藻前在軍機大臣上行走，懋著勞勩，著一併交部從優議敘。其滿、漢章京各員，均著交部議敘。

六年十一月十八日諭：戶部尚書柏後，著加恩在紫禁城內騎馬。

十二月初五日諭：軍機章京焦祐瀛，著加恩以四五品京堂候補，遇缺提奏。該員本任戶部郎中，著即開缺。

七年十月十九日日本處奏：軍機處行走滿、漢章京，自咸豐四年保奏之後，已逾三年。臣等留心察看，擇其資格較深、辦事勤奮者數員，公同酌擬。戶部員外郎瑞亨，請作為候補郎中。該

員現在丁憂，擬俟服闋後，遇有本部題選咨留郎中缺出，即行奏補。戶部筆帖式達春布，請作爲候補主事，遇有本部題選咨留缺出，即行奏補。內閣中書文吉、英祥，請作爲候補侍讀。該二員現在均未服滿，擬俟服闋後，遇有侍讀缺出，即行奏補。起居注主事段承實，請作爲候補員外郎，由臣等公掣缺分較多之戶、刑兩部行走，遇有該部題選咨留員外郎缺出，即行奏補。工部員外郎梁經先、禮部員外郎白恩佑，請作爲候補郎中，遇有各本部題選咨留郎中缺出，即行奏補。內閣典籍曾協均，請作爲候補侍讀，遇有缺出，即行奏補。謹奏。奉旨：依議。

十二月二十六日本處奏：繕辦漢檔告竣，所有派出總校之起居注主事裴季芳、刑部額外主事夏獻雲，總司校對，頗爲詳慎，自應量予鼓勵。懇恩准令裴季芳以六部員外郎儘先選用，並先分部分行走。夏獻雲係額外主事，業經期滿，因丁憂尚未引見。可否俟服闋引見後，遇有本部主事缺出，無論題選咨留，儘先補用。謹奏。奉旨：裴季芳著以六部員外郎儘先選用，並先分部分行走。夏獻雲業經學習期滿，著俟服闋引見後，遇有本部主事缺出，無論題選咨留，儘先補用。

八年正月二十五日諭：大學士彭蘊章、協辦大學士戶部尚書柏蔭、吏部右侍郎穆蔭、工部左侍郎杜翰、贊襄樞務，矢慎矢勤，均著交部議敘。

二月二十四日本處奏：軍機章京內閣典籍曾協均，前經臣等保奏，請作爲候補侍讀，遇有缺出，即行奏補，奉旨依議。茲查有內閣侍讀葉名澧告假一缺，據內閣行查吏部轉據咨覆，應由

臣等援案奏補。相應請旨，將曾協均補授內閣侍讀。謹奏。奉旨：知道了。

五月十六日本處奏：此次承辦清檔，臣等派軍機章京理藩院筆帖式慶霖、理藩院題署主事文衡總司校對，頗爲詳慎，應請量爲鼓勵。慶霖、文衡均請作爲候補主事，遇有理藩院滿洲、蒙古題選咨留主事缺出，即行補用。謹奏。奉旨：慶霖、文衡均著作爲候補主事，遇有理藩院滿洲、蒙古題選咨留主事缺出，即行補用。

九月初九日諭：杜翰現丁母憂，著加恩賞銀四百兩辦理喪事，由廣儲司給發。

十月二十九日諭：吏部左侍郎匡源、禮部右侍郎文祥，均著加恩在紫禁城內騎馬。

十一年四月初二日本處奏：繕辦漢檔告竣，所有派出總校之工部候補主事朱智、戶部候補主事蔡兆槐，總司校對，頗爲詳慎，自應量予鼓勵。懇恩准令朱智遇有本部主事缺出，無論題選咨留，儘先補用。蔡兆槐俟補缺後，遇有本部題選咨留員外郎缺出，即行補用。謹奏。奉旨：朱智著遇有本部主事缺出，無論題選咨留，儘先補用。蔡兆槐著俟補缺後，遇有本部題選咨留員外郎缺出，即行補用。

十一月初二日本處奏：軍機處行走滿漢章京，自咸豐七年保奏之後，已逾三年。臣等留心察看，擇其資格較深、辦事勤奮者數員，公同酌擬。內閣中書英廉，請作爲候補侍讀，遇有侍讀缺出，即行奏補。內閣候補中書松齡、慶裕，請俟補缺後，遇有侍讀缺出，即行奏補。工部筆

帖式增壽，請作爲候補主事，遇有本部主事缺出，無論題選咨留，即行奏補。候選主事內閣中書方鼎銳，請以主事籤掣缺分較多之戶、刑兩部行走，遇有該部主事缺出，無論題選咨留，即行奏補。戶部主事朱學勤，請作爲候補員外郎，遇有本部員外郎缺出，無論題選咨留，即行奏補。內閣典籍許庚身，請作爲候補侍讀，遇有缺出，即行奏補。工部候補主事蔣繼洙，請俟補缺後，遇有本部員外郎缺出，無論題選咨留，即行奏補。謹奏。奉旨：依議。

十二月初七日議政王軍機大臣面奉諭旨：軍機章京當差勞苦，著賞給銀二千兩，由廣儲司給發。

同治元年正月初一日諭：朕奉母后皇太后、聖母皇太后懿旨：恭親王以議政王在軍機處辦理一切政務，勤勞懋著，加恩著在紫禁城內坐四人轎，以示優異。

二十三日諭：朕奉母后皇太后、聖母皇太后懿旨：恭親王自簡授議政王以來，首贊樞廷，賢親輔翼，公忠體國，於一切用人行政，事無鉅細，綜覈靡遺，著交宗人府從優議敘。大學士桂良、戶部尚書沈兆霖、都察院左都御史文祥、戶部左侍郎寶鋆在軍機處行走，實力勤，和衷共濟；順天府府丞曹毓瑛自參機務，克稱厥職：均著交部議敘。

閏八月十九日諭：軍機大臣都察院左都御史李棠階，著加恩在紫禁城內騎馬。

九月二十日本處奏：軍機章京內閣典籍許庚身，前經臣等保奏，請作爲候補侍讀，遇有缺出，即行奏補，奉旨依議。嗣於本年壬戌科中式進士，奉旨著仍作爲候補侍讀，遇有缺出，即行奏補。茲查有內閣侍讀陳寓升任山東道監察御史，所遺一缺，據內閣行查吏部轉據咨覆，應由臣等援案奏補。相應請旨，將許庚身補授內閣侍讀。謹奏。奉旨：依議。

十二月二十六日本處奏：竊臣等於本月十八日將編輯新檔十函進呈御覽，並聲明該章京供事著有微勞，懇請量予獎敘。奉旨：依議。欽此。查此次冊檔，事閱十年，頭緒紛繁，該章京等分年編纂，詳加校勘，不無微勞足錄，該供事等常川在方略館繕寫辦理，尤爲出力，相應懇懇天恩獎敘，以昭激勸。謹繕清單恭呈御覽。謹奏。

太常寺少卿王拯，內閣侍讀瑞廉、許庚身，以上三員擬請賞隨帶加二級。廣東高廉道、前內閣侍讀英秀、戶科給事中前內閣侍讀文吉、河南道監察御史前內閣侍讀曾協均、候選道前戶部員外郎吳兆麟、山西試用直隸州知州前工部主事裕彰，以上五員擬請交部從優議敘。刑部郎中胡家玉，擬請賞加四品銜。戶部員外郎朱學勤，擬請遇有該部郎中缺出，無論題選咨留，遇缺即補。理藩院員外郎衡光，擬請以該衙門郎中即補。刑部主事嵩壽、工部主事增壽、朱智，以上三員均擬請遇有本部員外郎缺出，無論題選咨留，遇缺即補。理藩院題署主事崇縉，擬請俟服闋後，以本衙門主事無論題選咨留，遇缺即補。是日奉旨：依議。

二年六月二十七日日本處奏：此次辦理清字檔案，臣等派軍機章京刑部員外郎嵩壽、理藩院候補主事崇繕總司校對，尚屬詳慎，自應量加獎勵。懇恩准令嵩壽作爲候補郎中，遇有本部郎中缺出，無論題選咨留，即行奏補。崇繕作爲候補員外郎，俟補主事後，遇有本衙門滿洲、蒙古題選咨留員外郎缺出，即行奏補。謹奏。奉旨：嵩壽著作爲候補郎中，遇有本部郎中缺出，無論題選咨留，即行奏補。崇繕著作爲候補員外郎，俟補主事後，遇有本衙門滿洲、蒙古題選咨留員外郎缺出，即行奏補。

九月初一日諭：本日引見之倭滿截取刑部郎中胡家玉，著開缺以四品京堂候補。

十月初五日諭：軍機大臣兵部左侍郎曹毓瑛，著加恩在紫禁城內騎馬。

十二月二十一日日本處奏：軍機處行走滿漢章京，自咸豐十年保奏一次，係展限一年，於十一年辦理，現計咸豐十年至今已逾三年。臣等留心察看，擇其資格較深、辦事勤奮者數員，公同酌擬。內閣中書奎綬，請分理藩院行走，作爲候補主事，遇有理藩院滿洲、蒙古無論題選咨留主事缺出，即行奏補。內閣候補中書額圖璉，請遇有滿漢本堂實缺中書缺出，不計旗分，即行奏補。理藩院筆帖式英貴，請作爲候補主事，遇有本衙門滿洲、蒙古無論題選咨留主事缺出，即行奏補。內閣貼寫中書文海，請俟補缺後，遇有侍讀缺出，即行奏補。工部候補主事杜來錫，請遇有本部主事缺出，無論題選咨留，即行奏補。戶部主事范運鵬，請作爲候補員外郎，遇有本部

員外郎缺出，無論題選咨留，即行奏補。內閣中書沈淮，請以主事籤掣缺分較多之戶、刑兩部行走，遇有該部主事缺出，無論題選咨留，即行奏補。刑部候補主事周瑞清，請遇有本部主事缺出，無論題選咨留，即行奏補。謹奏。奉旨：依議。

三年正月二十三日諭：朕奉慈安皇太后、慈禧皇太后懿旨：議政恭親王賢親最著，輔翼公忠，自首贊樞廷，於今三載，於用人行政，一切克盡匡襄，勤勞罔懈，著交宗人府從優議敘。工部尚書文祥、戶部尚書寶鋆、工部尚書李棠階、兵部左侍郎曹毓瑛，同心協贊，克慎克勤，均著交部議敘。

二月十五日日本處奏：繕修漢檔告竣，所有派出總校之工部主事王汝訥、內閣侍讀馮柏年，總司校對，頗爲詳慎，自應量予鼓勵。懇恩准令王汝訥作爲候補員外郎，遇有本部員外郎缺出，無論題選咨留，即行奏補。馮柏年係應升郎中之員，以郎中由臣等籤掣缺分較多之戶、刑兩部行走，遇有該部郎中缺出，無論題選咨留，即行奏補。謹奏。奉旨：王汝訥著作爲候補員外郎，遇有本部員外郎缺出，無論題選咨留，即行奏補。馮柏年著作爲郎中籤掣缺分較多之戶、刑兩部行走，遇有該部郎中缺出，無論題選咨留，即行奏補。

七月初二日諭：恭親王自簡授議政王以來，於今三載。適值東南等省兵事方殷，用人行政，徵兵籌餉，一切深資贊畫，弼亮宣猷，忠勤丕著。軍機大臣文祥等，翼贊樞廷，同心輔治，前

於蘇、杭省城克復各案內，屢欲降旨加恩，均經該王大臣等再三懇辭，不忍重違其意。茲當江寧省城克復，紅旗馳報，殲擒首逆，本欲援照從前優獎成案，降旨施恩。乃該王大臣等仍復懇切力辭，鑒其誠悃，不得已酌中給予恩施，以獎勞動。議政恭親王著加恩賞加軍功三級，仍加賞一貝勒，令伊子奉恩輔國公載澂受封，並封伊子載濬入八分輔國公，載溎不入八分鎮國公；軍機大臣工部尚書文祥，著賞加太子太保銜，伊姪凱肇並賞給員外郎，分部學習行走；戶部尚書寶鋆，著賞加太子少保銜，並賞戴花翎；工部尚書李棠階，著賞加太子少保銜，伊子李洵並賞給舉人，准其一體會試；兵部左侍郎曹毓瑛，著賞加頭品頂戴，賞戴花翎；以示朕慶賞酬庸之意。此次辦理軍務十有餘年，軍報絡繹，事務殷繁，軍機章京等夙夕從公，承書諭旨，均無貽誤，尚屬著有微勞。著議政王、軍機大臣分別等第，酌量從優保獎，候旨施恩。

初四日諭：昨因江寧紅旗報捷，降旨令議政王、軍機大臣將滿、漢軍機章京等分別等第，量予從優保獎，茲據開單具奏。該軍機章京等自軍興以來，辦理軍報，承書諭旨，夙夕從公，尚無貽誤，均屬著有微勞，自應量予恩施，以示鼓勵。理藩院員外郎衡光，著以知府不論雙單月遇缺前即選，仍在任候選並賞戴花翎。記名道府刑部郎中嵩壽、記名道府戶部員外郎英祥，均著專以道員用，並賞戴花翎。理藩院員外郎崇縉、工部員外郎增壽，均著賞戴花翎。內閣中書松齡，著俟補侍讀後，以知府不論雙單月在任遇缺前即選，並先換侍讀頂戴。內閣侍讀英廉，著

以道員在任即選，並先換頂戴。候補侍讀瑞廉，著以知府不論雙單月遇缺前即選，仍在任候選，並賞戴藍翎，即補侍讀。內閣貼寫中書慶裕，著俟服闋後，遇有中書缺出，不計旗分，遇缺即補，並賞加侍讀銜，賞戴藍翎。理藩院主事奎綬，著作爲本衙門候補員外郎，遇有員外郎缺出，無論題選咨留，遇缺即補。工部郎中崐玉，著俟服闋後，以知府不論雙單月在任遇缺前即選。內閣中書額圖璋，著作爲候補侍讀，遇有侍讀缺出，即行奏補。理藩院主事英貴，著以本衙門員外郎，無論題選咨留，遇缺即補。內閣貼寫中書文海，遇有中書缺出，不計旗分，即行奏補，並賞加侍讀銜，賞戴藍翎。禮部筆帖式續昌，著作爲理藩院候補主事，俟服闋後，遇有缺出，無論題選咨留，遇缺即補，並賞加員外郎銜。刑部主事薩隆阿，著遇有本部員外郎缺出，無論題選咨留，即行奏補，先換頂戴。工部主事額哲克，著以本部員外郎，無論題選咨留，遇缺即補，並賞加知府銜。禮部候補主事裕長，著遇有本部主事缺出，無論題選咨留，即行奏補，並賞加五品頂戴。內閣貼寫中書容斌，著賞加侍讀銜，光祿寺卿胡家玉、光祿寺少卿鄭錫瀛，均著賞戴花翎，並賞給軍功加二級。刑部主事方鼎銳，著免補員外郎，以本部郎中無論題選咨留，遇缺即補，並賞戴花翎。內閣侍讀許庚身，著以六部郎中，不論班次，遇缺即選，仍在任候選，並賞戴花翎。工部員外郎朱智，著以本部郎中，不論題選，遇缺即補，並賞戴花翎。工部候補主事蔣繼洙，著免補主事，著作爲候補員外郎，仍歸原保案內，遇有本部員外郎缺出，無論題選咨留，即行奏補，並賞戴藍

翎。候選六部員外郎工部行走裴季芳，著以六部員外郎，不論班次，遇缺即選。刑部主事夏獻雲，著遇有本部員外郎缺出，無論題選咨留，即行奏補，先換頂戴。戶部郎中蔡兆槐，著作爲歷俸期滿並賞加四品銜工部主事。杜來錫，著以本部員外郎，無論題選咨留，遇缺即補。戶部員外郎范運鵬，著以本部郎中，無論題選咨留，遇缺即補，並賞加道銜。刑部主事沈淮、周瑞清，均著遇有本部員外郎缺出，無論題選咨留，即行奏補，先換頂戴。禮部郎中龔嘉雋，著作爲歷俸期滿並賞加道銜記名御史。吏部郎中陳元楷，著俟升補御史後，以應升之缺升用。工部主事王汝訥，著俟補員外郎後，以本部郎中，無論題選咨留，遇缺即補。戶部郎中馮柏年，著作爲歷俸期滿並賞加道銜。刑部候補主事徐用儀，著無論題選咨留，遇缺即補，並賞給軍功加一級。吏部候補主事史崧秀，著俟補缺後，以本部員外郎，無論題選咨留，遇缺即補，先換頂戴。禮部主事徐景軾，著遇有本部員外郎缺出，無論題選咨留，即行奏補，先換頂戴。戶部主事方熊祥，著俟補員外郎後，遇有本部郎中缺出，無論題選咨留，即行奏補。戶部主事葉衍蘭，著賞加四品銜。前戶部郎中朱學勤，著賞戴花翎。

初六日諭：咸豐十一年冬間，朕奉慈安皇太后、慈禧皇太后自熱河旋蹕，授恭親王爲議政王，並以王自留京辦事以來，諸臻妥協，因仰體皇考文宗顯皇帝酬庸未竟之志，宣示遺命，以親王世襲罔替。王涕泣固辭，不得已降旨從緩，俟朕親政之年，再行辦理，先行賞食親王雙俸，以

示優禮。昨因江寧逆首就殲，紅旗告捷，我兩宮皇太后以王首贊樞廷，賢親最著，亟思丕承先緒，仍加恩以親王世襲罔替。王乃推功諸將，再三懇辭，念其情詞諄切，俯如所請，僅加恩王之三子載澂等，於朝廷論功行賞之心，初未盡愜。茲復據奏「金陵雖克，而湖北、江西賊氛尚熾，陝、甘、雲、貴餘孽未平，軍餉浩繁，庫欸支絀。且在京王公諸臣之俸糈、八旗兵丁之月餉，減成支放，未復舊章，而王公貝勒萃於一門，既忝高爵，復膺厚祿，若不痛自抑損，不獨滿則必虧，徒增咎戾，且何以副知遇之隆而塞天下之望？請將支食親王雙俸之處，即行停止」等語。覽王所奏，具見忠愛，惻怛出於至誠。惟爵以馭貴，祿以馭富，國家詔楛之典，古今所同。王自簡任樞廷，於今三載，運籌決策，成效卓然。嗣後慎始敬終，忠勤匪懈，行當廓清區宇，丕著全功。拭目昇平，更加懋賞。至此次嘉賞成功，因王搗抑爲懷，僅酌中給予恩施，未嘗加厚。若將從前所降恩命遽爾收回，亦恐無以昭勸賞之平而示人臣之則。恭親王仍著食親王雙俸，其毋固辭。

四年十月初十日諭：禮部右侍郎汪元方，著加恩在紫禁城內騎馬。

二十八日諭：文祥奏請假回旗迎養一摺，文祥著賞假三箇月，前赴盛京迎養伊母來京。並賞人獲六兩，即著文祥齎去，以資頤養。

樞垣記略卷之十二

恩敘七

同治五年十月二十一日日本處奏：軍機處行走滿、漢章京，查同治二年保奏之後，已逾三年。臣等留心察看，擇其資格較深、辦事勤奮者數員，公同酌擬。理藩院員外郎崇縉、奎綬，均請作爲候補郎中，遇有本衙門滿洲、蒙古題選咨留郎中缺出，儘先奏補。理藩院即補主事續昌，請俟補主事後，作爲員外郎，遇有本衙門滿洲、蒙古題選咨留員外郎缺出，儘先奏補。禮部主事裕長，請作爲候補員外郎，遇有本衙門題選咨留員外郎缺出，儘先奏補。吏部候補主事靳邦慶，請遇有本部主事缺出，無論題選咨留，即行奏補。戶部主事李廷簫，請俟補員外郎後，遇有本部郎中缺出，無論題選咨留，即行奏補。吏部候補主事史崧秀，前於江寧紅旗報捷案內保奏，俟補缺後，以員外郎無論題選咨留，遇缺即補。此次擬請遇有本部主事缺出，無論題選咨留，即行奏補，俟補缺後，仍歸原保以員外郎無論題選咨留，遇缺即補。禮部員外郎徐景軾，請遇有本部郎中缺出，無論題選咨留，即行奏補。謹奏。奉旨：依議。

又片奏：繕辦漢檔告竣，所有派出總校之內閣典籍江人鏡、刑部主事徐用儀，總司校對，頗

爲詳慎，自應量予鼓勵。懇恩准令江人鏡作爲候補侍讀，遇有缺出，即行奏補。徐用儀俟題輔員外郎後，遇有本部郎中缺出，不論題選咨留，即行奏補。謹奏。奉旨：江人鏡著作爲候補侍讀，遇有缺出，即行奏補。徐用儀著俟題輔員外郎後，遇有本部郎中缺出，不論題選咨留，即行奏補。六年正月二十三日諭：朕奉慈安皇太后、慈禧皇太后懿旨，恭親王首贊樞廷，於今六年，小心謹慎，夙夜勤勞，克盡一襄，深資輔翼，著交宗人府從優議敘。吏部尚書文祥、戶部尚書寶鋆、都察院左都御史汪元方，同心贊畫，勤慎和衷，均著交部議敘。

十二月初六日諭：本日引見御史之工部郎中朱智，著即註銷御史開缺，以五品京堂候補。七年七月十一日諭：昨據李鴻章奏，殲除捻逆，直、東一律肅清。軍機大臣恭親王等，贊理機務，昕夕慎勤，今幸大功告成，自應量予獎敘。恭親王、文祥、寶鋆、沈桂芬，均著賞加二級。軍機章京等夙夜趨公，承書諭旨，亦屬著有微勞，著恭親王等分別奏請獎勵，候旨施恩。

十七日本處奏：此次辦理清字檔案，臣等派軍機章京候補侍讀內閣中書額圖琿、候選道內閣侍讀文海總司校對，尚屬詳慎，自應量予獎勵。額圖琿請賞加四品銜；文海曾由國史館保奏以道員不論雙單月遇缺前先選用，請仍以道員不論雙單月歸捐班一缺後，在任即選。謹奏。奉旨：額圖琿著賞加四品銜，文海著仍以道員不論雙單月歸捐班一缺後，在任即選。

十八日諭：昨因捻逆蕩平，紅旗報捷，降旨令恭親王等將滿、漢軍機章京等分別保獎，茲據

開單具奏。該軍機章京等行走有年，繕寫諭旨，昕夕從公，均屬著有微勞，自應量予恩施，以示鼓勵。專用道員戶部緞疋庫郎中增壽，著俟簡放道員後，遇有鹽運使缺出，提奏藍翎。戶部銀庫員外郎瑞廉，著賞換花翎。戶部顏料庫員外郎英廉，著賞戴花翎。內閣侍讀慶裕，著以道員不論雙單月歸升班後，在任即選。工部郎中岷玉，著賞加鹽運使銜。內閣候補侍讀額圖璋，著俟補缺後，以知府不論雙單月歸選班先在任即選。藍翎內閣侍讀文海，著賞換花翎。理藩院員外郎續昌，著賞戴藍翎。工部員外郎額哲克，著賞戴藍翎。內閣貼寫中書本貴，著以實缺中書不計旗分，遇缺即行奏補。禮部郎中三德，著賞戴藍翎。吏部筆帖式春岫，著俟題升主事後，遇有本部員外郎缺出，無論題選咨留，儘先即補。內閣候補中書尚德，著以實缺中書，不計旗分，遇缺即行奏補。理藩院主事玉春，著遇有本院員外郎缺出，無論題選咨留，即行補用。員外郎志文，著賞加知府銜。內閣蒙古中書豐紳泰，著賞加五品銜。刑部額外主事增林，著賞加員外郎銜。理藩院郎中崇繕，著賞加四品銜。鹽運使銜理藩院郎中奎綬，著賞換按察使銜。員外郎英貴，著賞加四品銜。禮部員外郎裕長，著賞加道銜。太常寺卿鄭錫瀛，著賞加二品頂戴。內閣侍讀學士朱學勤，著以三品京堂開列在前。鴻臚寺少卿朱智，著以四品京堂開列在前。藍翎工部郎中蔣繼洙，著賞換花翎。內閣典籍候補侍讀江人鏡、刑部員外郎周瑞清，均著賞戴花翎。刑部員外郎夏獻雲，著俟補郎中後，以道員分發省分，歸候補班前補用。吏部主事斬邦慶，著遇有

本部員外郎缺出，無論題選咨留，即行奏補。工部員外郎杜來錫，著俟補郎中後，作爲歷俸期滿。戶部員外郎李廷簫，著賞加道銜截取知府。戶部郎中馮柏年，著俟補知府後，以道員在任儘先即補。刑部員外郎徐用儀，著賞戴花翎。吏部主事史崧秀，著俟補員外郎後，以本部郎中，無論題選咨留，遇缺即補。禮部郎中徐景軾，著俟截取知府得缺後，以道員在任候補截取知府。戶部郎中方熊祥，著俟補知府後，以道員在任候補。戶部主事葉衍蘭，著賞加三品銜。兵部候補員外郎蕭庭滋，著作爲本部候補郎中，儘先即補。候補主事吳國杰，著遇有本部主事缺出，無論題選咨留，即行奏補。候補員外郎金日修，著以本部員外郎，無論題選咨留，即行奏補。記名御史禮部員外郎梁僧寶，著俟補御史後，仍遇有應升缺出，保送帶領開列在前。前刑部員外郎裴季芳，著俟服闋後，免選員外郎，以知府分發省分，歸候補班補用。前刑部員外郎沈淮，著賞加四品銜。

二十二日本處奏：軍機章京內閣典籍江人鏡，經臣等保奏，奉旨作爲候補侍讀，遇有缺出，即行奏補。茲查有內閣侍讀方濬師升任廣東雷瓊遺缺道，所遺一缺，據內閣行查吏部轉據咨覆，應由臣等援案奏補。相應請旨，將江人鏡補授內閣侍讀。謹奏。奉旨：依議。

十月初八日諭：軍機大臣吏部左侍郎沈桂芬，著加恩在紫禁城內騎馬。

十九日諭：軍機大臣署禮部左侍郎李鴻藻，著加恩在紫禁城內騎馬。

八年十月十九日諭：軍機大臣吏部尚書文祥，病逾匝月，尚未就痊，實深廩系。著派御醫王繼武前往診視，並賞給人參八兩，以資調理。

十一月二十四日日本處奏：軍機處行走滿、漢章京，查同治五年保奏之後，已逾三年。臣等留心察看，擇其資格較深、辦事勤奮者數員，公同酌擬。內閣中書本貴、尚德，均請作爲候補侍讀，遇有侍讀缺出，儘先奏補。禮部郎中三德，請加道銜。理藩院員外郎玉春，請遇有本衙門郎中缺出，無論滿洲、蒙古題選咨留，儘先即補。戶部主事葉衍蘭，請遇有本部員外郎缺出，無論題選咨留，即行奏補。兵部候補郎中蕭庭滋，請以郎中無論題選咨留，即行奏補。兵部候補主事吳國杰，請俟補主事後，以本部員外郎，無論題選咨留，即行奏補。兵部候補員外郎金日修，請俟補郎中後，作爲歷俸期滿。謹奏。奉旨：依議。

又片奏：繕辦漢檔告竣，所有派出總校之禮部郎中梁僧寶、禮部候補主事胡延夔，總司校對，頗爲詳慎，自應量予鼓勵。懇恩准令梁僧寶加四品銜，胡延夔俟補缺後，以本部員外郎，不論題選咨留，即行奏補。謹奏。奉旨：梁僧寶著賞加四品銜，胡延夔著俟補缺後，以本部員外郎，不論題選咨留，即行奏補。

十二月初五日諭：吏部尚書文祥之母，秉性淑慎，克享遐齡，教子有方，俾成良弼，今以疾終，深堪軫惻。朝廷優禮大臣，推恩賢母，著賜祭一壇，賞銀二千兩經理喪事，由廣儲司給發，靈

樞回旗時，沿途地方官妥爲照料，以示優眷。

九年正月二十三日諭：朕奉慈安皇太后、慈禧皇太后懿旨；恭親王首贊樞廷，於今九年，夙夜靖共，於一切行政用人，虛心匡弼，鉅細靡遺，深資夾輔，著交宗人府從優議敘。吏部尚書文祥、戶部尚書寶鋆、都察院左都御史沈桂芬、戶部右侍郎李鴻藻，同心翊贊，克慎克勤，均著交部議敘。

七月初五日諭：本日引見御史之刑部員外郎周瑞清，著即註銷御史開缺，以五品京堂候補。

十年三月十七日諭：本日引見之截取刑部郎中徐用儀，著開缺以五品京堂候補。

十月二十二日諭：吏部左侍郎胡家玉，著加恩在紫禁城內騎馬。

十一年八月二十七日日本處奏：前因粵匪、捻匪先後蕩平，同治七年十一月恭奉諭旨，命臣等纂輯方略，當經酌擬章程具奏，並聲明該總纂等如勤奮編輯，擬照成案，分次請獎，供事、謄錄等一併給獎在案。竊查粵匪自道光三十年起事至同治四年勦平，捻匪自咸豐元年起事至同治七年勦平，辦理軍務前後十有九年，凡各路軍營及內外臣工章奏，頭緒紛繁，我文宗顯皇帝神謨廣運，指示機宜，聖訓煌煌，昭如日月。迨我皇上御極後，仰承兩宮皇太后懿訓，燭照無遺，綸綍昭垂，同符前烈。臣等敬謹編纂，綜計勦平粵匪方略四百二十卷、勦平捻匪方略三百二十卷，陸續進呈，蒙發交南書房翰林校閱，均無錯誤。全書兩編，茲已一律告成。計自同治八年二月開館

起，迄今僅止三年有餘，即已告成，除進呈本外，又繕陳設本一分，校對亦已過半。所有在館人員，實皆奮勉出力，除臣等不敢仰邀議敘外，其總纂及提調、收掌、纂修、校對、譯漢官、供事人等，臣等公同酌擬獎敘，分繕清單恭呈御覽，伏候欽定。至謄錄人等及其餘供事，擬俟陳設本全行完竣後，由臣等覈其在館功課及平日差使，分別等第，造冊註明，咨部獎敘，其應如何過班銓選之處，統歸吏部覈辦。此次卷帙較多，辦理迅速，該謄錄、供事等格外出力，內有量加從優給予分發之員，懇請飭部毋庸覈減，以昭激勸。再此次所保，不論題選咨留補用各員，係查照軍機處繕修冊檔成案辦理，合併聲明。謹奏。

是日奉諭：恭親王等奏「纂輯勦平粵匪方略四百二十卷、勦平捻匪方略三百二十卷告成，奉表恭進」一摺。勦捕粵匪始於道光三十年，至同治三年克復江寧省城，嗣後搜捕餘孽又歷年餘。勦捕捻匪始於咸豐元年，至同治七年在直隸地方併力殲除，計辦理軍務前後十有九年。各路軍營及內外臣工章奏紛繁，我文宗顯皇帝神謨廣運，指示機宜，聖訓昭垂，軍民感服。迨朕御極後，稟承慈安皇太后、慈禧皇太后懿訓，燭照無遺，同符先烈，戡定大難，用底救平，一切機宜，運畫允宜，垂示將來。恭親王等奉命纂辦數年來，率同在館人員，陸續繕輯呈進，隨時披覽，卷帙繁多，尚屬詳悉賅備，所有大小出力各員，自應普加優獎。恭親王等摺內雖自稱不敢仰邀議敘，仍應特沛恩施。恭親王著賞加三級，並奉慈禧皇太后頒發御書「訐謨辰告」扁額一方，賞給

恭親王，以示優異。文祥、寶璽、沈桂芬、李鴻藻，均著賞加二級。該提調等在軍機處行走有年，平日辦事俱屬勤慎，此次在館或總司纂輯，或分司檢校，均能奮勉出力，迅速告成，著照所請給予獎勵。候補宗人府府丞朱學勤，著賞給二品頂戴。太僕寺卿朱智，著賞給二品頂戴，並加隨帶二級。內閣侍讀學士許庚身，著以三品京堂候補，並加隨帶二級。郎中崇縉，著以道員用，並俟補道員後賞加布政使銜，隨帶加三級。候選道郎中奎綬，著賞隨帶加三級，並俟選道員後賞加布政使銜。員外郎續昌，著以道員不論雙單月在任即選，先換頂戴。郎中春岫，著以道員不論雙單月在任遇缺即選，先換頂戴。中書尚德，著俟補侍讀後，以知府不論雙單月在任遇缺即選，先換頂戴。員外郎志文，著以知府不論雙單月在任遇缺即選，並賞加道銜。鴻臚寺少卿周瑞清，著以四品京堂候補，並俟補缺後賞加三品銜。候補五品京堂徐用儀，著俟補缺後以四品京堂候補，並加隨帶二級。即選道文海，著以四五品京堂用。郎中崑玉，著俟補道員後，賞加布政使銜並隨帶加二級。內閣侍讀額圖琿，著俟選知府後，以本省道員儘先升用，並賞加鹽運使銜。員外郎英謙，著以知府不論雙單月在任遇缺即選，並賞換道銜。靳邦慶，著遇有本部郎中缺出，無論題選咨留，即行奏補，並俟補郎中後，賞加道銜。李廷簫，著俟截取知府得缺後，賞加鹽運使銜，以道員在任，歸候補班前補用。郎中史崧秀，著俟截取知府得缺後，以道員在任，歸候補班前補用，先換頂戴。員外郎葉衍蘭，著賞給隨帶加三級。主事胡延夔，著免補主事，作

爲候補員外郎，仍照原保班次奏補。陸爽棠，著免其試俸，以本部員外郎無論題選咨留，遇缺即補。張岳年，著以主事無論題選咨留，遇缺即補，並賞加五品銜。內閣典籍李耀奎，著作爲候補侍讀，遇有缺出，即行奏補，先換頂戴。員外郎李方豫，著遇有本部員外郎缺出，無論題選咨留，即行奏補。主事丁鶴年，著遇有本部主事缺出，無論題選咨留，即行奏補。沈源深，著以員外郎無論題選咨留，即行奏補。魏邦翰、陳毓秀，均著遇有本部主事缺出，無論題選咨留，即行奏補。中書邵文煦，著以主事籤掣缺分較多之戶、刑兩部，無論題選咨留，遇缺即補。主事馮光勳，著遇有本部主事缺出，無論題選咨留，即行奏補。郎中李固恆，著俟截取知府得缺後，在任以道員候補。其離館之道員增壽，著賞隨帶加二級。知府慶裕，著以道員在任歸候補班前補用。道員英廉，著賞加布政使銜。御史三德，著以道員不論雙單月在任候選。知府江人鏡，著以道員在任候補。道員夏獻雲，著賞隨帶加二級。知府杜來錫，著俟服闋得缺後，以道員在任候補。方熊祥，著賞加鹽運使銜。郎中蕭庭滋，著免補本班，以知府分發省分歸候補班前先用。金曰修，著賞加道銜。御史梁僧寶，著以應升之缺在任候補，並俟得缺後遇缺題奏。主事李士彬，著俟服闋後，無論題選咨留，遇缺即補。御史沈淮，著俟截取知府得缺後，在任以道員歸候補班前補用。餘依議。

九月十九日慈安皇太后、慈禧皇太后懿旨：皇帝寅紹丕基，於今十有一載。親賢夾輔，共

濟時艱，茲當大婚禮成，自應特沛恩施，用彰勞勩。恭親王輔政多年，勩勞懋著，前於咸豐十一年十月間命以親王世襲罔替，因該親王再三懇辭，允俟親政之年再行辦理。現在皇帝大婚禮成，親政伊邇，著即加恩以親王世襲罔替。軍機大臣大學士文祥，著在紫禁城內乘坐二人肩輿。太子少保銜尚書寶鋆，著賞加太子少保銜。尚書沈桂芬、李鴻藻，均著賞加太子少保銜。

十一月初四日本處奏：軍機處行走滿、漢章京，查同治八年保奏之後，已逾三年。臣等留心察看，擇其資格較深、辦事勤奮者數員，公同酌擬。理藩院郎中玉春，請加道銜。理藩院員外郎志文，請作為候補郎中，遇有本衙門郎中缺出，無論滿洲、蒙古題選咨留，儘先即補。理藩院主事豐紳泰，請遇有本衙門員外郎缺出，無論滿洲、蒙古題選咨留，儘先即補。刑部筆帖式桂斌，請以本部主事無論題選咨留，遇缺即補。刑部候補主事邵文煦，請俟補主事後，以本部員外郎無論題選咨留，遇缺即補。內閣典籍候補侍讀李耀奎，請俟補侍讀後，以郎中遇缺即選。工部候補員外郎李方豫，請俟補員外郎後，免其試俸，以本部郎中無論題選咨留，遇缺即補。工部候補主事丁鶴年，請俟補主事後，以本部員外郎無論題選咨留，遇缺即補。謹奏。奉旨：依議。

又片奏：繕辦漢檔告竣，所有派出總校之刑部主事陸爽棠、刑部候補主事張岳年，總司校對，頗為詳慎，自應量予鼓勵。懇恩准令陸爽棠候補員外郎後，以本部郎中無論題選咨留，遇

缺即補。張岳年俟補缺後，免其試俸，以本部員外郎無論題選咨留，遇缺即補。謹奏。奉旨：陸爽棠著俟補員外郎後，以本部郎中無論題選咨留，遇缺即補。張岳年著俟補缺後，免其試俸，以本部員外郎無論題選咨留，遇缺即補。

十二年正月二十三日諭：朕奉慈安端裕皇太后、慈禧端佑皇太后懿旨：恭親王首贊樞廷，歷久不懈，盡心輔政，鉅細靡遺，懋著勤勞，深資倚任，著交宗人府從優議敘。大學士文祥、吏部尚書寶鋆、兵部尚書沈桂芬、工部尚書李鴻藻，和衷贊畫，矢慎矢勤，均著交部議敘。

十二月十一日本處奏：此次辦理清字檔案，臣等派軍機章京道府用候選道理藩院員外郎續昌、道府用道銜刑部員外郎增林總司校對，尚屬詳慎，自應量予獎勵。續昌擬請專以道員用；增林擬請俟簡放道府後，賞加鹽運使銜。謹奏。奉旨：續昌著專以道員用，增林著俟簡放道府後賞加鹽運使銜。

二十八日諭：明年恭逢慈禧端佑康頤皇太后四旬大慶，並朕親政後初屆元日令辰，亦宜特沛恩施。恭親王、文祥、寶鋆均著交該衙門從優議敘，沈桂芬著賞給御書扁額一方。

又諭：軍機大臣工部尚書李鴻藻之母姚氏，年逾八旬，精神強固，加恩賞給御書扁額一方。十三年十一月二十八日本處奏：軍機章京內閣典籍李耀奎，前經臣等保奏，作為候補侍讀，遇有缺出，即行奏補。茲查有內閣侍讀丁士彬升任安徽鳳陽府知府所遺一缺，據內閣行查

吏部轉據咨覆，應由臣等援案奏補。相應請旨，將李耀奎補授內閣侍讀。謹奏。奉旨：依議。

光緒元年十一月二十三日日本處奏：軍機處行走滿、漢章京，查同治十一年保奏之後，已逾三年。臣等留心察看，擇其資格較深、辦事勤奮者數員，公同酌擬。內閣候補侍讀中書本貴、尚德，均請仍以侍讀遇缺即補。戶部員外郎額勒精額，請以本部郎中無論題選咨留，遇缺即補。內閣貼寫中書如松，請作爲候補主事，掣分戶、刑兩部，以該部主事無論題選咨留，遇缺即補。吏部主事魏邦翰，請以員外郎無論題選咨留，遇缺即補。戶部主事陳毓秀，請以員外郎無論題選咨留，遇缺即補。刑部主事馮光勛，請以員外郎無論題選咨留，遇缺即補。兵部郎中李固恆，請免試俸歷俸。謹奏。奉旨：依議。

又片奏：繕辦漢檔告竣，所有派出總校之刑部主事李士彬、吏部員外郎沈源深，總司校對，頗爲詳慎，自應量予鼓勵。懇恩准令李士彬以員外郎無論題選咨留，遇缺即補；沈源深以郎中無論題選咨留，遇缺即補。謹奏。奉旨：李士彬著以員外郎無論題選咨留，遇缺即補。沈源深著以郎中無論題選咨留，遇缺即補。

樞垣記略卷之十三

規制一

辦理軍機處設自雍正年間，銀印藏大內，印鑰以領班之軍機大臣佩之。有應用之官文書，直日章京親到內奏事房向內監請印，向軍機大臣請印鑰啓用，用畢即行送進。凡請印鑰必以金牌爲質。金牌以金爲之，廣約五分，厚約一分，修約兩寸，上鑄「軍機處」三字，直日章京佩之，封印後領班章京佩之。若隨扈出京，則於出京之前一日將印請出，交領班之軍機大臣管帶，回鑾之日即行送進。

謹按：雍正十年三月初三日大學士等遵旨議奏，辦理軍機處密行事件，所需鈐封印信，謹擬「辦理軍機印信」字樣，移咨禮部鑄造，貯辦理軍機處，派員管理，並行知各省及西北兩路軍營。今辦理軍機處銀印，乾隆初年所換鑄，清、漢篆其文，曰「辦理軍機事務印記」。兩旁鑄刻年月字號，一曰「乾隆十四年正月日造」九字，一曰「禮部造」三字，一曰「乾字一百二十九號」八字。又按：現遇隨扈出京之前，將印請出，交兵部領齋。兵部司員每日送至行宮門外朝房，請軍機大臣啓視，並備鈐用。

軍機大臣兼用滿、漢大員，無定額，以大學士領班。

謹按：嘉慶四年正月，命成親王入直辦事，是年十月間，以與定制未符，即命出直。又：咸豐三年十月初七日諭，恭親王奕訢著在軍機大臣上行走。又：十一年十月初一日諭，恭親王奕訢著授爲議政王在軍機處行走。又：同治四年四月十四日諭，恭親王著仍在軍機大臣上行走。又：嘉慶四年，章京吳熊光、戴衢亨奉特加三品銜在軍機大臣上學習行走。又：十六年，章京盧蔭溥奉特加四品銜在軍機大臣上學習行走。又謹按：滿洲軍機大臣奉旨，在軍機處行走者，是否准看漢摺之處，歷由本處繕片請旨遵行，均得旨准其閱看。又：乾隆二十五年三月初十日本處奏，尚書兆惠，前在侍郎任內在軍機處行走，未經奉旨閱看硃批奏摺。今同都統侯富德俱在軍機處行走，其閱看硃批奏摺之處，伏候欽定。奉旨：閱清字不閱漢字。又按：自道光年間以後，滿洲大臣一體閱看漢摺，均未繕遞奏片。又：咸豐八年五月二十四日諭，匡源、文祥在軍機行走次序，著在杜翰之次。嗣後凡學習者俱在班末，俟實授時請旨。

滿、漢軍機章京各分爲兩班，每班各八人，其八人內各以一人領班，國語謂之達拉密，由軍機大臣揀派資深望重者爲之。凡挑補滿、漢章京，本處預期行片各衙門，令各出具考語保送數員，至多不得過八員，由軍機大臣親加考校，將人選者帶領引見，記名者遇缺以次奏署、奏補。

謹按：嘉慶四年正月十六日諭，軍機處爲機密要地，向來行走章京未定額數，俱由軍機大臣挑補，並不帶領引見。因思各衙門、各旗官員即筆帖式、驍騎校、護軍校等微員，無不由引見補授，軍機章京職事較重，豈有轉不帶領引見之理？嗣後滿、漢章京各定爲十六員，由內閣、六部、理藩院堂官於司員中書、筆帖式等官擇其人品端方，年力富強，字畫端楷者交軍機大臣帶領引見，候朕簡用。其記名人員遇有缺出，按次陸續充補。此次應挑之漢章京，即照新例辦理。又：十一年正月二十日本處奏，查滿軍機章京理藩院題署主事德寧額，於嘉慶九年出三座塔稅差，經臣等奏明，以記名挨次應補之內閣中書重倫接署。該員行走以來，差使尚屬勤勉。現在德寧額回京供職，可否將重倫留於額外行走，俟有缺出，即行充補之處，理合奏明，請旨。奏旨：依議。謹按：自嘉慶四年以後，每班章京不得過八人，至是始有先因署缺即留於額外行走候補之員。又：二十一年冬，軍機大臣奏明行走之強逢泰不佔額缺，於是每班八人之外，復有額外章京一員。又：咸豐三年二月初六日本處奏，現在軍務較繁，請添傳記名漢章京四人在額外行走。奉旨：知道了。又：七年十一月十二日本處奏，前添傳漢章京四員均已充補實缺，請添傳二員在額外行走。奉旨：知道了。又：十一年十月初八日本處奏：漢章京自咸豐三年奏添額外行走四員，嗣因直務繁簡不常，有即行傳補者，有未即行傳補者。現在兩班行走共十八人，事務較繁，請添傳二員在額外行走。奉

旨：知道了。又：同治十一年十月二十二日本處奏：現在軍務漸平，諸事較簡，漢章京擬停傳二員。奉旨：依議。

滿洲章京以內閣中書，六部、理藩院郎中、員外郎、主事、筆帖式兼充；漢章京以內閣中書，六部郎中、員外郎、主事、七品小京官由進士舉人出身者兼充。

謹按：乾隆年間，滿洲大員如侍郎保成、松筠，內閣學士博清額、索琳、福德等，漢大員如順天府尹蔣炳，副都御史胡寶琮、傅顯、劉秉恬、孫永清，大理寺卿王昶，光祿寺卿申甫，太僕寺卿程燾，候補三品京堂袁守侗等，皆令在軍機章京上行走，至嘉慶年間始定此例。又：嘉慶四年二月十一日本處奏：原在軍機章京上行走之科道各員，應仍遵旨留軍機處外，此後軍機處行走人員，遇有補放御史者，即回本衙門任事，不必在軍機處行走。又：五年七月二十六日諭：嗣後軍機章京有陞任至通政司副使、大理寺少卿者，即著軍機大臣奏明，不必在軍機章京上行走。又：十年十月二十四日本處議奏：御史吳邦慶摺內所稱「漢章京應分別出身」一節，查軍機章京向例由內閣中書挑取者居多，其由六部司員挑取者不及十之一二。自嘉慶四年奉旨於內閣中書及六部司員內保送以來，多係進士、舉人出身者，間有一二員由拔貢生出身，亦係朝考錄用之六部小京官。若榜副貢生即無由考試錄用部員之階，是以歷來挑取章京，並無由此項出身者。至捐納人員，惟進士、舉人捐納，內閣

中書向來均經挑入軍機行走，其由捐納、貢監出身者，本不挑補，應毋庸議。又：據稱「內自三品京堂以上，外自藩臬以上各大員與軍機處俱有交涉事件，若令其子弟挑補章京行走，恐不無私通信息、洩漏機密等弊。請照現任三品京堂或督撫子弟不准考選御史之例，嗣後軍機章京一體迴避」等語。查軍機處設立滿漢章京，恭繕諭旨，登載冊檔，均關緊要，自應慎選人才，嚴防弊竇。前經欽奉諭旨，交軍機大臣帶領引見，並奉特旨，派科道官逐日進內稽查，立法已爲周密。該章京等如能謹飭自矢，奉公守法，自不致有洩漏通信情弊。倘行走或有不謹，臣等必當隨時查察，據實嚴參。況該章京等不過職司繕寫，臣等面承諭旨，遇有實關緊要之事，本不輕向章京等宣露。至與該章京等父兄果有關涉事件，尤當留心慎密，儘可不令聞知，伊等亦何從洩漏？若因此設法防維，則各大員不獨子弟應行迴避，凡其族誼親姪年家故舊，苟不知謹慎，安保無傳遞信息之事。且軍機處承辦京外直省事件繁多，大小各員，均不免有所交涉，又豈獨三品以上大員子弟，始慮其洩漏？是該御史所奏杜漸防微之道，全不在此。惟機廷清切之地，父兄既身躋通顯，其子弟原不必廁身樞要，似應酌量定以限制。但如該御史所奏外官自藩臬以上，猶未詳盡。即如鹽運使一官，亦係三品，外官司道並行，體制相埒，此外鹽政關差，亦有外旗人員，其子弟似亦應一體迴避。應請嗣後滿漢現任京官文職三品以上，武職二品以上，及外官文職督、撫、司、道、鹽政、關差，武

職提、鎮以上各大員子弟，均不得保送挑補軍機章京，其大員之親姪從弟及外姻親戚等不在此例。至該員等有初補軍機時，父兄尚未通顯，迨行走諳習，正資得力，而其父兄洊擢至三品以上等官者，應否令其回本衙門之處，臣等隨時奏明，請旨定奪。又查現在軍機處行走滿洲章京內，有工部侍郎明興之子內閣中書重倫，直隸布政使慶格之弟刑部主事吉祥，雲南布政使阿禮布之弟吏部員外郎德克津布，該三員挑補均在條奏之前，當差亦尚勤慎。臣等此次議奏，如蒙允准，應否即令該三員循照新例，回本衙門當差之處，恭候訓示遵行。奉旨：依議。重倫、吉祥、德克津布三員充補軍機在新例之前，均著毋庸迴避。又：十六年二月初七日諭：軍機爲樞密重地，滿、漢章京趨公執事，先以謹慎爲本。從前御史吳邦慶條奏，大員子弟不准充補軍機章京，經軍機大臣議覆，自道員以上子弟皆令迴避，其有行走任先者，並隨時請旨定奪。茲據慶桂等奏，新授南贛道查清阿之子誠端，應否迴避。朕思謹慎與否，總視乎其人，而防閑之道，亦必當定以限制。嗣後文職京官三品以上，外任臬司以上；武職京官副都統以上，外官總兵以上，其親子弟均不准在軍機章京上行走，其行走在先者亦毋庸隨時具奏，即令照例回本衙門當差。誠端係道員之子，無庸迴避。又：二十五年十月二十七日諭：從前軍機處滿、漢章京皆軍機大臣於內閣等衙門傳取，嘉慶四年改由內閣、六部、理藩院保送引見。嗣後將保送人員先令軍機大臣考試，分別棄取，帶領引見，其

記名者挨次傳補，立法至爲允當。惟大員子弟設有迴避之例，殊可不必，防弊之道，初不在此。如大臣子弟有挑入軍機處者，藉以學習政事，未嘗不可造就人材。嗣後保送軍機章京，著無庸迴避大員子弟，其軍機章京有陞至通政司副使、大理寺少卿、及補授科道者，即回本衙門行走，著仍照舊例行。又：查自咸豐八年後歷次交片，各衙門保送軍機章京，均聲明大員子弟仍照例不得保送。又：章京有升至通政使司、通政使副使，大理寺卿、少卿者，歷經奉旨，仍在軍機章京上行走。又：咸豐十一年正月初六日諭：滿、漢軍機章京，每班挑取各四員在總理各國事務衙門額外行走，仍照常軍機處值班，毋庸常川到署。又：同治七年十月十七日本處奏：現在記名漢軍機章京將次用竣，臣等照章行取內閣等衙門人員，考試帶領引見。據工部保送之七品小京官丁鶴年，係鑲黃旗漢軍人。查漢軍機章京自嘉慶四年奉旨定有額數，令各衙門保送後，並無漢軍人員行走，詳稽冊檔，亦無漢軍不准充補明文，臣等未便駁令不准與考。閱看該員試卷，文理尚優，字畫亦屬端楷。惟向無辦過似此成案，可否一併帶領引見之處，伏候聖裁。奉旨：准其帶領引見。

軍機處在隆宗門內之北，軍機大臣入直於此。軍機章京直房在隆宗門內之南，滿、漢兩班分左右居之。每日寅時，軍機大臣及章京等以次入直，辰刻軍機大臣始入見，或不待辰刻而先召見，每日或一次或數次。軍機章京皆隨入，祇候於南書房。軍機大臣至上前，豫敷席於地

賜坐，承旨畢乃出，授軍機章京書之。述旨畢，內奏事太監傳旨令散，遂以次退直。若在圓明園，每日入直於左如意門內，御河之南爲軍機堂，堂之右爲滿章京直房，其前爲漢章京直房，直務均與在宮之日同。

謹按：軍機大臣出入均由內右門，至南書房祇候召見。乾隆年間軍機章京隨軍機大臣後亦出入內右門，嘉慶年間章京等始專出入乾清門，仍均在南書房祇候。

軍機處繕寫諭旨之式，凡特降者，曰內閣奉上諭；因所奏請而降者，曰奉旨。其或因所奏請而即以宣示中外者，亦曰內閣奉上諭。各載其所奉之年月日於前。述旨發下後，即交內閣傳鈔，謂之明發。其諭令軍機大臣行不由內閣傳鈔者，謂之寄信，外間謂之廷寄。其式：行經略、大將軍、欽差大臣、將軍、參贊大臣、都統、副都統、辦事領隊大臣、總督、巡撫、學政曰「軍機大臣」字寄，其行鹽政、關差、藩臬曰「軍機大臣傳諭」，亦皆載所奉之年月日，徑由軍機處封交兵部捷報處遞往。視事之緩急，或馬上飛遞，或四百里，或五百里，或六百里，或六百里加緊，皆於封函上註明。其封函之式，字寄者，右書辦理軍機處封寄，左書某處某官開拆；傳諭者，居中大書辦理軍機處封，左邊下半書傳諭某處某官開拆；皆於封口及年月日處鈐用辦理軍機處印。

謹按：乾隆年間寄信，皆領班之軍機大臣出名。乾隆三十六年二月駕巡山東，大學士尹繼善、劉統勳，協辦大學士尚書劉綸俱未隨扈，經本處奏請面奉諭旨，清字寄信著尚書福

隆安出名，漢字寄信著尚書于敏中出名。又：嘉慶九年議准軍機處交兵部加封寄往各省書字，其封面書寫何人姓氏者，應交本人拆閱，如本任官陞調他處並來京陛見，其護理及接任之員不得拆閱，即轉遞交本員祇領。若尋常印封無本員姓氏交該衙門開拆者，方准署任之員拆閱查辦。又按：寄信行督辦軍務大員亦書軍機大臣字寄，行各省提鎮亦書軍機大臣傳諭，提鎮有督辦軍務者，亦書軍機大臣字寄。至寄信中尤爲緊要之件奉旨密諭者，則書軍機大臣密寄。

謹按：咸豐十一年十月初一日日本處奏，每日摺報奉旨批發謹擬寫「議政王軍機大臣奉旨」字樣，寄信諭旨擬寫「議政王軍機大臣字寄」字樣，其交片行文一律辦理。又謹按：兩次垂簾訓政，每日摺報，奉旨繕批呈覽，自咸豐十一年十月至同治四年三月則寫「議政王軍機大臣奉旨」，寄信則寫「議政王軍機大臣字寄」字樣，以後均寫「軍機大臣奉旨」、「軍機大臣字寄」字樣。

凡中外奏摺，奉硃批「該部議奏」、「該部知道」者，皆錄副發鈔，其硃批「覽」或硃批「知道了」，或硃批「准駁其事」，及訓飭嘉勉之詞，皆視其事係部院應辦者，即發鈔，不涉部院者，不發鈔。凡未奉硃批之摺，即以原摺發鈔。凡硃批原摺，如在京衙門之摺，即存軍機處彙繳；如各省，俱於本日錄副後，係專差齎奏者，交內奏事封發，由驛馳奏者，即由本處封交兵部遞往。其內閣

領鈔之摺於次日繳回，同不發鈔之摺按日歸入月摺包備案。

凡議大政、讞大獄有旨特交軍機大臣者，即由本處承辦；其交軍機大臣會同各部院衙門者，或由本處主稿，或由所會衙門主稿，臨時酌定。凡應行刑訊之案，或就內務府公所，或就步軍統領衙門公所提訊，其阜役刑具皆於刑部傳用。如會同刑部者或刑部堂官前來會訊，或就刑部會訊，亦臨時酌定。若有軍旅之事，則考山川之險夷，道里之遠近，以備顧問。其邊裔絕域古書茫昧者，則追尋新舊冊檔，加以諮訪，使皆可徵驗，並就戶部、兵部、理藩院等衙門咨取兵馬錢糧，簡明確數備查，有旨垂詢，則或繪圖或繕單即時呈遞。

謹按：乾隆四十六年 月 日旨：秋審勾到事件，軍機大臣辦理熟諳，著同大學士一體承旨。又：乾隆九年 月 日本處奏：據韓光基奏稱「軍機處密議之件，無論議准議駁，於議定後奉旨欽遵行知該處或外省之後，應仍知照該管衙門存案」等語。查軍機處辦理事件不一，奏定之後，有應交部院者，有應行知外省者，有祇應本處存案備查者。至於密辦密議之事，或頒發諭旨，或存案備查，斷不便概行發部。韓光基所請知照該管衙門之處，誠如聖諭事屬難行，應無庸議。又：乾隆十一年三月二十四日奏：向來軍機處事件，俱係交內閣轉發，除密議密奏外，係何衙門承辦者，即傳該衙門承鈔。今張允隨所奏卡瓦一摺，奉硃批「議政王大臣速議具奏」，因係兵部主稿，是以內閣傳鈔。伏思議政處與各衙門不同，嗣後

凡遇交議政處事件，俱交內閣，專交該衙門辦理，不得發鈔。謹奏。奉旨：是。又：乾隆二十三年十月十九日奏：各部傳鈔事件，往往多有遺漏，即續經查出或該督撫咨部詢問，始行檢舉辦理，雖將經手各官加以處分，而公事究已稽遲。臣等酌議，嗣後應令軍機處承辦交發之滿、漢官員，將逐日所發諭旨及摺奏事件，每屆十日彙開一單，交與內閣票簽處轉交各衙門逐一查對，如有遺漏，若係尋常事件，即可作速補鈔，若事屬緊要，除一面補鈔趕辦外，仍將遺漏之員參奏議處。如此，十日內並無遺漏，即於單內註明繳回。在各部院既可得免遺漏，即軍機處或有未經交出事件，亦可隨時查出，於公事似有裨益。

凡遇大典禮，豫期有旨，令軍機大臣查考舊案者，即行查所司詳稽冊檔，彙齊後，摘敘簡明節略，開單呈覽。或有御製書事之文、紀事之詩，有旨特交軍機大臣等查明事之起訖者，亦即繕具節略，清單恭呈御覽。

凡恭遇除授內外大臣官員應進單者，文職大學士以下至京堂，武職御前大臣以下至步軍前鋒、護軍統領；外任將軍、總督、巡撫、布政使、按察使缺出，有旨令開列應補應陞人員，皆繕遞名單。鹽運使缺出，有旨進單，即交吏部查開俸深道員十人、知府十人，與軍機處記名京察一等人一體繕單呈遞。至文武大臣職任多者，遇出缺應補、出差應署者，有旨令查開管轄處所，即繕遞缺單。

凡文職鹽運使及道員記名以按察使用。武職一等侍衛、翼長、參領、協領、長史、總管、城守尉記名以副都統用；總兵記名以提督用，副將記名以總兵用。遇缺出皆將記名人員進單。凡道若府缺出不由銓選保題者，由本處請旨，其或選缺道府在部無應選之人，由吏部請旨，又或題缺道府該省無可題之人，由督撫請旨，皆由本處進單。京察一等記名之給事中，御史，郎中，員外郎，內閣侍讀，翰林院侍讀、侍講、修撰、編修、檢討，詹事府洗馬、中允、贊善，以滿洲、蒙古人員爲一單，漢員爲一單，皆道府兼用；內務府郎中、員外郎爲一單，以道府關差兼用；其或遇引見或因保舉特旨記名者，皆各爲一單。知府以道用，同知、直隸州知州以知府用，京員視奉旨指明或以道用，或以知府用，或道府兼用。其道府兼用者，遇請旨道府缺進單，以道用者，遇請旨道缺進單，以知府用者，遇請旨知府缺進單。其漢給事中、御史、郎中俸滿截取記名以繁缺用者，除由部銓選外，遇請旨道缺，給事中一體進單，遇請旨知府缺，御史、郎中一體進單。又曾任請旨缺道府及雖非任請旨缺而曾列名請旨單者，遇有丁憂起復、降革開復各員，由吏部知照軍機處亦一體進單。其因告病或終養開缺，經病痊及養親事畢，例應坐補原缺由吏部知照軍機處者，遇該員坐補缺出亦一體進單。至文職有知州、知縣奉旨記名者，應用同知、直隸州知州；武職有參將奉旨記名者，應用副將。遇有同知、直隸州知州簡放知府遺缺及副將簡放總兵遺缺，亦將各該員進單。

謹查，道光九年冬以後，鹽運使缺出，京察一等記名以道府用人員不行進單。

凡大比之年，會試總裁，順天鄉試主考，會試後覆試、殿試，朝考散館及翰詹大考，並各項考試閱卷官，有旨令查開應點人員，即繕遞名單。凡各省學政屆子、午、卯、酉年八月應行更換之期，有旨進單，即將各學政到任年月及曾否歲考註明開單，並將由進士出身之侍郎、京堂開單，其曾否得過試差、學差皆註明，得差者並註明次數。又奉天府府丞係兼奉天學政，並將進士出身對品應調之太常寺少卿、鴻臚寺卿、太僕寺少卿、順天府府丞銜名另繕一單一併呈遞。

謹查，奉天府府丞兼奉天學政歷屆成案，均將進士出身之通政使司、副使，大理寺少卿一體開列進單。

凡鄉試、會試及覆試考差恭遇欽命試題，豫期以上三屆之題繕單進御，並以本處所藏四書一部一同呈遞。其自乾隆三元年以後出過會試及順天鄉試題者，皆於四書內黏貼黃籤。其朝考散館、大考翰詹，亦由軍機處查開上三次題目清單，豫期呈遞。此外各項考試惟考御史、廕生及各繙譯題由南書房承辦，餘皆由本處於前一日提奏。

謹查，現在考試漢御史、廕生及繙譯考試各題目，均由本處提奏，考試孝廉方正係由內閣擬題。

樞垣記略卷之十四

規制二

凡滿、漢章京繕寫諭旨、記載檔案、查覈奏議，係清字者，皆由滿洲章京辦理，係漢字者，皆歸漢章京辦理。在京旗營及各省駐防、西北兩路補放應進單者，內、外蒙古、藩部及喇嘛並哈薩克、霍罕、廓爾喀朝貢應擬賞者，皆隸滿洲章京。在京部院及各省文員、綠營武員補放應進單者，王公內外大臣應擬賞者，及朝鮮、琉球、越南、暹羅、緬甸、南掌等各外國朝貢應擬賞者，皆隸漢章京。惟承審案件，無論滿、漢章京，一體由軍機大臣酌派。

謹按：朝鮮等國國王及使臣正賞，均由禮部承辦，惟加賞使臣由本處擬進賞單。又該國各使臣等能詩者恭進詩章，復加賞該國王及獻詩使臣，皆臨時派漢章京二人承辦。

凡西北兩路駐邊大臣，皆由軍機處繕具月摺，每月於初五、二十日兩次開單呈遞。應換防者則稽其班，於每年十月將各處期滿大臣開單呈遞。除伊犁將軍、定邊左副將軍、烏魯木齊都統外，參贊大臣有塔爾巴哈台一人、喀什噶爾一人、烏里雅蘇台一人、科布多一人，辦事大臣有喀喇沙爾一人、阿克蘇一人、烏什一人、葉爾羌一人、和闐一人、哈密一人、西寧一人、西藏一人、

庫倫一人，幫辦大臣有哈什噶爾一人，葉爾羌一人，和闐一人，哈密一人，領隊大臣有伊犁五人，庫爾喀喇烏蘇一人，塔爾巴哈台二人，烏魯木齊一人，古城一人，吐魯番一人，巴里坤一人。

謹查，現在西北兩路駐邊將軍大臣：伊犁將軍一人，參贊大臣一人，領隊大臣五人，

巴彥岱、錫伯、索倫、察哈爾、厄魯特各一人。

塔爾巴哈台參贊大臣一人，領隊大臣二人，烏魯木齊都統

一人，領隊大臣一人，巴里坤領隊大臣一人，吐魯番領隊大臣一人，古城領隊大臣一人，庫爾喀喇烏蘇領隊大臣一人，葉爾羌參贊大臣一人，幫辦大臣一人，喀什噶爾辦事大臣一人，英吉沙爾領隊大臣一人，和闐辦事大臣一人，烏什辦事大臣一人，幫辦大臣一人，阿克蘇辦事大臣一人，庫車辦事大臣一人，喀喇沙爾辦事大臣一人，哈密辦事大臣一人，幫辦大臣一人，烏里雅蘇台將軍一人，即定邊左副將軍。參贊大臣二人，科布多參贊大臣一人，幫辦大臣一人，庫倫辦事大臣二人，西寧辦事大臣一人，駐藏辦事大臣一人，幫辦大臣一人。

凡伊犁、烏魯木齊暨南路各回城章京內，例由廢員補放者，伊犁糧餉章京缺二，駝馬章京缺一，管倉章京缺四，烏魯木齊管倉章京缺三，喀喇沙爾糧餉章京缺一，庫車糧餉章京缺一，阿克蘇糧餉章京缺一，葉爾羌糧餉章京缺一，喀什噶爾糧餉章京缺一，烏什糧餉章京缺一，皆由軍機處豫行八旗查明各廢員獲咎案由開送清冊。軍機大臣傳齊該廢員，揀選將獲咎較輕、年力富强者，每次酌取數員引見，記名者，遇缺按名補放。

凡恭遇頒賞御書處所進新刊御製詩文集，武英殿所進新刊御纂、欽定各書並其他珍幣，有旨令軍機大臣擬賞者，各按數多寡，開列皇子、皇孫、王大臣等名單呈遞。請旨發下後，在京者交內閣知照各處祇領，外省者傳各省駐京提塘祇領。至西北兩路大臣端午、中秋、歲除例賜藥物及果餌等物，皆交兵部由驛遞發往。

凡恭遇祇謁陵寢及駐蹕南苑、湯山、盤山，歲幸熱河木蘭行圍，並東巡、西巡、南巡各地方，其有行宮者，軍機大臣入直於宮門外之左偏直廬；如在行營，則於白布城東門夾道內設蒙古包入直；其在看城等城，則皆於黃布城左右設帳房入直。滿、漢、章、京等設帳房，隨帶短几坐褥，按資格列坐其中。

謹按：乾隆初年恭遇聖駕時巡，軍機大臣是否隨往，皆候旨遵行。乾隆四年十月二十六日本處奏，皇上南苑大閱，臣等辦理軍機處除臣訥親、臣海望總理行營隨往外，臣鄂爾泰、張廷玉、徐本、納延泰隨駕之處，合行請旨。奉旨，大學士徐本、尚書納延泰去。至二十一日又諭，朕駐蹕南苑，天氣寒冷，吏、兵二部輪班之日，大學士鄂爾泰、張廷玉不必前往。近日軍機大臣除特派留京辦事或先已出差外省及鄉、會典試外，凡恭遇時巡無不隨往者，不待奏請矣。又：同治十二年二月二十八日諭，嗣後恭謁慕陵、定陵之日，軍機大臣俱著隨入陵寢門。又按：軍機章京隨圍係輪班前往，不隨往者每日滿、漢各二人詣內閣聽報，滿洲

章京在誥敕房，漢章京在蒙古堂祇候。遇有行在，軍機處文件分別照行。又：乾隆三十三年七月初七日日本處奏，臣等向在熱河遇有軍機處會同刑部、內務府、步軍統領衙門查辦事件，均借副都統衙門旁屋暫住審辦，並無公所。伏查園明圓遇有審辦事件，向在步軍統領衙門官廳辦理，殊屬便易。今增福查出高恆房屋一所，約有三十餘間，可否照園明圓官廳之例，仰懇聖恩，即將此項房屋賞給臣等作爲辦事之地。如蒙俞允，臣等仍交與熱河總管照看，毋致稍有損壞。奉旨：知道了。

凡各直省有應前往查辦之事，奉旨專派軍機大臣或會同部院大臣者，軍機大臣於滿、漢章京中選擇一二員奏明，一體馳驛前往。

謹按：嘉慶五年八月二十五日諭，向來軍機大臣出差隨帶軍機章京，原以堂司統屬，故令帶往辦事。乃年來出差及簡放外任大員，如阿迪斯、長麟、長齡等，並非軍機大臣，亦在朕前率意請帶軍機章京，殊屬非是。大臣等奉派出差，各有屬員可以隨往，何以將素非所屬之員帶往辦事？至簡放外任，向無隨帶京員之例。況軍機章京現有定額，若出差大臣俱請帶往，軍機處安得有如許人員？且難保無軍機章京向出差大臣營謀前往，沿途倚仗軍機處虛張聲勢。此時軍機大臣實皆小心謹慎，不敢作福作威，章京等亦皆奉公守法，若屢派出差，恐小軍機之故態復萌，沿途又受苦累，是朕並非欽派各大臣出差，竟係派軍機章京

出差矣。嗣後出差人員除軍機大臣仍准其隨帶章京外，其餘如有率行奏請者，即將該大臣治罪，另行簡放。又：乾隆十七年十月十四日旨，著派軍機處行走郎中福德、刑部郎中官保押帶該犯等馳驛前往，協同該署撫楊應琚查辦。又：四十年正月二十日旨，侍郎高樸著同軍機章京永保馳驛前往山西，有查辦事件。此皆以章京專膺使節，爲樞曹異數。而嘉慶十四年間，章京盧蔭溥以鴻臚寺少卿遂與軍機大臣托津同奉命往江南查辦案件，則更前此未聞之榮遇也。

凡恭遇臨幸西苑、景山或詣雍和宮，在園明圓日或幸清漪園、靜明園、黑龍潭，如在臨幸處所召見者，軍機大臣皆隨往，如在宮召見者，即不隨往。凡臨幸處所皆有軍機直廬，達拉密及直日之滿、漢章京各二人先往接摺，並祇候軍機大臣入見。若恭遇幸靜宜園駐蹕之日，軍機大臣率章京等均隨往入直，略如隨扈之儀。

凡京外王大臣有奉特旨到軍機處恭聽諭旨、恭讀硃筆及閱看各處摺奏者，方得在軍機堂簾內拱立，事畢即出。其餘部院內外大小官員不得擅入，其簾前窗外階下均不許閒人窺視，滿、漢章京之直房亦如之。

謹按：嘉慶五年十一月十八日諭，軍機處爲辦理樞務承寫密旨之地，首以嚴密爲要，軍機大臣傳述朕旨，令章京繕寫，均不應稍有洩漏。自去年正月以後，軍機處頗覺整飭嚴

肅，閒雜人等亦覺稀少。近日又覺廢弛，軍機處臺階上下窗外廊邊，擁擠多人，藉回事畫稿爲名，探聽消息。摺稿未達於宮庭，新聞早傳於街市，廣爲談說，信口批評，實非政體，必應嚴定章程，以昭法守。此後軍機大臣止准在軍機處承寫本日所奉上諭，其部院稿案不准在軍機處辦理，本管司員不准至軍機處回事，軍機章京辦事之處不准閒人窺視，自王、貝勒、貝子、公、文武滿、漢大臣，俱不准至軍機處同軍機大臣談說事體，違者重處不赦。自今日始，每日著都察院科道一人輪流進內，在隆宗門內北首內務府直房監視，軍機大臣散後方准退直。如有前次情弊，即令直班科道參奏，候旨嚴懲；若科道曠班或推故早散，亦准軍機大臣指名參奏。再此後有通諭王大臣之事，俱在乾清門外階下傳述，不准在軍機處傳旨。此旨通諭中外，各衙門敬謹凜遵，違者不恕。特諭。又：六年四月初二日旨，圓明園距城較遠，其軍機辦事處所若仍令科道前往值日，設遇陰雨遲散，該科道等不及進城，無處住宿。嗣後不必派員前往，以示體恤，遇進城之時，仍著照舊值日稽查。又：二十五年十月初三日旨，稽查軍機處御史著裁撤。

凡軍機大臣及章京每日晨直飯食，皆由膳房承應，其滿、漢章京散直後在城中則退食於方略館，在圓明園則退食於外直廬。均由內務府、戶部銀庫支領飯銀，其會計出入以兩班達拉密及方略館提調分掌之。

謹按：圓明園滿、漢章京外直廬一在挂甲屯，一在冰窖，均係乾隆年間賞給居住。恭查乾隆三十三年八月十八日本處奏，軍機司員前蒙皇上天恩，賞給慶復入官花園一所。該員等在圓明園該班直宿迄今已逾多年，除歷次將木植拆卸官用外，所存之屋日久無人修理，漸致損壞。查該處地面甚大，司員等不能修整，若聽其頹廢，將一切牆垣屋壁坍塌，不惟該處係聖駕經行之所，有礙觀瞻；且園池樹木繁盛，無人專管照料，亦甚可惜。查莊親王現在圓明園所置五福書房窄狹，不敷居住，情願將現住房屋換給該司員等。因房間無多，尚不敷用，並願將圓明園高恆入官房屋一所，照內務府估價按數買交軍機處司員分住。若准其調換，即以軍機處司員所住之園賞給莊親王，聽其自行修理。一轉移間，莊親王得有寬敞園亭，隨時酌修，官園既可不致日就坍塌，而軍機處司員亦得有整齊房屋居住，可否如此，出自天恩。奉旨：知道了。又：乾隆十三年奏准戶部堂司官員並戶部銀庫飯銀內，每年各撥銀二千兩作為軍機司員飯銀之用。又：乾隆五十六年九月二十八日旨，銀庫司員每年所得養廉內，每人各撥出銀五百兩賞給軍機章京，以為公費之用。又：嘉慶六年七月二十七日旨，管理三庫大臣慶桂等奏「每年應賞御前、乾清門侍衛，軍機章京並三庫官員養廉共需銀八萬餘兩，因各省所解飯銀不敷支給，請將戶部寄存捐納飯銀歸入銀庫借支備用」等語。此等賞項，從前原因三庫飯銀為數較多，是以每年格外分賞各處，用昭恩賚，並

非正俸及養廉可比。年來外省應解錢糧，俱因撥給軍需，隨解飯銀短絀，除三庫官員養廉照例動支外，其餘應賞各處之項，自當酌量搏節。應如何裁減分給之處，著軍機大臣詳議具奏，俟軍需告歲，各省飯銀解部充裕，仍著照前例給賞。八月十三日本處覆奏，查向來外省隨正項錢糧解到飯銀，貯存銀庫有盈無絀，每年作爲御前、乾清門侍衛，軍機章京等賞項。此皆仰賴鴻慈，恩施格外，俾當差充裕，誠如聖諭，並非正俸養廉可比。現在軍務善後事宜需用尚多，各省應解錢糧俱已就近協撥，銀庫所收飯銀既不敷支用，自應隨時酌減。所有每年應賞御前、乾清門侍衛銀一萬兩，軍機章京銀三千兩，理藩院銀一千二百兩，臣等公同酌減十分之三等因。奉旨：依議。又：八年六月二十二日旨，總管內務府大臣奏「該衙門官員等得項不敷，請於濩銀項下原撥軍機處賞項五千兩內，歸還銀一千兩，原撥步軍統領衙門賞項三千兩內，歸還銀二千兩添補辦公」等語。此項撥給軍機處、步軍統領衙門銀兩，向來如何分給該司員等當差辦公之處，著軍機大臣、步軍統領衙門查明詳晰具奏，再降諭旨。二十六日本處覆奏，查軍機司員每年除應領內務府濩價五千兩外，尚有戶部飯銀及銀庫飯銀，謹將各項銀兩數目及每年如何支用之處，一併開單恭呈御覽。計開軍機處原領戶部飯銀一千兩，銀庫飯銀三千兩，於嘉慶六年間遵旨酌議減銀九百兩，現領銀三千一百兩；又於乾隆三十六年間，因軍機章京差使繁重，費用甚多，經原任尚書公福隆安奏請，將

內務府優價銀撥給軍機處司員五千兩；又乾隆五十六年間，奉特旨於戶部銀庫司員養廉內，每年撥給軍機處司員二千兩；三共領銀一萬一百兩。查軍機處滿、漢司員直班十六員，及方略館清、漢檔房收掌等官，並蘇拉供事人等，每日早晚飯共十二棹，約計銀十五兩，每年共用銀五千四百兩；又春秋兩次滿、漢司員隨圍十六員，春圍每員幫貼銀二十兩，秋圍每員五十兩，管理檔房蘇拉八名，每名春圍幫貼銀十兩，秋圍每人四十兩，計每年用銀一千五百餘兩；又該班房茶燭冰炭等項每日約用銀一兩，計每年用銀三百餘兩；三共開除銀七千二百餘兩。餘銀於每年冬季滿、漢司員三十二員分別等第，每員約分銀七八九十兩不等額，設蘇拉十二名，每名賞銀二十餘兩不等。是日奏上，奉諭，前因內務府大臣奏請於獲銀項下，原撥軍機處賞項內，歸還銀一千兩，原撥步軍統領衙門賞項內，歸還銀二千兩，添補辦公，當即諭令軍機大臣、步軍統領衙門詳查奏明。茲據查明，將歷年分賞銀兩數目據實復奏。軍機章京等差使繁重，費用甚多，前已於應領項下暫減銀九百兩。步軍統領衙門司員每年當差辦公之用，亦惟資此項分給，由來已久，朕一視同仁，未便遽照內務府大臣等所請如數撥還。但念該衙門司員人數較多，公項不敷分給，著於原撥軍機處賞項下扣出銀五百兩，步軍統領衙門下扣出銀一千兩交內務府收領。嗣後該大臣亦不得聽屬員不知足之言，再行瀆請。又：嘉慶二十五年六月二十四日本處奏，查軍機處滿、漢章京向由戶部

銀庫飯銀內，蒙撥給銀三千兩添補每年辦公之用。嗣於嘉慶六年遵旨議奏，將應給內閣及御前、乾清門侍衛、軍機章京等飯食銀兩俱減去十分之三，嘉慶十四年內閣因辦公缺乏，奏蒙恩准，仍照舊例免其扣減。本年侍衛處亦因公拮据，懇仍照舊例全數支領，奏蒙允准各在案。臣等伏查滿、漢軍機章京常川在內該班，一切用項較多，每年例支銀兩不敷辦公。現在內閣侍衛處飯銀俱經奏復舊例，全數支領，所有軍機章京應領戶部銀庫飯銀三千兩，可否免其扣減三成，仍照舊例支領。奉旨：准其全數支領。謹查，現在本處每年五月內領銀庫養廉銀六百六十六兩六錢零，又領內務府獲價銀四千五百兩；八月內領銀庫養廉銀六百六十六兩六錢零；十月內領銀庫飯銀三千兩；又領戶部飯銀一千兩；十二月內領銀庫飯銀六百六十六兩六錢零；計全年領銀一萬五百兩。

凡滿、漢軍機章京，每逾三年，准軍機大臣擇其尤爲勤慎者，酌保數人交部議敘。

謹按：每屆奏案及諭旨均詳恩敘卷中。

凡本處清字、漢字清檔，每屆五年由軍機大臣奏請另繕一分，以備闕失。清字檔令方略館譯漢官繕寫，漢字檔令內閣中書繕寫，皆派本處章京二人校對，事竣，請旨議敘。

謹按：乾隆二十二年奏准各衙門凡奉清、漢上諭，譯漢繙清，俱送軍機處繙譯，該大臣於行走官內揀擇繙譯精通者六人，定爲六缺，專司辦理。五年之後，如果辦理無誤，奏明交

部議敘紀錄二次。又：六十年四月十七日本處奏，纂輯廓爾喀紀略五十四卷現已完竣，並恭錄御製紀事詩文列爲天章四冊，冠於卷首，一併進呈。臣等查向來纂辦紀略等書告竣，將纂修、謄錄、供事人等奏請給與議敘在案。前次纂輯巴勒布紀略二十六卷，未經奏請議敘，此次續辦之。廓爾喀紀略計共五十八冊，卷帙較多，所有纂修各員及譯漢官、謄錄、供事人等，尚屬奮勉。再軍機檔案向派中書等另行鈔錄一分，以備查閱，每屆五年告竣一次，前於乾隆五十四年奏蒙賞給議敘。嗣又將近年以來所奉諭旨及議覆等件檔案繕成九十二冊，所有繕寫各員及承辦之供事人等，均無錯誤。可否將廓爾喀紀略纂修等官並校繕檔案中書及謄錄、供事人等俱各照例分別議敘，以示鼓勵。謹奏。奉旨：著照例議敘。又：嘉慶六年八月十四日本處奏，查軍機處錄存檔案，自乾隆五十三年起至六十年止，所奉諭旨及議覆等件，經臣等於上年循照歷次之例，選派中書另錄一分，以備查閱，奏准在案。今中書等業將各檔繕成，共計一百二十三冊，臣等檢查，俱無舛錯。向來繕辦軍機檔案每次告竣，俱給予議敘。此次繕辦檔案內有平定廓爾喀並苗匪、臺灣各檔案，卷帙浩繁，較之上屆六十年繕寫九十二冊之數多至三十餘冊，即比較五十四年繕寫清檔一百零五冊之數亦多十餘冊。所有繕寫中書及承辦之供事，趕緊繕辦，均屬奮勉，可否飭部查照前例，按檔冊多寡，給與議敘，以示鼓勵。謹奏。奉旨：著照例議敘。又：十年十二月十八日本處奏，竊照

軍機處自嘉慶元年以來，所奉漢字諭旨、寄信及議覆等項冊檔繁多，歷年隨帶翻閱，間有擦損，又緣六年大雨，潮氣侵溼，前經臣等奏明查照向例，派員另繕一分，恭貯備查在案。自本年二月起，臣等督飭該員等上緊繕繕，次第完竣，計自嘉慶元年春季起至十年夏季止，現經一律辦出。臣等因卷帙浩繁，恐有舛漏，復經派員詳校，尚無草率。查此次所辦，除尋常各檔案外，並將勦平邪匪及工賑、衡工各檔案均經另辦一分，查對齊全，共計有二百餘冊，比較上三次乾隆五十四年、六十年、嘉慶六年所辦清、漢各檔俱多五六十冊及七八十冊不等。所有繕寫、校對之中書及承辦之供事，均尚奮勉，仰懇照例給與議敘，以示鼓勵。再查檔案關係緊要，此次所繕各檔，從元年至今所積太多，未免有擦損侵溼之處，除經查補完善外，此後漢字各檔案，請每積有五年奏辦一次，以昭慎重，謹奏。奉旨，著照例賞給議敘，餘依議。又：十六年十二月二十一日日本處奏，竊照軍機處自嘉慶十年以後，所奉漢字諭旨、寄信及議覆等項冊檔繁多，前經臣等奏定章程，奏明派員繕寫一分，並因從前節年舊檔經各館查閱，多有參差訛脫之處，一併飭令修理在案。自本年三月起，臣等督飭該員上緊繕校，次第完竣，計自嘉慶十年秋季起，至十五年冬季止，共六十八冊，均一律辦出。其節年舊檔二百四十餘冊，亦均詳細覆核，補綴整齊。查此次繕寫五年檔案，復將乾隆三十年以後各舊檔整理完善，所有承辦之中書等，尚屬奮勉，可否仰懇照例給與議敘，其在館供事人等，當差

亦均勤奮，應請照例一律議敘。惟供事內有於辦理勦平三省邪匪方略全部告成時，曾經奏請分發，經部議祇將其銓選班次酌予從優，未經分發。今查該供事等，經屢次議敘之後，現在辦理檔案又屬奮勉，可否將等第在前尤爲出力者，量予分發，以免壅滯。謹奏。又奏，查此次臣等派出總司校對之中書梁承福、王鳳翰二員在軍機處行走，素屬奮勉得力，現經臣等責令覆校各檔案，尤爲詳慎，應奏明量予鼓勵。可否將該二員即以應升之主事分掣在臣等所管戶、刑二部行走，遇有題選缺出，各予補用，無庸另給議敘。謹奏。奉旨：依議。

又：二十三年十二月初十日日本處奏，竊照軍機處自嘉慶十五年以後，所奉漢字諭旨、寄信及議覆等項冊檔繁多，經臣等查照歷屆辦理之例，傳內閣中書十六員繕寫，派軍機章京二員校勘，督飭上緊繕校。計自嘉慶十六年春季起，二十年冬季止，共七十冊，均一律繕出，即舊檔三百一十餘冊，亦均覆校補綴整齊。所有承辦各員及在館供事等，可否照例給予議敘。謹奏。奉旨，准其議敘。又：道光二年二月十六日日本處奏，竊照軍機處自嘉慶二十年以後，所奉漢字諭旨、寄信及議覆等項冊檔繁多，經臣等遵照歷屆辦理之例，傳內閣中書十六員繕寫，派軍機章京二員校勘，督飭上緊繕校。計自嘉慶二十一年春季起，至二十五年冬季止，共六十三冊，並五年內逐日登記號簿十冊，均一律繕出，其節年舊檔三百八十餘冊，亦均補綴整齊。查此次繕寫五年檔案，復將乾隆三十年以後各舊檔修補完善，所有承辦各員

及在館供事等，可否照例一體給與議敘。再查軍機處逐日登記號簿爲收發事件總目，檢查便於翻閱，向來繕修清檔時，並不另行繕錄。此次辦理漢字檔冊，臣等派出軍機章京吏部員外郎陳彬、內閣中書喬用遷詳加校對，並令在館供事，將登記號簿另繕一分，責成該章京等校對無訛。查嘉慶十六年繕修檔冊，曾將總校之章京中書梁承福、王鳳翰二員奏請以主事陞用，分部行走。今該章京陳彬等總司校對，頗爲詳慎，應請量予鼓勵。查員外郎陳彬補缺後，例應試俸中書，喬用遷尚未補缺。可否准令陳彬銷去試俸，喬用遷遇有題選缺出，即行奏補，餘依議。奉旨，員外郎陳彬著准銷試俸，中書喬用遷著遇有本衙門題選缺出，即行奏補，餘依議。又：咸豐四年正月二十五日本處奏，軍機處錄存檔案，歷屆五年奏請辦理一次，將檔冊另錄一分收存備查。自上屆繕修後，現雖僅及三年，惟當軍報紛集之時，較之五年檔冊已覺繁多，且不時繙閱，磨損過甚。若仍拘泥成案，俟至咸豐六年辦理，恐爲期過久，字跡或多漫漶，將來難於查覈。臣等擬將此三年內所奉諭旨及寄信、會議各漢字檔冊，即行繕錄一分，另備檢查。該章京等如果辦理妥協，查照向例，奏請鼓勵。奉旨，知道了。

方略館在隆宗門外咸安宮之左，凡本處檔案皆藏庫中。總裁無定員，以軍機大臣領之。每次軍功告藏及遇有政事之大者，皆奏奉諭旨紀其始末，纂輯成書，或曰方略，或曰紀略，隨時奏請欽定。亦有他書奉旨交輯者，均率在館人員承辦。其提調、收掌、纂修皆以滿、漢軍機章京

兼充。提調，滿洲二人、漢二人。收掌，滿洲二人、漢二人。纂修，滿洲三人、漢六人。內一缺由翰林院咨送編、檢以上官一人充補。

方略館設譯漢官，乾隆初定爲六缺，後因應繙譯之件漸繁，隨時由吏部傳取，無定額。凡遇清字文案應譯漢者，皆令譯寫成冊，以備纂輯。

方略館校對由軍機大臣咨取內閣中書兼充，無定員，凡館中所纂書籍及所錄清檔，皆令分司校勘。其供事亦無定額，由內閣、翰林院、詹事府等衙門傳取，書成時皆分別奏請議敘。

內繙書房管理亦無定員，以滿洲軍機大臣領之。凡諭旨，清字則譯漢，漢字則繙清，各衙門咨送於內閣者，皆錄送繙書房，其每年起居注館承辦起居注有應繙譯者，亦如之。凡恭遇臨御經筵，則敬繙御論及講官所擬講章。凡恭遇冊立、冊封，敕諭外藩、外國及各壇廟、山川祝文，暨諭祭、諭葬之祭文、碑文，皆由內閣翰林院交繙。凡有旨令將經史繙清者，皆隨時纂辦，以候欽定。凡御製詩文之敕繙者，皆即恭繙錄進。

凡繙書房，提調二人，協辦提調二人，收掌四人，掌檔四人，皆由滿洲軍機大臣於繙書房行走官酌委其兼行走官。翰林院、詹事府、內閣中書、各部院司員筆帖式無定額，繙譯官四十人，各以通於繙譯者爲之。

樞垣記略卷之十五

題名一

親王奉旨在軍機大臣上行走

成親王 永字輩，諱理，正紅旗，諡曰哲。

恭親王 奕字輩，名訢，鑲藍旗。

滿洲軍機大臣

鄂爾泰 字毅菴，滿洲鑲藍旗人。康熙己卯舉人。官至大學士，封伯爵。諡文端。

莽鵠立 字樹本，滿洲鑲黃旗人。官至都統，署工部尚書。諡勤敏。

索柱 字海峰，滿洲正黃旗人。康熙乙未進士，官至工部侍郎。

海望 字（缺），滿洲正黃旗人。官至戶部尚書。諡勤恪。

納延泰 字（缺），蒙古正藍旗人。官至理藩院尚書。

- 訥親 字(缺)，滿洲鑲黃旗人。官至大學士，襲公爵。
- 性桂 字(缺)，滿洲正藍旗人。官至吏部尚書。諡恭簡。
- 雙喜 字(缺)，滿洲鑲黃旗人。官至盛京工部侍郎。
- 班第 字(缺)，蒙古鑲黃旗人。官至兵部尚書，定北將軍，封公爵。諡義烈。
- 馬爾賽 字(缺)，滿洲正白旗人。官至戶部尚書。
- 傅恆 字春和，滿洲鑲黃旗人。官至大學士，封公爵。諡文忠，贈郡王。
- 高斌 字東軒，滿洲鑲黃旗人。官至大學士。諡文定。
- 馬蘭泰 字(缺)，滿洲正黃旗人。官至參贊大臣，襲侯爵。
- 舒赫德 字伯容，滿洲正白旗人。官至大學士。諡文襄。
- 來保 字學圃，滿洲正白旗人。官至大學士。諡文端。
- 尹繼善 字元長，滿洲鑲黃旗人。雍正癸卯進士，官至大學士。諡文端。
- 兆惠 字和甫，滿洲正黃旗人。官至戶部尚書、協辦大學士，封公爵。諡文襄。
- 雅爾哈善 字(缺)，滿洲正紅旗人。官至兵部尚書。
- 阿里衮 字松崖，滿洲鑲黃旗人。官至戶部尚書、協辦大學士，襲公爵。諡襄壯。
- 夢麟 字文子，蒙古正白旗人。乾隆乙丑進士，官至戶部侍郎。

三泰 字(缺)，滿洲正白旗人。官至戶部侍郎，封子爵。諡果勇。

富德 字(缺)，滿洲正黃旗人。官至理藩院尚書。

阿桂 字廣庭，滿洲正藍旗人。乾隆戊午舉人，官至大學士，封公爵。諡文成。

福隆安 字珊林，滿洲鑲黃旗人。傅恆子，固倫額駙。官至兵部尚書，襲公爵。諡勤恪。

溫福 字(缺)，滿洲鑲紅旗人。官至大學士。

豐陞額 字(缺)，滿洲鑲黃旗人。阿里衮子。官至戶部尚書，襲公爵。諡誠武。

桂林 字(缺)，滿洲鑲藍旗人。官至兩廣總督。諡莊敏。

慶桂 字丹年，滿洲鑲黃旗人。尹繼善子。官至大學士。諡文恪。

福康安 字敬齋，滿洲鑲黃旗人。傅恆子。官至大學士，封貝子。諡文襄，贈郡王。

索琳 字(缺)，滿洲正藍旗人。廕生，官至理藩院尚書。

阿思哈 字(缺)，滿洲正白旗人。官至漕運總督。諡莊恪。

和珅 字致齋，滿洲正紅旗人。官至大學士，封公爵。

奎林 字(缺)，滿洲鑲黃旗人。官至成都將軍，襲公爵。諡武毅。

福長安 字誠齋，滿洲鑲黃旗人。傅恆子。官至工部尚書，封侯爵。

松筠 字湘浦，蒙古正藍旗人。官至大學士。諡文清。

台布 字(缺)，蒙古正藍旗人。官至西寧辦事大臣。

謹按：以上皆乾隆年間人直。

傅森 字(缺)，滿洲鑲黃旗人。官至戶部尚書。

那彥成 字繹堂，滿洲正藍旗人。阿桂孫。乾隆己酉進士，官至直隸總督。諡文毅。

成德 字(缺)，滿洲正藍旗人。官至戶部尚書。諡恪慎。

德瑛 字(缺)，滿洲鑲黃旗人。官至工部侍郎。

英和 字煦齋，滿洲正白旗人。乾隆癸丑進士，官至戶部尚書、協辦大學士。

托津 字知亭，滿洲鑲黃旗人。官至大學士。諡文定。

勒保 字宜軒，滿洲鑲黃旗人。溫福子。官至大學士，封侯爵。諡文襄。

桂芳 字香東，滿洲鑲藍旗人。嘉慶己未進士，官至戶部侍郎。諡文敏。

和瑛 字泰菴，蒙古鑲黃旗人。乾隆辛卯進士，官至刑部尚書。諡簡勤。

文孚 字秋潭，滿洲鑲黃旗人。官至大學士。諡文敬。

謹按：以上皆嘉慶年間人直。

長齡 字懋亭，蒙古正白旗人。納延泰子。官至大學士，封公爵。諡文襄。

玉麟 字研農，滿洲正黃旗人。乾隆乙卯進士，官至伊犁將軍。諡文恭。

蔣攸銜 字礪堂，漢軍鑲藍旗人。乾隆甲辰進士，官至大學士，贈尚書銜。

穆彰阿 字鶴舫，滿洲鑲藍旗人。嘉慶乙丑進士，官至大學士。

賽尚阿 字鶴汀，蒙古正藍旗人。官至大學士。

奎 照 字玉亭，滿洲正白旗人。英和子。官至禮部尚書。

文 慶 字孔修，滿洲鑲紅旗人。溫福曾孫。道光壬午進士，官至大學士。諡文端。

隆 文 字雲章，滿洲正紅旗人。嘉慶戊辰進士，官至戶部尚書。諡端敏。

謹按：以上皆道光年間人直。

穆 蔭 字清軒，滿洲正白旗人。官至兵部尚書。

舒興阿 字雲溪，滿洲正藍旗人。道光壬辰進士，官至陝甘總督、內閣學士。

麟 魁 字梅谷，滿洲鑲白旗人。道光癸未進士，官至兵部尚書、協辦大學士、署陝甘總督。

諡文端。

瑞 麟 字澄泉，滿洲正藍旗人。官至大學士、兩廣總督。諡文莊。

柏 葭 字靜濤，蒙古正藍旗人。道光丙戌進士，官至大學士。

文 祥 字博川，滿洲正紅旗人。道光乙巳進士，現官大學士。

桂 良 字燕山，滿洲正紅旗人。官至大學士。諡文端。

寶鏗 字佩衡，滿洲鑲白旗人。道光戊戌進士，現官大學士。

謹按：以上皆咸豐年間入直。又按：是書紀載止於光緒乙亥十二月，卷中題名及分注現官云云，皆以是月爲斷。

漢軍機大臣

張廷玉 字研齋，安徽桐城人。康熙庚辰進士，官至大學士，封伯爵。諡文和。

蔣廷錫 字揚孫，江蘇常熟人。康熙四十二年欽賜進士，官至大學士。諡文肅。

哈元生 字（缺），直隸河間人。官至貴州提督。

朱 軾 字可亭，江西高安人。康熙甲戌進士，官至大學士。諡文端。

徐 本 字立人，浙江錢塘人。康熙戊戌進士，官至大學士。諡文穆。

蔣 溥 字質甫，江蘇常熟人。廷錫子。雍正庚戌進士，官至大學士。諡文恪。

汪由敦 字謹堂，浙江錢塘人。雍正甲辰進士，官至吏部尚書、協辦大學士。諡文端。

陳大受 字占咸，湖南祁陽人。雍正癸丑進士，官至吏部尚書、協辦大學士。諡文肅。

劉 綸 字繩菴，江蘇武進人。乾隆丙辰舉博學鴻詞科第一，官至大學士。諡文定。

劉統勳 字延清，山東諸城人。雍正甲辰進士，官至大學士。諡文正。

裘曰修 字叔度，江西新建人。乾隆己未進士，官至工部尚書。諡文達。

于敏中 字耐圃，江蘇金壇人。乾隆丁巳狀元，官至大學士。諡文襄。

袁守侗 字愚谷，山東長山人。乾隆甲子舉人，官至直隸總督。諡清愨。

梁國治 字階平，浙江會稽人。乾隆戊辰狀元，官至大學士。諡文定。

董誥 字蔗林，浙江富陽人。乾隆癸未進士，官至大學士。諡文恭。

王杰 字偉人，陝西韓城人。乾隆辛巳狀元，官至大學士。諡文端。

孫士毅 字補山，浙江仁和人。乾隆辛巳進士，官至大學士，封公爵。諡文靖。

謹按：以上皆乾隆年間人直。

沈初 字雲椒，浙江平湖人。乾隆癸未榜眼，官至戶部尚書。諡文恪。

吳熊光 字槐江，江蘇昭文人。乾隆戊子舉人，官至兩廣總督。

戴衢亨 字蓮士，江西大庾人。乾隆戊戌狀元，官至大學士。諡文端。

劉權之 字雲房，湖南湘潭人。乾隆庚辰進士，官至大學士。諡文恪。

盧蔭溥 字南石，山東德州人。乾隆辛丑進士，官至大學士。諡文肅。

章煦 字桐門，浙江錢塘人。乾隆壬辰進士，官至大學士。諡文簡。

戴均元 字可亭，江西大庾人。乾隆乙未進士，官至大學士。

謹按：以上皆嘉慶年間人直。

曹振鏞

字儷笙，安徽歙縣人。乾隆辛丑進士，官至大學士。諡文正。

黃鉞

字左田，安徽當塗人。乾隆庚戌進士，官至戶部尚書。諡勤敏。

王鼎

字省崖，陝西蒲城人。嘉慶丙辰進士，官至大學士。諡文恪。

潘世恩

字芝軒，江蘇吳縣人。乾隆癸丑狀元，官至大學士。諡文恭。

趙盛奎

字菊言，直隸深州人。嘉慶辛酉拔貢，官至刑部侍郎。

何汝霖

字兩人，江蘇江寧人。道光乙酉舉人，官至禮部尚書。諡恪慎。

祁寯藻

字春浦，山西壽陽人。嘉慶甲戌進士，官至大學士。諡文端。

陳孚恩

字子鶴，江西新城人。道光乙酉拔貢，官至吏部尚書。

季芝昌

字仙九，江蘇江陰人。道光壬辰探花，官至閩浙總督。

謹按：以上皆道光年間人直。

彭蘊章

字詠莪，江蘇長洲人。道光乙未進士，官至大學士。諡文敬。

邵燦

字又村，浙江餘姚人。道光壬辰進士，官至漕運總督。諡文靖。

杜翰

字繼園，山東濱州人。道光甲辰進士，官至禮部侍郎。

匡源

字鶴泉，山東膠州人。道光庚子進士，官吏部侍郎。

焦祐瀛 字桂樵，直隸天津人。道光己亥舉人，官太僕寺卿。

沈兆霖 字朗亭，浙江錢塘人。道光丙申進士，官至戶部尚書、署陝甘總督。諡文忠。

曹毓瑛 字琢如，江蘇江陰人。道光癸卯舉人，官至兵部尚書。諡恭愨。

謹按：以上皆咸豐年間人直。

李棠階 字文園，河南河內人。道光壬午進士，官至禮部尚書。諡文清。

李鴻藻 字蘭孫，直隸高陽人。咸豐壬子進士，現官工部尚書。

胡家玉 字小蘧，江西新建人。道光辛丑探花，官都察院左都御史，現官候補五品京堂。

汪元方 字嘯盒，浙江餘杭人。道光癸巳進士，官至都察院左都御史。諡文端。

沈桂芬 字經笙，順天宛平人。道光丁未進士，現官兵部尚書、協辦大學士。

謹按：以上皆同治年間人直。

樞垣記略卷之十六

題名二

滿洲軍機章京

舒赫德 已見大臣。雍正八年十二月由內閣侍讀入直。

常鈞 字石堂，滿洲鑲紅旗人。雍正八年（缺）月由兵部主事入直，官至湖南巡撫。

兆惠 已見大臣。雍正九年正月由筆帖式入直。

雅爾哈善 已見大臣。雍正九年二月由內閣中書入直。

明善 字元復，滿洲正白旗人。雍正九年二月由內閣中書入直，官至西安副都統。

積蘭泰 字薰庭，滿洲正黃旗人。雍正九年六月由內閣中書入直。

阿思哈 已見大臣。雍正九年七月由內閣中書入直。

傅亮 字（缺）旗人。雍正十年十月由兵部筆帖式入直。

權霍托 字（缺）旗人。雍正十年（缺）月由兵部主事入直。

遜札齊 字(缺) 旗人。雍正十年(缺)月由刑部員外郎入直。

索諾木 字(缺) 旗人。雍正十年(缺)月由理藩院筆帖式入直。

揚珠 字(缺) 旗人。雍正十年(缺)月由兵部筆帖式入直。

瓜蘭泰 字(缺)，滿洲鑲白旗人。雍正十年(缺)月由太僕寺典簿入直。

官保 字雲軒，滿洲正黃旗人。雍正十年(缺)月由刑部主事入直，官至吏部尚書。諡文勤。

瞻柱 字(缺) 旗人。

德興 字(缺) 旗人。

唐烏里 字(缺) 旗人。

蘇楞額 字(缺) 旗人。

佛存 字(缺) 旗人。

達素 字(缺)，滿洲鑲黃旗人。雍正十一年正月由內務府筆帖式入直。

鄂容安 字休和，滿洲鑲藍旗人。鄂爾泰子。雍正癸丑進士，十一年五月由庶吉士入直，官至

兩廣總督，襲伯爵。諡剛烈。

鄂倫 字(缺)，滿洲鑲藍旗人。鄂容安從弟。雍正癸丑進士，十一年五月由庶吉士入直。

班第 已見大臣。雍正十一年八月由理藩院侍郎入直。

納親 已見大臣。雍正十一年(缺)月由鑾儀使入直。

蘇崇阿 字(缺)，滿洲正白旗人。雍正十三年正月由內閣中書入直。

索柱 字(缺)旗人。雍正十三年八月由(缺)入直。

赫色布 字(缺)，滿洲鑲紅旗人。雍正十三年十一月由兵部筆帖式入直。

那爾賽 字(缺)，滿洲(缺)旗人。雍正十三年十一月由宗人府員外郎入直。

保寧 字(缺)旗人。

董漢 字(缺)旗人。

阿爾布 字(缺)，滿洲正白旗人。乾隆元年(缺)月由兵部筆帖式入直。

靈保 字(缺)，滿洲正黃旗人。乾隆二年(缺)月由內閣中書入直。

碩善 字春農，滿洲鑲藍旗人。乾隆二年八月由兵部筆帖式入直。

定福 字(缺)，滿洲正紅旗人。乾隆六年(缺)月由兵部筆帖式入直。

書秀 字(缺)，滿洲(缺)旗人。

阿桂 已見大臣。乾隆八年三月由兵部郎中入直，十六年十月以吏部員外郎再入直。

溫福 已見大臣。乾隆八年四月由兵部員外郎入直。

三寶 字(缺)，滿洲正紅旗人。乾隆九年(缺)月由內閣侍讀入直，官至大學士。謚文敬。

官登 字循夫，滿洲鑲黃旗人。乾隆九年（缺）月由內閣中書入直。

德克進 字（缺）旗人。

崇祿 字（缺）旗人。

三贊保 字（缺）旗人。

敏德 字（缺）旗人。

常亮 字（缺），滿洲鑲黃旗人。乾隆十一年（缺）月由兵部主事入直。

安福 字（缺），滿洲正白旗人。乾隆十一年（缺）月由兵部主事入直。

德舒 字（缺），滿洲鑲紅旗人。乾隆十二年（缺）月由內閣中書入直。

德勒炳阿 字（缺）旗人。

雅拉布 字（缺）旗人。

德壽 字（缺）旗人。乾隆十三年（缺）月由內閣中書入直。

巴彥他哈 字（缺）旗人。乾隆十三年（缺）月由內閣中書入直。

烏勒穆集 字（缺）旗人。乾隆十三年（缺）月由理藩院主事入直。

圖桑阿 字（缺）旗人。乾隆十三年（缺）月由戶部司庫入直。

薩璧 字（缺）旗人。乾隆十三年（缺）月由兵部筆帖式入直。

靈毓 字(缺)，滿洲鑲黃旗人。乾隆十三年(缺)月由內閣中書入直。

富察善 字瑶峰，滿洲鑲黃旗人。乾隆十三年(缺)月由內閣侍讀入直，官至盛京工部侍郎。

雅河圖 字(缺)旗人。乾隆十三年(缺)月由吏部主事入直。

福德 字(缺)，蒙古鑲白旗人。乾隆十三年(缺)月由理藩院員外郎入直。

傅顯 字令宜，滿洲鑲紅旗人。乾隆十三年(缺)月由內閣中書入直，官至漕運總督。謚襄勤。

鄂寶 字霽堂，滿洲鑲黃旗人。鄂爾泰子。乾隆十三年(缺)月由內閣侍讀入直，官至漕運

總督。

巴延三 字(缺)，滿洲正紅旗人。乾隆十三年(缺)月由內閣中書入直，官至戶部尚書。

富德 字(缺)，滿洲鑲紅旗人。乾隆十三年(缺)月由內閣侍讀入直。

阿固哩 字(缺)，滿洲正藍旗人。乾隆十三年(缺)月由(缺)主事入直。

景宣 字(缺)，滿洲鑲白旗人。乾隆十三年(缺)月由內閣中書入直。

唐烏里 字(缺)旗人。乾隆十三年(缺)月由內閣中書入直。

九格 字(缺)，滿洲正藍旗人。乾隆十三年(缺)月由工部主事入直。

富明安 字(缺)，滿洲鑲紅旗人。乾隆十(缺)年(缺)月由戶部主事入直，官至湖廣總督。謚恭恪。

巴揚阿 字(缺)旗人。

額勒登額 字(缺)，滿洲鑲黃旗人。乾隆十六年(缺)月由吏部筆帖式入直。

輔德 字弼甫，滿洲鑲黃旗人。乾隆十六年(缺)月由內閣中書入直，官至江西巡撫。

武保 字(缺)，滿洲鑲黃旗人。乾隆十六年(缺)月由銀庫員外郎入直。

索琳 已見大臣。乾隆十七年(缺)月由兵部員外郎入直。

文祿 字(缺)旗人。乾隆十七年(缺)月由兵部筆帖式入直，官至直隸按察使。

立柱 字(缺)旗人。乾隆十七年(缺)月由(缺)入直。

博清額 字(缺)，滿洲鑲黃旗人。乾隆十七年(缺)月由戶部員外郎入直，三十六年以內閣學士

再入直，三十八年以理藩院侍郎三人入直，官至理藩院尚書。諡恭勤。

博昆 字穆菴，蒙古正黃旗人。乾隆十七年(缺)月由理藩院筆帖式入直，官至布政使。

赫泰 字(缺)，滿洲正紅旗人。乾隆十八年(缺)月由銀庫員外郎入直。

本珠克 字(缺)，滿洲鑲黃旗人。乾隆十八年(缺)月由銀庫筆帖式入直。

額爾景額 字(缺)旗人。乾隆十九年(缺)月由內閣侍讀入直。

本忠 字(缺)，滿洲鑲黃旗人。乾隆十九年(缺)月由刑部筆帖式入直。

明山 字魯瞻，滿洲正藍旗人。乾隆十九年(缺)月由主事銜入直，官至陝甘總督，諡勤恪。

富森布 字(缺)旗人。乾隆十九年(缺)月由吏部筆帖式入直。

慶 桂 已見大臣。乾隆二十年(缺)月由戶部員外郎入直。

東 文 字(缺)旗人。乾隆二十年(缺)月由內閣中書入直。

沙 勤 字(缺)旗人。乾隆二十年(缺)月由內閣中書入直。

明 德 字實齋，滿洲正紅旗人。乾隆二十年(缺)月由緞疋庫司庫入直，官至總督。

富 傳 字(缺)，滿洲(缺)旗人。乾隆二十一年(缺)月由戶部筆帖式入直，官至四川布政使。

珠魯訥 字(缺)，滿洲鑲白旗人。乾隆二十一年(缺)月由吏部筆帖式入直，官至禮部侍郎。

巴尼璉 字韞輝，蒙古正黃旗人。乾隆二十一年五月由內閣中書入直，官至按察使。

額騰額 字(缺)旗人。乾隆二十一年六月由(缺)入直。

郝 碩 字(缺)，滿洲(缺)旗人。乾隆二十二年五月由戶部員外郎入直，官至山東巡撫。

巴清額 字(缺)旗人。乾隆二十二年六月由(缺)入直。

明 福 字(缺)旗人。乾隆二十二年六月由(缺)入直。

什蒙額 字(缺)旗人。乾隆二十二年十月由(缺)入直。

德 敏 字(缺)旗人。乾隆二十三年七月由銀庫筆帖式入直。

蘇靈額 字(缺)旗人。乾隆二十三年十月由(缺)入直。

塞爾布 字(缺)旗人。乾隆二十三年(缺)月由緞疋庫大使入直。

薩靈阿 字(缺)旗人。乾隆二十三年(缺)月由內閣中書入直。

賽明阿 字(缺)旗人。乾隆二十四年二月由戶部員外郎入直。

西凌阿 字(缺)旗人。乾隆二十五年(缺)月由理藩院員外郎入直。

留保住 字(缺)，蒙古正白旗人。乾隆二十五年三月由理藩院郎中入直，官至理藩院尚書。

昌峻 字(缺)旗人。乾隆二十五年四月由(缺)入直。

福寧 字康齋，滿洲鑲藍旗人，乾隆二十五年六月由兵部筆帖式入直，官至湖廣總督。

明瑞 字筠亭，滿洲鑲黃旗人。乾隆二十五年(缺)月由(缺)入直，官至兵部尚書，襲公爵。

諡忠烈。

諾穆清 字(缺)，滿洲正藍旗人。乾隆二十六年三月由戶部郎中入直，四十二年由雲南巡撫

降調回京，以主事銜再入直，官至戶部侍郎。

德成 字(缺)，滿洲正黃旗人。乾隆二十六年五月由內務府筆帖式入直。

舒彬 字(缺)旗人。乾隆二十六年十二月由內閣中書入直。

法福哩 字(缺)旗人。乾隆二十六年十二月由吏部員外郎入直。

勒保 已見大臣。乾隆二十七年十一月由中書科筆帖式入直。

玉山 字(缺)旗人。乾隆二十七年十二月由顏料庫庫使入直。

伊克坦布 字(缺)旗人。乾隆二十八年三月由(缺)入直。

英善 字(缺)，滿洲鑲黃旗人。乾隆二十八年五月由侍衛處筆帖式入直，官至都察院左都

御史。

毓奇 字鍾山，滿洲鑲黃旗人。乾隆二十八年十月由內閣中書入直，官至漕運總督。

成策 字警之，滿洲(缺)旗人。乾隆癸酉舉人，二十八年十月由(缺)入直，官至工部侍郎。

特昇額 字(缺)，滿洲鑲黃旗人。乾隆二十九年七月由兵部筆帖式入直。

宜綿 原名尚安，字(缺)，滿洲正白旗人。乾隆三十二年(缺)月由兵部筆帖式入直，官至陝

甘總督。

惠齡 字瑤圃，蒙古正白旗人。納延泰子。乾隆三十二年五月由戶部筆帖式入直，官至湖廣

總督。諡勤襄。

興隆 字(缺)旗人。乾隆三十二年五月由戶部筆帖式入直。

盛住 字(缺)，滿洲正白旗人。乾隆三十二年五月由內閣中書入直，官至戶部侍郎。

穆精額 字(缺)旗人。乾隆三十二年六月由戶部筆帖式入直。

明書 字(缺)旗人。乾隆三十(缺)年(缺)月由(缺)入直。

海寧 字(缺)，滿洲正藍旗人。乾隆三十三年三月由工部主事入直，四十四年九月以甘肅按

察使丁憂回京再入直，官至浙江巡撫。諡勤毅。

永保

字（缺），滿洲鑲紅旗人。溫福子。乾隆三十三年六月由內閣中書入直，三十八年以內閣侍讀再入直，官至兩廣總督，襲伯爵。諡恪敏。

那丹珠

字（缺）旗人。乾隆三十四年正月由（缺）入直。

福祿

字（缺）旗人。乾隆三十四年二月由段疋庫大使入直。

蘇成額

字（缺）旗人。乾隆三十四年二月由緞疋庫大使入直。

穆克登

字（缺），滿洲正白旗人。乾隆三十四年二月由內閣中書入直，官至江蘇按察使。

特克慎

字（缺），滿洲正黃旗人。乾隆三十四年六月由戶部主事入直。

保成

字（缺），滿洲鑲紅旗人。乾隆三十四年（缺）月由刑部郎中入直，官至吏部侍郎，遷寧夏將軍。

福崧

字（缺），滿洲正黃旗人。乾隆三十五年十二月由內閣中書入直，官至浙江巡撫。

奎舒

字（缺），蒙古正紅旗人。乾隆三十五年十二月由理藩院筆帖式入直，官至理藩院侍郎。

璧興

字（缺）旗人。乾隆三十（缺）年（缺）月由（缺）入直。

慶彰

字（缺）旗人。乾隆三十（缺）年（缺）月由（缺）入直。

齊布森

原名齊克慎，字立亭，滿洲鑲紅旗人。乾隆三十六年（缺）月由（缺）筆帖式入直，官至盛

京刑部侍郎。

明倫 字(缺)旗人。乾隆三十六年五月由(缺)入直。

舒林 字(缺)旗人。乾隆三十六年五月由(缺)入直。

阿揚阿 字(缺)旗人。乾隆三十六年五月由(缺)入直。

佛喜保 字(缺)，滿洲鑲紅旗人。乾隆三十六年七月由理藩院郎中入直。

慶玉 字伯崑，(缺)旗人。乾隆三十六年十一月由(缺)入直，官至布政使。

伊江阿 字誠菴，滿洲正白旗人。乾隆三十六年十一月由理藩院筆帖式入直，官至山東巡撫。

靖海 字(缺)旗人。乾隆三十七年三月由(缺)入直。

吉爾喀拉圖 字(缺)，蒙古正藍旗人。乾隆三十七年六月由內閣中書入直。

索住 字(缺)旗人。乾隆三十七年十月由(缺)入直。

高杞 字(缺)，滿洲鑲黃旗人。乾隆三十七年十一月由內閣中書入直，官至河南巡撫、烏魯

木齊都統。

齊慎 字(缺)旗人。乾隆三十七年十一月由(缺)入直。

奇格 字(缺)旗人。乾隆三十七年十二月由(缺)入直。

庫奇克泰 字(缺)旗人。乾隆三十八年二月由(缺)入直。

福尼善

字(缺)，滿洲鑲紅旗人。傅顯子。乾隆三十八年三月由戶部主事入直，官至貴州巡撫。

數倫泰

字丹崖，滿洲鑲藍旗人。乾隆三十八年九月由戶部員外郎入直，四十五年五月以戶部

主事再入直，官至寧夏將軍。

海廣

字(缺)，滿洲正藍旗人。海寧弟。乾隆三十八年十一月由(缺)入直。

阿林

字(缺)旗人。乾隆三十八年十一月由(缺)入直。

蘇楞泰

字(缺)旗人。乾隆三十九年(缺)月由候補員外郎入直。

那琅阿

字福庭，滿洲鑲白旗人。乾隆四十年正月由兵部員外郎入直，官至廣東鹽運使。

玉華

字西巖，(缺)旗人。乾隆四十年正月由(缺)入直。

玉岱

字東巖，(缺)旗人。玉華弟。乾隆四十年正月由(缺)入直，官至兵部郎中。

舒弼

字亮廷，滿洲正白旗人。阿思哈子。乾隆四十年正月由(缺)入直，官至陝西督糧道。

克昌

字(缺)，滿洲鑲紅旗人。乾隆四十年五月由理藩院主事入直，官至刑部郎中。

塔琦

字(缺)，滿洲正紅旗人。乾隆四十年十二月由刑部員外郎入直，官至刑部侍郎。

博興

字濟堂，蒙古正白旗人。乾隆四十一年正月由理藩院郎中入直，官至理藩院尚書。

達桑阿

字(缺)旗人。乾隆四十一年二月由(缺)入直。

長齡

已見大臣。惠齡弟。乾隆四十一年二月由理藩院筆帖式入直。

松筠 已見大臣。乾隆四十一年十一月由理藩院筆帖式入直。

薩哈善 字(缺)旗人。乾隆四十一年十二月由(缺)入直。

舒廉 字竹泉，滿洲正白旗人。乾隆四十二年正月由戶部員外郎入直，官至戶部侍郎。

達春 字(缺)旗人。乾隆四十二年正月由(缺)入直。

策拔克 字凌度，蒙古鑲黃旗人。乾隆四十二年(缺)月由理藩院筆帖式入直，官至副都統。

貢楚克札布 字乃庭，蒙古鑲白旗人。乾隆四十二年七月由理藩院主事入直，官至烏魯木齊都統。

國廉 字(缺)旗人。

佛興保 字(缺)旗人。

索寧安 字(缺)旗人。乾隆四十三年閏六月由(缺)入直。

德綸 字如菴，滿洲鑲黃旗人。乾隆四十三年閏六月由內閣中書入直，官至歸綏道。

托津 已見大臣。博清額子。乾隆四十三年九月由翰林院筆帖式入直。

索明阿 字雲軒，(缺)旗人。乾隆四十四年正月由吏部員外郎入直，官至通永道。

嵩貴 字良卿，蒙古正白旗人。乾隆四十四年正月由翰林院筆帖式入直，官至內閣學士。

富俊 字松崖，蒙古正黃旗人。乾隆四十四年由理藩院筆帖式入直，官至理藩院尚書。

台斐音 字(缺)，蒙古正黃旗人。乾隆四十四年(缺)月由國子監助教入直，官至廣西巡撫。

巴忠 字丹亭，蒙古鑲紅旗人。乾隆四十四年（缺）月由二等侍衛入直，官至理藩院侍郎。

成林 字（缺），滿洲鑲藍旗人。乾隆四十五年七月由內閣中書入直，官至廣西巡撫。

海昇 字（缺）旗人。乾隆四十五年九月由禮部主事入直，官至禮部侍郎。

衡齡 原名恆寧，字（缺），滿洲鑲紅旗人。乾隆四十五年九月由吏部主事入直，官至山西巡撫。

恩長 字（缺），滿洲鑲藍旗人。乾隆四十五年（缺）月由兵部員外郎入直，官至河南巡撫。

札克桑阿 原名札拉豐阿，字（缺）旗人。乾隆四十六年四月由（缺）入直。

札拉桑阿 字（缺）旗人。札克桑阿弟。

珠爾廣額 原名朱有貴，字（缺），漢軍正紅旗人。乾隆四十六年四月由（缺）入直。

台布 已見大臣。乾隆四十七年十月由理藩院主事入直。

德克精阿 字曉峰，滿洲鑲紅旗人。乾隆四十八年正月由兵部主事入直，官至（缺）府知府。

法克津 字（缺）旗人。乾隆四十八年二月由（缺）入直。

圖璧赫 字（缺）旗人。乾隆四十八年二月由（缺）入直。

福成額 字（缺），蒙古正藍旗人。乾隆四十九年四月由理藩院筆帖式入直。

海成 字（缺），滿洲正黃旗人。乾隆四十九年五月由工部員外郎入直，官至江西巡撫。

雅滿泰 字（缺）旗人。

誠麟 字(缺)，滿洲鑲藍旗人。乾隆五十年(缺)月由顏料庫員外郎入直。

湛露 字吉雲，滿洲鑲白旗人。乾隆五十一年九月由理藩院員外郎入直，官至霸昌道。

薩榮安 字(缺)，滿洲正黃旗人。乾隆五十一年十月由鑾儀衛主事入直，官至雲南按察使。

巴克坦 原名巴永，字(缺)，蒙古鑲紅旗人。巴忠弟。乾隆五十一年十月由理藩院筆帖式入直，

官至科布多參贊大臣。

素訥 字孟蟾，蒙古鑲黃旗人。乾隆五十一年十月由內閣中書入直，官至直隸布政使。

全保 字(缺)，蒙古鑲黃旗人。乾隆五十一年十月由理藩院主事入直，官至陝甘總督。

常明 字(缺)，滿洲鑲紅旗人。乾隆五十一年(缺)月由(缺)筆帖式入直，官至四川總督。諡襄恪。

常齡 字(缺)旗人。

富楞泰 字(缺)，滿洲(缺)旗人。

福爾喀泰 字(缺)旗人。

鄂勒錫葉埒圖 原名塔永安，又名鄂勒哲依圖，字(缺)，蒙古正紅旗人。乾隆五十三年(缺)月由

(缺)入直，官至武備院卿。

蘇明阿 字(缺)旗人。乾隆五十三年十一月由(缺)入直。

索凌阿 字(缺)旗人。乾隆五十三年十二月由(缺)入直。

長亮 字（缺）旗人。乾隆五十三年十二月由（缺）入直。

巴達阿 原名巴克坦布，字質齋，蒙古正藍旗人。乾隆五十四年（缺）月由理藩院筆帖式入直，官至江寧將軍。

索恩 字（缺）旗人。

文孚 已見大臣。乾隆五十五年五月由內閣中書入直。

巴哈布 字海山，（缺）旗人。乾隆五十五年五月由戶部員外郎入直，官至興泉永道。

玉凝 原名玉寧，字（缺），滿洲正紅旗人。乾隆五十五年（缺）月由內閣中書入直，官至參贊大臣。

景敏 字遜齋，滿洲正白旗人。乾隆五十五年（缺）月由刑部主事入直，官至貴州巡撫。

文寧 字（缺）旗人。乾隆五十六年四月由（缺）入直。

和太 字（缺）旗人。乾隆五十六年八月由（缺）入直。

富察善 字（缺），蒙古鑲藍旗人。乾隆五十六年九月由理藩院筆帖式入直，官至理藩院郎中。

員承寧 字（缺），漢軍（缺）旗人。乾隆五十七年正月由（缺）入直，官至鴻臚寺少卿。

圖勒炳阿 字毅堂，蒙古鑲藍旗人。乾隆五十七年七月由內閣中書入直，官至鳳翔府知府。

吉隆阿 字（缺），蒙古（缺）旗人。乾隆六十年由內閣侍讀入直，官至冀寧道。

珠爾松額 字七峰，漢軍正紅旗人。珠爾賡額弟。乾隆六十年十一月由內閣中書入直，官至候

補知府。

松箴 字心菴，蒙古正藍旗人。松筠從弟。乾隆六十年十一月由內閣中書入直，官至吉林

將軍。

德豐 原名德寧額，字懋齋，蒙古正藍旗人。乾隆六十年十一月由理藩院筆帖式入直，官至

南韶連道。

珠拉 字慧堂，蒙古鑲黃旗人。策巴克子。乾隆六十年十一月由理藩院筆帖式入直，官至理

藩院員外郎。

明安泰 字平甫，滿洲正藍旗人。乾隆六十年十一月由內閣中書入直，官至江蘇按察使。

遇昌 字（缺），滿洲鑲白旗人。（缺）月由（缺）入直，官至江蘇按察使。

和精額 字（缺），滿洲（缺）旗人。（缺）月由吏部主事入直，官至（缺）科給事中。

多容安 字見峰，蒙古正黃旗人。嘉慶四年二月由內閣中書入直，官至寧池太廣道。

鄂靈 字（缺），滿洲鑲黃旗人。嘉慶四年二月由內閣中書入直。

明舒 字（缺），滿洲正黃旗人。嘉慶四年二月由戶部員外郎入直，官至新疆辦事大臣。

德克津布 字古愚，滿洲正白旗人。嘉慶四年二月由吏部筆帖式入直，官至朔平府知府。

福綿 原名富綿，字久亭，滿洲鑲紅旗人。嘉慶四年五月由內閣中書入直，官至山西巡撫、倉場侍郎。

伊星阿 字麟圃，蒙古正紅旗人。嘉慶四年五月由內閣中書入直，官至貴西道。

瑞麟 字應亭，滿洲正黃旗人。嘉慶四年五月由戶部員外郎入直，官至盛京刑部侍郎。

伊誠額 字（缺）旗人。嘉慶四年七月由禮部筆帖式入直。

吉祥 字止生，滿洲正白旗人。嘉慶四年八月由刑部筆帖式入直，官至刑部員外郎。

武爾通阿 字魯齋，滿洲鑲紅旗人。嘉慶四年八月由刑部筆帖式入直，官至（缺）道御史。

金齊賢阿 原名金齊香阿，字（缺），蒙古正白旗人。嘉慶四年（缺）月由禮部筆帖式入直，官至順

慶府知府。

錫齡 字遐齋，滿洲鑲紅旗人。嘉慶四年九月由工部筆帖式入直，官至長寶道。

興科 字振堂，滿洲鑲黃旗人。嘉慶五年二月由工部筆帖式入直，官至奉天府府尹。

昌宜泰 字靜夫，滿洲鑲藍旗人。嘉慶六年（缺）月由理藩院主事入直，官至開封府知府。

景祿 字（缺），滿洲（缺）旗人。

穆馨阿 字桂山，滿洲鑲藍旗人。嘉慶八年正月由內閣中書入直，官至銀庫員外郎。

廉敬 原名聯奎，字聚堂，滿洲鑲黃旗人。嘉慶八年十一月由內閣中書入直，官至成都將軍。

祥麟 字(缺)，滿洲鑲黃旗人。嘉慶九年正月由戶部主事入直。

吉郎阿 字靄堂，滿洲鑲藍旗人。嘉慶九年四月由內閣中書入直，官至戶部員外郎，贈公爵。諡

端勤。

重倫 字望峰，滿洲鑲黃旗人。嘉慶九年七月由內閣中書入直，官至刑部郎中。

花連布 字(缺)，滿洲鑲黃旗人。嘉慶十年十月由理藩院筆帖式入直。

伊博格圖 字(缺)，蒙古正黃旗人。嘉慶十二年五月由理藩院筆帖式入直，官至理藩院員外郎。

克興額 字伯詩，滿洲鑲白旗人。嘉慶十二年七月由禮部主事入直，官至候補知府。

珠滿 字瑤圃，蒙古鑲黃旗人。珠拉從弟。嘉慶十二年十月由兵部筆帖式入直，官至鞏昌府

知府。

誠端 字述堂，滿洲鑲黃旗人。嘉慶十三年十月由內閣中書入直，官至盛京工部侍郎。

成貴 字和齋，滿洲鑲黃旗人。嘉慶十四年正月由戶部筆帖式入直。

玉彰 字達士，滿洲正黃旗人。嘉慶十四年正月由內閣中書入直，官至熱河道。

景昌 原名札清阿，字(缺)，滿洲正紅旗人。嘉慶十四年九月由內閣中書入直，官至金華府

知府。

企善 字勉之，滿洲正黃旗人。嘉慶十四年九月由內閣中書入直，官至臨安府知府。

昌熾 字曙亭，蒙古正紅旗人。鄂勒錫葉埒圖子。嘉慶十四年九月由理藩院筆帖式入直，官至鎮迪道。

誠安 字荔園，蒙古正黃旗人。嘉慶十五年正月由戶部筆帖式入直，官至福寧府知府。
成善 原名成麟，字筠溪，蒙古正黃旗人。台斐音子。嘉慶十五年正月由兵部員外郎入直，官至黃州府知府。

那丹珠 字理堂，滿洲鑲黃旗人。嘉慶十六年二月由戶部筆帖式入直，官至兵部郎中。

札勒杭阿 字煥堂，滿洲正白旗人。宜綿子。嘉慶十六年七月由戶部員外郎入直。

容海 字納川，滿洲鑲藍旗人。嘉慶十六年九月由工部郎中入直，官至廣東按察使。

岳齡安 字(缺)，滿洲鑲白旗人。嘉慶十七年五月由理藩院員外郎入直，官至陝西布政使。

廷勳 字(缺)，滿洲正藍旗人。嘉慶十七年十月由理藩院司庫人直，官至涼州府知府。

安誠 字靜甫，滿洲鑲藍旗人。嘉慶十七年十一月由戶部筆帖式入直，官至戶部郎中。

桂明 字秋農，滿洲正黃旗人。嘉慶十七年十一月由刑部筆帖式入直，官至蘭州府知府。

瑞慶 字遠村，滿洲鑲藍旗人。嘉慶十七年十二月由工部筆帖式入直，官至工部郎中。

桂芬 字丹秋，蒙古正白旗人。惠齡子。嘉慶二十一年正月由理藩院筆帖式入直，官至理藩

院員外郎。

福兆 字藹亭，蒙古正黃旗人。嘉慶二十一年十一月由理藩院筆帖式入直。

達興 字起亭，滿洲正藍旗人。嘉慶二十二年二月由禮部筆帖式入直，官至禮部主事。

阿成 字（缺），滿洲正藍旗人。嘉慶二十二年五月由兵部郎中入直。

布延柏勒格 字錫五，蒙古正藍旗人。嘉慶二十二年十一月由內閣中書入直，官至理藩院主事。

福昇阿 字麗江，滿洲正藍旗人。嘉慶二十三年正月由內閣中書入直。

阿達順 字質菴，蒙古正白旗人。嘉慶二十四年八月由戶部主事入直。

烏爾恭額 字敬齋，滿洲鑲黃旗人。嘉慶二十五年十一月由戶部筆帖式入直，官至浙江巡撫。

德舒 字（缺），滿洲正紅旗人。道光元年三月由內閣中書入直。

福英阿 字（缺），滿洲鑲黃旗人。道光元年七月由內閣中書入直。

蘇勒芳阿 字靜亭，滿洲鑲白旗人。道光元年八月由內閣中書入直。

樞垣記略卷之十七

題名三

滿洲軍機章京

三龍泰 更名隆泰，字（缺），蒙古鑲黃旗人。道光三年九月由刑部主事入直。

賽尚阿 已見大臣。道光三年九月由理藩院筆帖式入直。

平慶 字（缺），滿洲鑲藍旗人。瑞慶兄。道光三年十一月由吏部主事入直。

文明 字（缺），滿洲鑲紅旗人。道光三年十一月由戶部筆帖式入直。

岳齡 字松橋，蒙古鑲白旗人。道光三年十一月由內閣中書入直。

英桂 字香崖，滿洲正藍旗人。道光四年三月由內閣中書入直，現官吏部尚書、協辦大學士。

玉崐 字（缺），滿洲正黃旗人。玉彰弟。道光四年七月由刑部筆帖式入直。

那遜阿古拉 字久峰，蒙古正白旗人。道光四年七月由刑部筆帖式入直。

松林 字（缺），蒙古正黃旗人。道光四年八月由理藩院筆帖式入直。

- 達興阿 字(缺)，滿洲鑲紅旗人。佛喜保姪。道光五年四月由兵部主事入直。
- 英麟 字(缺)，蒙古鑲紅旗人。道光五年七月由內閣中書入直。
- 春和 字(缺)，滿洲正紅旗人。道光五年十一月由戶部主事入直。
- 文俊 字秋山，滿洲鑲紅旗人。道光六年正月由內閣中書入直，官馬蘭鎮總兵。
- 惠麟 字(缺)，蒙古正黃旗人。多容安子。道光六年四月由工部主事入直。
- 文丕 字(缺)，滿洲正白旗人。道光六年十一月由兵部主事入直。
- 熙成 字備菴，蒙古正藍旗人。台布子。道光七年二月由理藩院筆帖式入直，官至內閣學士。
- 桂德 字月樵，滿洲鑲藍旗人。道光七年十一月由工部筆帖式入直，官至盛京刑部侍郎。
- 阿齡阿 字(缺)，滿洲(缺)旗人。道光八年四月由刑部郎中入直。
- 音德賀 字春橋，滿洲正紅旗人。道光九年三月由內閣中書入直，官至雷州府知府。
- 英幹 字(缺)，滿洲鑲紅旗人。道光九年五月由內閣中書入直。
- 玉春 字(缺)，滿洲正白旗人。道光九年八月由內閣中書入直。
- 文斌 字(缺)，蒙古鑲紅旗人。道光十年三月由理藩院筆帖式入直。
- 德雲 字(缺)，滿洲鑲紅旗人。道光十年十月由工部筆帖式入直。
- 慶安 字(缺)，蒙古鑲藍旗人。道光十一年正月由理藩院筆帖式入直。

瑞春 字慰農，蒙古正藍旗人。道光十一年五月由理藩院筆帖式入直，官至湖州府知府。

麟翔 字厚堂，蒙古正白旗人。惠齡孫，桂芬子。道光十一年七月由兵部員外郎入直，官至

泰寧鎮總兵。

崇綸 字荷卿，滿洲正白旗人。盛住孫。道光十一年十月由內閣中書入直，官至湖北巡撫。

福連 字（缺），滿洲正藍旗人。道光十二年正月由戶部筆帖式入直。

愛升圖 字（缺），蒙古正藍旗人。道光十二年正月由理藩院筆帖式入直。

崇光 字（缺），蒙古鑲白旗人。道光十二年正月由吏部筆帖式入直。

豫慶 字（缺），滿洲正白旗人。道光十二年五月由兵部筆帖式入直。

清泰 字（缺），滿洲正紅旗人。道光十二年六月由工部員外郎入直。

雲錦 字（缺），滿洲正白旗人。道光十二年十一月由戶部筆帖式入直。

誠廉 字（缺），滿洲鑲白旗人。道光十二年十二月由工部筆帖式入直。

恩符 字（缺），滿洲正紅旗人。道光十三年二月由戶部筆帖式入直。

文裕 字（缺），滿洲鑲藍旗人。道光十三年六月由內閣中書入直。

海慶 字靜瀾，滿洲正白旗人。道光十四年二月由工部司庫入直。

麟椿 字（缺），滿洲鑲白旗人。道光十四年三月由理藩院筆帖式入直。

崇祥 字楚帆，滿洲鑲紅旗人。道光十四年八月由吏部筆帖式入直。

崇泰 字雲谷，蒙古鑲黃旗人。道光十五年八月由理藩院筆帖式入直，官至雁平道。

春長 字（缺），滿洲正白旗人。道光十五年十二月由內閣中書入直。

麟書 字（缺），蒙古正白旗人。道光十五年十二月由兵部筆帖式入直。

穆蔭 已見大臣。道光十六年三月由內閣中書入直。

紹德 字桂崖，滿洲鑲黃旗人。道光十八年四月由戶部筆帖式入直。

四慶 字篤園，滿洲正藍旗人。道光十八年五月由吏部主事入直。

濟安 字（缺），滿洲鑲白旗人。道光十九年二月由戶部筆帖式入直。

蘇勒芳阿 字怡齋，蒙古鑲白旗人。道光十九年三月由理藩院筆帖式入直。

福善 字應之，滿洲正黃旗人。道光十九年八月由內閣中書入直。

豐盛額 字餘齋，蒙古鑲藍旗人。道光二十一年十月由內閣中書入直，官至內閣侍讀。

清盛 字輔廷，滿洲正藍旗人。道光二十一年十月由內閣中書入直，官至山東布政使。

托克托布 字（缺），滿洲鑲藍旗人。道光二十二年二月由戶部緞疋庫司庫入直。

賽音博勒格圖 字雨亭，蒙古正藍旗人。道光二十三年六月由理藩院筆帖式入直，官至口北道

西朗阿 字（缺），滿洲正紅旗人。道光二十三年十二月由內閣中書入直。

德椿 字景融，滿洲正藍旗人。道光二十四年二月由內閣中書入直，現官理藩院侍郎。
英秀 字芝山，滿洲鑲藍旗人。道光二十四年三月由內閣中書入直，官至廣東按察使。
瑞亨 字蘊謙，滿洲正黃旗人。道光二十五年十一月由戶部筆帖式入直，現官重慶府知府。
衡光 字時圃，蒙古正白旗人。道光二十五年十一月由禮部筆帖式入直，官至登州府知府。
賽沙布 字貽堂，蒙古正藍旗人。道光二十五年十二月由理藩院筆帖式入直。
嵩壽 字眉臣，滿洲正藍旗人。道光二十六年七月由內閣中書入直。
桂昌 字世五，滿洲正白旗人。道光二十六年十月由工部筆帖式入直。
文彬 字質軒，滿洲鑲黃旗人。道光二十七年五月由內閣中書入直。
寶福 字介田，滿洲鑲白旗人。道光二十九年四月由理藩院筆帖式入直。
文吉 字士林，滿洲正紅旗人。道光二十九年六月由內閣中書入直，現官延建邵道。
達春布 字敏齋，滿洲鑲黃旗人。道光三十年五月由戶部筆帖式入直，現官九江府知府。
慶安 字恬齋，滿洲正白旗人。道光三十年十一月由刑部主事入直。
長年 字閔仙，滿洲鑲藍旗人。桂德子。咸豐元年三月由內閣中書入直。
慶霖 字雲亭，滿洲鑲黃旗人。咸豐元年五月由理藩院筆帖式入直。
蘇布 字展卿，滿洲鑲紅旗人。咸豐二年七月由內閣中書入直。

- 玉衡 字心齋，滿洲正藍旗人。咸豐二年七月由內閣中書入直。
- 文衡 字子權，蒙古鑲紅旗人。咸豐三年正月由理藩院筆帖式入直。
- 英祥 字豪卿，滿洲正藍旗人。四慶子。咸豐三年二月由內閣中書入直，現官廣西按察使。
- 鍾秀 字峻甫，滿洲鑲黃旗人。咸豐三年三月由內閣中書入直。
- 祥保 字佑之，蒙古鑲黃旗人。咸豐三年四月由理藩院筆帖式入直。
- 崇縉 字小圃，蒙古正藍旗人。咸豐三年十二月由理藩院筆帖式入直，現官歸綏道。
- 松齡 字夢九，滿洲正黃旗人。咸豐四年五月由內閣中書入直，官至內閣侍讀。
- 英廉 原名英華，字岳峰，滿洲鑲紅旗人。咸豐四年九月由內閣中書入直，現官金衢嚴道。
- 興昌 字雲崖，滿洲正白旗人。咸豐四年十一月由禮部主事入直，官至四川候補直隸州
- 裕彰 字昭甫，滿洲鑲白旗人。咸豐五年五月由戶部筆帖式入直，現官温州府知府。
- 塔克什布 字誠齋，蒙古鑲白旗人。咸豐六年正月由理藩院筆帖式入直，現官理藩院主事。
- 增壽 字靈舫，滿洲正白旗人。咸豐六年二月由工部筆帖式入直，現官岳常禮道。
- 瑞廉 字潔圃，滿洲正紅旗人。咸豐六年二月由內閣中書入直，官至吏部員外郎。
- 慶多 字祝三，滿洲正黃旗人。咸豐六年二月由工部司庫入直。
- 慶裕 字蘭圃，滿洲正白旗人。咸豐八年四月由內閣中書入直，現官奉天府府尹。

奎 綬 原名奎炘，字若卿，蒙古正黃旗人。台斐音孫，成善子。咸豐八年十一月由內閣中書

入直，現官理藩院郎中。

崑 玉 字寶田，滿洲正藍旗人。咸豐九年十月由工部員外郎入直，現官工部郎中。

額圖環 字健奔，滿洲鑲紅旗人。咸豐十年五月由內閣中書入直，官至貴陽府遺缺知府。

英 謙 原名英貴，字裕農，滿洲鑲紅旗人。咸豐十一年七月由理藩院筆帖式入直，現官熱

河道。

文 海 字仲瀛，滿洲鑲紅旗人。咸豐十一年七月由內閣中書入直，復中同治壬戌舉人，現官

戶部員外郎。

續 昌 字燕甫，蒙古正白旗人。同治元年三月由禮部筆帖式入直，現官理藩院員外郎。

額哲克 字性初，滿洲正紅旗人。同治元年十二月由工部主事入直，現官韶州府知府。

裕 長 字壽泉，滿洲正白旗人。崇綸子。同治元年十二月由禮部鑄印局主事職銜入直，現官

大名府知府。

容 斌 字有莊，滿洲正藍旗人。同治二年四月由內閣中書入直。

本 貴 字鐵珊，滿洲鑲紅旗人。同治四年十一月由內閣中書入直。

三 德 字匡九，覺羅，正藍旗人。同治四年十一月由禮部主事入直，現官福建道御史。

春岫 原名春山，字笑如，滿洲正紅旗人。同治六年十月由吏部筆帖式入直，現官吏部郎中。

尚德 字成之，滿洲正紅旗人。同治六年十二月由內閣中書入直。

玉春 字梅臣，蒙古正白旗人。同治六年十二月由理藩院主事入直，現官理藩院員外郎。

志文 字輔臣，蒙古鑲白旗人。同治六年十二月由理藩院員外郎入直，現官理藩院郎中。

豐紳泰 字雲鵬，蒙古正藍旗人。同治七年四月由內閣中書入直，現官理藩院員外郎。

增林 字芝圃，滿洲正紅旗人。同治七年四月由刑部主事入直，現官錦州府知府。

桂斌 字文圃，滿洲正黃旗人。同治七年九月由刑部筆帖式入直，現官刑部員外郎。

文綬 字翰章，滿洲正黃旗人。同治九年二月由刑部員外郎入直。

文齡 字錫九，滿洲正藍旗人。同治九年十月由吏部主事入直。

額勒精額 字裕如，滿洲鑲紅旗人。同治十二年七月由戶部主事入直。

如松 字鶴儕，滿洲正白旗人。同治十二年九月由內閣中書入直。

文英 字子俊，滿洲正白旗人。同治十二年十二月由內閣中書入直。

榮堃 字至田，滿洲鑲藍旗人。同治十三年七月由兵部筆帖式入直。

曾鉢 字懷清，滿洲正白旗人。光緒元年四月由工部員外郎入直。

穆特亨額 字清舫，滿洲鑲白旗人。光緒元年四月由刑部筆帖式入直。

德克吉訥 字峻臣，滿洲鑲白旗人。光緒元年五月由內閣中書入直。
那丹珠 字松岩，蒙古正黃旗人。光緒元年五月由理藩院主事入直。

樞垣記略卷之十八

題名四

漢軍機章京

蔣炳 字曉滄，江蘇陽湖人。雍正丙午舉人。九年六月由內閣侍讀入直，官至河南巡撫。

柴潮生 字禹門，浙江仁和人。雍正甲辰舉人。十年正月由內閣中書入直，官至戶科給事中。

彭元璣 字（缺），江西南昌人。康熙（缺）舉人。雍正十年（缺）月由內閣中書入直。

周景柱 字（缺），浙江遂安人。雍正（缺）舉人。十年（缺）月由內閣中書入直。

喻敦仁 字（缺）人。雍正（缺）舉人。十年（缺）月由內閣中書入直。

吳元安 字（缺），江蘇上元人。雍正丙午舉人。（缺）年（缺）月由內閣中書入直，官至兵科給事中。

姚培益 字苞延，江蘇婁縣人。康熙甲午舉人。雍正（缺）年（缺）月由（缺）人直，官至刑部員外郎。

翁藻 字（缺），浙江仁和人。雍正癸卯進士。（缺）年（缺）月由人直，官至江蘇按察使。

凌燾 字（缺），安徽定遠人。康熙（缺）舉人。雍正（缺）年（缺）月由內閣中書入直，官至江西按察使。

張若靄 字晴嵐，安徽桐城人。廷玉子。雍正癸丑進士，即授編修入直，官至內閣學士兼禮部侍郎。襲伯爵。

何璘 字（缺），順天宛平人。雍正甲寅考取中書入直。

畢誼 字元復，江蘇婁縣籍安徽休寧人。康熙戊戌進士。十三年（缺）月由禮科給事入直，後由盧鳳道左遷主事再入直。

林枝春 字青圃，福建閩縣人。雍正十三年（缺）月由內閣中書入直。復中乾隆丁巳榜眼。官至通政使司副使。

陳兆崙 字星齋，浙江錢塘人。雍正庚戌進士。十三年十二月由內閣中書入直，復舉乾隆丙辰博學鴻詞科，官至太僕寺卿。

馬燝 字（缺），江蘇常熟人。雍正己酉舉人。乾隆元年三月由起居注主事入直，後由順天府府丞左遷內閣侍讀再入直，官至順天府府尹。

潘中立 字松溪，江西新城人。雍正癸丑進士。乾隆元年三月由內閣中書入直。

途逢震 字石溪，江西南昌人。乾隆二年四月由內閣中書入直，復中己未榜眼，官至工部侍郎。

孫紹基 字（缺），湖北漢陽人。雍正壬子舉人。乾隆二年四月由內閣中書入直，官至山東道御史。

胡寶瑔 榜名沈金蘭，江蘇青浦籍婁縣人。雍正癸卯舉人。乾隆二年（缺）月由內閣中書入直，

官至河南巡撫，贈兵部尚書。諡恪靖。

方觀承

字問亭，安徽桐城人。由監生授內閣中書。乾隆二年十二月入直，官至直隸總督。諡

恪敏。

蔣元益

字時菴，江蘇長洲人。乾隆二年十二月由內閣中書入直，復中乙丑進士，官至兵部

侍郎。

王愷伯

字（缺），江蘇吳縣人。乾隆六年（缺）月由內閣中書入直，官至長蘆鹽運使。

張泰開

字有堂，江蘇金匱人。乾隆七年（缺）月由內閣中書入直，復中壬戌進士，官至禮部尚

書。諡文恪。

梁國治

已見大臣。乾隆七年（缺）月由內閣中書入直，復中戊辰狀元。

歐陽正煥

字淑之，湖南衡山人。乾隆（缺）年（缺）月由內閣中書入直，復中乙丑進士，官至江南

道御史。

何日熙

字（缺），江西新城人。舉人。乾隆十年（缺）月由內閣中書入直。

王貽桂

字（缺）人。舉人。乾隆十年（缺）月由內閣中書入直。

袁芳松

字（缺），江西宜春人。雍正己酉舉人。乾隆十年（缺）月由內閣中書入直，官至大理寺卿。

錢 遜

字（缺），浙江嘉善人。舉人。

胡廷樞

字御寰，江蘇婁縣人。雍正丙午舉人。乾隆十一年二月由內閣中書入直，官至內閣侍讀。

沈作朋

字（缺），浙江德清人。舉人。乾隆十一年（缺）月由內閣中書入直，官至湖南布政使。

楊承曾

字（缺），江蘇陽湖人。乾隆戊午舉人。十三年（缺）月由內閣中書入直，官至（缺）道御史。

莊培因

字本淳，江蘇陽湖人。乾隆十三年九月由內閣中書入直，復中甲戌狀元，官至翰林院侍講學士。

曹錫寶

字劍亭，江蘇上海人。乾隆十三年九月由內閣中書入直，復中丁丑進士，官至山東督糧道，改授御史，贈都察院副都御史。

毛永燮

字立之，順天大興人。乾隆壬戌進士。十三年（缺）月由內閣中書入直，官至江西道御史。

陳朝礎

字雲根，福建閩縣人。雍正己酉舉人。乾隆十三年（缺）月由內閣中書入直，官至陝西道御史。

睦朝棟

字樹人，江蘇丹陽人。乾隆壬戌進士。十三年（缺）月由內閣中書入直，官至陝西道御史。

程 燾

字九峰，浙江仁和人。乾隆戊午舉人。十三年（缺）月由內閣中書入直，三十三年由湖

北巡撫左遷太僕寺卿再入直。

孔繼汾 字止堂，山東曲阜人。乾隆丁卯舉人。十五年（缺）月由內閣中書入直，官至戶部主事。

程巖 字巨山，江西鉛山人。乾隆己未進士。十五年（缺）月由（缺）入直，官至吏部侍郎。

申甫 字笏山，江蘇江都人。乾隆辛酉舉人。十五年（缺）月由內閣中書入直，官至都察院副

都御史。

王以夔 字和庭，直隸清苑人。乾隆（缺）舉人。十七年（缺）月由內閣中書入直。

孫夢遠 字申伯，江蘇常熟人。乾隆壬戌進士。十八年（缺）月由內閣中書入直，官至宗人府

主事。

袁守侗 已見大臣。乾隆十八年（缺）月由內閣中書入直，三十四年以候補三品京堂再入直。

馮光熊 字泰古，浙江嘉興人。乾隆丁卯舉人。十八年（缺）月由內閣中書入直，官至貴州巡撫。

章寶傳 字習之，浙江歸安人。乾隆壬戌進士。十八年（缺）月由宗人府主事入直，官至鴻臚寺

少卿。

顧雲 字北墅，江蘇如皋人。乾隆（缺）舉人。十八年（缺）月由內閣中書入直，官至吏部員外郎。

王日杏 字丹宸，江蘇無錫人。乾隆癸酉舉人。是年（缺）月由內閣中書入直，官至銅仁府知府，

贈光祿寺少卿。

張三賓

字介軒，浙江仁和人。乾隆（缺）舉人。（缺）年（缺）月由內閣中書入直，官至吏科給事中。

梅立本

字秋竣，安徽宣城人。乾隆十九年（缺）月由內閣中書入直，復中丁丑榜眼。

毛應藻

字文軒，江蘇武進人。乾隆十九年（缺）月由內閣中書入直，復中丁丑進士，改官太平府

教授。

蔣宗海

字春農，江蘇丹徒人。乾隆壬申進士。二十年正月由內閣中書入直。

蔣雍植

字秦樹，安徽懷寧人。乾隆二十年正月由內閣中書入直，復中辛巳進士，官至翰林院

編修。

陳輝祖

字玉亭，湖南祁陽人。大受子。廕生。乾隆二十年（缺）月由戶部員外郎入直，官至閩

浙總督。

劉湘

字蘭階，直隸涿州人。乾隆戊辰進士。二十年十二月由江南道御史入直，官至禮科給

事中。

趙翼

字雲崧，江蘇陽湖人。乾隆二十一年（缺）月由內閣中書入直，復中辛巳探花，官至池

北道。

畢沅

字湘衡，江蘇鎮洋人。乾隆二十二年（缺）月由內閣中書入直，復中庚辰狀元，官至湖廣

總督。

陸燿 字朗夫，江蘇吳江人。乾隆壬申舉人。二十三年（缺）月由內閣中書入直，官至湖南

巡撫。

張霽 字研廬，浙江錢塘人。乾隆壬申進士，二十三年（缺）月由內閣中書入直，官至兵科給事中。

金雲槐 字蒔庭，安徽歙縣人。乾隆（缺）舉人。二十三年九月由內閣中書入直，復中辛巳進士，官至常州府知府。

張若淳 字壽雪，安徽桐城人。若霽弟。廕生。乾隆二十三年（缺）月由刑部主事入直，官至刑部尚書。諡勤恪。

童鳳三 字梧岡，浙江山陰人。乾隆二十四年（缺）月由內閣中書入直，復中庚辰進士，官至吏部侍郎。

賀五瑞 字輯菴，江蘇丹陽人。乾隆（缺）進士。二十四年七月由內閣中書入直。
諸重光 字申之，浙江餘姚人。乾隆二十四年七月由內閣中書入直，復中庚辰榜眼，官至辰州府知府。

丁璫 字（缺），山東諸城人。乾隆（缺）舉人。二十四年七月由內閣中書入直，官至起居注主事。

劉秉恬 字竹軒，山西洪洞人。乾隆二十四年七月由內閣中書入直，官至四川總督。

王 昶

字德甫，江蘇青浦人。乾隆甲戌進士。二十四年十一月由內閣中書入直，四十一年以鴻臚寺卿再入直，官至刑部侍郎。

汪承霽

字時齋，安徽休寧人。由敦子。廕生。乾隆二十五年十一月由兵部主事入直，三十五年以戶部郎中再入直，官至兵部尚書。

熊學驥

字德稱，江西南昌人。乾隆二十五年（缺）月由（缺）入直，官至湖南督糧道。

袁匡肅

字（缺），浙江錢塘人。乾隆（缺）舉人。二十七年（缺）月由內閣中書入直。

孫士毅

已見大臣。乾隆二十七年（缺）月由內閣中書入直，四十年以戶部郎中再入直。

錢受穀

字冲齋，浙江秀水人。乾隆庚辰進士。二十九年（缺）月由戶部員外郎入直，官至池東道。

趙文哲

字升之，江蘇上海人。乾隆二十七年召試內閣中書。二十九年（缺）月入直，贈光祿寺少卿。

阮葵生

字吾山，江蘇山陽人。乾隆辛巳中正榜。二十九年（缺）月由內閣中書入直，官至刑部侍郎。

陸錫熊

字耳山，江蘇上海人。乾隆辛巳進士。二十九年十月由內閣中書入直，官至都察院副都御史。

鄭步雲

字蓀揆，浙江歸安人。乾隆壬申進士。二十九年（缺）月由吏部主事入直，官至禮部郎中。

陳繩祖

字鉅橋，湖南祁陽人。輝祖弟。乾隆二十九年十月由戶部主事入直，官至廣東督糧道。

章 棠

字二梧，江蘇上海人。乾隆辛巳中正榜。三十年正月由內閣中書入直，官至山東鹽

運使。

王友亮

字景南，安徽婺源人。乾隆三十年正月由內閣中書入直，復中辛丑進士，官至通政使司副使。

陳希哲

字（缺），江蘇長洲人。乾隆三十年（缺）召試內閣中書入直。

馮應榴

字星實，浙江桐鄉人。乾隆辛巳進士。三十年（缺）月由內閣中書入直，官至江西布

政使，改鴻臚寺卿。

徐步雲

字蒸遠，江蘇興化人。乾隆壬子召試中書，（缺）年（缺）月入直。

劉謹之

字樸夫，江蘇武進人。乾隆己卯舉人。三十一年五月由內閣中書入直，官至禮科給

事中，贈鴻臚寺卿。

嚴長明

字道甫，江蘇上元人。乾隆三十年召試內閣中書，三十一年五月入直，官至內閣侍讀。

王嵩柱

字（缺），順天寶坻人。乾隆辛巳中正榜。三十一年十月由內閣中書入直，官至懷慶

府知府。

洪 朴

字素人，安徽歙縣人。乾隆辛巳中正榜。三十一年十月由內閣中書入直，復中辛卯

進士，官至廣平府知府。

吳壽昌

字泰交，浙江山陰人。乾隆三十年召試內閣中書，三十一年（缺）月入直，復中己丑進士，官至翰林院侍讀。

劉秉禮

字退谷，山西洪洞人。秉恬弟。乾隆壬午舉人。三十四年二月由內閣中書入直，官至戶部郎中。

周發春

字青原，江蘇上元人。乾隆三十年召試內閣中書，三十四年六月入直。

費淳

字筠圃，浙江錢塘人。乾隆癸未進士。三十四年六月由刑部員外郎入直，官至大學士。諡文恪。

金榜

字輔之，安徽歙縣人。雲槐弟。乾隆三十四年六月由內閣中書入直，復中壬辰狀元，官至翰林院修撰。

金光梯

字蘭畦，江南英山人。乾隆己丑中正榜。三十五年（缺）月由內閣中書入直，復中庚子進士，官至刑部尚書。

潘庭筠

字蘭公，浙江錢塘人。乾隆己丑中正榜。三十六年五月由內閣中書入直，復中戊戌進士，官至陝西道御史。

孫永清

字春臺，江蘇無錫人。乾隆己丑中正榜。三十六年五月由內閣中書入直，官至廣西

巡撫。

陸 瓊

字耕芳，江蘇陽湖人。乾隆己丑中正榜。三十六年五月由內閣中書入直，官至溫處道。

王彝憲

字荔林，江蘇上元人。乾隆己丑中正榜。三十七年正月由內閣中書入直，官至慶陽

府知府。

邵 洪

字海度，浙江鄞縣人。乾隆辛卯進士。三十七年正月由吏部主事入直，官至禮部侍郎。

蔣熊昌

字澄川，江蘇陽湖人。炳子。乾隆癸未進士。三十七年正月由(缺)入直，官至潁州府

知府。

姚 梁

字甸之，浙江慶元人。乾隆己丑進士。三十七年正月由(缺)入直，官至四川按察使。

沈啓震

字位東，浙江桐鄉人。乾隆己丑中正榜。三十七年正月由內閣中書入直，官至運河道。

王慶長

字佑之，山東福山人。乾隆壬辰中正榜。是年(缺)月由內閣中書入直，官至福建按察使。

史夢琦

字卓峰，江蘇陽湖人。乾隆己丑進士。三十八年四月由內閣中書入直，官至汀漳龍道。

汪日章

字首禾，浙江錢塘人。乾隆壬辰中正榜。三十八年四月由內閣中書入直，官至江蘇

巡撫。

龔提身

字深甫，浙江仁和人。乾隆己丑中正榜。三十八年十月由內閣中書入直。

吳錫齡

字莼淵，安徽休寧人。乾隆壬辰中正榜。四十年正月由內閣中書入直，復中乙未狀

元，官至翰林院修撰。

程維岳

字申伯，浙江嘉善人。乾隆壬辰中正榜。四十年（缺）月由內閣中書入直，復中庚子進士，官至山東道御史。

馮培

字德宇，江蘇元和人。乾隆壬辰中正榜。四十年（缺）月由內閣中書入直，復中戊戌進士，由庶吉士改吏部主事再入直，官至吏科給事中。

杜兆基

字稷山，浙江會稽人。乾隆三十八年召試內閣中書，四十年（缺）月入直，官至山西道御史。

沈清藻

字魯田，浙江仁和人。乾隆四十年（缺）月由內閣中書入直，復中乙未探花，官至翰林院編修。

吳熊光

已見大臣。乾隆四十年（缺）月由內閣中書入直。

方維甸

字葆巖，安徽桐城人。觀承子。乾隆四十年欽賜舉人，內閣中書。是年（缺）月入直，復中庚子進士，官至直隸總督。諡勤襄。

范鏊

字叔度，順天大興人。乾隆己丑中正榜。四十二年正月由內閣中書入直，復中庚子進士，官至光祿寺卿。

戴衢亨

已見大臣。乾隆四十一年召試內閣中書，四十二年正月入直。

吳俊 字曇繡，江蘇吳縣人。乾隆壬辰進士。四十二年正月由內閣中書入直，官至山東布

政使。

施光輅 字維殷，浙江錢塘人。乾隆己丑中正榜。四十二年正月由內閣中書入直，官至敘州

府知府。

裘行簡 字可亭，江西新建人。曰修子。乾隆四十年欽賜舉人、內閣中書。四十二年（缺）月入

直，五十五年以戶部員外郎再入直，官至直隸總督。諡恭勤。

李燦 字文翰，江蘇長洲人。乾隆壬辰進士。四十二年（缺）月由內閣中書入直，官至順天府

府丞。

關槐 字晉軒，浙江仁和人。乾隆四十一年召試內閣中書。四十二年二月入直，復中庚子

進士，官至禮部侍郎。

蔣謝庭 字雲隈，江蘇長洲人。乾隆己丑中正榜。四十二年六月由工部主事入直，官至山東

道御史。

趙輝 字（缺）人。乾隆四十三年五月由（缺）人直。

王學海 字問渠，直隸天津人。乾隆己丑中正榜。四十三年七月由內閣中書入直，官至陝西

道御史。

胡時顯 字晴溪，江蘇武進人。由監生欽賜中書科中書。四十四年三月入直，官至鴻臚寺卿，贈光祿寺卿。

章煦 已見大臣。乾隆四十五年四月由內閣中書入直。

毛上龔 字羅照，江蘇鎮洋人。乾隆壬辰進士。四十五年十月由內閣中書入直，官至戶部主事。
盛惇崇 字孟巖，江蘇陽湖人。乾隆甲午舉人。四十五年十月由內閣中書入直，官至甘肅布政使。

張姚成 字詡軒，浙江鄞縣人。乾隆乙未進士。四十六年四月由內閣中書入直，官至江西督糧道。

張敦培 字息園，江蘇昭文人。乾隆乙未進士。四十六年四月由內閣中書入直，官至山西道御史。

張曾效 字魯堂，安徽桐城人。乾隆己丑中正榜。四十六年四月由內閣中書入直，官至戶部員外郎。

毛鳳儀 字雨香，江蘇吳縣人。乾隆乙未進士。四十六年四月由內閣中書入直，官至山東道御史。

秦瀛 字凌滄，江蘇無錫人。乾隆四十一年召試內閣中書。四十六年四月入直，官至刑部

侍郎。

沈 琨

字舫西，浙江歸安人。乾隆辛卯舉人。四十六年四月由內閣中書入直，選佛山同知，於五十四年呈請註銷再入直，官至泰安府知府。

趙秉淵

字少鈍，江蘇上海人。文哲子。廕生。乾隆四十八年正月由內閣中書入直，官至成都府知府。

洪 梧

字桐生，安徽歙縣人。朴弟。乾隆庚戌進士。四十八年十二月由內閣中書入直，官至沂州府知府。

汪彥博

字文軒，江蘇鎮洋人。乾隆四十九年召試內閣中書。五十一年九月入直，復中丁未進士，官至青州府知府。

金應琦

字筠莊，安徽歙縣人。雲槐子。乾隆四十九年召試內閣中書。五十一年十月入直，官至江西巡撫。

張師誠

字蘭渚，浙江歸安人。乾隆四十九年召試內閣中書。五十一年十月入直，復中庚戌進士，官至安徽巡撫，倉場侍郎。

管世銘

字鍼若，江蘇武進人。乾隆戊戌進士。五十一年十月由戶部主事入直，官至浙江道御史。

程振甲

字也園，安徽歙縣人。乾隆四十九年召試內閣中書。五十一年十月入直，官至吏部員外郎。

柴模

字珠山，浙江山陰人。乾隆庚子進士。五十一年十一月由內閣中書入直。

孫衡

字平山，浙江仁和人。士毅子。廕生。乾隆五十五年正月由內閣中書入直，官至戶部主事。

費錫章

字西塘，浙江歸安人。乾隆四十九年召試內閣中書。五十五年八月入直，官至順天府府尹，贈兵部侍郎。

鮑薰茂

字樹堂，安徽歙縣人。乾隆四十九年召試內閣中書。五十五年八月入直，官至通政使司通政使。

錢楷

字裴山，浙江嘉興人。乾隆己酉進士。五十五年八月由戶部主事入直，官至安徽巡撫。

曾燠

字賓谷，江西南城人。乾隆辛丑進士。五十五年八月由戶部主事入直，官至貴州巡撫。

楊揆

字荔裳，江蘇金匱人。乾隆四十五年召試內閣中書。五十五年八月入直，官至四川布政使。

楊世綸

字鳳池，江蘇如皋人。乾隆己丑中正榜。五十八年八月由內閣中書入直，官至廉州府知府。

錢 澧 字東注，雲南昆明人。乾隆辛卯進士。五十九年十一月由通政司副使左遷湖廣道御史入直。

姚祖同 字亮甫，浙江錢塘人。乾隆四十九年召試內閣中書。六十年九月入直，官至河南巡撫、都察院左都御史。

曹惠華 字山甫，江西新建人。乾隆乙卯進士。六十年九月由內閣中書入直，官至刑部主事。

徐 炳 字晴圃，直隸天津人。乾隆壬子舉人。六十年會試錄取內閣中書入直，官至山西巡撫。

陳慶槐 字蔭山，浙江定海人。乾隆庚戌進士。六十年九月由內閣中書入直。

何 金 字竹居，浙江會稽人。乾隆四十九年召試內閣中書。六十年九月入直，官至貴州按察使。

黃文輝 字閩峰，江蘇儀徵人。乾隆四十九年召試內閣中書。六十年九月入直。

齊嘉紹 字衣聞，直隸天津人。乾隆庚戌進士。嘉慶四年二月由內閣中書入直，官至江西鹽法道。

姚文田 字秋農，浙江歸安人。乾隆四十九年召試內閣中書。嘉慶四年二月入直，復中己未狀元，官至禮部尚書。諡文僖。

傅 淦 字篁山，浙江蕭山人。乾隆己酉舉人。六十年會試錄取內閣中書。嘉慶四年二月入

直，官至禮科給事中。

趙佩湘

字筠浦，江蘇丹徒人。乾隆癸丑進士。嘉慶四年二月由內閣中書入直，官至禮科給事中。

事。

胡枚

字梁園，浙江石門人。乾隆乙卯進士。嘉慶四年二月由內閣中書入直，官至戶部郎中。

吳光悅

字見樓，江蘇陽湖人。嘉慶丙辰進士。四年二月由內閣中書入直，官至江西巡撫。

顏允璨

字輝山，江蘇丹徒人。嘉慶丙辰進士。四年二月由內閣中書入直。

蔡炯

字雲橋，江西德化人。嘉慶丙辰進士。四年二月由內閣中書入直，官至甘肅按察使、

內閣侍讀學士。

茅豫

字少山，浙江山陰人。乾隆丁未進士。嘉慶四年二月由兵部員外郎入直，官至河東

道，改戶部郎中。

任烜

字芑園，江蘇宜興人。乾隆乙卯進士。嘉慶四年四月由吏部主事入直，官至通永道。

何元煊

字研農，山西靈石人。乾隆丁未進士。嘉慶四年七月由戶部郎中入直，官至太平府

知府。

糜奇瑜

字閻峰，四川秀山人。乾隆己酉拔貢。嘉慶四年八月由戶部主事入直，官至貴州布

政使、太僕寺卿。

熊方受

字介茲，廣西永康人。乾隆庚戌進士。嘉慶四年十月由禮部主事入直，官至東昌府知府。

張志緒

字石蘭，浙江餘姚人。乾隆乙卯進士。嘉慶五年正月由刑部主事入直，官至江寧布政使。

黃躍之

字子淵，安徽含山人。嘉慶丙辰進士。五年正月由戶部主事入直，官至戶部員外郎。

楊懋恬

字雪颿，江西清江人。乾隆己酉拔貢。嘉慶五年五月由工部主事入直，官至漕運總督。

盛惇大

字甫山，江蘇陽湖人。惇崇弟。乾隆庚子召試舉人。嘉慶五年五月由內閣中書入直，官至慶陽府知府。

袁煦

字(缺)，山東長山人。守侗子。乾隆甲寅舉人。嘉慶六年七月由內閣中書入直。

萬雲

字子雨，浙江仁和人。嘉慶己未進士。六年八月由吏部主事入直，官至潮州府知府。

盧蔭溥

已見大臣。嘉慶六年十一月由禮部主事入直。

葉繼雯

字雲素，湖北漢陽人。乾隆庚戌進士。嘉慶八年十月由內閣中書入直，官至刑科給事中。

吳應咸

字晦堂，江西南豐人。嘉慶丙辰進士。八年十一月由戶部主事入直。

龔麗正

字闇齋，浙江仁和人。提身子。嘉慶丙辰進士。八年十一月由禮部主事入直，官至

蘇松太道。

康紹鑄

字蘭皋，山西興縣人。嘉慶己未進士。十年閏六月由兵部主事入直，官至湖南巡撫。

張之屏

字午莊，山西介休人。嘉慶己未進士。十年九月由工部主事入直，官至延安府知府。

童槐

字萼君，浙江鄞縣人。嘉慶乙丑進士。是年十月由工部主事入直，官至通政司副使。

梁承福

字鶴莊，浙江山陰人。國治子。乾隆甲寅舉人。嘉慶十三年閏五月由內閣中書入直，

官至建昌府知府。

王厚慶

字幼海，山東福山人。嘉慶辛酉進士。十三年十二月由內閣中書入直，官至浙江候

補道。

王鳳翰

字小蓬，山西安邑人。嘉慶十三年十二月由內閣中書入直，復中己巳進士，官至池

西道。

余霽元

字鷺門，江西德化人。嘉慶己未進士。十三年（缺）月由刑部主事入直，官至淮揚道。

程同文

字春廬，浙江桐鄉人。嘉慶己未進士。十四年四月由兵部主事入直，官至通政司副使。

聶鏡敏

字心如，湖南衡山人。嘉慶辛酉拔貢。十四年七月由禮部主事入直。

趙盛奎

己見大臣。嘉慶十五年十月由吏部主事入直。

秦繩曾

字宜圃，江蘇江寧人。嘉慶乙丑進士。十五年十一月由刑部主事入直，官至（缺）道

御史。

陳鍾麟

字厚甫，江蘇元和人。嘉慶己未進士。十六年二月由戶部主事入直，官至杭嘉湖道。

楊振麟

字桂山，順天宛平人。嘉慶辛酉拔貢。十六年十月由刑部主事入直，官至陝西布政使。

陸蕖

字南村，浙江山陰人。乾隆乙卯舉人。嘉慶十七年二月由內閣中書入直，官至青州

府知府。

吳書城

字卧樓，浙江嘉善人。嘉慶戊午舉人。十七年三月由起居注主事入直，官至貴東道。

吳頤

字燮堂，江蘇元和人。嘉慶辛酉進士。十七年四月由戶部主事入直。

張允垂

字柳泉，江蘇婁縣人。嘉慶辛酉拔貢。十七年十月由戶部主事入直，官至陳州府知府。

韓文顯

字對山，浙江仁和人。乾隆甲寅舉人。嘉慶十八年七月由內閣中書入直，官至河東道。

孫蘭枝

字春甫，浙江仁和人，安徽休寧籍。嘉慶辛酉舉人。十八年九月由內閣中書入直，官

至陝安道。

徐鏞

字詠之，安徽桐城人。嘉慶己巳進士。十八年十一月由工部主事入直，官至山西布

政使。

吳孝銘

字伯新，江蘇武進人。嘉慶己巳進士。十八年十一月由工部主事入直，官至宗人府

府丞。

蘇兆登

字樸園，山東霑化人。嘉慶己未榜眼，由南安府知府左遷戶部員外郎。十九年九月入直，官至福建按察使。

何增元

字申畚，四川璧山人。嘉慶乙丑進士。二十年六月由刑部主事入直，官至刑部郎中。

聞人熙

字春臺，浙江山陰人。嘉慶己巳進士。二十一年二月由內閣中書入直，官至南寧府知府。

沈學廉

字瘦山，浙江仁和人。嘉慶戊辰進士。二十一年五月由兵部主事入直，官至江西道御史。

趙光祿

字雨樓，浙江歸安人。嘉慶戊辰進士。二十一年六月由戶部主事入直，官至鎮江府知府。

程喬采

字晴峰，江西新建人。嘉慶辛未進士。二十一年六月由禮部主事入直，官至湖廣總督。

徐受荃

字楚薌，浙江鄞縣人。嘉慶辛酉拔貢。二十一年七月由兵部主事入直。

吳榮光

字伯榮，廣東南海人。嘉慶己未進士，由御史左遷。二十一年八月以刑部郎中入直，官至湖南巡撫。

強逢泰

字綺園，陝西韓城人。廕生。嘉慶二十一年十月由工部主事入直，官至工部郎中。

李昌平

字東山，湖北竹谿人。嘉慶辛酉進士。二十三年三月由內閣中書入直，官至戶部主事。

梁章鉅

字芷林，福建長樂人。嘉慶壬戌進士。二十三年四月由禮部主事入直，官至江蘇巡撫。

路德

字鷺洲，陝西盤屋人。嘉慶己巳進士。二十四年四月由戶部主事入直。

錢廷熊

字古槎，浙江仁和人。嘉慶癸酉拔貢。二十四年十月由刑部七品小京官入直，官至

甘涼道。

陳彬

字謙齋，河南商邱人。嘉慶辛未進士。二十四年十月由吏部員外郎入直，官至天津

府知府。

許乃普

字溟生，浙江錢塘人。嘉慶癸酉拔貢。二十四年十一月由刑部七品小京官入直，復

中庚辰榜眼，官至吏部尚書。諡文恪。

喬用遷

字見齋，湖北孝感人。嘉慶甲戌進士。二十五年九月由內閣中書入直，官至貴州巡撫。

余文銓

字次卿，湖北松滋人。嘉慶己巳進士。二十五年十一月由戶部主事入直，官至江南

道御史。

胡方朔

字小東，安徽桐城人。嘉慶辛未進士。道光元年六月由戶部主事入直。

王啓文

字曉堂，直隸南宮人。嘉慶辛酉拔貢。道光元年六月由戶部主事入直。

陳孝寬

字湘帆，河南祥符人，浙江海寧籍。嘉慶癸酉拔貢。道光元年七月由工部主事入直。

蔣泰階

字雲簪，江蘇吳縣人。嘉慶己巳進士。道光元年七月由起居注主事入直，官至山東

道御史。

馬光瀾

字厚菴，浙江會稽人。嘉慶丁丑進士。道光元年九月由刑部主事入直，官至山東鹽

李彥章

字蘭卿，福建侯官人。嘉慶辛未進士。道光二年閏三月由內閣中書入直，官至山東鹽運使。

樞垣記略卷之十九

題名五

漢軍機章京

俞誦芬

字茗溪，安徽婺源人。嘉慶己卯進士。道光二年閏三月由戶部主事入直，官至汀漳龍道。

傅繩勳

字秋坪，山東聊城人。嘉慶甲戌進士。道光二年八月由工部主事入直，官至江蘇巡撫。

蔡勳

字槐卿，廣東東莞人。嘉慶己卯舉人。道光二年八月由刑部主事入直，官至吉安府知府。

趙榮

字斗垣，江蘇上海人。文哲孫、秉淵姪。嘉慶丁丑進士。道光二年九月由內閣中書入直。

朱達吉

字穎艘，浙江嘉興人。嘉慶甲戌進士。道光四年十月由內閣中書入直，官至廣東督糧道。

張祥河

字詩齡，江蘇婁縣人。嘉慶庚辰進士。道光四年十一月由內閣中書入直，官至工部尚書。諡溫和。

龍汝言

字子嘉，安徽桐城人。嘉慶甲戌狀元。道光四年十一月由內閣中書入直，官至兵部員外郎。

周濤

字聽松，貴州貴筑人。嘉慶庚辰進士。道光五年八月由兵部主事入直，官至河間府知府。

汪元爵

字竹君，江蘇鎮洋人。彥博姪。嘉慶戊寅舉人。道光七年正月由內閣中書入直，官至刑部郎中。

徐思荃

字穎墀，江西龍南人。（缺）道光七年閏五月由刑部主事入直。

方銘彝

字悔軒，安徽定遠人。嘉慶己卯舉人。道光七年閏五月由內閣中書入直，官至刑部郎中。

鄭喬林

字春溪，河南羅山人。嘉慶癸酉拔貢。道光七年七月由工部主事入直，官至順德府知府。

許球

字玉叔，安徽歙縣人。道光癸未進士。八年正月由吏部主事入直，官至兗沂曹濟道。

何汝霖 已見大臣。道光八年五月由工部主事入直。

王藻 字菽原，江蘇通州人。道光壬午進士。八年五月由禮部主事入直，官至湖南布政使。

徐瑾 字韞齋，安徽歙縣人。嘉慶丁丑進士。道光十年十月由工部員外郎入直，官至湖北按察使。

湯鵬 字海秋，湖南益陽人。道光癸未進士。十一年五月由禮部主事入直，官至御史，改戶部郎中。

鄭瑞麟 字瑩圃，福建閩縣人。嘉慶己卯進士。道光十一年七月由內閣中書入直，官至慶遠府知府。

萬貢珍 字蠡門，江蘇宜興人。道光癸未進士。十一年八月由戶部主事入直，官至湖南布政使、大理寺卿。

王廣業 字子勤，江蘇泰州人。道光丙戌進士。十一年十月由兵部郎中入直，官至漳州府知府。

程庭柱 字楞香，江蘇吳縣人。道光丙戌進士。十一年十二月由刑部主事入直，官至都察院左副都御史。

陳孚恩 已見大臣。道光十二年六月由吏部主事入直。

江紹愷 字飲吉，江蘇儀徵人。道光癸未進士。十二年九月由刑部主事入直，官至刑部郎中。

彭蘊章 已見大臣。道光十三年七月由內閣中書入直，復中乙未進士。

朱應元 字慎菴，浙江秀水人。道光丙戌進士。十三年十月由工部主事入直，官至慶陽府知府。

劉景昌 字仲寅，貴州大定人。（缺）道光十三年十二月由兵部主事入直，官至南韶連道。

王寅 字琴槎，湖南武陵人。道光己丑進士。十四年三月由戶部主事入直。

馬麗文 字郁齋，湖北蒲圻人。道光癸未進士。十四年三月由禮部主事入直，官至雲南候補道。

王積順 字若溪，浙江仁和人。道光癸巳進士。十四年五月由內閣中書入直，官至刑部員外郎。

林揚祖 字帖瞻，福建莆田人。道光己丑進士。十四年七月由刑部主事入直，官甘肅布政使。

胡增瑞 字典齋，江西萍鄉人。道光壬辰進士。十五年（缺）月由戶部主事入直。

陳本欽 字堯農，湖南長沙人。道光壬辰進士。十六年二月由工部主事入直，官至工部員外郎。

吳清皋 字小穀，浙江錢塘人。嘉慶癸酉舉人。道光十六年由內閣中書入直，官至撫州府知府。

何桂馨 字一山，江蘇吳縣人。道光己丑進士。十六年四月由內閣中書入直，官至陝西道御史。

江鴻升 字翊雲，福建閩縣人。道光己丑進士。十七年八月由工部主事入直，官至雷瓊道。

潘鐸 字木君，江蘇江寧人。道光壬辰進士。十七年九月由兵部郎中入直，官至署雲貴總

督。諡忠毅。

王桂 字秋卿，江蘇甘泉人。道光己丑進士。十七年十月由吏部主事入直，官至廣平府知府。

顏以煥 字敘五，廣東連平州人。嘉慶丙子舉人。道光十九年正月由內閣侍讀入直，官至東

河總督。

汪本銓 字衡甫，江蘇陽湖人。道光己丑進士。十九年四月由禮部主事入直，官至浙江布政使。

喬晉芳 字心農，山西聞喜人。道光乙未探花。十九年五月由刑部主事入直，官至常德府知府。

吳光業 字補之，江西南豐人。道光壬辰進士。十九年七月由刑部主事入直，官至內閣侍讀

學士。

宗稷辰 字滌樓，浙江會稽人。道光辛巳舉人。二十年五月由內閣中書入直，官至運河道。

梁瀚 字海樓，陝西鄠縣人。道光丙申進士。二十年五月由兵部主事入直，官至戶部侍郎。

程恭壽 字容伯，浙江錢塘人。道光己亥舉人。二十年六月由刑部主事入直，官光祿寺少卿。

莊心省 字西樵，廣東番禺人。道光壬辰進士。二十年七月由戶部主事入直，官至戶部郎中。

聶灃 字雨飄，陝西涇陽人。道光甲午舉人。二十二年四月由禮部主事入直，官候補五品

京堂。

朱憲曾 字鐵琴，順天涿州人。道光癸巳進士。二十二年五月由吏部主事入直。

孔慶鋤 字誠甫，山東曲阜人。道光丙申進士。二十二年十月由工部主事入直，官至貴州按

察使。

朱麗宣

字霽堂，江蘇荆溪人。道光癸巳進士。二十二年十月由工部主事入直，官至工部員外郎。

袁甲三

字午橋，河南項城人。道光乙未進士。二十三年四月由禮部主事入直，官至漕運總督。諡端敏。

吳士楨

字誦芬，順天大興人。道光（缺）舉人。二十三年九月由內閣中書入直。

鍾啓峴

字伯平，江西興國人。道光二十四年二月由兵部七品小京堂入直，復中乙巳進士，官至翰林院侍讀，贈四品京堂。

吳福年

字竹崖，浙江錢塘人。道光二十四年四月由內閣中書入直，復中乙巳探花，官至翰林院侍讀學士。

林映棠

字樹南，四川奉節人。道光乙未進士。二十四年九月由禮部主事入直，官至興安府知府，贈光祿寺卿銜。

王發桂

字笑山，直隸清苑人。道光丙申進士。二十四年九月由禮部主事入直，官至工部侍郎。

邵懿辰

字位西，浙江仁和人。道光辛卯舉人。二十五年五月由內閣中書入直，官至刑部員外郎，贈道銜。

劉子城

字雉峰，直隸滄州人。道光丁酉拔貢。二十五年五月由吏部主事入直，官至湖北鹽

法道。

王本梧

字琴仙，浙江鄞縣人。道光乙酉拔貢。二十五年十一月由兵部員外郎入直，官至吉

安府知府，贈道銜。

文獻英

字小南，湖南衡山人。道光庚子舉人。二十六年正月由戶部主事入直。

吳嘉淦

字清如，江蘇吳縣人。道光戊戌進士。二十六年二月由內閣中書入直，官至戶部員

外郎。

曹毓瑛

已見大臣。道光二十六年閏五月由兵部主事入直。

汪 榘

字心蘭，直隸灤州人。道光甲辰舉人。二十六年閏五月由工部主事入直，官至廣信

府知府。

段晴川

字春湖，河南溫縣人。道光丁酉拔貢。二十六年八月由兵部主事入直，官內閣侍讀

學士。

蔣錫綬

字幼竹，江蘇長洲人。道光丁酉拔貢。二十八年二月由刑部主事入直，官至安慶府

知府。

胡嘉楷

字熙伯，江蘇江寧人。道光丁酉拔貢。二十九年正月由工部主事入直，官至懷慶府

知府。

畢至 字春亭，湖北蘄水人。道光乙未進士。二十九年四月由工部郎中入直，官至漢中府

知府。

陳鴻翊 字仲鸞，順天寧河人。道光戊戌進士。二十九年閏四月由吏部主事入直，現官汀漳

龍道。

丁守存 字竹溪，山東日照人。道光乙未進士。二十九年五月由戶部主事入直，官湖北督糧道。

胡家玉 已見大臣。道光二十九年五月由刑部主事入直。

焦祐瀛 已見大臣。咸豐元年三月由內閣中書入直。

錢寶青 字萍缸，浙江嘉善人。道光辛丑進士。咸豐元年七月由戶部主事入直，官至都察院

副都御史。

吳台朗 字次垣，江蘇丹徒人。道光庚子進士。咸豐元年八月由禮部主事入直，官至山東候

補道。

錢以同 字小蘭，江蘇華亭人。道光戊戌進士。咸豐元年閏八月由兵部主事入直，官至（粵）道

御史。

李汝楫 字濟川，雲南會澤人。道光丁酉拔貢。咸豐元年十月由刑部主事入直，官至四川候

補知府。

林壽圖 字穎叔，福建閩縣人。道光乙巳進士。咸豐二年正月由工部主事入直，官陝西布政使。
程祖誥 字覃叔，安徽休寧人。道光庚戌進士。咸豐二年三月由戶部主事入直，現官宗人府府丞。
吳兆麟 字筠軒，浙江錢塘人。道光壬辰舉人。咸豐三年二月由內閣中書入直，官江西鹽法道。
賀壽慈 字雲甫，湖北蒲圻人。道光辛丑進士。咸豐三年二月由吏部主事入直，現官都察院左都御史。

鄧廷柎 字雙坡，廣西新寧人。道光甲辰進士。咸豐三年二月由工部主事入直，官廣東布政使。
張金鑒 字子明，廣東東莞人。道光甲辰進士。咸豐三年二月由禮部主事入直，官至候選郎中。
李德莪 字蓼生，江蘇新陽人。道光甲辰進士。咸豐三年二月由工部主事入直，現官貴東道。
段承實 字芳山，江西南昌人。道光己亥舉人。咸豐三年四月由內閣中書入直，官至刑部員外郎。

梁經先 更名景先，字義初，陝西三原人。道光乙巳進士。咸豐三年五月由工部主事入直，現官河南道御史

郭祥瑞 字玉麓，河南新鄉人。道光丁未進士。咸豐三年六月由戶部主事入直，官至廣東按察使。

裴季芳 字石麓，河南祥符人。道光丁未進士。咸豐三年六月由內閣中書入直，官至候選知府。

白恩祐

字蘭岩，山西介休人。道光丁未進士。咸豐三年六月由工部主事入直，官湖南鹽法道。

章倬標

字果堂，浙江金華人。道光丁未進士。咸豐三年九月由禮部主事入直，現官福建候補道。

補道。

曾協均

字笙巢，江西南城人。煥子。道光癸卯舉人。咸豐三年十二月由內閣中書入直，官慶遠府知府。

慶遠府知府。

王錫振

更名拯，字少奮，廣西馬平人。道光辛丑進士。咸豐四年正月由戶部主事入直，官至

通政使司通政使。

鄭錫瀛

字惕庵，順天大興人。道光乙巳進士。咸豐四年二月由吏部主事入直，官至都察院

副都御史。

洗斌

字雲樵，廣東南海人。道光辛丑進士。咸豐四年二月由工部主事入直，官廬州府知府。

夏獻雲

字芝岑，江西新建人。道光己酉拔貢。咸豐四年三月由刑部七品小京官入直，現官

湖南督糧道。

嚴謙亨

字吉六，福建長泰人。道光乙巳進士。咸豐四年九月由刑部主事入直。

蔣超伯

字叔起，江蘇江都人。道光乙巳進士。咸豐七年十月由刑部主事入直，官廣東候補道。

康錫齡

字子錫，山西興縣人。紹鏞孫。道光丁酉拔貢。咸豐七年十月由戶部員外郎入直，官

至延榆綏道。

朱夢元 字景唐，江西貴溪人。道光甲辰進士。咸豐八年三月由刑部員外郎入直，官至通政

使司通政使。

方鼎銳 字子穎，江蘇儀徵人。咸豐壬子舉人。八年五月由內閣中書入直，現官溫處道。

朱學勤 字修伯，浙江仁和人。咸豐癸丑進士。八年五月由戶部主事入直，官至大理寺卿。

朱智 字茗笙，浙江錢塘人。咸豐辛亥舉人。八年七月由工部主事入直，現官太僕寺卿。

張德容 字松坪，浙江西安人。咸豐癸丑進士。九年八月由刑部主事入直，現官岳州府知府。

靳邦慶 字迪丞，廣西臨桂人。咸豐癸丑進士。九年十月由吏部主事入直，現官衢州府知府。

許庚身 字星叔，浙江錢塘人。乃普姪。咸豐九年十一月由內閣典籍入直，復中同治壬戌進

士，現官光祿寺卿。

蔣繼洙 字椒林，山東曲阜人。道光庚戌進士。咸豐九年十二月由工部主事入直，現官廣信

府知府。

蔡兆槐 字植三，江蘇崇明人。咸豐癸丑進士。十年三月由戶部主事入直，現官榆林府知府。

杜來錫 字榮三，河南新鄉人。咸豐癸丑進士。十年五月由工部主事入直，官至朔平府知府。

王恩炳 字周生，江蘇高郵人。咸豐六年欽賜舉人。十年五月由內閣中書入直。

錢應溥 字子密，浙江嘉興人。道光己酉拔貢。咸豐十年七月由吏部主事入直。

范運鵬 字搏九，四川龍昌人。咸豐丙辰進士。十年十月由戶部主事入直，官鳳陽府知府。

龔聘英 字莘甫，江蘇崇明人。咸豐十年十月由刑部主事入直，復中同治壬戌進士，官至翰林

院編修。

沈淮 字桐甫，浙江鄞縣人。道光己酉舉人。咸豐十年十月由內閣中書入直，官至陝西道

御史。

江人鏡 字蓉舫，安徽婺源人。道光己酉舉人。咸豐十年十月由內閣中書入直，現官太原府

知府。

李庭簫 字小軒，湖北黃安人。咸豐癸丑進士。十年十月由戶部主事入直，現官陝西道御史。

周瑞清 字鑑湖，廣西臨桂人。咸豐己未進士。十一年十月由刑部主事入直，現官太常寺少卿。

何熾之 字柳門，廣東番禺人。咸豐乙卯舉人。十一年十月由工部郎中入直。

區公輔 字盍簪，廣東番禺人。咸豐辛亥舉人。十一年十一月由戶部主事入直。

龔嘉儔 字幼安，雲南昆明人。咸豐丙辰進士。同治元年二月由禮部員外郎入直，現官紹興

府知府。

陳元楷 字玉珊，廣東順德人。道光庚戌進士。同治元年四月由吏部郎中入直。

王汝訥

字子默，直隸灤州人。咸豐庚申進士。同治元年四月由工部主事入直，官至青州府知府。

馮柏年

字鶴崖，直隸天津人。道光己亥舉人。同治元年六月由內閣中書入直，官至江寧府知府。

徐用儀

字小雲，浙江海鹽人。咸豐己未舉人。同治元年八月由刑部主事入直，官鴻臚寺少卿、候補四品京堂。

史松秀

字琴孫，江蘇溧陽人。咸豐丙辰進士。同治元年八月由吏部主事入直，現官敘州府知府。

邵文煦

字茗仙，浙江餘姚人。咸豐辛亥舉人。同治元年八月由內閣中書入直，官刑部候補主事。

徐景軾

字肖坡，安徽歙縣人。咸豐丙辰進士。同治二年五月由禮部主事入直，現官雅州府知府。

方熊祥

字子望，浙江仁和人。咸豐癸丑進士。同治二年六月由戶部主事入直，官興化府知府。

葉衍蘭

字蘭臺，廣東番禺人。咸豐丙辰進士。同治三年五月由戶部主事入直，現官戶部員外郎。

蕭庭滋 字潤宇，貴州開州人。咸豐戊午舉人。同治四年正月由兵部員外郎入直。

吳國杰 字超伯，安徽休寧人。道光己酉舉人。同治六年五月由兵部主事入直。

金日修 字少伯，浙江錢塘人。同治乙丑進士。六年六月由宗人府主事入直。

梁僧寶 原名思問，字穎倩，廣東順德人。咸豐己未進士。同治七年閏四月由禮部員外郎入直，官鴻臚寺少卿。

胡延夔 字子韶，山西繁峙人。咸豐丙辰進士。同治七年九月由禮部主事入直，現官禮部員外郎。

陸夔棠 字憩雲，江蘇太倉人。咸豐辛亥舉人。同治八年二月由刑部主事入直，現官刑部郎中。

張岳年 原名善倬，字竹晨，浙江鄞縣人。咸豐壬子舉人。同治八年二月由刑部主事入直，現官刑部員外郎。

李耀奎 字凌舟，直隸天津人。咸豐辛亥舉人。同治八年七月由內閣中書入直，現官內閣侍讀。

李方豫 字荆南，江蘇江都人。同治丁卯舉人。九年四月由工部員外郎入直。

李士彬 字伯質，湖北蘄州人。同治乙丑進士。九年五月由刑部主事入直。

丁鶴年 字仙譜，漢軍鑲黃旗人。同治甲子舉人。九年八月由工部主事入直，現官工部員外郎。

沈源深 字叔眉，河南祥符人。咸豐庚申進士。同治九年九月由吏部主事入直，現官吏部員

外郎。

魏邦翰

字季蕤，

江蘇邳州人。

同治庚午舉人。

十年二月由吏部主事入直。

陳毓秀

字慧卿，

江蘇江陰人。

同治乙丑進士。

十年五月由戶部主事入直。

馮光勛

字伯紳，

江蘇陽湖人。

同治乙丑進士。

十年十二月由刑部主事入直。

李固恒

字少石，

河南鄭州人。

咸豐壬子舉人。

同治十一年二月由兵部郎中入直。

余聯沅

字搢珊，

湖北孝感人。

同治壬戌舉人。

光緒元年正月由內閣中書入直。

蕭韶

字杞山，

湖南清泉人。

同治丁卯舉人。

光緒元年二月由刑部員外郎入直。

方恭銘

字壽甫，

浙江仁和人。

同治癸亥進士。

光緒元年六月由戶部主事入直。

莊予楨

字幹林，

山東莒州人。

同治壬戌進士。

光緒元年八月由禮部主事入直。

樞垣記略卷之二十

詩文一

汪由敦詩三首

春曉入直

魚鑰初傳曙色橫，風催殘漏有餘聲。遊仙難醒人間夢，換骨須從天上行。擁帚玉除春露重，捲簾溫室曉燈清。應知無上光明界，願陞丹青畫不成。

靜宜園侍直

聽鐘趨直趁晨鴉，簾捲前山片片霞。鈴索無聲封事少，一鞭歸路日初斜。

直廬即事

晝長人散敞簾櫳，宮漏三聲過未中。晚奏封章還待報，坐看飛絮撲晴空。

于敏中詩一首

申拂珊光祿行帳中獲生麇一獻之大庖異日即以頒賜木蘭扈蹕

佳話也不可無詩紀其事輒賦六韻贈之

特拜全麇賜，頒從數獲餘。喧傳微飢得，列獻射生如。是麇與從獵諸人所射生，同列簿以獻。食力償其願，旌勞溯厥初。幻殊迷鹿夢，笑擬弄麇書。同人有舉此爲戲者。行炙誇賓客，分鮮逮僕輿。東方工割肉，拂珊昨在宴次每以善割自負。歸遺一軒渠。

趙文哲詩一首

長歌行贈陸耳山

陸敬輿有荒莊，趙元叔有空囊，一貧至此非所恨，但恨一出一人相避成參商。與君結交久，樂事掛人口。銷夏雲林壁上泉，餞春繡谷花前酒。聞君昨從吳越賦皇華，舊句已籠碧紗否？萬人海中藏我六載餘，君亦兀寄宣南坊畔廬。深深青瑣闥，滑滑白玉除。十行之詔萬卷書，與君朝朝暮暮登駟如。今春歌上陵，去秋歌出塞。屬車豹尾間，簪筆兩人在。偶然拍馬依飛前，草檄飛書立而待。壬午同年生，與君同命鳥。長安泥爪何足誇，別有千秋共懷抱。我昨一跌君不

知國門一出十步三威遲。計程謂當此傾蓋，嗟哉楊朱淚灑歧路歧。行者萬里塗，居者萬里心，楚山嶄嶄水淫淫。知君朝回一燈對風雪，夢中千巖萬壑與我同登臨。陸敬輿，趙元叔，曷不雲龍共追逐。詩題日南至，書到日東陸。詠梅儻寄草堂篇，吹笛還酬武谿曲。

陸燿詩二首

扈從木蘭賦贈同人屬和

地迴天高露氣清，行圍歲事有期程。關門不設防秋戍，壯士能歌出塞聲。霹靂手翻弓引滿，風颺蹄蹴馬騎生。短衣囊筆長楊裏，早愧相如作賦情。

寓園雜詠和阮唐山同年

中庭促膝共蓬廬，諧笑云云習未除。苟節刪於相熟後，淡懷長似訂交初。才華須讓連城璧，蹇劣誰持下坂車。夜久不知河轉角，柳梢缺月掛方疎。

敢笑趨公職事微，每因戒旦切朝饑。自牽羸馬呼奚僕，已見羣鷄集省闈。宮漏傳聲催制草，掖梧寒露濕朝衣。在家早起平生意，莫怪勞薪偃息希。

嚴長明詩一首

寄王蘭泉前輩

詔策籌邊第一功，恩光稠疊動昭融。翔鸞音洪三槐露，孔雀翎翻九棘風。邦典坐愁心鄭重，王綸手捧地尊崇。公入都後，晉秩大理寺卿，仍直樞庭。臨風莫道台光迴，仰首卿雲即見公。

趙翼詩六首

璞函落第後入直軍機詩以調之

吾家元叔今詩翁，才名廿載雄江東。弱不勝衣一把骨，筆力乃挽千鈞弓。一朝獻賦入薇省，長安詩社幾爲空。我昨讀君詩滿冊，雅材百五妙驅策。機杼織成七襄錦，雲霞補自五色石。老樹著花霏遠香，疎桐滴雨湛寒碧。有時哀絲彈寡女，忽焉快劍擊俠客。即今此道論作家，得不推袁虛一席。胡爲才高遇偏左，兩試春官再被斥。途窮阮籍思回車，去直樞曹應推擇。自言日暮甘倒行，冷官聊逐熱客迹。噫嘻此地吾舊遊，直廬珥筆參國謀。夜草軍機磨盾鼻，曉宣相麻促詞頭。從獵每隨虎賁隊，待漏慣聽雞人籌。文章報國儒者事，固藉黼黻宣王猷。獨惜君才不易得，自今未免分日力。眼看名山業垂就，忍把精神耗吏職。丈夫窮達會有命，不如讀書飽

胸臆。竿進百尺步益艱，丹將九還火莫息。期君速到蓬山巔，寬問歲月恣討研。卻將鎖院揮毫手，來作花輒應制篇。

軍機夜直

鱗鱗鴛瓦露華生，夜直深嚴聽漏聲。地接星河雙闕迴，職供文字一官清。蠻箋書剪三更燭，神索風傳萬里兵。時方用兵西陲。所愧才非船下水，班聯虛忝侍承明。

清切方知聖主勞，手批軍報夜濡毫。錦囊有策兵機密，金匱無書廟算高。樂府佇聽朱鷺鼓，尚方早賜紫貂袍。書生眊筆慚何補，不抵沙場斫賊刀。

下直同漱田秋帆諸人郊行即事

雨過青圻淨麴塵，出郊人馬共欣欣。班輪隻日餘雙目，春已三分過二分。蝶趁花香芳草路，鴉銜祭肉夕陽墳。郊行景色真堪畫，只少擔瓶一老軍。

七十自述

東華初步軟塵紅，移直樞曹地位崇。五夜趨朝雞唱月，九秋出塞馬趨風。沈沈鎖院聽鈴索，漠漠周防挽角弓。六載微勞差自慰，西師及見告成功。補中書，入直軍機，前後凡六年，時方用兵西陲。

歷歷巢痕記憶真，一時風景一時人。曾因曝直深嚴地，及事當朝老大臣。門館無私心似水，衣冠有慶物皆春。只今回首平津閣，慚愧曾充上座賓。謂博文忠、汪文端二公。

王昶詩十四首

直廬曉坐

東華扃已開，北闕鐘初響。鳴鑪入建章，瑤所躡宏敞。殘月遠無痕，明河高有象。直廬散微香，封事猶未上。偶與鷓鴣行，披襟勵誠讜。松火轉茗鑪，蘭膏映書幌。靜欣翰墨間，晴覺雲霞朗。禁地肅清嚴，簿書謝鞅掌。慙非經世才，謬作鈞天想。

歲暮蒙賜魚雉鹿兔果品恭紀

臘祭行將舉，天廚已早頒。江魚冰鬣壯，山雉錦翎斑。珍合殊方產，恩深內殿班。惟乾清門侍衛軍機房章京有之，部院郎官皆不及也。徹來供晚膳，歡喜溢慈顏。

常山峪晚直

馳道緣崖築，行宮傍嶺升。前驅先射虎，別騎晚調鷹。夕照千峯雨，疎煙萬帳燈。秋風殘暑退，涼氣滿衣稜。

自熱河至張家營作

令典秋三月，康莊第一程。滄溟連雁塞，古戍亘龍城。禾黍徵豐稔，烽煙息太平。何期韋帶士，得與飲飛行。

紫塞盧龍北，檀河又白河。日暄乾稻廩，風勁轉蓬科。鳥雀因寒聚，鷄豚就食多。義皇風俗古，竹馬更婆娑。

六十七圍場，方輿及大荒。秋高峯更翠，霜重草全黃。地界卡倫接，泉源淖爾長。每一圍場必有哈達山，下有泉，衆流積水謂之淖爾。彎環紅柵在，來往便戎行。圍場八旗分四正四隅，相距二三十里不等，近者或距六七里，蓋中有山者始爲圍場。以山大則禽獸多，山小則禽獸少，故遠近不能一概也。

木蘭圍中和申光祿笏山韻

霓旌風急動龍蛇，跋馬秋原野徑斜。指點溪山真似畫，可無茅屋兩三家。歷盡孱顏鳥道平，萬峯頂上曉霜清。不妨預作登高會，只少藍輿載酒行。沙河纔過碧山開，古木秋深翠作堆。空谷何人能見賞，年年風雪老琴材。短衣茸帽曉迎風，塞雁行行度碧空。知是山程行過半，初陽一抹樹梢紅。圍中路程遠者不過三四

十里，近者乃十餘里。每黎明啓行，至晚日三竿則已抵下營矣。

再次前韻

溪流曲曲縮秋蛇，列帳層層傍嶺斜。人語雞聲成小住，居然來往似鄰家。
絕磴初開木棧平，蒼巖雨過十分清。書生忽欲誇身手，笑與期門縱轡行。

旂門兩翼畫旗開，颯沓風生萬馬堆。今歲獻禽知倍富，龍沙天驥正呈材。待衛傅君靈安新從大宛

市馬歸，高伉壯健，異於常品。

千林黃葉颭秋風，殘日初沈暮靄空。散直歸來頻覓路，停鞭遙指帳燈紅。

合圍後有鹿逸至金壇相國帳中繫以呈獻特賜雙眼花翎以誌嘉瑞

四山萬騎殷雷霆，黃閣開帷對翠屏。豈有射聲來虎帳，竟同折角出龍庭。八珍絡繹增仙膳，雙眼勻圓耀彩翎。總與明良添盛事，好傳佳話玉堂聽。相國時掌翰林院事。

戴衢亨詩一首

送范攝生方葆巖隨尚書福侯赴臺灣平賊

男兒事業請長纓，磨盾濡毫意氣橫。闔外談諧資將略，幕中書記擅詩名。旌旗下瀨魚龍伏，鼓角從天猿鶴驚。觀海從戎心膽潤，此行差不負平生。

馮培詩二十首

和吳蠡濤新年初至西苑韻

首春慣遵塗，我馬意亦洽。湖冰老漸消，嵐翠秀堪搢。緒風蘇草樹，初日亂鳧鴨。橋喧簇魚竿，泥活起花鍤。人直欣事簡，遭逢此時恰。曳佩鑾鳴空，抽毫劍出匣。趨走五色雲，揮灑十行劄。境遂引蓬壺，談雄倒江峽。鈞樂飄管絃，火戲幻鱗甲。詩翁詩格健，牛耳齊盟狎。自哂荏叩鐘，兀白故難壓。

爲戴蓮士修撰紀事

阿濟格鳩開廣原，秋場蹴踏萬馬屯。雄雷急雪日數番，鞭梢湧出扶桑暎。幔城山川朝至尊，飲飛負羽環爲門。一鷹迸逸如星奔，注矢競發追驚魂，有人突前氣欲吞。赤手生搯林莽翻，不用網隍及火燔。中黃愕視相顧言，是何勇者育與賁？膽麤勢可移崑崙，就看雅度儒臣敦，但有筆橐無刀韃，獻禽天子旋拜恩。大庖波及逾春溫。帝曰前後兩狀元，丙申舊事堪同論，戴以繼于衣鉢存。賜詩有雲：狀元端是讓前輩，大小獲則同。蓋以于敏中丙申歲圍帳獲鹿事爲此五十六字榮光騫，捧來寶敵千瑣璠。旁觀敢不敢喧，我慙刺促駒局轅。側聞盛事須眉掀，持螯執鹿誰輕軒。一笑

沃我松醪渾，與酣作詩稜可捫。

和沈舫西用東坡清虛堂韻寄懷之作

瘦馬日踏河隄沙，廂東聚散如蓬衙。軍機直房在山莊門東。自夏徂秋氣候變，卜歸尚杳燈無花。
吾生到處作萍梗，何者爲客何者家。不能挽弓誇中鵠，時同人有隨班校射者。但令削札供塗鴉。吳興
山水劇清遠，有才京國流芬葩。詩箴緘遞付驛使，驪珠錯落窮搜爬。遙知右掖雨餘靜，坡翁一
卷澆新茶。燃殘官燭記寸刻，數來禁鼓傳三過。懷人未得尊酒共，赫蹏展讀空長嗟。相逢瓜代
粲一笑，掀髯對月杯樹霞。

晚直

寂寥人散盡，獨作後棲鴉。只有青山對，偏遲落日斜。虬鐘林外靜，魚鑰禁中賒。暝色看
徒御，迎來白鼻驕。守晚者候官門上鎖始歸，僕夫控馬以待也。

七峯別墅月夜

春色在空冥，烟高人夜清。鳥巢落山牖，魚背負潭星。老樹淨堪倚，幽齋涼不扃。塵勞頓
披豁，身世此浮萍。

持醪酌殘雪，中有梅花魂。遠夢過江水，新愁掛月村。雲嵐和幔卷，石井抵牀溫。已覺圓輝溢，然燈近上元。

早直

帶霧披闌闔，晨光到恰開。遞函封事少，布埒射侯催。樹色濃於染，峯陰溼似苔。宵衣天語出，早問雨陽來。

西苑退直

駘蕩韶光晝漏遲，從容散直早春時。日臨燕九仙雲近，風過秋千溫樹知。聽徧啼鶯濃似酒，飄來法曲裊如絲。太平多暇供吟賞，依舊陳編信手披。

和阮唐山前輩假宿七峯別墅之作

廢墅臨湖老屋椽，白波浮動夕陽前。歸林倦翼爭投暝，臥地殘峯不記年。重剔秋燈追往事，乍迴春夢破塵緣。何如木葉淮南夜，商略西窗聽雨眠。

直次無事戲作

直廬閨靜似茅菴，坐臥何殊彌勒龕。簾影欲搖雲滿屋，鳥聲疑對客清談。添熏官燭更初

永，強飯公廚味久諳。日夕拈毫無一字，年來嬾過再眠蠶。

陸蘧菴方葆巖還京喜贈。時同赴關隴者劉退谷汪首禾裘可亭復

值睢州河口漫溢往豫襄事並以寄懷

翩翩才調賦從軍，隴右論功得五君。人醉蒲桃初罷讌，秋深瓠子又離羣。朝家事重河渠志，官秩榮登戰伐勳。諸君皆以軍功晉級。媿我不才空握槩，編書想見柵塵雲。時承葉石峰堡紀略。

七峯園舊有海棠一株甚繁茂今已枯萎和蠡濤韻

襖被衝寒直禁扃，紙窗寂歷短檠青。一年駒隙匆匆過，五夜雞聲細細聽。官事稍稀翻汗簡，春光欲到動花鈴。玉堂未必真天上，隨處因緣是福庭。予與裴山俱由翰林改官。

陳蔭山舍人寄示灤河道中諸詠有山如太古誰能學石不多言便

可交之句蓋自況並以見贈也因賦此酬其意

策馬無端又塞垣，郵亭旅舍墨留痕。詩堪記里前塵在，人貴知心古意敦。一簣成時山可學，八音諧處石能言。與君共結盟鷗侶，海色江聲恣討論。

聞劉樸夫給事奄逝其妻湯恭人殉節詩以哀之

廿年起草禁垣久，萬里兼程驛使催。盛壯早驚雙鬢雪，耗磨甘忍寸心灰。生前有像真能肖，去年灤河直廬，繆舍人寫畫像，極似。身後無兒亦可哀。猶憶追趨如昨日，訃音偏向病中來。

聖主臨軒惜此臣，賜金加秩重恩綸。榮叨泉壤魂應感，死謝戎行氣尚振。福相國赴臺剿匪，欲與給事偕行，以疾甚弗果。結髮痛深連理樹，捐軀羞作未亡人。晉陵山色輝坊表，天語旌嘉勒字新。有旨進贈鴻臚寺卿，賜銀一百兩，湯氏建坊旌節。

夏日留京倬直漫興

綸扉晨啓集冠裳，元老威儀政事堂。偶話先朝聽歷歷，神遊直是到羲皇。謂雲巖相國。

日斜雲淨一簾垂，綠樹沈沈引夢遲。公膳餐餘無箇事，斷蟬聲在乍晴時。

長安門外簇停車，三日週環守直廬。時同直人少，隔三日即夜班一週。畢竟從容還偃蹇，塞垣跋馬

復何如。

斗室何由解鬱蒸，葛衫蕉扇小窗憑。臣心已自涼如水，不藉頒來內府冰。每年有移牒領冰之例，

實則直次未設一冰也。

秦瀛詩一首

七峯別墅月夜和馮玉圃吏部韻

暮色落空冥，衆峯相與青。鐘聲度明月，林影散寒星。高閣向山迴，鄰扉隔澗扃。閒來感身世，天地一浮萍。

管世銘詩五十五首

送秦小峴同年觀察浙東

樞庭才彥集，落落幾詩人。之子清吟擅，能無同調親。雞棲時並轡，豹直每均茵。忽建高牙去，相思越水濱。

浮沈

誤玷承明直，浮沈十載強。拙筭空濫隊，禿穎枉居囊。目自分臧否，心還任激揚。小臣於數子，或尚有微長。

暮春瀑直西苑

旭日動宮鴉，連朝撲面沙。氣清初潤麥，風定欲蘇花。襜被書攜友，周廬墅作家。田田荷葉小，又從五雲車。

機庭紀事

金倉碌碌治符書，忽遣簪毫近玉除。分帶六曹專視草，未登五品特垂魚。月常半直青綾被，歲或三隨黃屋車。清切此時稱右職，只慙郎鬢已蕭疎。

直廬有寄

直廬特許北門開，視草新班擢上才。初地傳衣將百歲，昔賢倚筆已三迴。興元赦制加顏讀，澤潞軍書運掌裁。潤色王言良不易，豈惟前路近中台。

扈蹕秋獮紀事

魏之凌雲賦子虛，又無強記誦亡書。精銷自擬勞薪似，也扈金根備屬車。
驛書樂水接都京，四日循環有定程。連夕雨多遲數刻，嶺頭已遣近臣迎。每日報到遲，即派侍衛

章京過廣仁嶺迎遞。

面承密敕語從容，分寫新綸撰進恭。御筆親增三五字，別傳天語帶硃封。
詔草經硃筆更改，例應另紙恭錄，惟廷寄諭旨即以硃發。

魚龍散樂列瓊筵，視政如常倍覺虔。一曲仙韶聽未闕，重臣三對御牀前。
萬壽節演劇後視政如常，軍機大臣有一日召對數次者。

不擇秋蛇與墨豬，但期疾速勿遲逾。繕完呈本催分寄，有一旨而傳諭數人者，照書數紙各寄，謂之分寄。珍重臨時與過硃。
凡恭遇御筆增改違錄他本者，謂之過硃。

方寸瓊函疊紙成，綠牌交出記分明。凡引見記名各員，吏、兵兩部以綠牌交機庭照錄，入存記匣，隨時進御。新來方面開何缺，封事先題進空名。
書缺而空其名，以待御筆。

天書脫稿進堯階，加緊郵程計日排。自每日行四百里以至六百里加緊不等。欲印紫泥先請鑰，亟繕夾袋出金牌。
機庭印鑰例由大臣中行走最前者佩帶，取用以金牌為合符。

舊事分明記阿誰，獨難顛末誦無遺。試繙隨手當年簿，機庭總簿謂之隨手。充棟封題若列眉。檢查舊事，必按各年隨手簿索之。

破例恩先契聖情，且教集議付廷評。何時部疏纔呈閣，預寫詞頭擬准行。凡直省奏請遷除當上意者，雖交部議，仍命存記。本上時議駁，亦擬旨准行。

賜果分鮮事疊稠，綺紈三品列卿儔。凡頒賜表裏，軍機章京例視三品京堂。辛勤視草遲公退，克食羹

資輟夕羞。國語恩賞謂之克食。

緘膝黃匣付崑崙，中有軍書要件存。當直者例滿、漢各一人，帶要件先候於尖營，以備承旨。今日莫音誰
扈直，最先跋馬候烏墩。國語以隨豹尾爲跟莫音，尖營爲烏墩。

內庭章服例優崇，貂錦平時借紫同。馬上羊羔齊著罽，祇披風帽是猩紅。

下圍傳駕左門還，在直郎官總立班。不向長楊陪羽獵，何由親切覩天顏。軍機帳房例在幔城之左，凡駕由左門入，在直章京皆立班。

封章絡繹費天題，夕對方終塞日西。行在召見軍機大臣，恒在晚膳以後。詔草先成先進御，不須留待十行齊。凡撰擬詔在六七道以上者，輒命隨成隨進。

請駕懸知日未曦，昨宵披答取重論。幔城一片傳呼急，恰有人先直早門。上直有一人最早者，謂之早門。

交抄內閣發遞紙如飛，針晷時時視帶圍。坐待行廬傳合鑰，散直有一人最晚者，以宮門下鑰爲度。
珠車燈火照光歸。周廬夜直兵弁統謂之珠車。

行帳安床篷艇齊，欠伸常慮打頭低。夢回誤聽瀟湘雁，卻是寒駝帶雨啼。

晚看白道夕看星，十二圍場句曲形。忽見塞門山色好，插天依舊馬頭青。圍場以西去，以東還。旋蹕欣承休沐恩，例容七日澣塵昏。扈蹕初歸，例得休澣七日。朝衫重繫牟尼串，雅步趨翔內右門。

內直各官皆進乾清門，惟軍機直郎許兼由內右門出入。

惟憑謹畏直承明，緘口仍防出舌輕。有問輒將他語亂，肯言温室樹何名？

追紀舊事

語關新故禁銷宜，平地吹毛賴護持。辨雪仍登天祿閣，三家詩草一家詞。丁未春，大宗伯某倚楮

王漁洋、朱竹垞、查他山三家詩及吳園次長短句內語疵，奏請毀禁，事下機庭。時余甫內直，惟請將曝書亭集壽李清七言古詩一首，事在禁前，照例抽燬，其漁洋秋柳七律及他山宮中草絕句、園次詞語意均無違礙。當路頗建其議，奏上，報可。

夏日直留守班即事雜詩

九夏鑾輿捺鉢停，見曝書亭集。暫教綸閣合機庭。濡毫兼問廚餐地，憑借西頭學士廳。每年借

蒙古學士堂爲早直之地。

相逢爭說息肩期，留務清閒亦恐遲。聽徹六更興辨指，登車略後早朝時。馮玉圃同年嘗見語曰：

「每日晨興，總以韓中辨指爲度。」

依然三日上更番，過午何人共掖垣。睡起斜陽滿宮樹，晴蟬乾鵲一時喧。

膏澤應知帝念殷，朝朝籍記等書雲。今年暘雨多時若，少有飛書附驛聞。

直房朵殿最西偏，岸幘深衣聽自便。今日相公親宿衛，近晡冠帶候文淵。

隨單公件束縱橫，事蹟難詳部寺門。各聽所由將領去，只令官簿自書名。
機宜文字稿連蜷，紙斷行斜半不全。隨報卷還窺約略，仍同省樹不輕傳。
每及清涼趁早衙，日高意已厭輕紗。西園不到剛三月，虛負薰風紅白花。

七峯別墅口占

西園樓被久如家，無復城南載酒車。猶喜詩情有供養，上樓山色下樓花。

樞垣記略卷之二十一

詩文二

裘行簡詩二十五首

上元後一日退直七峯別墅次馮玉圃前輩韻

春光滿蓬瀛，生意盡融洽。羣花蒙澤先，含苞已防掐。暖通躍沼魚，欣動藏池鴨。叮畦聚黃冠，吉語興畚鍤。土膏舊潤滋，又荷新恩恰。千頃鋪銀萼，輝映珠騰匣。即景擘蠻箋，火急追連劄。玉圃詩係直次促成者。聲牙韻詰屈，如灘聲轉峽。律陣誰褰旗，研焚余棄甲。退直得餘閒，涉筆聊謔狎。計日城南遊，花應盈擔壓。

同程愛廬日直

儻直承明載筆俱，五更鐘每聽紆徐。羨君百斛才扛鼎，媿我三年仕濫竽。過眼隙駒驚老大，關心歸雁夢江湖。尋芳擬共城南去，指點春光在畫圖。愛廬有春深花覆讀書廬圖。

隨從木蘭次馮玉圃前輩韻

匆匆誰唱贈行歌，又度羊腸九曲河。滿篋征衣餘野馬，一身生計倚封駝。山連遠塞高低接，人到中年聚散多。去住都爲官事繫，玉圃以纂書留京。尊鱸鄉味近如何。

豹尾曾同扈從儔，仙莊橐筆日追遊。昨歲同玉圃隨從熱河。關心夜燭兼晨漏，賭唱長歌更短謳。歲月只隨鴻爪幻，雲山又見雉媒秋。黃花重九年年負，選勝輸君醉墨留。

灤陽中秋集戴蓮士太史寓齋次汪首禾前輩韻

丹嶂千重水一崖，山川猶是歲時加。舊遊似燕春尋壘，小集如鷗晚聚沙。袖裡詩篇堪作伴，眼前風月不須賒。明朝騎馬興州道，又聽邊秋起暮笳。十六日進哨。

題畫次程也園考功韻

蠻箋十樣競抽毫，律陣詞壇繼水曹。舊雨重陪敲玉佩，幾人得路賜緋袍。再直樞庭，當日同事諸君多躋清要矣。誰憐老圃秋同淡，漫出商音語變騷。珍重花期莫辜負，城南沽酒費錢刀。

五月十八日夜直

夜直分班各一遭，年年橐筆占郎曹。風傳更鼓天街迴，星傍觚稜月殿高。蔭隔疎簾成薄

醉，涼生團扇效微勞。流螢點點緣堦砌，伴我吟情映紫毫。

九月趨直香山

瑤池蓬島景全收，覽勝還登最上頭。鏡裏樓臺分縹緲，仙家雲樹自清幽。誰言官事無佳興，畢竟勞人得壯遊。多少城南探菊客，笑他只爲蟹螯留。

次韻答沈舫西直廬

騷壇誰繼隱侯風，家世原推八詠雄。雨歇螭頭金錯落，涼生殿角玉丁東。人緣當制摛詞典，詩有真情和韻工。想聳鳶肩閒灑翰，鑪烟細裊墨池中。

贈戴蓮士官庶

誰道文章可富身，劇憐囊橐愈清貧。諸生徧入東風座，遙海爭雄大雅輪。知制誥階唐翰苑，副樞密秩宋詞臣。科名不愧通才選，落落前頭代幾人。

次管韞山侍御中秋夜直韻

搖鞭纔別古興桓，鏘佩旋瞻豸角冠。賦就秋聲人蘊藉，燈移蓮影地高寒。九門夜肅黃金鎖，三殿光生白玉盤。想見烏絲揮彩筆，幾回寫罷自尋看。

元日直廬

祥開淑景紫雲鋪，鷺序鴛行次第趨。日麗元辰春已透，人傳吉語笑相呼。鳴珂直散鐘烟靜，騰詔恩濃墨沼酥。直隸、河南、山東三省俱奉恩旨展賑，於次日頒發，是日先期恭錄。自謂小臣依禁近，太平無事筆先濡。 樞庭事件皆標於冊，曰隨手登記，元日則裝釘新冊，敬書「太平無事」四字於冊端。

疊前韻答沈舫西工部

花磚退直日斜晡，步履年年祕殿趨。春入蠻箋增跌宕，酒濃銅葉擬招呼。放懷似我狂猶昔，擲管因君潤欲酥。爲語東陽人太瘦，淋漓大筆莫頻濡。

五月二十八日直廬夜雨偶作

頓喜涼颺掃熱塵，扶疎繞屋掛天紳。攤書岑寂燈花暗，問夜慙慙漏滴真。但見蠅頭鑽故紙，幾曾車脚悔勞薪。由來郎署容瀟灑，何事馮公感嘆頻。

雨夜懷程也園吏部錢裴山農部鮑樹堂中翰

青瑣芸香紫塞烟，關情兩地一絨傳。懷人動感三秋賦，示疾難參五味禪。近以腹疾節飲食。以外窮通原自在，此中勞逸各隨緣。留京者每日寅入內閣，開灤河諸君頗暇。無端根觸蕭蕭雨，密樹蒼涼入

暮天。

次錢裴山見寄韻

麗正門趨劍佩身，仙才合奉屬車塵。隸傳程邈三千字，瑟鼓湘靈第一人。君上篆隸，以「鼓瑟希」三句題試禮闈第一。今古抗懷高論劇，雲山到手卧遊真。兼工繪事。高城漸聽秋砧起，我亦行裝檢

點頻。

磨盾抽毫紫塞行，由來能事屬書生。人如社燕年年至，居似秋枰局局更。灤陽寓居，向來前後班皆預爲指定，互相更換。畫譜詩牌閒裏趣，闌風伏雨客中情。我懷君日君思我，兩地開緘四韻成。

七月二十四日灤河起程作

一年一度代更番，旅壁常看舊句存。路繞重山迷向背，秋爭餘暑迭寒暄。隴秦恍惚嚴軍令，將帥頻仍沐主恩。慚媿小臣無報稱，濡毫揮汗寫論言。

題舊存便面

此乾隆癸丑年西苑直廬同人書畫也。後以箚敝裱爲軟幅，藏之笥中，亦幾忘之矣。

今檢點書篋，忽得此幅，因思馮實菴給諫已歸老，錫山杜巽山侍御已作古人，程也園考功以憂歸里，盛孟巖侍御出守同州，錢裴山祠部督學粵西，昨任滿回京，復入樞庭。而此內未經與題者。巽山所謂與之對弈之汪首禾，今任蘇州方伯，與之同觀之素蘭畦，今觀察關中。孟巖所謂先歸偃臥不及同觀之沈舫西，今爲泰安太守。癸丑距今甫十年，俯仰間已不勝聚散之感，率題二詩以誌慨嘆云爾。

誰道煙雲易變遷，煙雲滿幅尚依然。只今筆墨聯同調，故紙重看已十年。
承明曝直聚郎官，偶爾閒情感筆端。離合浮蹤風雅事，一時惆悵墨千丸。

曾燠詩二首

木蘭從獵酬曹儷笙同年寄懷韻

河如隴坂羊腸曲，木蘭有河名羊腸。天似穹廬雁塞寬。曉拂霜華千帳濕，夜明獵火四山寒。才非獻賦空操管，恩許分鮮每壓鞍。不負此行緣底事，丹崖碧樹飽經看。

除夜禁中宿直

斗柄初迴鳳闕間，松盆徹夜照清班。九重真覺春先到，萬戶誰如我最閒。南畝占年翻雪

壤，西師送喜過天山。書生何補昇平業，歲月催人鬢自斑。

野

關槐詩二首

入直軍機處呈同直諸公

縹緲鐘煙禁籟春，更番密勿掌絲綸。起家詞賦皆先澤，報國文章在此身。遊侶祥麟威鳳集，圖書朱戶綠窗陳。一從奉召歸樞掖，尺五天低雨露新。

同邵海度、吳槐江夜行蓮花套。

山行百折躡層梯，磴道盤旋入望迷。驛嶺衝雲同走馬，荒村落月又鳴雞。五更清景三人共，一望寒煙萬木齊。差喜行營封事少，懸厓翠壁待分題。

錢楷詩三首

七峯別墅晚望

獨立蒼茫興不孤，暫時塵眼對菰蘆。滿天秋氣雨霏夜，隔岸人家燈照湖。楊柳六橋碧活脫，芙蓉兩角青模糊。箇中許著烏篷舫，便泝煙波作釣徒。

九日靜宜園曉直

玉泉西去路逶迤，馬上乘船趁早暉。人海不知秋已老，重陽如此古來稀。風驅落葉滿山響，石迸流泉行逕微。腰脚非關莫菊健，鞭絲還逐暮鴉歸。

和馮玉圃小除夕同夜直韻

榻列東西戶不扃，一冬幾共此燈青。學疏蒼雅繙書推，言盡韋絃破睡聽。無事福同清鑿月，舊遊塵憶玉堂鈴。長安爆竹千門響，憑送春聲到禁庭。

吳俊詩十三首

七峯別墅雜詠

楸

撼撼似私語，瑟瑟嘲孤吟。赤日不到地，暗蟲相追尋。我夢爾來擾，我愁爾來侵。勢欲鬧一畝，羣枿爲之喑。啾啾初生鳥，十百巢其陰。一雨淹半月，濕竈不得燂。而爾工簸弄，蔽虧斗與參。欲鋤且未可，留以障炎侵。

棗

兩見初花時，今來復撥實。倚梯升其顛，百勞饜一逸。舍人腰腹瘦，奉職載慄慄。退直無事，食棗愈食蜜。能令肝脾調，亦使頭髮漆。欄邊捕螳螂，石罅尋蟋蟀。飽食自栩栩，都忘沐與櫛。叮嚀告園丁，壅澆罔缺失。須防根穴蝥，還恐皮處蝨。明年四五月，花復照我室。

松

窗前松兩株，鱗脫爪則存。亦欲自吟嘯，失勢噤難言。毒枿紛怒出，蒿菅亦已蕃。如何天矮姿，因此籠與樊。怒雨走霹靂，黑雲驚奔翻。衆木盡瘖啞，而能舞軒軒。酌爾一杯酒，寫我心鬱煩。

柳

絲疎不受櫛，條空不禁舞。風月湊衆芳，獨爾忝儕侶。平生煙霧姿，能事在媚嫵。一旦髡其顛，焉能僞疎古。人皆施斧斤，吾意頗未許。引泉培其根，伐莽壅以土。夫豈真汝憐，聊用相存汝。棄取了無與，榮悴自其所。稍稍腰肢成，嫵然弄春雨。便有無窮人，辛苦學張緒。

新年初至西苑次玉圃韻

西山入新年，漸與人意洽。草木雖未華，生氣已可掐。東風吹冰池，得意是花鴨。走車鬪

麟麟，坐鳥競恰恰。霞林鞞鞞裝，月館琉璃匣。橐筆侍法從，能事在草劄。兩肩堆春嵐，千言寫急峽。嘗醴温挾纊，擘袖香透甲。致身到蓬萊，笑語仙靈狎。作詩歌太平，五字疇我壓。

七峯別墅月夜次玉圃韻

春月轉冥冥，春燈獨自青。假山半潭霧，空水一房星。樹迴難爲影，鐘疎不受扃。同心鷗與鷺，相伴語枯萍。

形影神相贈，松風淪我魂。倦眠衾似衲，公退屋如村。燥吻傾醪潤，寒吟篝火温。偶然參吐納，兩手握關元。

贈盛子孟巖駕部

駕部作字不脫彊，波磔細碎毫毛收。指節力可挽萬牛，清絲人手亮以道。橫笛吹破天悠悠，仰面飲露調其喉。絲竹不到喉所周，文士簡默處女羞。難進易退懷好修，忽然搗羽風颼颼。三矢疊出應鼓枹，瞥若怒隼追清秋。洞然有聲蓋在侯，天子動色三諮諏。虎賁觀者駭且愁，引弓欲發還躊躇。而君退出神夷猶，握管依舊書不休，大抵其人非世侔。

七峯寓樓即事

紅荷萬柄瀉珠圓，翠柳千絲作舞便。東沼夕陽西沼暝，前山決溜後山泉。連翩踏雨中頻墊，頃刻裁麻袖屢撻。天與吾曹小休沐，蘆簾隔暑硯生煙。

秋來賽食羨陂魚，萬頃昆明浸碧虛。水荇風蒲飛鳥外，翠簫清醕嫩涼初。好風便旋常依馬，斜漢翻瀾欲洗車。身是玉皇司案吏，晚歸人羨屋渠渠。

七峰別墅係賜漢章京散直憩息之所，異數，諸曹所無也。

雨後赴西苑

惺忪曉夢背秋城，乍有涼颺便旋迎。天放好晴娛薄宦，蟬吟殘暑誚勞生。馴如白鷺因機息，淡到青山是骨清。一沼圓荷兩堤柳，者番稍覺芡衣輕。

七峯別墅海棠一株余及見其繁今不花且萎矣

春風淒斷月縱橫，猶見當時照眼明。大抵不花還有魄，由來無命爲多情。曾迷坐樹鶯兒夢，依舊穿簾燕子聲。弱柳頑桃都得意，相將枯影傍南榮。

園中晚直

殿門側左繚垣紆，曉日松陰冉冉敷。乍可游仙難覓枕，偶因憶事輒亡珠。人將白鶴精神健，辭與青山體骨殊。身坐清嚴無暑地，一更鐘漏動蓬壺。

程同文詩十三首

射圃落成紀事在七峰別墅之西

劣容百丈規爲圃，掛甲屯西此一隅。草引頽垣曾過馬，樹遮智井舊窺烏。百年興廢誰能料，兩月經營頓覺殊。散直蕭然有佳處，手成他日儻思吾。
襪被西園舊寓廬，近通一巷得幽居。井華足灑平莎徧，庭蔭還因老樹餘。牆外雲山隨隱露，室中几榻自清虛。時平竊幸樞垣暇，萬里飛馳少奏書。

西苑觀同直諸友習射

困繫鹽車不自由，渴來盤礴共吾儔。狂呼角勝馬從馬，生力挽強牛戴牛。酒實漏卮那易醉，詩扛健筆未能休。老夫忽覺豪情減，猿臂回思束髮秋。

聞校射御閱有期用前韻勸習射諸友

五射周人貢舉由，有如對策勝其儔。當今校此及鷓鴣，於古事非相馬牛。官列扈從常得與，習當僦直趁方休。上方孔翠誰承賜，策騎榆關耀素秋。

疊前韻賀趙菊言吏部盛奎得翎

聖處能窺楚養由，翩然儒雅渺無儔。會心桑女俄穿蟻，妙手庖丁若解牛。內定固應操百勝，卓登久已歷三休。得驍真博天公笑，看取宮門拜賜秋。

同日強綺園水部逢泰得翎索詩疊前韻奉賀。

褒忠奕葉主恩由，二十爲郎世寡儔。禁院卻來依五鳳，勳階本合佩千牛。簪毫日直書先學，匣劍宵鳴志未休。校射宮門好身手，時平絕塞罷防秋。

七峯退直同梁茵林儀部作

罷直日移午，解衣煩暑清。窗閒少蠅集，院靜未蟬鳴。獨樹剩天濶，微雲當
明。忘言似

君少，共此一編橫。

夜出古北口道中避雨失路

月黑路西東，林端虎嘯風。鬼燈深夜碧，野燒亂山紅。雨脚紛隨馬，雷聲殷在空。短衣懷李廣，意氣爲誰雄。

常山峪行帳夜半雷雨索茵林和

疾雷破山出，驟雨橫空來。殘暑勢猶盛，得此大敵摧。吾衰尤苦熱，披襟一快哉。似聞僕夫歎，登陟我馬頹。睡美不復問，醒時雲已開。印須且並轡，馬前月徘徊。

送茵林出守荊州

梧桐生高岡，託根貴得地。駿足聘長坂，遠到始吐氣。因材須彼蒼，官人仰大智。自非才命齊，焉得時會值。茵林我至交，相期久此意。浮沈郎署間，此豈造物意。晨興拍手笑，果見除目至。鳳池雖讓人，黃堂官不細。惟君特立操，能球末俗敝。惟君易簡德，能溥斯民利。旗常已有憑，節鉞待所致。政成定傲我，冷官一無濟。飛騰期故人，樹立作大器。不妨我老衰，側聞喜不寐。

桓桓古南郡，形勝天下雄。往者憂戈刃，戰氣妨春農。承平頗無事，鎮守煩上公。禁旅扼右臂，度支甲南中。重關控鄢郢，權稅三巴通。筦領非其人，難免物議叢。此邦況澤國，適當江漢衝。隄防歲勞費，沙洲日穹崇。秋濤壓城來，往事堪騰訇。保障非其人，其魚歎焉窮。變幻競鼠雀，哀嗷多雁鴻。非威易允濟，非惠難爲功。書生能了事，上徹耳目聰。肯讓韓荊州，虛聲獨隆隆。

憶君始入直，本無赫赫名。貌簡言復訥，資淺望尚輕。要津多俊異，而君泊無營。時賢喜通率，而君靜自矜。同儕動相訝，笑非用世英。我獨心爲儀，謂此非無能。仕途日飢餓，賢者方錚錚。正當資表率，詎可加譏評。況我喜談藝，得君肝膽傾。鴻文各無範，懷抱時崢嶸。天山聞見奇，史局丹黃精。君在方略館纂修西域圖志及校勘遼、金、元三史，議論多與鄙見相合。公餘更矻矻，楮墨尤縱橫。君退直後仍手不釋卷。定知敷政優，仕學能兼并。嗟予離索居，何由慰怵怵。報政君必速，壯遊我或成。青眼重高歌，良會歡平生。

溯我識君初，在嘉慶四年。射策忝前塵，蘭譜因牽連。余與君從兄曼雲編修爲己未會試同年。是時君甫冠，玉樹臨風前。搏沙一再聚，君亦瀛洲仙。比趨東華路，尤欣形影聯。君懷愈謙抑，我乃甘執鞭。東捧遼海雲，西踏關塞煙。每行必並轡，每食不敢先。惟君有恒德，儕輩無間言。君入樞庭最稱勤慎，進止不失尺寸，歷五年如一日。余以有恒稱之，樞長及諸同人咸以爲允也。周旋半廉讓，盤錯彌靜專。謾謾風在松，朗朗月印川。但以才藝稱，猶嫌所見偏。一麾萬事來，素蘊當畢宣。我言非阿好，

行矣須勉旃。

樞垣記略卷之二十二

詩文三

王昶文二首

軍機處題名記

軍機處，蓋古者知制誥之職。其制無公署，大小無專官。直廬始設於乾清門外西偏，繼遷於門內，與南書房鄰，復於隆宗門西供夜直者食宿。其大臣惟尚書、侍郎被寵眷尤異者，始得人，然必重以宰輔。其屬例用內閣中書舍人。舍人改庶吉士則不復入，改六曹、御史、給事中，遞遷卿寺，至都察院副都御史、內閣學士，入直如故，惟擢侍郎亦不復入。間有以貲以蔭爲郎得預者，率大臣子弟爲然。而張公若鸞、鄂公容安又以庶子、侍講入直，蔣公柄、程公燾又以巡撫罷還京入直，皆奉特旨行，非故事也。先是，雍正七年，青海軍事興，始設軍機房，領以親王、大臣，卜銀印，印藏內奏事太監處，有事請而用之。後六年，上即位，改名總理處。乾隆三年，王大臣請

罷之，詔復名軍機處。時大學士爲鄂公爾泰、張公廷玉、徐公本、蔣公廷錫，尚書爲海公望。每被旨，各歸舍繕擬，明日授所屬進之。後大臣避專擅名，乃令所屬具草，視定進呈。自是擇所屬益精慎，至大位者益衆。而上賞賜亦異於庶僚，紗緞、餅餌、果蔬時賜，歲暮賜鹿肉諸物率以爲常，以至上所游幸無不從。其職掌在恭擬上諭及內外臣工所奏有旨敕議者，各審其可否以聞。又外臣章奏，各書爲副以藏之。蓋本朝諭旨、誥命其別有四：凡批內外臣工題本常事謂之旨，頒將軍、總督、巡撫、學政、提督、總兵官、權稅使謂之敕，皆由內閣撰擬以進；凡南、北郊時享、祝版及祭告山川與大臣死事者祭葬之文，與夫后妃、宗室、王公封冊，皆由翰林院撰擬以進。然惟軍機處恭擬上諭爲至要。上諭亦有二：巡幸、上陵、經筵、蠲賑，及內臣自侍郎以上，外臣自總兵知府以上黜陟、調補暨曉諭中外，謂之明發；誥誡臣工，指授方略，查核政事，責問刑罰之不當者，謂之寄信。明發交內閣，以次交於部科；寄信密封交兵部用馬遞，或三百里，或四五百，或至八百里以行。其內外臣工所奏事經軍機大臣定議，取旨密封，遞送亦如之。內而六部、卿寺暨九門提督、內務府太監之敬事房，外而十五省，東北至奉天、吉林、黑龍江將軍所屬，西南至伊犁、葉爾羌將軍辦事大臣所屬，迄於四裔諸屬國，有事無不綜彙。且內閣、翰林院撰擬有弗當，又下軍機處審定。故所任最爲嚴密繁鉅。昶以乾隆庚辰由中書舍人入直，蓋八年於此矣。中間平定準噶爾、回部，西北數十年之患，一朝剗削殆盡，仰見聖天子武功旁魄，超越萬古。而時

又開方略、國史、三通諸館，祀皆爲斟酌條例，用副右文稽古之至意。下至梵筴釋典，隸於經咒館，有所繙譯，輒往討論。故雖職事至繁，竊以躬逢美盛爲大幸。軍機處設立垂四十年，尚無記，前人姓氏多忘軼不可考，乃詢於大宗伯張公泰開，給事中明公善，並以所聞於先輩者次第書之，稱職與否，可指數也。詞詳而不殺者，俾後世得以考見故實，且著遭際太平之榮遇云爾。

謹按：此王蘭泉司寇軍機處題名記，作於乾隆三十二年。現編春融堂集中，而題名迄未得見，遍訪諸先輩亦無有能述之者，或爲之而未成，或已成而佚之，俱不可知。記中敘樞垣梗概畧具，而現行事例未能盡詳。章鉅既爲廣搜博訪，補輯題名三卷，兼取數年來所聞所見所行之實，就其大者輯爲規制二卷。竊謂各部院案牘類皆書吏經手，司員寓目而已。惟樞廷義取慎密，有官而無吏，除每日發抄之摺交方略館供事繕寫外，凡收發文移，登記檔案及奉寄旨並飭封存之件，皆章京親自料簡。其章程名目傳自先輩，雖以各部院能事之員新入，其中有不能驟解者，今並爲分晰附著於此，以備故實焉。每日奏摺必於寅、卯二時發下，軍機章京分送各軍機大臣，互相繙閱，謂之接摺。凡奉硃批「另有旨」、「即有旨」，及未奉硃批者，皆另貯黃匣交軍機大臣捧入請旨，謂之見面。直日章京將本日所接奏摺、所遞片單、所奉諭旨，詳悉分載，硃批敬謹全載，諭旨及摺片則摘敘事由。有應發內閣者，皆注明「交」字，應發兵部者，皆注明馬遞及里數。釘成鉅冊，以春夏二季爲一本，秋冬二季爲一本，

謂之隨手。凡繕寫明發諭旨及各片單，用六行格子，繕寫寄信傳諭用五行格子，每行皆二十字，謂之現遞。其有字數過長，急須繕遞，則令一人於草稿中截定行款，分紙速寫，謂之點扣。分寫畢仍糊而聯之，謂之接扣。交達拉密覆校後貯於黃匣送軍機大臣恭閱，無訛，始付內監遞進，謂之述旨。經硃筆改定者，謂之過硃。若有先期豫擬諭旨，繕寫後封存於匣，以備屆期呈遞者，謂之伏地扣。其恭遇巡幸於首站呈遞者，謂之下馬遞。凡隨摺諭旨交內閣漢票簽，其不因奏請而特降者，交內閣滿票簽，寄信傳諭由馬遞者，交兵部，有交各部院速議速辦者，即專交各該部院，皆使領者註明畫押於簿中，謂之交發。凡抄摺皆以方略館供事，若係密行陳奏及用寄信傳諭之原摺，或有硃批應慎密者，皆章京自抄。各摺抄畢，各章京執正副二本互相讀校，即於副摺面註明某人所奏某事，及月、日、交、不交字樣，謂之開面。直日章京將本日所接各直省原摺各歸原函，繳入內奏事處，謂之交摺。凡本日所奉諭旨及所遞片單鈔釘成冊，按日遞添，按月一換，謂之清檔。凡發交之摺片，由內閣等處交還及彙存本處者，每日爲一束，每半月爲一包，謂之月摺。以上皆按日常行之事，謂之班務。均責成直日章京檢覈無訛，始將現年隨手、現季清檔、月摺及各種存貯要件收入櫃中。直日者親手題封，謂之封櫃，過是則以次散直。若散直後有驛遞奏摺續到隨時召見軍機大臣者，各章京亦即咸集祇候，其未奉召見軍機大臣毋庸進內者，則直日章京將所到摺件開明省分及拜發

月日封稟各軍機大臣。凡在城時，各章京兩班，間日輪直，每班直日各二人，分班輪算，周而復始。直日即兼直夜，於直務畢後，退食於方略館，至次日寅時首先入內，俟次班到齊，會同接摺後，始行交班，謂之該夜班。若在圓明園，則每四日爲一班，謂之該園班，每班直日亦二人，分班輪算，與在城同。直務畢則聚居於外直廬，所謂七峰別墅者也。凡直日者爲本班，不直日者爲幫班。凡園班於第四日散直後，不直日者聽其陸續入城，惟達拉密與本班必留宿以俟次日交班，謂之不截尾。凡園班恭值上進宮在每班之第五日，則帶直一日，爲五日班；若在每班之第六日，則仍於第五日換班。凡扈從行在，兩班章京輪流出派，以本年秋圍合次年春圍爲一班。凡扈從之前、扈回之後，例得輟直，或數日，或數十日，皆視道里之遠近爲輟直之久暫。令不扈從之班連日趨直，謂之圖塔密。凡扈次遇駐蹕日期謂之音德密，皆於隨手簿中注明。凡恭遇南郊大祀，上於先一日莅壇者，軍機大臣入直於西天門外，直廬章京各帶短几坐褥，列坐帳房中，略如扈從之儀，謂之壇班。凡壇班皆兩班相間輪直，不在常直之數。若適直應到之班，則謂之壇班遇本班，各章京皆蟒袍補服，策馬而來。

送馮郎中從軍赴滇序

雲南總督楊應琚，嗜功肇釁，弗能馭將帥，於是緬甸跳踉蠢動，人蓋達，掠隴川，攻圍猛卯諸

土司境。聖天子軫念荒服，赫然以怒，詔明瑞以將軍攝總督事，帥師進討。將啓行，謀擇僚佐，大學士傅公既令河南開歸道穆諾親、陝西興漢道錢受穀先乘遽赴永昌，且擇於軍機房之屬，奏以戶部郎中馮光熊及傅顯偕行。余惟古來幕府之職多矣，惟裴晉公征淮西以馬總爲行軍司馬，以韓愈、李正封爲從事，所辟皆一時賢才，號爲極盛。然吳元濟以囂童阻命，近在淮西，去京師千里，而近四境皆唐土地。督各節度使合攻之，此猶孤豚腐鼠，雖微李愬，元濟不日可縛，故晉公之奏功也易，而馬總、韓愈輩相得而益彰。今緬酋所居在徼外三四千里，負西南大海，阻以林巒，劃以炎瘴，昔元兵至強悍也，所過無不剝滅，三伐緬，僅責其貢賦以還。蓋用力於無可用之區，是以其難如此。惟明公以勇兼仁智，又得馮君輩個儻有計略人助之，以殺敵爲果，以止戈爲武，知其難以圖其易，則決策也必有節，而奏膚功也必速。予辱與三君子游，喜其志同道合，知燕喜而飲至也亦必不遠矣。於其行，因書以贈之。

錢澧文一首

奏請敕軍機大臣進止仍循舊章摺子

臣伏觀我朝設立軍機處，向來大臣與其職者，皆萃止其中，用以集思廣益，仰贊高深，地一則勢無所分，居同則情可共見，即如司員咨事畫稿，亦得有定所，而無殊歧，誠盡善不易之法也。

乃觀近日，惟大學士阿桂一人每日止軍機處，大學士和坤或入止於內右門內舊許大臣暫止之，或即止於隆宗門外近造辦處之廬；大學士王杰則入止於南書房，尚書董誥同之；尚書福長安則止於造辦處。每日惟召見時聯行而入，退則各還所處，雖亦有時暫至軍機處，而事過輒起，一切咨事畫稿，司員未免趨步兩歧。以我皇上乾行之健，離照之明，大小臣工戴德懷刑，決不至因此啓角立朋黨之漸。然行之萬世無弊，實莫過於率由舊章。況內右門之內，相近禁寢。向來因有養心殿帶領引見之事，須先一刻預備，恩加大臣，不令與各官露立；是以設廬許得暫止。不應於未辨色之先，一大臣入止，而隨從軍機司員亦更入更出。爲日既久，不能不與內監等狎熟，萬一有無知如高雲從者，雖立正刑辟，而所絀已多，杜漸自宜及早。至南書房以備幾暇顧問，俟軍機事件既畢，人未爲遲。若隆宗門外直廬及造辦處，則各色應差皆得覘聽於外，大臣於內辦事亦屬未便。請敕諸大臣，仍照舊規，同止軍機處，庶匪懈之忱，各申五夜，協恭之誼，共勵一堂。其圓明園辦事亦同一體。近日和坤、福長安止於如意門外南順牆東向之廬，王杰、董誥止於南書房之處，並請敕禁止。謹奏。

管世銘文二首

鶴半巢詩集序

國家初制，章疏票擬主之內閣，軍國機要主之議政處，其特頒詔旨，由南書房、翰林院視草。自雍正初年設軍機處，領以親重大臣，復選庶官之敏慎者爲滿、漢章京襄其事，機要章奏皆下焉。詔旨有明發，有密寄，由大臣面奉指揮具稿以進。自是內閣票擬特尋常吏事，而政本悉出機庭，兼議政、視草而一之。其初節目寬簡，甲日撰稿許乙、丙而進御，一二大臣實自主之。在直章京特分司繕寫、登記、檢查、交發之事，前此隸斯職者如趙璞、文哲、王蘭泉、趙雲崧、翼、申笏、山甫，並得於政事之暇，從容賦詠，藻耀一時。近者聖天子文德武功，光昭式廓，理大物博，恐易即於恬嬉，用益勵精圖治，未辨色輒問兵部驛報及四方賚奏，有即取以入，或不待進膳，批閱已竟，隨召大臣。諭意出，則分令諸章京撰草，人各一通，或數人共成一通，送大臣詳酌。未竟，中使已絡繹輩催。篇幅較長者必三四人分行繕正，僅而竣事。又繕畢未進，並進後復有諭改，日或至於再三。其他奉命稽牒檢案、加簽貼說及與各衙門聯事，如詳議條奏、讞訊疑獄，沓至紛投，刻期待報，率以日晡爲常，或繼燭留門而後出。其派出專辦非信宿所能得當者，雖例許番休之日，亦襍被在公，不敢歸私寓問家事焉。其中豪傑非常之士，久於其地，未嘗不資以開廣

見聞，練習吏事，因而入與鈞衡，出膺節鉞。獨於風雅之道寂焉無聞，蓋緣意不並銳，即素擅慧業，靈光亦委靡疲茶，消歸烏有。就使結習已深，未忍便廢，而當衆舉其職，獨應對蹇滯，搗寫窘率，少年英果，羣以鈍漢目之，其人亦旋自悔忸，不復措意。猝遇牽率酬應，亦如塵絃澀指，彈不成聲。豈人才不如昔哉？由積漸使之然也。同年馮玉圃給諫直機庭者二十餘年，每分撰詔草，退然未嘗與人爭先，及遇詞頭填委，亦即引紙不讓，灑灑數百言，曲中事情，而通達政體。同列推服，當軸者或不能加點。屬稿既畢，仍偕衆人治雜事。又充方略館提調兼總纂，凡經進之書，獨自刊削校正，並若無其事者然，余固已心服其有過人之量矣。其爲諸生時，已耳其詩名，迨同年同直請之，輒辭以輟業，蓋以所處既非言詩之地，所值又未必皆可與言詩之人，慎重而不輕出也。久之始示以鶴半巢詩一編，爲近年並直機庭所著。受而讀之，則摠情感事，俯仰古今，皆穆如清風之音，溫柔敦厚之旨，舉山林臺閣之習而一空之，又烏自知爲身處承明，與聞機要哉！余既歸其集，不能自己，附綴數言以贈之，並略誌機庭之緣起與前後職役機會繁簡寬迫之不同，俾後之讀是集而論其世者有所考。其似余之不竟所學，固藉是以解嘲。而玉圃之雅量汪汪，不可清濁，亦即見其所得於詩者獨深，匪僅余之鈍漢汗流僵走不可追攀，即曩時王、趙諸君子從容諷詠以適其事者，亦或未能易地而爲之也。

答友人書

來書言鄉人中多有譏僕簡傲者，僕與人交，親疎在心不在迹。蓋吾鄉之官於京師者，率十數人爾，往時僕爲中書舍人，多暇，數日輒過其舍，非有所親也；今或一二月一見，三四月一見，亦非心有所疎也。內直之班，上在宮則日入直，在圓明園則八日中往直四日有奇，比歸之三日，入刑部署者二日，入方略館者一日，過是則又須應圓明園之直。其有造吾門而見，十不得一二，且閱數日乃得往報，以是騰衆人之議。然公事使然，謂僕居要地，恃勢簡傲者，蓋不足與辯。曲禮言「不安說人」，孔子謂「君子易事而難說」，如以徵逐爲說人之具，僕年四十餘矣，方欲仿古人所行，招之不來，麾之不去，何肯酒食徵逐以希衆人之意乎！

方維甸文一首

陳謝恩召入直軍機摺子

竊臣維甸謹將奉到諭旨，詳細述告臣母。恭聆恩命，驚喜感泣，令臣扶掖叩頭，並諭以「天恩高厚，汝當勉力報效，不可因我衰老，以私廢公」等語。竊臣受恩至重，未效涓埃，前歲赴任閩中，因老母不能迎養，去秋在熱河，仰蒙垂問，瀝奏微忱。凡臣不能遽達之私衷，先荷聖明俯鑒，

特頒回籍養親之旨，俾遂門閭倚望之情，感戴生成，恩同覆載。今春自浙回籍，母子朝夕相依，臣母日誦佛號，頂戴聖慈。衰親服食得安，皆出主恩所賜。茲因軍機漢大臣需人，特召微臣俾參樞務，渥荷溫綸之褒獎，備叨溢分之殊榮。並蒙睿慮周詳，訓詞諄切，念臣母衰年遠涉，敕沿途照料其起居，恐臣母戀子難離，並巡幸以免其慮從。凡此優容之異數，實臣子罕邁之遭逢，自顧何人，得邀體恤入微至於此極。縱使捐糜頂踵，亦不足稍報鴻施。惟察看臣母身體，去歲腹疾雖已痊愈，而精神恍惚之症，每日卯後午前總有數次，陽衰氣怯，迥非數月前可比。聞臣片刻出門，亦必百端疑慮。前因臣入山祭掃，稟明往返兩日，臣母亦以爲應往。迨至次早，已忘前語，轉疑臣患病不起，失聲悲慟，終日未嘗進食。迨臣趕回見面，始得釋然。自此以後，跬步不敢他出，清晨初覺時，即須見臣侍側，否則疑慮生悲，勸慰不解。臣私揣臣母似難力疾遠行，然身受非常恩渥，又不敢陳情固請，戰慄兢兢，五中迷瞶，不知所爲。伏讀恩諭，准令將臣母身體情形，據實具奏，是以不揣冒昧，聲敘瑣屑實情，瀆陳天聽，臣不勝悚懼待命之至。

樞垣記略卷之二十三

詩文四

恭親王詩二十九首

恭和御製御門聽政示在廷諸臣元韻

親臨黼宸訓諸卿，濟濟駕行聖世盈。法守舊章嚴宥密，率由大典矢欽明。琳瑯玉藻頌臣下，宵旰宸懷念庶氓。職事願偕寮衆勉，承恩弼直抒愚誠。

恭和御製闡福瞻禮至浴蘭軒理政作元韻

瞻禮皇儀肅，青蓮見佛身。祥雲輝大地，淑氣滿前津。覺世修長世，安民每牖民。百僚承訓諭，弼直勉欽鄰。

恭和御製皇考宣宗成皇帝聖訓實錄告成御保和殿行禮

恭紀元韻

體元順紀帝承天，祇遙謨猷懷紹先。寶訓輝煌延世世，皇清福祚慶綿綿。心傳續緒參三極，聖治昭垂億萬年。敬仰日新不大烈，重光炳煥德威宣。

宣宗成皇帝聖訓實錄告成皇帝御保和殿受書奉命前引護視尊

藏乾清宮禮成敬紀五言百韻。

景運丕基鞏，洪謨邁帝唐。紹先欽聖主，佑後仰宣皇。赫赫宏猷著，巍巍寶錄藏。八朝衷協揆，卅載政提綱。建極符天健，持躬懋日強。無私恢覆幬，有耀普輝煌。謹按御製聖訓序，曰聖德昭心法也。侍膳依璇殿，迎暉啓采堂。歡承溫復清，慕永露還霜。曰聖孝，立人極也。亂齒勤惟誦，仔肩助就將。慎修耽至道，養正肇元良。曰聖學，崇正宗也。布闥醲沾雨，含生渥酌漿。登三臻顯鑠，撫五懷幾康。曰聖治，宣教化也。齋室凝精白，深宮格昊蒼。零壇親步禱，誠祝揭宸章。曰敬天，凝寶命也。監憲陪都莅，吟詩祖誥彰。貞釐皆矩矱，繼述見羹牆。曰法祖，紹鴻模也。率土同文闡，寰瀛雅化昌。國書殷改試，恩榜覩頻張。曰文教，闡欽明也。箭筈初圍鹿，星流迅翦狼。神鎗殲教匪，祕策靖回疆。

曰武功，除邪惡也。廣業懷維惕，思艱刻不遑。緝熙歌大武，待旦媿成湯。曰勤政，建皇極也。饑溺求其瘼，綏來視若傷。鴻慈真保赤，鳳詔徧騰黃。曰愛民，敷仁政也。錫類欣悼睦，酬庸更篤慶。本源絳玉牒，支派衍銀潢。曰睦族，固本支也。六計昭澄敘，羣僚悚激揚。貪風懲篋篋，循吏達圭璋。曰察吏，飭官常也。選士揆楨榦，掄賢任杜房。鑑衡懸九陛，鴛鴦肅千行。曰用人，昭潛哲也。樸儉崇逾切，瑰奇御未嘗。貢鮮停越嶠，採璞罷氐羌。曰崇儉，敦樸實也。壤賦舟車挽，圓錢出入量。薄徵輸稅課，查欠剔官贓。曰理財，慎明德也。珥筆爭敷奏，從繩賴贊襄。石看投水受，善喜樹旌颺。曰求言，廣益思也。靡問同民隱，輕徭軫歲荒。寬和涵蔀屋，愷惻喻村莊。曰恤下，達民情也。犴獄仁覃溥，雞竿膏赦常。鞫研周雀鼠，明允恤桁楊。曰慎刑，弼政教也。牙爪嫻雲陣，熊羆厚月糧。甲披叨例賞，戍役念邊防。曰恤兵，罷征戍也。冬賑蒙膏飫，春祺沛德洋。逋曾燭火旱，供只斂金穰。曰蠲賑，靡恫瘼也。封號隆關廟，禋儀拜素王。璧琮柔嶽瀆，蘋藻薦馨香。曰崇祀典，嚴祈報也。告誠廉兼法，栽培棟與梁。寅恭期左右，申勸效助勩。曰訓臣工，敘官方也。指授攻騎射，膚公紀斧斨。勵兵威虎奮，簡武亦龍驤。曰勵將士，修戎政也。惑世除邪慝，垂箴遏獫狁。溼陬歸並育，軌物範胥匡。曰嚴法紀，定民閑也。定志尊卑辨，緣情品制詳。科條參損益，貴賤限冠裳。曰正制度，明秩序也。仗節功宜激，褒忠詔立坊。綸音餘悼惜，襲次表芬芳。曰褒忠節，振綱常也。舊輔嘉旁作，前勳眷對敷。青珉銘帶礪，紫閣繪珩璜。曰篤勳舊，懋延賞也。南畝遙扶耒，西園各具筐。擴圖資粟帛，敦俗務農桑。曰重農桑，育羣生也。渾噩偕

遵轍，驕奢戒濫觴。黜華頒敕諭，尚質首膠庠。曰厚風俗，端治化也。內使闈應守，中涓竈懼煬。素

干嚴宦豎，僭侈斥貂璫。曰飭宦寺，肅宮廷也。伏莽譏奸宄，耕田去莠稂。廓清開泰寓，撻伐秉乾剛。

曰靖奸宄，安良善也。蠻服瞻顏幸，雄藩引領望。語言通譯寄，琛賚轉梯航。曰綏藩服，廣懷徠也。絕塞消

瑕釁，重臺戢寇攘。牧游安部落，市易靜帆檣。曰輯邊疆，固封土也。太僕閑分廐，凌河草滿塘。馳

驅多駿駟，肥腴共牛羊。曰飭牧政，達報章也。礮械威掀震，艨艟浪破狂。線沙巡遠島，銅海穩飛鯨。

曰海防，綏邊徼也。椿誌諮詢屢，隄工砌築忙。波恬桃泛汎，岸闊葦堪杭。曰河道，述平成也。穀麥覘雙

穗，秔秈集萬箱。班精恒發廩，聚米久盈倉。曰倉儲，裕積聚也。轉漕籌江浙，牽船積稻梁。銜連經

堰濟，瀦洩借睢漳。曰漕運，嚴正供也。淮楚新興販，滇黔昔免商。睿裁虞淡食，軍饗裕鹽場。曰鹽

法，普美利也。貔貅能擾種，鱗脰解插秧。耘籽攜子婦，穰稔熟甘涼。曰屯墾，寓兵農也。冊目紛璀璨，單

心獨勉獲。配郊辭享獻，祔廟謝粢薌。遺器陳都卻，豐碑讓弗當。緘朱留異命，揮翰溢謙光。

鼓舞孚林總，咳挺暢洽翔。漸摩包庶彙，淪浹徹遐方。珍笈祗編貝，瑤函敬飾緗。一人膺纘緒，

列卷炳琳瑯。郵理時於燮，聰聽治孔陽。式型行是訓，迓祉壽而臧。典鉅森杓斗，材幹媿棟栳。

管窺驚浩蕩，蠹測賦滄茫。錦帙齋宗族，鑄門闢闔閭。曙曦呈糾緜，執事恪趨跄。嗣統延麻祐，

貽謀降福祥。詠廣忱莫罄，鼎祚億年長。

文宗顯皇帝聖訓實錄告成皇帝御殿受書奉命前引護視尊藏乾

清宮禮成恩賜御用貂冠一頂御用金龍褂一件恭紀二律

卿雲亂縵碧空浮，瑞應光天德化周。謹按：實錄共成三百六十卷。赫赫典謨垂帝範，巍巍詰誓著

王猷。允文允武勤祗迺，不顯不承懷率由。寶錄輝煌昭法守，貽謀盛業煥千秋。

精一垂裳治體元，慶成端宸重推恩。感深鼇戴簪纓賁，彩煥龍章黼黻尊。惠洽彈冠敷閭

澤，歡同挾纊布春溫。欽奉諭旨：在館諸臣優敘錫賞，執事之王公、宗室官員及其餘大小文武各員均分別紀錄有差，八旗

兵丁各賞給一月錢糧。進賢補袞慚臣職，寅畏書紳矢弗諼。

樞廬雨中退直佩蘅大司農贈紫薇花四株率成一律賦謝

權幟朝歸夏日長，清風引入黑甜鄉。來函有「涼開陶令之窗，清入周公之夢」句。楚雲掩映當窗豔，蜀

錦繽紛拂檻涼。喜得玉堂人共賞，還疑畫省夜飄香。消炎恰有催詩雨，洗出鉛華鬪晚妝。

樞垣直廬喜雨

好雨應候降，膏澤沐蒼穹。幾日晴不雨，炎歊氣如烘。忽看濃雲布，油然四野同。漫空爽籟發，先來解愠風。屏翳神功播，細絲散濛濛。浙瀝宵達旦，地脈已潛通。水添四五尺，潤徧畝

南東。禾役看穠穠，黍苗自芘芘。人心咸誌喜，笠簞笑語中。喜者何所喜，霑足慶歲豐。豈必兩珠玉，尺澤利無窮。欣佔秋大穫，櫛比亦墉崇。衢巷童、田翁，一歌一擊壤，甘霽謝天工。時暘時雨若，胥歸造物功。造物不自有，化育慰宸衷。

樞垣記略卷之二十四

詩文五

恭親王詩

荷露烹茶七律二章應制

烹露爲茶味獨多，乘涼晨起詣溪荷。滿傾沉澹盤珠洩，小蘸瓶笙爨玉羅。夢醒每懷評茗客，詩清欣擬采蓮歌。幸依太液恩波近，得賜金莖徧飲和。

攜來仙露甚清華，消渴閒烹顧渚茶。七椀蓮香幽客座，一窗松影老詩家。瓶珠洩碧金莖擷，鑪火初紅石鼎譁。聞說月團天上味，得嘗屢沐聖恩加。

癸酉二月初五日扈蹕祇謁東陵出朝陽門通州道中即事

天街警蹕肅郵程，輕暖輕寒趁早行。三月風光過上巳，幾分春色近清明。初九日清明，上親詣定陵行數土禮並大饗禮。花鬚柳眼河邊路，雲影泉聲物外情。指點帆檣林立處，永通橋畔綠波平。永通

橋即通州八里橋

過箭桿河口占

雨後新青長麥苗，沙村環繞水迢迢。窩頭河畔垂楊綠，箭桿河即窩頭河，以經窩頭村而得。名窩

陀河。夾岸清陰覆艤橋。東西浮橋俱以舟聯。

三河曉行

東作勤劬憫穡夫，數行恩詔特蠲租。蹕路經由之大興、通州、三河、薊州、遵化州等州縣地方，應徵本年錢糧

均奉旨蠲免十分之三。丁男處處歡聲聚，子婦村村笑語呼。幾疊雲峯青遠列，一灣春水綠平鋪。分明我已身如畫，卻羨人家似畫圖。

遊薊州獨樂寺

姓字標題筆有神，巍然傑閣聳嶙峋。寺內閣上扁曰「觀音之閣」，唐李白書。慈雲縹緲紫香界，寶月

光明指妙津。不識不知昭法相，無人無我了緣因。琳宮古蹟蓮花地，清淨真成獨樂身。寺內後殿

有臥佛。

朱華山

岡巒勢崔嵬，蒼茫如畫裏。疊嶂聳嵯峨，遠岫青邈迤。石罅韻琤琮，山泉清且泚。古柏色蒼翠，朝霞散成綺。野花不知名，遍山豔紅紫。山鳥似能言，間關亂盈耳。駐馬暫盤桓，長松堪徙倚。東望鬱葱龍，昌瑞雲峰起。

一統志昌瑞山在遵化州西北七十里，本名豐臺嶺。初賜名鳳臺山，康熙二年又封爲昌瑞山，從祀地壇。山脈自太行來，重岡疊阜，鳳翥龍蟠，洵國家億萬年鍾祥福地。

桃花寺即景

幾曲斜盤徑，停驂日漸西。山高疑樹小，野曠覺天低。雲壑峯千疊，桃花水一谿。漁陽多勝蹟，八景仰宸題。

薊州志：桃花寺在州東十八里桃花山上，山有桃花，開時獨先，故名。乾隆十八年建行宮於山半。曰下舊聞考：桃花寺，乾隆九年重修，御題八景，曰湧晴雪，曰小九疊，曰吟清籟，曰坐雲漢，曰雲外賞，曰滌襟泉，曰點筆石，曰繡雲壁。

同治癸酉四月初六日遣使冊封親王世襲岡替敬紀殊恩兼以白

警爰成五言長律四十韻

咸豐壬子夏，慶衍帝恩宏。行葦推仁澤，分茅翊聖明。光依桐葉茂，蔭庇棣華榮。咸豐二年六月二十日，文宗顯皇帝遣使冊封親王。愧乏劬勩術，慙膺帶礪盟。靖共持素志，兢惕表丹情。三年十月初

七日，蒙恩在軍機大臣上行走。屏翰綸音沛，輝煌墨寶擊。風愆時警慄，日贊勵忠誠。四年二月二十六日，蒙賜御書額曰「屏翰宣勤」。顯廟貽鴻烈，吾皇遙駿聲。兩宮臻郅理，同治肇休禎。十一年十月初一日，復蒙恩入直樞廷。時值軍書絡繹，庶務紛繁，夙夜在公，不遑寢處。懿訓垂千禩，璿璣運九閔。邊陲銷劍戟，海澨翦鯨鯨。饑溺痼瘕抱，綏安軫慮縈。東南沾樂利，西朔埽欃槍。細柳無傳箭，長楊靜掩旌。橋山增愾慕，太室潔塗盛。昭告趨壇壝，馨香薦鎬京。同治三年六月，克復江寧省城，勳平粵匪，又歷年餘，搜捕餘孽，殲除淨盡。紅旗報捷之日，上親詣奉先殿、壽皇殿行禮，並遣親、郡王等分詣壇廟及盛京三陵、東西兩陵虔申祇告。七年七月，勳平捻匪，上親詣壽皇殿行禮，並詣景山關帝廟拈香。酬庸崇上爵，錫類媿蔥衡。金陵粵匪蕩平，在事將帥及內外臣工均蒙錫爵加恩。長子載澂，由咸豐十年正月初一日，蒙文宗顯皇帝特恩，封爲奉恩輔國公，同治元年正月初一日，兩宮皇太后、皇上加恩賞戴三眼花翎，粵匪軍務告竣，三年七月初二日，復蒙恩晉封多羅貝勒。渥荷兩朝殊恩，凡三錫命。闡化敷文教，宣威頌武威。訐謔承指授，宵旰仰經營。方略留青史，璇題煥彩臺。七年十一月初二日，奉命充方略館總裁，纂輯勳平粵匪方略四百二十卷，勳平捻匪方略三百二十卷，於十一年八月二十七日全書告成。賞加二級，並蒙慈禧端佑康頤皇太后殊書賜額曰「訐謔辰告」。親賢資夾輔，弼亮矢揚清。賜額頻叨賚，仔肩敢弋名。咸豐十一年三月初度，蒙恩賜額曰「親賢翊輔」。同治十年四月初度，蒙恩賜額曰「宗藩淵亮」。瑞徵開泰宇，厚載象坤貞。端本符周雅，隆儀肅渭迎。八年二月初五日，欽奉兩宮皇太后懿旨，襄辦大婚禮儀。賞延於世世，德洽遂生生。寵遇云何報，衷懷受若驚。十一年九月十五日，大婚禮成。十九日，欽奉兩宮皇太后懿旨，恭親王輔政多年，勳勞懋著。前於咸豐十一年十月間命以

親王世襲罔替，因該親王再三懇辭，允俟親政之年再行辦理。現在大婚禮成，親政伊邇，著即加恩以親王世襲罔替等因，欽此。」
寅恭欽繼述，申勸勗公卿。建極思康濟，投艱賴幹楨。克勤仍克儉，惟一允惟精。瞻就來重譯，鈞陶徧八紘。十二年正月二十六日，皇上親政。豫日，兩宮皇太后、皇上同御養心殿，召見內廷行走王、貝勒、公等，親、郡王、御前大臣、軍機大臣、大學士、總管內務府大臣、六部尚書、弘德殿行走大臣等，諭以「盡心匡弼，力戒因循，毋避嫌怨」。惴忱輸蓋獻，啓沃效葵傾。每切修齊念，常閑逸欲萌。汲深虞綆短，任鉅懷才輕。自滿須知損，居高務忌盈。坦夷占履吉，撝抑協謙亨。觥酒吟魚藻，笙詩譜鹿苹。宅心當鑑水，防意戒如城。玉牒嘉祥集，銀潢景福并。大婚禮成，親郡王、貝勒、貝子、公等皆蒙恩晉爵加銜，賞賚有差。乾綱恢復，鼎祚鞏昇平。拜命滋惶思，歌颺喜起賡。

恭和御製詣齋宮作元韻 十一月初二日

邇治覃敷秉兩宮，帝心誠敬格蒼穹。功成破竹寰區定，肅州報捷，關內一律肅清。世荷分茅錫賚豐。四月，蒙恩遣使册封親王、世襲罔替。常捧絲綸宣聖德，幸依帶礪翊皇躬。陽回預兆金穰歲，物阜民康萬福同。

甲戌二月二十四日扈蹕祇謁西陵出阜成門即事

曉烟漠漠柳絲絲，雲淡風輕日影遲。物態迎人都欲活，山容難畫始爲奇。芊緜細草鋪平

野，隱約深林映古祠。身在桑乾河畔路，夢魂早已向西馳。

渡盧溝橋

初日影搖紅，巍巍古鎮雄。城頭環白雉，石齒架雙虹。拱極重闐闕，破夢閒談：「議者謂盧溝鐵

輔咽喉，宜設兵防守，又須築城以衛兵。於是爲斗城，名拱北，南門曰永昌，北曰順治，創於崇禎丁丑。日下舊聞考：「拱北城，本朝更名拱極城，改永昌門曰威嚴。」盧溝兩岸風。波平長順軌，永定慰宸衷。畿輔安瀾志：盧溝橋一名廣利橋，在宛平

縣南三十里，跨盧溝河上。金明昌年間建，元明屢加修築。本朝康熙元年修，七年水溢，圯東北十二丈，重修，御製碑文，雍正、乾隆年間疊加修葺。永定河舊名盧溝河，即桑乾下流也，亦曰渾河。水流無定，衝決爲患，康熙三十七年賜名曰永定河。

過巨馬河

宋時險要記分明，巨拒同音互立名。宋史何繼筠傳：咸平二年，詔聽邊民越拒馬塞北市，何承矩上言曰：「緣

邊戰權自淘河至尼姑口，屈曲乃百餘里，此天險也。今聽公私貿易，則人馬交度，深非所宜。又河渠志：自邊吳泊至尼姑海口，綿亙七州軍，屈曲九百里，深不可以舟行，淺不可以徒涉，雖有勁兵，不能渡也。」蓋拒馬河於宋時最爲險要。水經：「巨馬河出代郡廣昌縣涑山。」鄭注：「即涑水也。」方輿紀要：「涑水源在廣昌縣南半里，東流合拒馬河，水源出七山。晉劉琨守此，以拒石勒，因名拒馬河。」又：「袁紹遣將崔巨業攻固安，不下，退還，公孫瓚擊之於巨馬水。」蓋明巨馬之名始見於此，亦未詳言其得名之故。至以拒敵得名，以巨爲拒，紀要以爲劉琨拒石勒，而廣昌縣志、霸州志又以爲楊六郎拒遼人，愈遠愈謬，皆不足信。寥廓天形垂野大，

高低山勢接雲平。烟光靄靄添嵐氣，風力蕭騷助水聲。本是昔年征戰地，即今阡陌盡耘耕。

涑水道中即景

屈曲古山窪，山居四五家。綠楊三月雨，紅杏滿村花。淺黛皺巒影，新青茁麥芽。招提遙望處，一徑入雲斜。

易州道中感懷

萬疊烟巒望若迷，四圍匝匝晚雲低。垂楊拂拂迎人面，新草茸茸沒馬蹏。冀野城孤臨廣陌，易州，禹貢冀州之域。安河橋畔護長隄。方輿紀要：白楊嶺在易州西北四十里，嶺多白楊樹。俗訛爲白羊。一統志：源泉水在易州西北，舊志在州西北十里，源出白羊嶺，由西轉東而南入易水。白楊水於乾隆二十六年濬治，賜名安河。哀鳴怕聽天邊雁，腸斷春風易水西。

扈蹕敬詣慕陵慕東陵隨入陵寢門行禮述哀恭紀

太行發脈鍾靈秀，佳氣龍葱護寶山。一統志：永寧山即秦寧山，在易州西五十里。乾隆元年八月，敕封爲永寧山，從祀地壇。山勢自太行來，巍峨聳拔，脈秀力豐，峻嶺崇山，遠拱於外，靈巖翠岫，環衛其間。一畿輔通志：秀若拱壁，簇若屯雲，考其濬洫，延袤千里，計所匯納，襟帶百川。易州志：乾坤聚秀之區，陰陽和會之所，洵爲上吉之壤。玉筍金城如拱衛，龍

蟠鳳翥勢迴環。空吟岵妃悲無極，追憶音容杳莫攀。今日激兒隨叩拜，椎心更慟舞衣斑。本年長子載澂十七歲，奉派扈蹕，並隨入暮陵，暮東陵殿門，敬謹隨從行禮。

大風吟

甲戌二月廿八日，扈蹕秋瀾村行宮。甫歇征鞍衣未解，四野忽忽來飄風。塵霾蔽天天黯淡，地軸震動雷靈輿。是時日影正當午，須臾昏暗迷西東。行幄撼搖思傾圮，飛沙揚礫排簾櫳。人聲馬聲嘈雜，旌旆迷離颺半空。信道春風狂似虎，飛廉肆虐專其雄。怒號叫吼勢益盛，肅然屏息心忡忡。去冬無雪春無雨，蒼生翹首望昊穹。昊穹應憫民疾苦，沛然膏澤仰天工。東作方興待耕耨，西成更冀卜年豐。綠野沾足慰農望，雨暘時若愜聖衷。

夏孟四日常雩大祀園丘前一日隨扈壇內齋宮喜雨恭紀敬依癸

西冬至前一日御製詩元韻

寅畏常存仰法宮，乘時鑿輅禮皇穹。薰風披拂羣生遂，甘雨優霑萬寶豐。光觀謙尊徵協吉，日昭乾惕羨持躬。一心一德微誠矢，況附星源福祿同。

甲戌秋日扈蹕南苑敬依道光癸未宣宗聖製行圍至團河行宮即

事元韻

春蒐秋獮總相宜，羽衛森嚴廣陌馳。風勁金商添颯爽，雲橫玉宇自逶遲。涼鷹臺畔縈青靄，飲鹿池邊漾碧漪。家法欽承時肄武，旌旗掩映鳳河湄。宸垣識略載：團河一支釀爲鳳河，其形如鳳，源在南苑中。

乙亥九月十八日辰刻穆宗毅皇帝梓宮由觀德殿孝哲毅皇后梓

宮由永思殿同時奉移東陵隆福寺行宮暫安殿恭理一切禮儀

敬謹送往仍隨扈軍機處入直

轉瞬光陰節序移，又逢露冷欲霜時。本月十一日寒露，二十六日霜降。天高夜月蒼涼映，野曠秋風慘淡吹。海溼山陬同愛戴，龍輶鳳翥擁幢麾。濡毫和淚悲難述，觀德西偏近永思。

二十一日奉移禮成二十二日几筵前大饗禮畢扈蹕恭謁定陵

行禮泣述

宛轉楓林淡著霜，蕭森氣釀十分涼。淒淒苦雨催黃葉，瑟瑟秋風下白楊。寶輅前年曾蒞
止，靈輿今日妥馨香。癸酉季春，曾扈從穆宗毅皇帝恭謁東陵。斷腸更有椎心淚，翹首陵山哭顯皇。

樞垣記略卷之二十五

詩文六

潘世恩詩十三首

甲午正月廿一日奉命入直樞廷翼日即蒙恩賜第恭紀

夙夜趨公敢計私，燕居早又荷鴻慈。庭留花木安排好，坐有琴書位置宜。人直近依天咫尺，退歸真覺日舒遲。巢林已慰鷦鷯願，況許朝陽借一枝。

八月二十六日蒙恩賜紫禁城內乘轎恭紀

紫禁森嚴漏未闌，趨朝特荷聖恩寬。榮叨策騎心猶壯，己丑十一月，蒙恩賜紫禁城內騎馬。詔許乘軒體即安。上界星辰真覺近，五更風雪不知寒。卻慙半載承三錫，本年二月，奉恩旨，御門免其人班，並免帶領引見。異數頻仍報稱難。

恩旨給扶恭紀

待漏晨趨拾級時，觀光咫尺敢倭遲。人誇腰脚年來健，自覺精神老漸衰。特遣朝臣頻問訊，親承天語許扶持。從今跬步期加慎，勉效馳驅報聖慈。

新正蒙恩晉加太傅銜賞用紫韁恭紀

迎年六出早占豐，獻歲祥雲耀碧空。天以麻徵昭聖德，帝敷闔澤逮臣工。拜恩春殿三元會，數典香山九老同。同日被恩者九人：世恩年八十，肅親王敬敏，貝勒綿德，大學士寶興，尚書保昌，阿勒清阿，李振祐，都察院左都御史成剛，都統中山，年皆七十以上。何幸幹材膺懋賞，矢將精白勵丹衷。

自愧衰庸蒲柳姿，每邀曲體荷恩私。得臻耄耋皆君賜，豈有涓埃答聖慈。寵晉上公慙燮理，輝分下乘勉驅馳。願賡天保升恆頌，仰和虞廷喜起詩。

八十生辰紀恩述懷詩八首

帝許延祺紀七旬，世恩七十生辰，蒙賞「熙載延祺」額，「翬亮宣猷襄密勿，靖共介福錫康彊」楹聯。十年今又拜温綸。衰遲已迫桑榆景，長養還滋雨露春。獻歲迎祥恩載渥，本年元旦，蒙晉加太傅，賞用紫韁。自天錫嘏命重申。門閭忽訝星雲燦，丹詔輝煌下紫宸。

休沐親承天語溫，奉面論二十日、二十二日毋庸進內。先期星使早臨門。璇題拜捧龍章煥，寶墨欽瞻鳳藻騫。斐几敷陳增璀璨，尚方瑰異錫便蕃。即看被體衣裳稱，安煥胥叨大造恩。

異數榮膺懋賞延，孫枝特荷寵恩偏。孫祖蔭蒙賞給舉人。鹿鳴遽預興賢列，蛾術方慙射策年。儘有功名磨鐵硯，莫忘世業守青氈。從茲魯鈍宜加勸，詩詠周行益勉旃。

銅龍曉闕問安回，用唐人句。詩句新成荷聖裁。正喜恩光天上至，又看麗藻日邊來。摘詞具仰搗謙吉，應教慙非大雅才。侍學頻年蒙獎勵，頽齡何幸得追陪。

記從通籍到蓬瀛，五十年來歲序更。八表光陰真迅速，三朝知遇總生成。和羹敢擬王曾詠，乾隆癸丑，蒙恩授修撰。絜膳欣陳李密情。嘉慶丙子，蒙恩准在籍侍養。綸閣超遷思日贊，道光癸巳，由吏部尚

書蒙恩超遷大學士，甲午入直樞廷。捫心何以答昇平。

年來稠疊主恩優，樗質頻邀體恤周。寵畀安輿榮策馬，道光癸卯，賞紫禁城乘轎，榮逾錫馬，益深感幸。

掖從中禁勝扶鳩。乙巳冬日，命南書房太監於進宮時扶掖。康莊敢說馳驅瘁，近年春巡，恩免隨扈。大典時虞隕

越羞。御門免入班，各衙門引見免帶領，坤寧宮吃肉免入班，經筵謝講後毋庸至文淵閣。如此矜全真破格，此生萬一

豈能酬。

芸窗世業本青箱，科第蟬聯被寵光。東閣簪毫輝棗萼，子曾沂，曾綬先後直內閣，曾綬以纂修玉牒賞加侍讀升銜。西清接武晉芝坊。世恩嘉慶戊午大考一等，由修撰洊升庶子。曾瑩道光丁未大考一等，由編修升庶子。碧

雞舊壤榮持節，世思嘉慶己未視學雲南，曾榮道光丙午簡放雲南正考官。仙蝶新篇紀奉常。曾璉丙午補太常寺卿
上：小草幸承膏澤渥，全家同祝壽無疆。

虞廷熙績懷承宣，黃髮深慙膂力愆。馬齒徒增羞戀棧，鴻慈未報忍歸田？同朝屈指無前輩，翰林前輩惟阮芸臺太傅子告在籍。共事和衷仗衆賢。惟矢靖共期匪懈，慎持晚節一心堅。

彭蘊章詩三十三首

香山靜宜園瀑直恭紀

九老當年佳宴開，乾隆時，舉香山九老宴，繪圖中禁，先曾祖尚書公與焉。五雲深處翠華來。蒼顏圖像留中禁，紫閣文章落上台。有御製詩，諸臣廣和。豹仗今隨還信宿，鳳池仍許共徘徊。詞臣榮遇懷先哲，先尚書直南齋四十年。承乏螭坳愧不才。

癸丑元旦上詣壽皇殿命隨同行禮恭紀

律轉青陽萬象新，焚香祇謁闕宮春。六飛翠罕來中禁，九拜瑤墀感從臣。孺慕未忘符舜孝，先型遠紹布堯仁。至誠昭格天垂鑒，貔虎南驅百獸馴。

正月二十三日蒙賜御筆其難其慎四字匾額敬賦一律以志榮幸

幾暇揮毫賜近臣，彩箋捧出墨痕新。艱難宏濟期安國，敬慎常存勉致身。喻到涉冰心戒懼，凜如執玉步遵循。深思一德篇中語，四字璇題誨爾諄。

晴後復雪春寒更甚退直偶成四首

雪深迷不辨西東，已脫貂裘更北風。盡道冰堅泥路滑，退朝莫漫控花驄。

掃盡春泥昇雪溝，唐句。長橋不見水東流。冰天一色渾無際，深鎖瓊宮十二樓。

呼酒圍爐夜未闌，紙窗風急燭花殘。遙憐今夕河間路，筆策聲中萬竈寒。

羽書千里馬蹄僵，謀騎聯鑣驛路長。聞道盧溝三尺雪，橐駝腫背送餼糧。

月初九日瀛臺入直御槍擊中野鴛賜軍機大臣恭紀

煙波深處水禽翔，聊試神機一發強。介弟行廚先拜賜，恭親王領班。近臣陪鼎許分嘗。大庖不滿春田後，珍膳猶頌太液旁。何日更隨南苑獵，三驅同看角弓張。

方略館謁留侯祠

泗上真人歌大風，運籌帷幄掃羣雄。報韓未遂推車志，輔漢終成躡足功。黃石授書謀逐鹿，赤松辟穀羨飛鴻。建儲聊借商山皓，脫屣榮名一笑中。

穀雨日入直瀛臺退朝泛舟至西苑門即事書懷

爛漫春光中，亭臺間花木。西苑罷朝參，行過虹橋曲。牆角丁香叢，茶火照人目。夾路菜花黃，沿隄楊柳綠。揚舲趁暖風，清波紋縵縠。參差碧藻流，出沒羣鳧浴。自從羽檄馳，憂憤額頻蹙。不知天地間，春意還繁縟。羣生有亨屯，造化終亭育。皇心保太和，剝極機將復。

上巳日隨扈西陵初六日隨駕恭謁慕陵禮成回至秋瀾恭紀

山陵修展謁，肅駕殷皇情。兩載事征戍，勞民役暫停。大禮詎久曠，感茲霜露零。蠲言勤鑾輅，畿西三日程。四陵次第謁，樞臣陪慕陵。成皇猶及事，攀髯歲月更。聖主躬孺慕，下馬動悲聲。羣僚皆愴惻，九叩淚縱橫。昨夜風揚沙，是時天朗晴。孝思驗昭格，胥蠻來神靈。念自橋山痛，五年勞甲兵。宵旰修主德，瘡痍恤民生。亨屯關世運，天道豈冥冥。泣顙在天佑，江漢殲長鯨。萬戶安耕鑿，重瞻海內平。

園居偶述三首

荆扉一閉忽三秋，野蔓枯藤滿地愁。掃徑恰逢梧葉落，披圖還羨竹林遊。

沈鳳塚爲余畫竹林六逸

圖。慣隨曉月趨深苑，閒送斜陽倚小樓。多感主人分廣廈，一枝仍許借淹留。 園分孔修師舊居之半，師今人直樞廷，仍許借居。

東籬佳會莫蹉跎，黃菊開時興若何。送酒無人酬令節，叩門有客賀登科。烽煙滿地名心淡，雨露一天恩澤多。白髮蕭蕭何所慕，百年身世付謳歌。

宗伯幽棲號似園，

麟梅谷大宗伯園名。當年歡會此傾樽。

壬子夏，梅谷招余偕祁春圃相國、邵又村少宰、穆

清軒光祿同飲於此。

裴卿挽粟猷彌壯，

又村旋以漕帥出都。疏傳歸田道更尊。

春圃相國因病致仕。三載屢驚

人物換，一堂依舊笑言溫。余與繼園少空同爲孔修師門下士，清軒少宰亦師舊屬。愧無籌國安民略，日與參

知細討論。

孔修師新拜參知之命。

十一月初五日漪瀾堂召對作

燈火虹橋曙色催，承光門外共徘徊。湖天一望冰如鏡，無復扁舟喚渡來。

侍從身依十二樓，初寒天氣賜珍裘。是日因賜裘道旁謝恩。可憐將士呼庚癸，挾纊何能遍九州。

二月十七日春雪初晴詣玉泉山靜明園曝直作兼懷壽陽相國城南

湖山一別幾春秋，扈蹕重來憶舊遊。春雪融泥花徑滑，水天開鏡溼雲收。巖前塔影迎眸聳，橋下泉聲入耳幽。遙憶城南風日美，知多清夢落滄洲。

恭和御製清漪園即事上巳前一日元韻

御園風景自清華，疊石幽深樹更嘉。檻外湖光新漲合，簷前山色淡雲遮。天回畿甸春千里，地接瀛洲水一涯。麥隴青青占歲稔，持盈還慮物情奢。

園居雨後

雷車輕碾阿香行，摩盪空中霹靂聲。驟雨已過雲脚斷，斜陽還照樹頭明。簷前乾鵲啼初歇，葉底新蟬噪不成。黃犬寄書歸未得，軟紅依舊蔽巖城。

借園八景

壬子春，假孔修師園寓居半載，今又居此一年矣。庭中有古柏、修篁、藥欄、藤架、牆纏薜荔、籬植黃花，疊石如山，小樓延月。春秋佳日，流覽怡情，因題曰借園，而系之以詩。

古柏

森森古柏後凋姿，歷盡冰霜勁節支。留得清陰消暑氣，薰風庭院午晴時。

叢竹

西窗叢竹景偏幽，謾謾清風滿徑秋。一枕蘧然莊夢醒，羲皇高臥不知愁。

藥欄

階前紅藥我新栽，不及陳根爛漫開。始悟十年期樹木，幾經雨露受滋培。

藤架

簾前枯藤花下垂，花開香色總相宜。盤拏老幹龍蛇伏，絡石穿林態崛奇。

荔牆

薛荔牆邊細雨收，空濛冷翠一庭秋。黃梅時節蠅螭畫，不似人間顧虎頭。

短籬

竹籬門對夕陽開，野草閒花滿地栽。苔徑不堪延俗客，太常仙蝶偶飛來。

疊石

瘦石玲瓏闢徑新，倪迂獅子出風塵。嶙峋縱比淮南小，五岳天涯結比鄰。

小樓

小樓高傍畫堂東，落日開簾面面風。最好清秋明月夜，千家燈火笛聲中。

八月二十九日奉敕恭題御筆求駿圖敬成七言古詩一章

燕山秋高苜蓿長，驊騮伏櫪思超驤。九重蒿目念吳楚，風塵千里弧矢張。覩茲神駿懷遠略，安得名將埽八荒。繪圖意在安天下，凜如朽索馭六馬。見蝗有詔恤羣黎，憂早命官巡四野。宵旰勤勞聖主心，霜蹄入廐豈從禽。早嗤赤水湟中產，何事瑤池域外尋。揮毫尺幅英姿壯，屹立閭闔依天仗。功成應向華山歸，羣空先自金臺訪。由來致治重求賢，騶虞官備風詩傳。果有王良能執轡，何勞祖述著先鞭。朝廷經緯兼文武，元戎十乘驂如舞。蓮葉千旗畫烏蛇，桃花萬騎驅貔虎。何時薄伐歸南仲，早奏膚公燕吉甫。年年西塞貢蒲萄，天閑十二揚玉鑣。凱旋還欲康侯錫，恩賚榮酬汗馬勞。

別借園

園林欲別增惆悵，不忘年來師弟情。綠野何能春久住，朱門每見主頻更。藤因緣樹高無際，藥爲移根掬不盈。賸有一雙仙蝶在，闌珊花事夢難成。

扇子湖觀荷二首

湖西未栽花，湖東香出水。一雨花氣銷，零落已如此。
我家荷花蕩，近在葑門外。何時泛芰簪，重訪釣游地。

散直口占三首

趨朝待漏夜披衣，退直青山街落暉。驛路軍書催不斷，揮毫人共暮鴉歸。
銅街爆竹送新聲，玉竦橋邊霽色澄。九十韶光還未半，南湖流水北湖冰。
吹到東風節物妍，湖隄柳色半含烟。眼中誰是無雙士，日暮青天響紙鳶。

樞垣記略卷之二十六

詩文七

寶璫詩三十四首

甲戌二月二十四日扈蹕晚宿黃新莊作

六飛臨蒞勢威雄，環衛森嚴禁鑿同。碧野萬燈星宿海，綠莎一路馬牛風。梨花夢雪噴香膩，行宮梨花盛開，大觀也。粦麥連雲祝歲豐。更有臨淮賢伯相，山川彈壓氣如虹。直督李少荃伯相率

地方官均隨扈。

房山早行

大防山翠鬱嵯峨，夙夜趨公響佩珂。四野人家春睡足，五更天氣曉寒多。飛仙自愛紅螺嶮，在上方山界。行旅爭誇白玉河。白玉塘水灌田，出玉塘米。指點上方渾不遠，片雲涼月滿烟蘿。

望石經山作

金經藏蘊奧，石洞闕遙深。古徑魁音梭，同莎。題草，山多是草，故名。靈風香樹林。石經刻竟，山吼樹生。王程多迫急，聖跡待追尋。迢遞雲山隔，時聞笙鶴音。

半壁山夜景

薄雨微雲釀早春，宵分景色極清新。依稀白水聞聲覺，隱約青山入夢頻。楊柳煙沈飛絮影，棠梨風捲落花塵。輕輿迅急征途暇，戲喚流鶯作比鄰。

秋瀾道中

無黨無偏遵道路，也如待漏百花中。衢尊久羨陶唐氏，畫錦仍思韓魏公。玉筍班清誰建白，金蓮炬美並搖紅。夾道籠燈並有竹火前導者。戴星出入懷寅亮，喜仰辰居勵匪躬。

詠召伯

芳草連天接薊門，召公餘烈至今存。千七百國幽并勁，三十六年師保尊。玉几受遺儕尚父，金臺養士有諸孫。彌綸政化孚南北，花發甘棠羨野村。

曉赴秋瀾

野雲四卷青茫茫，一鉤斜月昏鴉黃。五更虬箭蝦蟆長，聲聲似促人行裝。催歸有鳥啼垂楊，馬首胡弗瞻東方。九龍山色宵蒼涼，珠杓橫溢金精芒。安河之水即滄浪，濯足濯纓誰低昂？亦如叔度波汪洋，古今景慕中心藏。須臾旭日升扶桑，蒙翳盡掃開明光。山南山北紛紛莊，民物熙皞娛時康。迪麗臥虎通紅羊，此間世界真義皇。茅檐仰視飛雲翔，車馳馬驟行不遑。塵容應笑官程忙，秋瀾咫尺帷幄張，一甌佳茗思旗槍。夾路忽喜清芬揚，梨花杏花參差香。

辟穀洞

辟穀之洞真奇哉，此間奚事留侯來？豈因秦皇大索避居此，否則遊從赤松子。後世詭託難具論，漢土久非隆準諸子孫。所幸涿鹿近接壤，真迹尚有樓桑村。

塔岡懷古

突兀勢卓立，巨塔干青霄。藉問建者誰，云自隋皇朝。隋氏周懿威，幼主天元驕。詐力竊神器，禪讓沿譏嘲。獨孤雞鳴晨，阿麼鼠承祧。慘哉太子勇，宮禁煙雲銷。江南兵滅陳，海東威脅遼。但期志意滿，遑恤閭閻凋。云何開汴渠，殿脚螺雙描。頭顱漫自好，花月頻興妖。構此

宰堵波，妄思天福邀。下糾蟠石螭，上俯凌風鷗。法象詎呵護，令狐旋紛囂。復仇僭化及，易代來神堯。尉遲士桓桓，重此規岩堯。迄今千百年，仍仰工鑄雕。高岡鬱起伏，范水清迢遙。我來凝望之，赤城飛霞標。檐鈴金玲瓏，東風時動搖。惜無佛圖澄，吉語傳囑刁。

釣魚臺

釣臺饒逸趣，懷古思悠哉。嚴陵高隱名，磻溪王佐才。淮陰亦釣徒，功狗功人猜。西岐有聖王，靈沼兼靈臺。茲境國門西，經過頻徘徊。徘徊意未已，清風天上來。

八月二十六日扈蹕南苑恭紀

記曾蘭省隨雲罕，彈指光陰廿九年。供職禮曹，於道光二十六年隨扈駐此。今日屬車陪豹尾，古人羽獵炳鸞箋。秋風疎柳黃篩地，野潦蘋花白滿川。劉阮重來誰比似，笑從宦海悟神仙。

瞻神機營壁壘有作

名王簡閱振英聲，不數周家細柳營。地勢恢奇雄紫塞，日光焜耀閃紅旌。金符令肅囂塵寂，玉宇秋高勁氣橫。我亦濫叨都統列，本兵未敢侈談兵。新調兵部尚書。

赴團河途中作

我欲閒從麋鹿遊，應官忽得趣清幽。野花繡地平如掌，遠樹參天爽入眸。職業戎兵宜校獵，襟期疏朗況逢秋。聖朝湯網殊寬大，寄語虞人莫別搜。本年有免勾恩旨。

團河五律

官掖涵神淵，虛靈象法天。一灣珠內蘊，萬古月常圓。獨抱中和氣，真成太極泉。鳳形河衍派，恩澤徧農田。

撒圍恭紀

星駟肅天威，蒼茫大合圍。雷霆千騎奮，毛血半空飛。地挾風雲壯，人誇雉兔肥。長楊誰獻賦，西漢溯芳徽。

拜賜獵塵一肩紀恩恭賦

八駿雲飛七寶裝，星弧開處殲天狼。賜脰典盛尊鄒邑，推食恩醴比漢皇。愧乏遠謀呈紫闥，虛叨佳味炙黃羊。周京魚藻風規古，擬進璇宮萬壽觴。

季秋口占

露砌蛩吟細，風枝鶴夢涼。天時催九月，人意喜重陽。錦纈林楓赤，金鈴野菊黃。憑高無限意，雲水寫清蒼。

南苑聯吟題句

作者爲潘伯寅侍郎、黃孝侯司寇、徐頌閣宮庶、孫子受侍讀、歐陽用甫宮贊。

宿列文昌翊紫微，編開錦繡字珠璣。蓬萊共羨羣龍戴，藻采爭看五鳳飛。紅葉白雲新畫境，高山流水古琴徽。盛時合擬長楊賦，講武端應諫獵稀。

宮門御試鵠射恭紀

聖主臨軒猛士豪，袞黃翎翠繡弓弰。明蟾重暈月輪滿，老鶴一聲天宇高。金僕姑神窺宛轉，錦盤陀賜慰賢勞。中皆已鵠蒙恩渥，無復馮唐歎二毛。

由團河赴都途中作

鳳闕望岩峩，言旋覺路遙。村氓生似鹿，溪柳卧成橋。即景須臾暇，披襟壘塊銷。菊花新釀熟，小飲羨漁樵。

中書省紀事四絕句

中宵雨霽嫩涼新，盡滌東華十丈塵。莫訝金門車馬靜，聖皇秋獮正時巡。
萬戶千門曙色開，薇垣師濟列羣材。一肩黃袱隨飛騎，笑指硃封密本來。
監射名兼較射名，分司侍御鐵鉦聲。黃封仍鑄雲綾匣，飛將星馳繳御營。
熙天耀日說黃麻，軍國平章自古誇。故事奉行今我是，閒庭笑煞紫薇花。

新衙門七律

鑾輿計日鳳城歸，雨足郊原風力微。斜照一林秋樹瘦，清霜十畝晚菘肥。山窺短堞銀雲護，河繞新宮玉帶圍。最喜南齋諸雅什，珠光劍氣溢輝輝。

謹次恭邸步宣宗聖製行圍至團河行營即事元韻

靈囿寬平獵事宜，軒皇曾此陣雲馳。廣歌雄傑漢高帝，環衛驍騰唐尉遲。藏鹿何人恬夢寐，懸狙有客詠漣漪。神孫秋獮親藩扈，一派璇源證水湄。

乙亥九月十八日扈蹕潞河途中哀感

秋風秋樹淡斜陽，噩夢無端攪混茫。碧漢龍升珠濺淚，丹山鳳逝玉韜光。媯皇鍊石天容慘，蜀帝啼烟野氣涼。歎息蓬萊水清淺，十三年事感滄桑。

夜赴白澗

燈火走間關，途長心自閒。霜清秋寫月，樹遠夜疑山。幸得川原曠，渾忘涉歷艱。暖紅欣日出，道路盡歡顏。

葛山口占

綜錯碧瑤簪，豐臺瑞氣含。云何山有木，翻取葛之覃。藎化魔氛靜，龍興佛果參。清書聞梵唄，拜手學和南。

西峯口作

涼颿催晚節，落葉滿平原。忽入西峯口，猶看衆綠繁。松蹊驚客竄，苹鹿飲流喧。最愛巖頭菊，蕭疏澹不言。

音得密七律用老杜藍田崔氏莊韻

碧巘丹楓棟宇寬，迎鑾父老雜悲歡。黃花似近王官谷，白氎時逢隱士冠。風葉四山秋入夢，雲花萬頃曉生寒。低徊不忍輕言別，豈是貪將景物看。

俯仰乾坤意境寬，秋成萬寶兆民歡。古聞狗監司魚鑰，今或蟬綏藉范冠。市地峯巒欣雨潤，人雲鴻雁戒霜寒。道旁無限青青麥，更爲蒼生著眼看。

過薊州作

秋深芳草尚萋萋，一路清風信馬蹄。洵水碧繁燕樹外，漁山翠點薊門西。道如軒帝猶延訪，政有張君共品題。底事寺偏名獨樂，菩提無語但眉低。

即事

詩在奚囊酒在盆，夕陽鴉點碧天痕。蕭疏一幅倪迂畫，黃葉西風白澗村。

林壽圖詩七首

巡防夜直

幕府秋高夜氣清，牙旗鼓角靜風聲。薄寒借酒銷殘蠟，細火烹茶送短更。但使將軍寬揖客，未妨老卒伴書生。看星擬挾威弧矢，料識天狼不敢明。

病中夢登拱宸樓

北斗闌干接上層，病魂蓬島忽飛騰。登樓秋老半山月，近水星明初夜燈。人影破窗呼欲出，蟲聲落葉靜相響。遊仙一枕吾堪慰，苦被鷓鴣喚日升。

福州郡館上元燈事甚盛余以園直未赴

良夕此孤飲，青天低玉繩。月圓最初夜，風翦乍晴燈。盛事懷鄉社，微官愧友朋。何人解相念，檐鐵聽敲冰。

二月十五日退直赴繹萱大令夜飲

蒙脫鶻裘換綠醪，禁鐘正值散官曹。望中樓閣月輪滿，春半鶯花酒價高。彭澤得錢貧且

飲，孟公投轄氣仍豪。不須靜夜驚吹角，聽撥尊前鳳尾槽。

七峯別墅夜雪用定甫韻

明滅春光水閣燈，雪窗中酒記吾曾。煙搖苑樹又今夕，星黯湖橋何處罨。三島龍吟沈畫角，五更鷓鴣夢警丹稜。

丹稜，地名。閉門敢學袁安臥，擬踏瓊瑤向曉暎。

櫛櫛銀雲作雨篩，夢回冷火澹虛帷。那無竹舞東方白，應有梅生南向枝。望澤早知天與歲，傷痍誰爲國求醫。登樓王粲紛多感，共撚寒髭喚借鴟。

淀園寓廬獨定甫湖樓有柳一株春來忽枯喜可望西山也復用韻

邀定甫同作

朝回螻蟻穴自封，蜜房各退成懶蜂。斜陽坐數宮鴉紅，喜君樓有湖山供。憶昨秋風吹亂蓬，却思刻看蓬萊峯，凭闌縮手無斧工。不知春到虹橋東，誰家青掃長眉濃。獨刪繁葉出老幹，洗伐功與詩人同。幾年韶釋變頽翁，薄植或怨非天鍾。豈知豁眼去塵障，一笑乍與巖靈逢。看君拄笏當晴空，詩得山骨譏肉豐。我欲折枝作馬箠，出門還謝羸駘慵。

梁景先詩二首

赴淀園直途中微雪用東坡宿柏仙庵韻

一路緇塵換素羹，乾坤逼曉氣逾清。袖攜竹葉雲爲液，苦寒，挈瓶酒車中。車碾梅花玉有聲。詩境高寒容白戰，天心仁愛爲春耕。時方祈雪。登樓明日尋王粲，同直王少鶴農部寓拱宸樓。放眼西山萬里晴。

題彭詠莪相國樞垣趨直圖

我作水曹郎，摳衣畫諾趨公堂。公爲樞密使，橐筆從公深嚴地。嵩華崔巍黃河深，光耀久依韓太尉。披圖載蒼舊須眉，七葉金貂劇華貴。爾時司膳光祿卿，鹽梅便調傅說羹。圖作於任光祿卿時。釣龍臺畔藥籠滿，蹲鳳池頭珂佩清。使闕差旋，入直軍機。霜晨月夕歷寒暑，敕賜宮袍賚燕許。乙卯元日特賜蟒袍。捷書中夜馳未央，御燭分輝照蓮炬。東南烽火今八秋，聖主宵旰公塵憂。恩詔口宣蒼黎舞，邊機指畫帷幄籌。即看海宇清塵氛，明堂飲至策元勳。進賢冠在凌煙閣，天子爲召曹將軍。畫師爲沈鳳屏供奉。

王拯詩二十五首

繡山屬題張詩舲撫軍載鵝圖

撫軍直樞廷日，扈從木蘭，有饋鵝者而載以駝，常被至尊顧笑，嗣是敷歷所至，鵝必隨焉。繡山爲之繪圖作記，代徵題詠。

烏墩疾騎如風過，鶴婁後載飛龍馱。鷓鴣者倡相應圖，屬車偶矚天顏和。山陰故事新淮汴，圖畫流風尚如見。我亦鑾坡許載毫，軍聲夢冷西池宴。

曉直

曙鐘初動萬鴉鳴，禁樹龍蔥帶月明。金爵煙輕疑夢繞，玉階霜重有人行。菰蒲夜色迷江海，楊柳春風想旆鉦。擬躡松喬身漸老，夜爐寒擁一燈清。

夜直

承明簪橐問何如，曲院幽房好客居。殿角槐風春樹暗，觚棱松月夜窗虛。淋漓詔草還飛羽，局促風簾屢廢書。襜被宵來眠未得，五更霜氣似穹廬。

歐陽文忠公生日林子穎叔移奉苑廬舊縣公像於家同人即席分

韻得顏字

樞軸曾參二府間，從容文采照人寰。一時聞譽兼諸老，千載風流想盛顏。常愧官寮棲懶漫，祇餘香火伴高閑。插花起舞公應在，休問琅琊何處山。

六月七日雨後曉直承光殿作

東西池水跨長虹，水殿凌霄翠堞中。萬柄荷香迎御仗，千年松蓋駐靈蹤。殿前龍武新歸節，海畔蓮華盡洗空。何日酒泉分玉甕，簪毫一賦罷南戎。

拱宸樓絕句

在圓明園軍機直廬七峰別墅中

小樓一角護垂楊，攜得秋風襖被涼。不信人間是天上，樓前銀漢接紅牆。
湖海銷沈鬢欲絲，此間來較十年遲。午鐘了卻官家事，惟有西山對展眉。
屈指荷衣上塾年，樓中題字故依然。風流祇見雞羣鶴，絳闕彤牙一世仙。
妙筆興宗好屬文，幾人惆悵惜離羣。九重依舊巢痕在，燈火青熒獨夜分。

穎叔曉直清漪園歸賦贈

積雪神皋路，仙郎走馬歸。迴風歛絮帽，飛霰上朝衣。白鶴尋雙表，園有耶律丞相墓祠。青霓看一圍。內人稱三山之幸爲外圍。雲屏毋乃恨，錯夢到金微。

雨後扈直清漪園謁元耶律文正公墓祠

鬱鬱瓮山麓，蕭然孰祠墓。修治傍宮苑，磊落想皇度。宿雨積高原，朝煙靄庭樹。虛堂神鬼赫，遺象冠裳塑。緬懷耶律公，草昧適天數。倉皇昔元代，法制僅匱具。當時茲管葛，餘事猶詞賦。髻乎故絕倫，姚樞趙復實友助。我昔百泉遊，馨香拜洲步。頗聞梅溪勝，咫尺蘇門路。如何虛卜築，死瘞邱山處。迺知賢者心，七尺徇所遇。鄉閭重子孫，時節守霜露。縱能金盃祕，那得銅槃固。豹尾幸簪隨，螭頭起瞻慕。餘生畏溝瀆，何處青山渡。

淀廬六詠

七小石

天上北斗星，何年化爲石。敏之不能言，煮亦不可食。惟應天河畔，坐對天孫織。

有嘉樹軒

將軍何時去，大樹已飄零。我來青天月，萬里悵青冥。飽飯黃昏後，樵歌起遠汀。

井屋

井冽汲常衆，井渾淘始難。年時居井眉，誰識井苦甘。復恐雨時塌，秋蛩號夜闌。

拱宸樓

朝直君門趨，暮直君門宿。君門嚴九重，只在湖山曲。樓枕明月夜，清景耐幽獨。

歐齋

我懷湖文字，所學又空疎。不期醉翁醉，亦在承明廬。欲乞先生筆，焚香幾斂裾。

湖陰西舫

湖陽車馬囂，湖陰好獨處。雖無畫舫遊，恰有牽船住。高樹落清陰，鼓舷時對語。

拱宸樓下一柳忽萎穎叔有詩三疊前韻

樓陰一角春煙封，依樓芳樹不留蜂。晨朝聊隔飛塵紅，吹絮吹花如弗供。昨秋零落先蒿蓬，爽氣頓豁青瑤峯，眼前得失知誰工。春風放綠湖西東，樓枕不復纖萋濃。一般臨水足生意，咫尺榮枯胡異同。樓居黯觸香山翁，散朝駱馬騎龍鍾。焚香閉閣獨惆悵，曾記絲綸闕下逢。神

君色相原虛空，阿誰含嬌悽水豐。黃昏獨坐自灑掃，我老西山眉黛慵。

奉題詠莪樞相出示樞垣趨直圖往爲光祿少卿時作也圖有記乃

典學閩中作

金蓮學士舊聲名，青紫班頭早列卿。今日璣衡調玉燭，一星龍尾特分明。

緋衣先插侍中貂，五夜金門最早朝。猶有昇平傳故事，尚方珍寶問勤勞。

待捷甘泉夜嚮晨，燈簾重展畫圖新。春風第一螭頭影，曾夢觚稜向海濱。

慄慄清霜曳玉珂，槐衙風景近如何。樓桃笑倚詩情在，日日西山爽氣多。
從圖直廬，所居爲拱宸

樓，蒙公惠贈楹帖，有「山翠滿窗人倚樓」之句。

歐齋夜讀歐詩有作

一誦明妃曲，古音世所稀。紛紛顛倒耳目事，何用萬里夷狄爲。再讀平戎操，我心更悽惻。當時有事獨無用，有策胡爲匿不出？滁山高高，滁水湯湯，琅琊尺幅懸中堂。翁時年廬四十強，一麾乃在山水鄉，巍峩節概雄文章。我今年亦踰強仕，位業蕭然媿當世。多生文字只情溺，二頃桑麻問誰置？憶昔單車諭蜀行，相如作檄悔論兵。秋風灞岸重迴馬，壯士有懷空請纓。門前

花葉宮湖滿，日夕香風清露澣。五年金馬日棲遲，抱葉寒蟬意蕭散。秋聲夜起湖陰曲，一炷鑪香還夜讀。何當歸買訾洲田，鶉鷄聲中閒叱犢。

直廬待雪未成奉懷穎叔侍御新自樞垣擢臺諫也

晨朝喜見同雲合，日暮空愁集霰飛。翠袖許教千喚出，紅巾還解十重圍。幾年袂被親同舍，今夕篝燈獨掩扉。驄馬街頭行步好，空林孤鶴亂鴉歸。

直廬獨夜

掖廬如水傍層霄，獵獵霜風送晚潮。孤吏守窗人寂寞，亂鴉翻樹語啁啾。坐看涼月移階影，問似空山臥擔樵。飽食官廚行負手，料應雙鬢日凋蕭。

樞垣記略卷之二十七

雜記一

國朝武功赫濯，軍令嚴明，四征不庭，無不恪承謨略。初置議政大臣，以參承軍事籌畫。自雍正初年以來，復設辦理軍機事務處，凡當命將出師征勦情形，皆令以郵函直達。聖神燭照，洞悉機宜，軍機大臣承旨書宣，帥臣等仰憑授算，所至悉奏膚公。兵部之職，不過稽覈額籍，考察員弁而已。欽定歷代職官表。

欽定歷代職官表分目悉準今制，凡長貳僚屬具列焉，明綱紀也。其兼官無正員而所掌綦重，如軍機處之類，亦別有專表，崇職守也。四庫全書提要。

謹按：今武英殿本歷代職官表無軍機處一門，謹附識於此，以俟再考。

軍機處本內閣之分局。國初承前明舊制，機務出納悉關內閣，其軍事付議政王大臣議奏。康熙中，諭旨或命南書房翰林撰擬，是時南書房最爲親切地，如唐翰林學士掌內制。雍正年間，用兵西北，以內閣在太和門外，僂直者多，慮漏洩事機，始設軍需房於隆宗門內，選內閣中書之謹密者入直繕寫，後名軍機處。地近宮庭，便於宣召。爲軍機大臣者，皆親臣重臣，於是承旨出

政，皆在於此矣。直廬初僅板屋數間，乾隆初年始改建瓦屋。然擬旨猶軍機大臣之事。先是，雍正年間，皆張文和公爲之，後文和公以汪文端公長於文學，特薦入，以代其勞。金川用兵時，皆文端筆也。國書則有舒文襄公、大司馬班公、蒙古文則有理藩院納公，皆任屬草之役。迨傅文忠公領揆席，滿司員欲藉爲見才營進地，文忠始稍假之，其始不過短幅片紙，後則無一非司員所撰矣。文端見滿司員如此，而漢文猶必自己出，嫌于攬持，乃亦聽司員代擬。相沿日久，遂爲軍機司員之專職，雖上亦知司員所爲。其司員亦不必皆由內閣，凡部院之能事者皆得入，而員數且數倍于昔。此軍機前後不同之故事也。舊曝雜記。

軍機處有廷寄。凡機事慮漏泄不便發抄者，則軍機大臣面承後，撰擬進呈。發出即封入紙函，用辦理軍機處銀印鈐之，交兵部加封發驛馳遞。其遲速皆由軍機司員判明於函外，曰馬上飛遞者，不過日行三百里，有緊急則另判日行里數，或四五百里，或六百里，並有六百里加緊者。即此一事，已爲前代所未有。機事必須發而後由部行文，則已傳播人口，且驛遞遲緩，探事者可便捷足先驛遞而到，自有廷寄之例，始密且速矣。此例自雍正年間始，其格式乃張文和所奏定也。軍機印存大內，需用則請出，用畢即繳進。自用兵以來，軍報旁午，日或數起，難於屢請屢繳，故每請印出則鈐就封函數百，以便隨時取用。而封函無專員收掌，不免狼籍遺失，宜專派一員登記月日數目，庶更爲慎重也。同上。

軍機撰擬諭旨，向例撰定後，於次日進呈。自西陲用兵，軍報至輒遞入，所述者亦隨撰隨進。或遇巡幸在途，馬上降旨，傅文忠面奉後，使軍機司員歇馬撰繕，馳至頓宿之行營進奏，原不爲遲也。然此營至彼營七八十里，必半日方到，而兩營之間尚有一尖營，以備聖駕中途稍憩者，國語謂之烏墩。司員欲誇捷，遂倉猝繕就，急飛馳至烏墩進奏，名曰趕烏墩。斯固敏速集事，然限於晷刻，究不能曲盡事理，每煩御筆改定云。同上。

上每晨起必以卯刻，長夏時天已向明，至冬月纔五更也。時同直軍機者十餘人，每夕留一人宿直舍。又恐詰朝猝事，非一人所能了，則每日輪一人早入相助，謂之早班，率以五更入。平時不知聖躬起居，自十二月二十四日以後，上自寢宮出，每過一門，必鳴爆竹一聲。余輩在直舍遙聞爆竹聲，自遠漸近，則知聖駕已至乾清宮，計是時尚須然燭寸許始天明也。余輩十餘人，閱五六日輪一早班，已覺勞苦，孰知上日日如此。然此猶尋常無事時耳。當西陲用兵，有軍報至，雖夜半亦必親覽，趣召軍機大臣，指示機宜，動千百言。余時擬撰，自起草至作楷進呈，或需一二時，上猶披衣待也。同上。

上每日膳後，閱中外奏摺畢，以次召見諸大臣，最後見軍機大臣訖，吏、兵等部各以其員引見。見畢，日加巳，皆燕閒時矣。或作詩，或作畫，而詩爲常課，日必數首，皆用硃筆作草，令內監持出付軍機大臣之有文學者，用摺紙楷書之，謂之詩片。遇有引用故事而御筆令注之者，則諸

大臣歸，遍繙書籍，或數日始得，有終不得者，上亦弗怪也。余扈從木蘭時，讀御製兩獵詩，有「著製」二字，一時不知所出，後始悟出於左傳齊陳成子帥師救鄭篇「依製，杖戈」注：「製，雨衣也。」又用兵時寄信有奉諭旨硃筆增出「埋根首進」四字，亦不解所謂。後閱後漢書馬融傳始得之，謂決計進兵也。聖學淵博如此，豈文學諸臣所能仰副萬一哉？余直軍機時，見詩片乃汪文端、劉文正所書，其後劉文定繼之。由詩片抄入詩本，則內監之職。迨于文襄供奉，則並詩本亦手自抄寫矣。同上。

軍機大臣同進見，自傅文忠公始。上初年惟訥親一人承旨，訥公能強記而不甚通文義，每傳一旨，令汪文端代擬。訥公惟恐不得當，輒令再撰，有屢易而仍用初稿者，一稿甫定，又傳一旨，改易亦如之。文端頗苦之，然不敢較也。時傅文忠在旁竊不平。迨平定、金川歸，首揆席，則自陳不能多識，恐有遺忘，乞令軍機大臣同進見，於是遂爲例。諸臣既感和衷之雅，而文忠實有稍釋獨記之勞。然上眷倚有加，每日晚膳後閱內閣本章畢，有所商榷，又獨召文忠進見，時謂之「晚面」云。同上。

謹按：道光二年夏，松湘、浦太宰緣事出直，文秋潭、大司空出差，黃左田、大司農病假，曹儷、笙相國遂獨對者卅月，亦異數也。

乾隆六年冬，劉統勳以左都御史奏言：「尚書公訥親一人之身，兼理數處，出入禁闈，嚮用方

隆。屬官既奔走恐後，同僚亦避其鋒鏑，部中議覆事件，或展轉駁詰，或過目不留。出一言而勢在必行，定一稿而限逾積月。任事過銳，處事過嚴，殆非懷謙集益、推賢讓能之道。宜加訓示，俾知省改。其所管事務，量行酌減，免曠廢之虞，收贊襄之益。」又言：「大學士張廷玉子姓宗族及其姻黨姚氏，占仕籍者至數十人。此盈滿之候，而傾覆之機所伏。宜量加裁抑，三年內停其遷轉，以保全而成就之。」旨下部查議，並訓飭訥親，如所請。測海集。

往時，軍機大臣罕有與督撫外吏相接者。前輩嘗言張文和公在雍正年間最承寵眷，然門無竿牘，餽禮有過百金者輒卻之。訥親當今上初年，亦最蒙眷遇，然其人雖苛刻而門庭峻絕，無有能干以私者。余人軍機已不及見二公，時傳文忠爲首揆，頗和易近情矣。然外吏莫能登其門，督撫皆平交，不恃爲奧援也。余在汪文端第，凡書牘多爲作答，見湖撫陳文恭伴函不過僮錦二端，閩撫潘敏惠爲公同年，餽節亦不過葛紗而已，至軍機司員，更無有過而問者。閩督楊某被劾入京，人各送幣毳數事，值三十餘金，顧北墅雲入直，詫爲異事，謂生平未嘗見此重餽也。王漱田日杏所識外吏稍多，扈從南巡，途次間有贈遺，歸裝剩百餘金，過端午節，充然有餘，輒沾沾誇於同列。是時風氣如此。簞曝雜記。

軍機章京非特不當與外吏接，即在京都院官亦少往還。余初入，見前輩馬少京兆燦正襟危坐，有部院官立階前，輒拒之曰：「此機密地，非公等所宜至也。」同直中有與部院官交語者，更面

斥不少假，被斥者不敢置一詞云。同上。

鄂文端公自西路經略歸，仍直軍機處，上命戶部尚書海望爲治第，凡什器必具。已報齊矣，命昇堂上几，視之，以爲竊敗。召海望切責，海望叩首請易乃止。聞府中無園圃，又命以藩邸小紅橋園賜公爲別業，而中分其半爲軍機房。小倉山房文集。

癸丑殿試後三日，憲皇帝御懋勤殿閱卷，將原擬第三卷改第一卷，第五卷改第三卷。及啓彌封，則第一卷係會元陳倓，第三卷則張若靄也。上大喜。時廷玉在直廬辦事，遣內侍諭曰：「爾子張若靄取中探花矣，特告大學士知之。」廷玉驚懼失措，免冠叩首，懇辭數四，內侍轉奏，未蒙俞允。復奏請面見啓事，仍免冠叩首，繼以泣下。上憐其愚忱，乃命改爲二甲第一名。嗣引見新進士，若靄得照榜眼探花例，一體授翰林院編修。次日又奉旨：「在軍機房行走，隨伊父教導。」若靄辨明而入，及暮而歸，抄錄諭旨，收貯檔案，頗稱勤慎。其非交辦之事，廷玉固不言，若靄亦不敢問也。甲寅秋，軍機大臣入見，各賜洋漆匣端硯一方，又特賜若靄一研。又顧諸大臣曰：「張若靄品量好，朕甚嘉之。」是冬御書「福」字，以次面賜廷臣，最後至若靄，上大笑曰：「今日乃寫『福』字第一日也，汝父得第一幅，汝得最後一幅，無意中有此恰好事，豈非吉祥之徵乎？」聖心之屬望如此。澄懷園集。

畢誼字元復，婁縣人，寄籍天津。康熙五十七年進士，由咸安宮教習授內閣中書。乾隆元

年設總理事務處，滿、漢四人入直，誼與焉。數議國家大典禮及大政事，淹雅精確，政府毘倚之。在臺垣前後章奏二十餘上，皆洞中機要，鄂文端爾泰嘗論當世人才，「畢某奏議，今之陸敬輿也」。在軍機多年，謹慎練達，號稱職。金川之役，傅忠勇恆欲奏授參贊，以年老辭。出爲鳳陽道，頗著聲績。以事鐫級。事白，以主事銜充平定金川方略館纂修。松江府志。

福州林青圃先生名枝春，以中書選直軍機處。素工書法，敏捷無訛，文詞尤風發泉湧。時值世廟升遐，軍機房諸事填委，先生目瞶手胝，肆應曲當。遇一切大典禮有不可須臾緩者，閣臣必以相屬曰非某某未易猝辦，一時有能手、神手之譽。踰年遂登鼎甲，爲名翰林。釣遊叢話。

胡寶瑤初名金蘭，字泰舒，始自歙縣遷於婁縣。生有神兆，資稟異人。雍正元年舉於鄉。乾隆二年，試授內閣中書，大學士鄂爾泰選直軍機處。六年秋，大學士查郎阿、兵部侍郎阿里衮奉命相度奉天三省地形，請以同行。時適隨駕校獵，即由木蘭徧歷諸部，至盛京，過吉林，渡松花江，轉至黑龍江，再轉至寧古塔，又遍閱諸邊，及春而還。共二萬二千餘里，橫穿側出，於冰霜風雪中覽其形勝，辨其土宜，自以爲極域外之大觀也。會舉御史，查郎阿疏名以上，時已遷內閣侍讀。旋授福建道御史，歷遷順天府丞。十三年，王師勦金川，大學士傅恆爲經略，以寶瑤從行。日馳三百餘里，剋期告捷，寶瑤贊畫功居多。春融堂集。

方恪敏公祖若父，皆以文字之累謫黑龍江。公時尚少，歲往來塞外，以營菽水之奉奔走南

北，徒步或數百里。數年，祖、考皆沒，公益困，然於其間厲志勤學問，徧知天下利病、人情風俗，所當設施，遂成爲巨才矣。雍正十年，平郡王福彭征準噶爾，即奏爲書記，賜中書銜以往。乾隆初還京，入軍機處，累遷吏部郎中。出爲直隸清河道。十四年，遂授直隸總督。惜抱軒記。

謹按：方恪敏公父子皆名臣，其初皆由樞曹起家，後進仰之如山斗。今圓明園滿章京直房壁間有恪敏墨蹟一紙，閱八九十年，尚珍護如新也。又按：我朝以樞曹爲華選，漢章京之以通才碩學爲近臣所薦引，尤屬省署殊榮。其有世家貴胄絳冕相聯，與夫初步郎曹旋躋顯座者，在滿章京中指不勝屈，漢人則什伯之一二矣。綜核九十年中可數者，如父子同入軍機則有蔣炳，子熊昌；方觀承，子維甸；袁守侗，子煦；梁國治，子承福；孫士毅，子衡；趙文哲，子秉淵；龔禔身，子麗正。兄弟同入軍機則有劉秉恬，弟秉愷；陳輝祖，弟繩祖；金雲槐，弟榜；洪朴，弟梧；盛惇崇，弟惇大。先爲章京後爲大臣者則袁守侗、孫士毅、梁國治、章煦，皆游陞卿貳，出直復由部院大臣除授。吳熊光、戴衢亨、盧蔭溥則以章京歷兼卿列以至大臣，未嘗一日離直者也。

程燾字九峯，號雲軒。乾隆戊午舉於鄉試。補中書舍人，派軍機處行走。蜀有軍旅事，公隨經略傅公往，以功擢兵部武選司主事。轉員外，薦御史，充方略館纂修官。回部用兵，以素嫻軍務，授洮岷道。歷升湖北巡撫，左遷太僕寺卿，再入軍機。扈從木蘭，得疾告歸。

兩浙輶軒錄。

程公以戊午舉人補中書，軍機處行走。遷武選司主事，以御史用，出爲甘肅洮岷道，奏母老，改江南驛鹽道。歷官至陝西巡撫。湖北翦辮獄起，降江西布政使。入京補太僕寺卿，以病免。公性樸直，粵曳任氣，有所懷，雖權貴前必達其意。任兵部，事繁，誤軍機處僂直之期，傅忠勇公謂人曰：「九峰久不來，想戀兵部耶？」如彼處樂，可不必再來軍機。」公聞之，怫然曰：「兵部、軍機，皆國家事，相公不當分畛域之見。」程燾才拙，僅能料簡一處，無分身法。」即遣人往軍機處取直宿行李。忠勇公笑曰：「人言九峰戀，九峰又戀耶！然其言甚正，曷爲我婉留之。」同事者再三云，公始往。公所任事，專務先難。從傅忠勇公平金川，從大司馬舒公赫德觀兵滇、黔，再從陝甘總督黃公廷桂平定伊犁。經由葉爾羌、阿克蘇地方，繩行沙度二萬餘里，心計手畫，不知渴饑，諸大臣倚賴甚重，而上亦因是深知公。小倉山房文集。

曹錫寶字鴻書。

乾隆六年順天舉人。試中書，在軍機裏行，與同直武進莊培因齊名。松江府志。

上海曹劍亭侍御由軍機章京觀察山右，鑄級歸。復在四庫書館效力考證，黃籤成，議敘。

與王介子方伯皆以國子司業候補，未得缺，遂官御史。以劾和坤家人劉全見風節焉。梧門詩話。

諸重光以舉人考授中書，直軍機，受知於傅文忠。時王師進討伊犁，繼平回部，軍書旁午，

重光晝夜入直，傳宣調發，大臣倚若左右手。兩浙輶軒錄。

申君笏山，以乾隆七年考授中書，九年在軍機處行走。歷官至副都御史，仍直軍機處。凡三十餘年中，更戡金川，討準夷，平定回部，軍書旁午，日不暇給，君帶星而入，比夜而歸，爲聖主所深知，宰臣所倚任，與胡巡撫寶瓌、蔣侍郎炳同。至於奉命起草，每奏進必當上意，政事填委，手批口授，皆能明晰曉暢，洞中機要，則二君或不逮焉。春融堂集。

汪文端公於乾隆十一年以刑部尚書兼署都察院左都御史，旋入直軍機處。丁卯、戊辰之間，金川方用兵，羽書旁午，恭承睿謨廣運，燭照萬里之外。指授方略，日數千百言，文端視草，援筆立就，無不當上意。松泉文集。

陸朗夫風儀秀整，靜氣迎人。在樞垣倬直，至於日晡猶不退，猝有急務，立辦。以故大學士傅文忠公屢薦公，上亦知公深，凡巡幸處俱令扈從。小倉山房文集。

王蘭泉先生以丁丑召試中書，協辦侍讀。戊寅入直軍機處，充通鑑輯覽纂修、同文志纂修，兼校經咒館。戊子充續三通館纂修。因兩淮鹽運使提引事發，與趙君升之坐言語不密罷職。時緬甸未靖，阿公桂爲定邊左副將軍，知先生學問，請以從，詔許之。辛卯，阿公罷，溫公福代之，移師四川。溫公復請以行，遂與趙君升之、王君丹宸偕發永昌。是年賞給主事，隨四川軍營辦事，洊升至吏部郎中。丙辰，金川蕩平凱旋，五月初五日得旨：「吏部郎中王昶，久在軍營，著有勞績。著升授鴻臚寺卿，賞戴花翎，在軍機處行走。」是時科甲出身賜花翎者，惟大學士金壇于

公及先生而已。己亥，以都察院左副都御史外用河南布政使，戶部尚書梁公國治言在軍機房久，多聞舊事，請留。庚子，隨扈南巡差次，授江西按察使。丙午秋，以雲南布政使入覲，蒙詢問歷來軍機密事及前于文襄公當國狀。戊申，調江西布政使。己酉春，升刑部右侍郎。春融堂集。

乾隆癸未，余以內閣中書直軍機處時，法駕春則上陵，秋則校獵，無不蒙筆以從。而方恪敏公時爲直隸總督，首先迎駕，每行在召見畢，輒與相見。蓋公爲內閣前輩，又直軍機最久，爲余平時所景慕。其後十五年又與公之子葆巖方伯先後直軍機處，乃得讀公薇香、燕香兩集，凡若干卷。同上。

乾隆庚辰會試，未揭曉前一日，鎮洋宮保畢公與同年諸君重光、童君鳳三皆以中書直軍機。諸當西苑夜直，日未昃，諸君忽語公曰：「今夕須湘衡代直。」公問故，則曰：「余輩尚善書，儻獲雋，可望前列，須回寓偃息，并候榜發耳。湘衡書法中下，即中式，詎有一甲望耶？」湘衡者，公字也。語竟，二人者徑去不顧，公不得已爲代直。日晡，忽陝甘總督黃廷桂奏摺發下，則言新疆屯田事，公無事，熟讀之。時新疆甫開，上方欲興屯田，及殿試，發策新貢士即及之。公經學、屯田二策，條對獨詳核，遂由擬進第四人改第一，諸君次之，童君名第十一。更生齋文集。

趙君升之兩放會試，未得列館職，而書局總裁歷舉公分修平定準噶爾、回部方略，通鑑輯覽，一統志及未成之音韻述微，鑑古輯覽，熱河志諸書，且俾總校，均集日程課。公又以其間寅

人西出，優直草詔令，賦詩談讌俱不廢。或賣文以佐祿，人所不逮。去年四庫全書館局開，一時績學之士多人翰林，賜進士，其與公同獲罪者皆起，而公積軍功稍遷，遇變又不爲同行者之苟免。設公舉禮部，必不直軍機，不直軍機，人知公學之博，說之長，而不知才之足倚以決事，即一言不密，又非出有意。退而授徒著書，亦足以開益於人而傳於後。乃援薦援留，輾轉再四，至以身殉，爲可哀矣。白華文集。

趙君升之以壬午召試中書，癸未充方略館纂修官。甲申，直軍機房，大學士劉文正公、劉文定公、今大學士于公皆嗟異其才。戊子秋，侍講學士紀公及中書徐步雲洩兩淮盧運使事，君與昶牽連得罪。會兵部尚書阿公桂以定邊右副將軍總督雲南、貴州，請以余兩人掌書記，詔許之。春融堂集。

孫文靖公雖風裁山峻，而貞不絕俗，受人誣諉，必委曲爲謀。刻意憐才，雖一介之士，輒與抗禮。故事，京師士大夫在軍機者，例不見客，不答拜。獨公反其所爲，與故舊周旋，宴飲如平生歡。小倉山房文集。

王日杏字丹宸，癸酉舉人。授內閣中書，入直軍機處，歷遷戶部郎中。出守貴州大定府，緣事鑄職。復起爲刑部主事，入直如故。三十六年從西軍入川，與趙文哲同在幕府，軍潰，格賊死之，贈光祿寺少卿。金川瑣記。

樞垣記略卷之二十八

雜記二

秦樹蔣君在軍機處行走，嘗總辦方略一書。方略者，載西事始末，自車楞、烏巴什、阿睦爾撒納款關以來，至擒瓦齊，考定伊犁爲正編；其先後誅大小和卓木，回部悉平，經理西南屯田諸務爲續編。中間歷時五年，闢地二萬餘里。端緒千百，事實、人名，累譯而後具。館中用車載箱致君家，冊檔充屋，莫能竟其首尾。君早起坐書室，夕燒膏以繼，肌分孔決，終始一貫。午食列盤殮或不暇啜，寒則以火酒數杯自溫，比竟茫如也。書成久之，而君之精殆銷亡於此矣。書既上，同修者皆得優敘，而君名以卒不與，館中諸公議欲如故侍讀楊公述曾贈銜例爲之請，已而未果，此亦君之命也夫。朱笥河文集。

趙生雲松官中書舍人，入直樞要，詔命奏劄，援筆立就，無不中窾會，余深倚其攸助。然生不自以爲能，退直之暇，益沈思旁訊，以古作者自期。松泉文集。

辛巳殿試閱卷大臣劉文正公、劉文定公，皆軍機大臣也。是科會試前，有軍機處行走之御史睦朝棟上一封事，請複試迴避卷。上意其子弟中有會試者，慮已入分校，即應迴避，故預爲此

奏。乃特點朝棟爲同考官，而令於人闈時各自書應迴避之親族列單進呈，則睦別無子弟，而總裁劉文正、于文襄應迴避者甚多。時上方南巡，啓蹕時，曾密諭劉、于二公留京主會試，疑語泄而睦爲二公地也，遂下刑部治罪。部引結交近侍例，坐以大辟，於是軍機大臣及司員爲一時所指摘。且隔歲庚辰狀元畢秋帆、榜眼諸桐嶼皆軍機中書，故蜚語上聞，有「歷科鼎甲皆爲軍機所佔」之說。及會試榜發，而余又以軍機中書得雋，傳文忠爲余危之，語余不必更望大魁。而余以生平所志在此，私心終不能已。適兩劉公又作閱卷大臣，慮其以避嫌擯也，乃變易書法，作歐陽率更體。兩劉公初不知，已列之高等，及將定進呈十卷，文定公慮余卷入二甲，又或啓形跡之疑，及遍檢諸卷，意必得余卷置十名外，彼此俱可無累。及檢一卷，獨九圈，當以第一進呈，文定公細檢，疑是余。文正公覆閱，笑曰：「趙雲松字跡雖燒灰，亦可認，此必非也。」文定又謂：「遍閱二百七卷，無趙雲松書，則必變體矣。」文正又覆閱，謂雲松文素跡弛不羈，亦不能如此謹嚴。而文定終以爲疑，恐又成軍機結交之局。兆將軍惠時方奏凱歸，亦派人閱卷，自陳不習漢文，上諭以諸臣各有圈點爲記，但圈多者即佳。兆公果用數圈法，而惟余卷九圈，餘或八或五，遂以第一進呈。上是日閱十卷，幾二十刻，見拙卷係江南人，第二胡高望浙江人，且皆內閣中書，而第三卷王杰則陝西籍，因問本朝陝西曾有狀元否。皆對云未有，遂以王卷與翼互易焉。傳臚之日，一甲三人例出班跪，余獨掛數珠，上陞坐，遙見之。後以問傅文忠，文忠以軍機中書例帶數珠

對，且言昔汪由敦應奉文字，皆其所擬，上心識之。明日諭諸大臣曰：「趙翼文自佳，然江、浙多狀元，無足異。陝西則本朝尚未有，今當西師大凱之後，王杰卷已至第三，即與一狀元，亦不爲過也。」簞曝雜記。

余直軍機時，直舍即在軍機大臣直廬之西，僅屋一間半，又逼近隆宗門之牆，故窄且暗。後遷於對面北向之屋，凡五間，與滿洲司員同直，則余已改官，不復入直矣。扈從木蘭時，戎帳中無几案，率伏地起草，或以奏事黃匣作書案，而懸腕書之。夜無燈檠，惟以鐵絲燈籠作座，置燈其上，映以作字，偶縈拂輒蠟淚汗滿身。非特戎帳中爲然，木蘭外有行宮處，直房亦如此，惟多一木榻耳。余歸田後，值歲庚子上南巡，余恭迎於宿遷，見行宮之軍機房明窗淨几，華裯繡毯，當筆者倚隱囊欹而坐，頗顧盼自雄，余不覺爽然失也。同上。

傅文忠公不談時文而極愛才。余直軍機時最貧，一貂帽已三載，毛皆拳縮如蝟。一日黎明，公在隆宗門外小直房，獨呼余至，探懷中五十金授余，囑易新帽過年。時已殘臘，卒歲資正缺，五十金遂以應用。明日入直，依然舊帽也，公一笑不復言。嗚乎！此意尤可感已。同上。

陳雲根侍御名朝礎，爲德泉京兆哲嗣。孺染家學，熟諳掌故，以內閣侍讀兼軍機行走。臨事敏決，爲宰臣所倚重。吾閩八十餘年來，京宦之直樞廷者，自青圃通政而後，雲根一人而已。

釣遊叢話。

乾隆二十七年，天子巡幸江南，嚴道甫侍讀以獻賦，授內閣中書。初任後即奏充方略館纂修官，以書局在內廷，許懸數珠。中書在書局得懸數珠，自此始也。潛研堂文集。

嚴道甫在軍機時，嘗扈從木蘭，大雪中失橐駝並所裝物，求之不獲。越一日，一人牽橐駝而至，且謝罪，乃故軍機蘇拉緣事遣配者。問：「何以知爲吾物？」曰：「軍機官披羊裘者，獨公一人。今篋無他裘，非公而誰？」問既竊何以復還，曰：「恐公寒耳！」勞以錢而遣之。同上。

上嘗問傅文忠公軍機章京可用者，傅公對曰：「人才可用者多，若有守有爲可繼胡寶琮者，嚴長明一人耳。」長明內直日久，諳悉典故，尤務持平允。雲南糧儲道羅長浩虧銅廠銀萬一千兩，又分賠屬員汪大鏞銀一千兩，有旨加罰十倍，逾限即正法。羅已納十有一萬矣，仍有分賠銀六萬未完，而限垂滿，呈乞展限，詔下軍機大臣與刑部查辦。時劉文正公掌刑部，方主會試入闈，諸公相視莫能決。適有行在宣諭軍機大臣事，長明即詣貢院撾鼓求見，因從容曰：「羅觀察之限已迫，俟公出闈已無及矣。其所欠者分賠屬員之項，昨見吏部檔，汪大鏞赴補直隸，屬員既邀寬釋，且得官，而上司乃坐極刑，可乎？」即於袖中出請寬限稿，求畫押，劉公義而許之。長明出示諸公列銜會奏，果奉俞旨令汪大鏞分繳欠項，而羅得出獄。同上。

嚴道甫在軍機凡七年，通古今，多智，又工于奏牘，諸城劉文正公最奇其才。大金川之爲逆也，大學士溫敏往督師，欲君從行，君固辭退。有咎君奈何違宰相意者，君曰：「是將敗沒，吾若

何從之？人頗甚君言。既而溫公卒，致軍潰以死，隨往者皆盡。惜抱軒集。

嚴東有直軍機，鳴鞭珥筆，時扈屬車。然荷衣蕙帶，輒志江湖，晉侍讀後，即以病歸。湖海

詩話。

馮君星實之直軍機也，機禁重臣倚君爲重，有大獄必委君。方臨清王倫之亂，其黨有梵和尚者，既就訊，刑部將悉逮寺僧，梵又妄稱倫黨數千，具有書冊，將並治之。君以連染衆持不可，事遂寢，其誣枉者皆得釋。蓋君於事務持大體如此。小峴山人文集。

三十年南巡，周君青原召試一等，賜舉人，授中書，旋入軍機處辦事。一夕內直，上偶問，得君名，歎曰：「此吾南巡時所得江南才子也。」時大臣無不欽重君者。君兩會試未第，條註吏議，年纔逾三十耳。當君之得過，以人有來探事者，君對不知，後其人得罪，引君及同直軍機者，實皆未泄密也。吏有與軍機官相惡者，即以不嚴斥探者傅重比鑄級。其後與君同罪者復進用至卿貳，而君獨遠跡都門，身一見枉，終放廢以至於老，天下惜之。惜抱軒集。

章公二梧於乾隆三十四年，經傅文忠公選入軍機處行走。公固書生，而軍機司員常棗筆處從，每遇六飛巡幸，公據鞍馳驟，如所素習，委任叢雜，未嘗遺忘。嘗充方略館纂修兼提調，各館纂修專任一書，獨方略館以樞臣總領，於事無所不當問，館書無不彙集。而提調專司出入，稽考勤惰，公尤平允，冠其先後。切問齋集。

阮吾山侍郎博聞強識，嘗直機廷，故於朝章國典尤所熟洽。著茶餘客話十六卷，戴藤塘太常刻其半，人多以未見全帙爲憾也。梧門詩話。

孫君永清以乾隆己丑會試取授內閣中書舍人。旋入直軍機房，撰擬悉當，大學士劉文正公、于文襄公倚若左右手。三十八年，遷內閣侍讀。鑾輅時巡，恆在扈從，常以要事騎而馳，上遙識之，曰：「此軍機處孫某也。馳驟若是，孰謂南人止能坐船耶？」四十四年，擢御史，明年遂晉右副都御史，八月，授貴州布政使。不次之擢，蓋異數也。方予自四川歸，以鴻臚寺卿與君同直軍機。又四年，予由副都御史按察江西，君實補其缺，故予二人相得爲最深云。春融堂集。

陸君耳山以壬午召試中書，充方略館纂修官。時方奉勅修通鑑綱目輯覽，君編撰以進，當上意，遂直軍機處。同上。

上海陸君錫熊爲文不假思索。在軍機時，適用兵金川，夜半嘗傳旨七道，援筆立成擬進，無一字易。孝聖憲皇后賓天，凡大祭殷奠上尊諡，典禮嚴重，應奉文字無敢屬筆者，于文襄特舉以屬之。松江府志。

公以丁亥三月選入軍機處，襍被直宿，經旬不歸。每遇國家行慶大典禮，制詔所宜，皆出公手。嘗蒙恩賜硃批上諭全部，以微臣而沾重賚，蓋異數也。以陸宗人府主事引見，上命前跪，劉文正公曰：「此人學問甚優。」會四庫館開，以薦司總纂校錄而兼內直，日無暇晷。癸巳八月，得旨

改翰林院侍讀，即援例辭軍機。諸同事皆欲攀留，劉文正公曰：「翰林職在文章，陸君雖去此，其倚藉正不少也。」陸錫熊副憲行述。

毛羅照官舍人時，喜爲人作畫，畫尾綴以小詩，頗具風格。後直軍機處，簪筆趨公，不受促迫矣。梧門詩話。

謹按：今圓明園軍機堂之西軒壁，粘山水畫幅巨紙，即羅照舍人筆也。

張君劬軒之成進士也，其文稍異於時，磨勘幾被黜。金壇于文襄公獨才君，薦爲明紀綱目纂修官。書成，授中書，在軍機處行走。小峴山人文集。

楊荔裳於乾隆四十五年召試金陵行在，賜舉人，授內閣中書，閱數年入直軍機處。會廓爾喀酋長侵犯西藏，福嘉勇公爲大將軍，奏以荔裳從行。廓爾喀距碣門萬八千里，荔裳以書生從事。自星宿海而外，所歷懸厓絕壑，險阻非人境，層冰山積，人馬驚墜，而荔裳枕戈浙劍，著紙若飛，即成事，撰文紀功，勒石而還。賜花翎，除侍讀，再擢而至甘肅布政使。同上。

相傳洪素人在軍機時，某相國問曰：「汝向人說我剛復自用，有之乎？」曰：「然。」相國怒曰：「汝是我門生，乃謗我乎？」謝曰：「老師只有一『復』字，何曾有『剛』字？門生因師生之誼，故妄加一『剛』字耳。」梧門詩話。

陸伯焜少以詞賦稱。及入軍機，留意朝章典故，金壇于文襄倚重之。松江府志。

婺源王景南通副居官，恪敬吏事。在中書，嘗直軍機處，在刑部，嘗總辦秋審處，皆躬任勞苦，不急求人知，所建議皆當理。惜抱軒集。

程維岳，字愛廬，由中書歷御史。行走軍機十餘年，爲阿文成公所倚重。充萬壽盛典館提調，兼方略館總纂。盛京通志、遼入金、元史、南巡盛典、薩拉爾、臺灣、巴勒布等紀略，皆與編纂事。松江府志。

愛廬少承香樹先生指授，以詩文負異儕偶，珥筆機廷，奏進文字，多其撰擬。梧門詩話。

胡君時顯以軍功得官，雖歷九卿侍從，未嘗一日得立於朝。方其以主事入直軍機也，純皇帝悉君才，行大用矣，忽以言語忤要人，即日斥出。要人所以挖君者不遺餘力，而君之所以抗要人者亦幾不留餘地焉。卒至不安於位，東西走軍營，而其以公事抗貝子、抗經略者，復如故，亦可謂百折不變者矣。更生齋文集。

昆明錢南園先生爲御史時，參奏山左撫臣國泰驕縱無度，病國殃民。高廟命偕大臣往訊，得實，遂以敢言擢通政司參議，洊升至通政使司副使，督學湖南。會湖南童生有匿喪應考者，又有首告違礙書籍者，爲巡撫浦霖所劾，部議甚嚴，上宥之，以主事用。旋補員外郎，數日復授湖廣道御史。時大學士和坤方用事，在軍機不與諸大臣同處辦事，當時無敢言者。先生獨具奏摺數百言，請敕軍機大臣進止仍循舊章。上覽奏，切責諸大臣，謂所奏甚是，即命在軍機處行走。和坤甚怒，故以艱巨試之，皆迎刃而解，益爲和坤所忌。是年九月以疾卒，論者惜之。余在史館

撰和坤傳，欲將此疏序入，編緝紅本不得，移牒於內閣，軍機處索之，仍不得，蓋和坤用事時早滅其跡矣。茲於陳孝廉履和處得之，因亟采入焉。滇南采風錄

錢君南園始以御史奏山東巡撫國泰穢亂，高廟命和坤偕君往治之。君在道衣敝，和坤持衣請君易，君卒辭。和坤知君不可私干，故治獄無敢傾陂，得伸國法。其後君擢至通政使司副使，督學湖南，時和坤已大貴，媒孽其短不得，乃以湖北鹽政有失，鑄君級。君旋遭艱歸，服終補部曹。高廟知君直，更擢爲御史，使直軍機處。君復奏和坤及軍機大臣常不在直之咎，有詔飭責，謂君言當。和坤益謙，君而高廟知君賢不可譖，則凡軍機勞苦事多以委君。君家貧，衣裳薄，常夜入暮出，積勞成疾以殞。方天子仁明，綱紀猶在，大臣雖有所怨惡，不能逐去，第勞辱之而已。而君遭其困，顧不獲遷延數寒暑，留其身以待公論大明之日，俾國得盡其才用，士得盡瞻君子之有爲也，悲夫！惜抱軒集。

余同年友陽湖蔣君熊昌，字澄川。以才儁仕爲戶部郎，直軍機處。出守潁州府凡八年，有政績。以事被議歸里，即不復出。同上。

青城山人於四十二年正月入軍機處行走，七月充平定兩金川方略館纂修官，除日賜御書「福」字及麋鹿、風羊、野雉、冰魚諸物。四十三年五月，閣臣以公勤慎奏聞，奉旨：「關槐賞令補實缺，不必挨次，以示鼓勵。」因補內閣撰文中書。七月扈從興京，塗次撰擬祭北海神文，畫雲

壑松崖畫卷進呈，蒙加獎賜內務府五色文錦一疋。內廷染翰供職自此始。次黃旗堡，又命畫北鎮醫無閭山等圖，嗣後懋勤殿交辦書畫之件無間。抵盛京，與吳公熊光同奉旨恭查歷朝法物及征明時弓矢甲冑之屬。旋充大清一統志纂修、盛京通志纂修。四十四年秋隨扈木蘭，入崖口遇雨，山水陡發。供帳不至，經危嶺峻谷，下臨寨河，公單騎夜行，有獸竄林麓出，馬驚逸，遂溺於河，賴一蒙古卒吏入水援之。四十五年南巡，駐蹕江南靈巖山，命寫竹爐山房圖。時山人以就禮部試留京，旨下，左右以未經扈從對，因寄寫焉。太常卿劉公謹之有紀事一絕，云：「窈窕靈巖展畫圖，青旗翠輦麗仙都。侍臣合有丹青筆，好向山房寫竹爐。」及榜發中式，額駙福公隆安又爲奏聞。青城山人集。

霜林秋色圖，縱七尺，橫二尺二寸。設色畫層巒疊翠，萬樹丹黃。御製詩注云：「關槐任中書時，在軍機處司員行走。曾扈蹕木蘭，目所親見，故能繪其景。」凡題款九十七字，詩載御製詩五集。同上。

乾隆丙午，公以戶部山東司主事隨章佳文成公讞浙、閩獄，文成公留意人才，虛中好士，遂陰識公。及還京，適機廷乏人，特舉人直，公力辭不獲。而後應機廷會同刑部讞獄，輒以相委，歲無虛月。癸丑擢浙江道監察御史。向例，軍機司員入蘭臺不供御史本職，公請都察院事仍聽輪派焉。雅好制藝文字，通籍後猶時時爲之。曝直圓明園四日始得休沐，就正之文積案頭，

雖應酬雜選，筆札紛煩，必先改定，畢然後他及。或以爲何太自苦，則曰：「此吾數日來片刻樂境，何云苦耶！」管世銘侍御行述。

乾隆末年，阿文成公與和珅不相能，凡朝夕同直軍機，必離立十數步外。和珅亦知公意，故就公語，公亦泛答之，然未嘗移立一步。公嘗臥直廬，軍機章京管世銘入省之，公素所厚也，忽呼語曰：「我年八十，可死；位將相，恩遇無比，可死；子孫皆已佐部務，無所不足，可死。所忍死以待者，實欲俟犬馬之意得一上達，死乃不恨。」然竟不果。更生齋文集。

韞山以經師爲詩人，晚直機廷。公卿謝表多倩爲之，典贍明達，一時無兩。梧門詩話。

汪容甫云：賓谷轉運早列詞館，游更華省，入直樞地。出掌外臺，精力絕人，五官並用。晝理簡牘，夕誦文史，部分如流，觴詠多暇，綽乎神仙中人也。朋舊詩錄。

裘可亭公弱冠受仕，入直內廷。舊聞前典，博覽強識。詞頭宣底，手筆允副，躬膺知遇，鉅艱重仔，敷歷中外，終始如一。裘行簡靜宜室詩集序。

嘉慶十有六年，方葆巖尚書自總督浙閩告歸，奉母吳太夫人養，病於江南之里第。夏四月，有詔召入爲軍機大臣，於是奏以「臣之母不能頃刻離臣，臣又不能奉老年病軀之母疲曳就道」，懇辭新命。上聞，憫而俞可，乃輟召，而加賜珍物，以助其孝養之忱焉。惜抱軒集。

方勤襄公始生時，恪敏公正總制畿輔。彌月之辰，恪敏適扈從行在，面陳後復攜抱入覲，賞

賈駢蕃。及勤襄既長，賜官中書。所聘雲南裴撫軍女，尚未娶，會引見，蒙垂詢，命金壇于相國傳示裴中丞，甫畢姻焉。旋以歸寧滇南，又有旨下直隸制軍沿途促返，殊恩寵眷，亙古所稀。勤襄於庚子會闈中式，榜發適病。明年辛丑殿試成進士，改吏部，充軍機章京，遷轉臺諫，浚陟副憲，特差巡按長蘆鹽政，迥非常例。後歷撫陝西，晉督閩浙，以太夫人年逾八旬，陳情養親回籍。未幾召爲軍機大臣，溫綸婉摯，至渥極隆。勤襄復以母病懇辭，母終，遂以哀毀卒於家。桐城科名錄。

謹按：方勤襄行狀云：「年十八入京，賜舉人、內閣中書、軍機處行走，又五年成進士。」是勤襄先以內閣中書入直，而此敘於成進士之後充章京，殊未核也。

自雍正間以軍機處領政事，常置重臣，其下以內閣中書舍人人中給事，由舍人人者，後雖累遷，或至二品不出。於今六七十年，頗參擇他曹矣。要惟舍人爲本，初於京朝官最名華要，非通敏乘時才略之士，無由以入。其人而自軍機來者，處士大夫間，往往衣冠笑語望而可識，惟余與秦君小峴交八九年，彌久而未始覺其身之在樞要也。澗雅堂文集。

小峴工古文辭，曾直樞庭，喜考核中朝掌故，有所得，輒筆之於書。政暇，丹鉛著錄，手不停披，蓋學者也。梧門詩話。

沈舫西名琨，字兼山。由京畿道御史出守泰安，閱三年引疾歸。其爲中書舍人，與余同直

軍機。以京察上考，例選佛山同知，心弗願也，會奉諱歸。服闋，仍供職內廷，洊擢御史，復與余同官。余南還而君任外郡，不得見者數年。君歸後往來吳越間，則吾兩人皆已老矣。馮培撰傳。

公初直軍機處，以京察授廣東同知，旋以憂歸。服闋入都，阿文成公、王文端公交章保留，仍直軍機。先後簪筆樞垣幾二十年，每歲灤河、淀津、盤山、盛京、五臺時巡諸大典，咸得扈從，凡有視草，數千言倚馬立就。公餘不廢吟詠，唱酬之外，每恭逢恩賚及身，歷名勝諸區，必以詩紀其盛焉。沈太守行述。

余直南齋時，秦小峴、錢裴山二君每五鼓在禁中，即橐筆相見，其時小峴、裴山皆直軍機處也。及余視學來浙，適小峴觀察杭嘉湖，裴山亦在杭州，嘗以雨後招遊西湖，余有句云：「共舒中禁燈前目，求看西湖雨後山。」定香亭筆談。

童蓴君文筆華贍，肄業成均時，余即以璫璵之器目之。特行文矜重，廷試交卷過遲，違例，未與鼎甲，世論惜之。旋選人機廷，亦足展其所學矣。梧門詩語。